

國學基  
本叢書  
明詩紀事  
九

書叢本基學國

事 紀 詩 明

(九)

輯 田 陳

行發館書印務商

# 明詩紀事卷六上

## 辛籤

### 史可法一首

可法字憲之，大興人。原籍祥符。崇禎戊辰進士。除西安推官。徵授戶部主事。歷員外郎中。遷分守池州。太平參議。進分巡安慶池州副使。監江北諸軍。擢右僉都御史。巡撫安慶廬州太平池州。及河南湖廣江西諸州縣提督軍務。以憂歸。起戶部侍郎。總督漕運。巡撫鳳陽淮安揚州。拜南兵部尚書。參贊機務。福王立。拜禮部尚書。兼東閣大學士。改兵部。進武英殿大學士。督師淮揚。累加少保。兼太子太保。少傅。兼太子太傅。少師。兼太子太師。進太傅。大兵下揚州。自刎不殊。被執死之。唐王立。贈太師諡忠靖。乾隆中。賜諡忠正。有集四卷。

池北偶談。康熙二十年。吳江吳漢槎兆騫自甯古塔歸京師。駐防將軍安某者。老將也。語之曰。子歸。可語史館諸君。昔王師下江南。破揚州時。吾在行間。親見人自呼云。我史閣部也。親王引與坐。勸之降。以洪承疇爲比。史但搖首云。我此時只辦一死。但城中百萬生靈。幸毋戮及。王百方勸諭。終不從。乃就死。此吾所目擊者。史書不可屈卻此人。

望溪集。左忠毅公視學京畿。一日。風雪嚴寒。從數騎。微行入古寺。廡下一生伏案。文方成草。公閱畢。卽解貂覆生。叩之。寺僧則

史公可法也。及試吏呼名至史公。公罷然注視。呈卷卽面署第一。及左公下廠獄。逆奄防伺甚嚴。雖家僕不得近。史公聞左公被炮烙。旦夕且死。持五十金。謀於禁卒。卒使史更敝衣草屨。背篋。手長纒。爲除不潔者。引入。微指左公處。則席地倚牆而坐。面額焦爛不可辨。膝以下筋骨盡脫。史前跪抱公膝而嗚咽。公辨其聲。而目不可開。乃奮臂以指。撥眵。目光如炬。怒曰。庸奴。此何地也。國家事糜爛至此。老夫已矣。汝復輕身而昧大義。天下事誰支拄者。不速去。無俟奸人構陷。吾今撲殺汝。因摸地上刑械作投擊勢。史噤不發聲。趨而出。崇禎末。流賊張獻忠出沒蕪黃潛桐間。史公以鳳廬道奉檄守禦。每有警。輒數月不就寢。使將士更休。而自坐幄幕外。擇健卒十人。令二人蹲踞而背倚之。漏鼓移。則番代。每寒夜。起立振衣裳。甲上冰霜迸落。鏗然有聲。或勸少休。公曰。吾上恐負朝廷。下恐愧左公也。

田按。乾隆四十二年。侍郎彭元瑞以所得史公畫像及其札。編合卷進呈。高宗御製詩一章。題於卷端。命廷臣和韻。並命大學士于敏中書御製明臣史可法書復睿親王事一篇。及史公原書於卷裝。漢陵貯。棄於揚州梅花嶺。史公祠中。嗚呼。勝國忠臣。得錫諡於異代。且親灑宸翰於遺像。教忠之意深矣。

### 六安署病中感懷

待理猶繁苦抱疴。公餘側枕奈如何。民饑由己嗟艱食。兵悍逢人欲弄戈。撫字無能先布德。催科甯忍復爲苛。白雲交瘁燕山下。國手誰憐妙劑多。

### 左懋第一首

懋弟字仲及。萊陽人。崇禎辛未進士。除韓城知縣。擢戶科給事中。改刑科。福王立。進兵科都給事中。擢右僉都御史。巡撫應天徽州諸府。拜兵部侍郎。經理河北。充通問使。不屈死。乾隆中。賜諡忠。



貞有梅花詩草

啓禎兩朝遺詩公詩文道勁可觀。

三岡讒略左公懋第奉使議和。不屈死。臨刑絕命詞曰。漠漠黃沙少雁過。片雲南下意如何。丹衷碧血消難盡。蕩作寒煙總不磨。被難時。忽風沙四起。捲市柵於雲際。一時爲之罷市。

靜志居詩話。左公將北行。貽書姜給事探。大略謂國遭大故。二東不聞有斷頭穴胸以報故君者。彼鄒魯仁義之稱安在。懋第北行是懋第死日也。既入燕。卒以閏月十九日死於市。

客燕

鼎髯攀無及。親闈并莫依。豈堪哀子淚。時落客臣衣。陵樹夢猶見。家山魂亦稀。人間忠孝事。意與鶴同歸。

袁繼咸一首

繼咸字季通。宜春人。天啓乙丑進士。除行人。擢御史。謫南行人司副。遷禮部主事。歷員外。出爲山西僉事。歷湖廣參議。移淮陽。參楊嗣昌軍事。擢右僉都御史。巡撫鄖陽。襄陽陷。被逮。戍貴州。起故官。總理河北屯政。未赴。擢兵部侍郎。總督江西湖廣。應天安慶軍務。左夢庚降。大清被執。北去。不屈死之。乾隆中。賜諡忠毅。有六柳堂遺集。

靜志居詩話。侍郎處危疑之際。內抑權奸。外調重鎮。備極苦心。晚受命於燕京。堪與左仲及比烈。若江州之焚。倉猝不能戢將士。當非其本心。近見野紀。有誣公歸命本朝者。殆出怨家之口也。軍中自銘曰。死事也。易成事也。難爲嬰弗克。爲白維艱。張死。

匪先許死匪後臣心匪他。靖獻我后嗚呼。父母有過則諫。諫而不從則號泣。旻天。憐之不怨。晉陽之甲。豈可訓哉。既被獲。抵大勝關。親王傳語。袁總督著隨行。與以大官做。又自銘曰。大官好做大節難移。成仁取義。前訓是師。文山。袁山。仰止庶幾。袁山。侍郎自號也。

雪日

雪片大如掌。忍飢不可齧。愧無子卿氈。敢墮漢臣節。鑽牖瞰扶桑。晨曦未全滅。花發嶺南枝。羅浮夢空結。

郝彪佳二首

彪佳字幼文。紹興山陰人。天啓壬戌進士。除興化推官。以憂歸。起御史。福王立。進大理丞。以右僉都御史巡撫應天。移疾去。南都失守。自投池中死。唐王贈少保兵部尚書。諡忠敏。乾隆中。賜諡忠惠。有集十卷。

靜志居詩話。祁公美風采。夫人商亦有令儀。閨門唱隨。鄉黨有金童玉女之目。其司理甯陽也。慮閩人語近侏離。預遣人前往。買二僮婢。詢其鄉音。及升廳事。胥吏多操土語侮公。公佯不知。浹旬後。按籍遍召在官人。至一一聲其罪。衆驚以爲神。迨入爲臺諫。卽進封事。略云。凡文武內外大小諸臣。必使之安其位。而後各盡其心。邇來六卿九列之長。詰責時聞。引罪日見。因而周章急遽。救過不遑。竊恐當事諸臣。悚於嚴旨。冀以迎合揣摩。善保名位。臣所慮於大臣者此也。人材中下。參半。藉上感發其忠義。鼓舞以功名。今司道有司。或欽案之累由人。或錢穀之輸未足。降級住俸。什居二三。必至苟且支吾。急功赴名之心。不勝其掩罪匿瑕之念。臣所慮於羣臣者此也。陛下聞鼓鞀而思將帥之臣。儻得真英雄。卽推轂設壇。夫豈爲過。一或獎拔之術未盡。則冒濫之寶將萌。臣所慮於武臣者此也。陛下深懲情竄。特遣內臣。撫按之事。多令監視。正恐同罪同功。反使互蒙互蔽。開水

火之端其患顯啓交結之漸其患深臣所慮於內臣者此也其言切中思陵時弊故其後亡國卒由此數端云公嘗治別業於寓山極林壑之勝乙酉閏月六日坐園中題其案曰圖功爲其難潔身爲其易吾爲其易者聊存潔身志含笑入九泉浩然留天地又書曰已治棺寄蕺山戒珠寺可取以斂我是夜兄子鴻孫侍側夜分不寐公第曰君子之愛人也以德速鴻孫倦隱凡步至放生碣下投水昧旦猶整巾帶立水中子理孫班孫葬之園旁捨池館爲寺塑公像於堂至今存焉

### 寓中清明雜興二首

風雨清明又一春。桃花零亂野溪濱。窗前惟有青山在。歲歲相看作故人。  
榆柳年前手自栽。而今綠影覆亭臺。虛堂淨敞荷池畔。爲待銜泥燕子來。

### 黃端伯三首

端伯字元公。建昌新城人。崇禎戊辰進士。除甯波推官。改杭州。丁艱歸。削髮爲僧。福王時起禮部主事。大清兵下南京。死之。唐王時贈太常寺卿。諡忠節。乾隆中賜諡烈愍。有瑤光閣。東海還鄉三集。

四庫總目。端伯生平好佛。嘗鑄私印曰海岸道人。取楞嚴經引諸沈冥出於苦海之語。及晚年磨去印文。改鑄忠孝廉節四字。終以殉國流芳。可謂不負其志。

自端錄。端伯爲杭州推官。丁艱歸。削髮爲僧。或以上聞。奉旨勸問。乙酉起禮部。安坐私寓。不報名。或勸削髮爲僧。歸江西。答曰。臨難苟免。聖人之言也。可藉口釋氏。偷息人間耶。大書其門曰。大明忠臣黃端伯之寓。居停懼禍。及乃聞於官。被執。角巾野服入見。南面屹立。命之跪。不屈。竟跌坐於地。與之言。皆對以媢語。及拔刃相向。卽伸頸云。頭在此。五月二十六日。下於江甯獄。

端坐如平時。多方說降。微笑不應。至九月十三日。命殺之。點頭而出。復令降臣勸其從順。終不從。遂令行刑。適履脫。大言曰。頭可斷。履不可失。卽納之。至南門外水草庵前。曰。此吾死所也。向天叩頭。呼高皇帝。烈皇帝。將刑。適報恩寺僧一輪趨過。呼之代書。絕命詞云。靚面絕商量。獨露金剛王。問我安身處。刀山是道場。

靜志居詩話。元公近體瀏亮。雖注意逃禪。都無蔬筍之氣。絕命辭云。欲識分身處。刀山是道場。靈運可以作佛矣。  
田按。元公深於佛理。故於死生了然。小詩別有清趣。

饒州道中

驅馬月當路。出門風滿天。野林侵露早。山縣得寒先。客興悲今日。朋遊憶去年。故鄉何處是。回首意茫然。

絕句爲黃定之解嘲二首

二月桃源踏落花。桃花千樹爛於霞。人家各站桃花裏。一逕桃花是一家。  
新豐酒市轉林隈。野樹成行小逕開。旁舍日斜初曬網。綠楊洲上打魚回。

雁蕩山行

大小芙蓉映水村。青山爲郭石爲門。幽居不記人間世。祇向花源長子孫。

王若之三首

若之字湘客。益都人。以廕除南都前衛都事。改戶部員外。歷郎中。出爲河南參議。告歸。起南戶部郎中。遷僉事。以事削籍。提問。尋復官。大兵下南京。殉難。乾隆中。賜諡節愍。有湘客集。

居易錄。湘客孤情絕。照清談如晉人。服官留都。放情山水。三忤奄寺。罷官。乙酉。避兵姑熟。干戈崎嶇。獨載三代古鼎彝法書名畫。兼輻連軸。寢食與俱。其答人書云。正惟草莽之中。當堅守一之節。遂死於難。所與游者。皆一代偉人。詩清真。無啓禎氣習。最工尺牘。單詞片語。逼似晉宋間人。

### 山望

我愛南山好。孤高海岱中。曠源荒白日。大陸敵秋風。封禪書何有。神仙藥不逢。古今無限量。搔首向長空。

### 季夏北上濟山遇雨偶題

片時眼界激清。鼻觀與之俱省。脫巾解帶匡床。消受荷花百頃。

### 山居漫興

紅紫園林春事多。主人樽酒恣婆娑。好懷饒與芳時競。一日花開一醉歌。

### 徐汧一首

汧字九一。長洲人。崇禎戊辰進士。改庶吉士。授檢討。歷贊善。諭德。庶子。福王立。召爲少詹事。移疾歸。南都失守。投水死。唐王時。贈禮部尙書。諡文靖。乾隆中。賜諡忠節。

自靖錄。甲申。京都陷。汧號痛不已。南中福王立。咸謂中興可望。汧獨蹙然曰。相無王導。謝安。將非祖逖。陶侃。區區新造之江左。分門別戶。燕雀處堂。其能久安乎。吾惟有一死以報十七年憂勞。故主耳。每指園中池曰。此止水也。聞南京不守。將引決於莊。舍爲莊僕所覺。不得死。從山中夜泛小舟至虎邱。月下沽酒獨飲。飲罷。蕭衣冠北向稽首。從容赴虎邱後谿新塘橋下自沈死。

一老僕躍入隨殉。

同呂非齋譚埽菴酌山塘

蕭簡聊從意所申。招尋彌愛得其倫。深杯帆席淹留夜。過眼雲山曉晚春。人影連隄花作市。磬聲交寺月爲鄰。淡娛今夕宜同醉。寂歷知懷感慨均。

楊廷麟二首

廷麟字伯祥。清江人。崇禎辛未進士。選庶吉士。授編修。改兵部主事。軍前贊畫。貶秩。尋復官。福王立。用薦授左庶子。不就。唐王時。拜吏部侍郎。進兵部尙書。兼東閣大學士。守贛州。城陷投水死。桂王贈新淦伯。諡文正。乾隆中。賜諡忠節。有兼山集。

梅村詩話。伯祥別字機部。爲文排盪峭刻。在韓蘇間。書法出入兩晉。做索靖體。詩則好用奇思棘句。不甚合律。然秀異犛拔。往往出人。機部借臥子同出吾師。姜新建之門。以文章氣節相砥礪。既遇黃石齋先生於京邸。一見道合。負直節。好強諫。上書論閣部楊嗣昌失事罪。得旨。兵部贊畫。參督師盧象昇軍事。余贈之詩曰。諸將自承中尉令。孤臣誰給羽林兵。蓋紀實也。盧與閣部議軍事不合。遇機部相得甚已。而中外異心。兵勢日蹙。盧自謂必死。願參軍書生徒共死無益。乃以計激之去。機部不知也。機部至孫侍郎傳庭軍前六日。而盧公於賈莊徇難。乃求得其尸。抱之痛哭。盧公之死。有馬士抱之。傷不深。機部詩云。死君旁者一掌牧。通首俱妙。惜佚落不全。又憶其渾河詩云。春至軍中草木寬。亦奇句。機部自盧公死後。其策益不用。無聊生。會詔詰督師死狀。賈莊前數日。督師警必戰。願孤軍無援。聞太監高起潛兵在近。則大喜。於眞定野廟中。倚土鏃作書約之合軍。高竟拔營夜遁。督師用無援故敗。機部受詔直以實對。慈溪馮鄆仙得其書。謂余曰。此疏入。機部死矣。爲定數語。機部聞之。則大恨。

先是嗣昌遣部役張姓者偵賈莊。而其人白盧公死狀。流涕動色。嗣昌榜笞之。楚毒備至。口無改辭。呼曰。死則死耳。盧老爺忠臣。吾儕小人。敢欺天乎。遂以拷死。於是機部遺書馮與予曰。高監一段。竟爲刪卻。後世謂廷麟不及一部役耶。然機部竟以此得免。余詩又曰。憂深平勃軍南北。疏訟甘陳誼死生。亦實事也。已而機部過宜興。訪盧公子孫。再放舟婁東。與天如師及余會。飲十日。嘉定程孟陽爲畫髻參軍圖。錢東澗作短歌。余作臨江參軍一章。凡六十韻。余與機部相知最深。於其參軍。周旋最久。故於詩最真。論其事最當。卽謂之詩史。可勿愧。機部後守贛州。從城上投濼死。集竟散佚不傳。

西江詩話。伯祥與倪鴻寶。黃石齋並以文章名天下。稱爲三翰林。懷宗嘗大書唐人句。當軒半落天河水。遶徑全低明月枝。四字賜焉。國變。枯槁行吟。形神俱瘁。每與故人尺一。自署兼山。蓋以兼文。謝二公自況也。

靜志居詩話。伯祥慨慷淋漓。特取材未純。故辭多鬱轉。

自靖錄。甲申聞變。公痛哭。與劉同升大集紳士於澹臺祠。爲烈帝發喪。舉義旗。誓滅賊。復疆土。雪列聖仇恥。結連贛撫李永茂。立忠誠社於贛。招致四方義勇。於是王其宏。其隆。劉明保。彭日趣。各率家丁軍糧入社。立功者幾二萬人。大享士於城西。率兵收萬安。抵泰和。復吉安。奉表迎唐王。王拜公兵部尙書。兼東閣大學士。開府南贛。公念國破君亡。偷安海甸。非計。刻意圖復中原。未幾而劉同升以積勞卒於軍。永茂亦以憂歸。彭期生與公同保孤城。公將入閩。會萬元吉以總制七省至。遂留辦軍事。先是公招降峒寇。得四萬人。賜名龍武新軍。所謂四營者也。張安者。四營之一。統兵復撫州。丙戌五月。戰於梅林。而敗。兵旋散。八月。大兵攻贛州。十月四日。黎明。城陷。殉節。

### 寄李尙書

朝聞驛使向江樓。虎韞魚文耀列侯。戎服畫銷南浦雨。漢家雲護北陵秋。空同山下看雙節。天柱灘頭領八州。今日傳呼新僕射。臨淮依舊擁貂裘。



丙戌元日

黃華嶺外瑞雲齊。白露洲前戰馬嘶。五道將軍臨直北。三江父老望征西。春風斗帳降銅馬。細雨戈船鬪水犀。此日建康應拜舞。近臣不解賦鳧鷖。

梅村詩話。楊機部殉節後云。已無子。有妻小范。孝廉來吳門。攜機部在贛州詩十餘首。并言其子尚在。余後訪機部子。知在甯都山中。甯都被掠。機部之子亦在掠中。有彭士望者。機部門人。以三百金贖得。並求得其母子置一處。可謂不負機部也。機部詩學素拘折。此寄李尙書丙戌元日詩。高渾深麗。軍中從容慷慨。戎服賦詩。具見整暇。七年不見。其學問之進益如此。

萬元吉二首

元吉字吉人。南昌人。天啓乙丑進士。除潮州推官。改歸德。謫永州檢校。遷大理評事。軍前監紀。以憂歸。起南兵部主事。進郎中。福王立。擢太僕少卿。唐王時。擢兵部侍郎。總督江西湖廣諸軍。加兵部尙書。贛州破。投水死。桂王贈太師。上柱國。建極殿大學士。兼吏部尙書。追封進賢伯。諡文烈。乾隆中。賜諡忠節。

田按。萬公監楊嗣昌軍。寇自楚入蜀。請出奇聚而殲之。嗣昌猶豫不決。寇遂逸出。迄無成功。此事史傳不載。公與機部守贛城。幾及半載。其智計有過人者。卒以食盡援絕。抗義不屈。哀哉。

送無我上人還廬山

萬里秋聲急。清楓古渡平。潯陽潮自落。楚岸月孤明。破衲饑寒去。芒鞋雨雪行。廬峯遙在望。慧遠定相迎。

謁草廬祠

白水餘真氣。高人此結廬。不因求聞達。祇自守清虛。一鼎英雄沸。數椽天地舒。綸巾風骨古。瞻對幾停車。

劉同升三首

同升字孝則。吉水人。祭酒應秋子。崇禎丁丑第一人。及第授修撰。以劾楊嗣昌謫福建按察司知事。福王立。起故官。不赴。唐王時。擢祭酒。進詹事。兼兵部侍郎。守贛州。病卒。有錦鱗集。

自靖錄。孝則崇禎丁丑狀元及第。當順天府尹用傘蓋儀。從送歸時。馬上賦詩云。千行馬上思親淚。一寸階前報主心。人已知其立志忠孝矣。明年戊寅。偕同榜探花趙士春合疏救少詹黃道周。論新輔楊嗣昌奪情。孝則謫福建按察司知事。士春亦謫福建布政司檢校。吾朝狀元以直諫被謫者。羅倫論李賢奪情。張昇劾劉吉。舒芬諫武宗南巡。三人皆江西產。而孝則復以江西人諫。可謂先後一轍。不負大魁矣。乙酉。問道歸。同楊廷麟。郭維經等守吉安。駐兵贛州。力疾勤事。城垂陷。卒於贛州分巡道署中。

夜宿雪山寺

鄰園已復佳。鄰寺益喜僻。不知何處鐘。冷然共晨夕。杖策行郊坰。峰巒青可惜。伊余厭風塵。懶性宜泉石。況此舊遊地。昔年無賸客。夜坐一燈幽。明朝望三益。

遊南岡寺

芳樹籠幽徑。高峯入寺青。人煙迷野店。鳥語出危亭。破寂留僧話。忘機誦佛經。秋蛩若爲怨。砌冷不堪聽。

過豐城

細雨風檣作意斜。岸移百丈過江沙。水邊一樹垂垂白。春晚棠梨尙著花。

彭期生一首

期生字觀我。海鹽人。萬曆丙辰進士。除徽州教授。累遷南昌知府。改濟南。謫布政司照磨。遷應天推官。改南兵部主事。歷郎中。出爲江西僉事。唐王立。進參議。擢光祿少卿。進太僕卿。兼江西布政使。守贛州。城陷。自縊死。乾隆中。賜諡節愍。有弱水山人詩集。

自靖錄。南贛總督萬元吉以贛爲江廣要地。非期生不勝任。乃檄赴贛州。期生題其門楣曰。國家養士三百年。報稱正在今日。祖宗承恩十二世。忠孝豈讓他人。以其家乃世襲海甯衛指揮同知也。丙戌三月。吉安破。四月八日。期生遂預書遺囑。一式五紙。留篋中。云。我爲湖西道。廬陵是文文山發祥生長之地。及陞光祿少卿。兼分守嶺北道。參議。則贛州是文文山起兵倡義之地。每覽文山全集。夜坐悲吟。擊節自壯。當不使負慚色於古人也。吉安城陷。我軍之夾河而壘者。遂皆潰逸。一散不可復收。盡奔至贛州。而十八灘之險。亦不可恃。且夕爲吉安之續矣。從今以後。日以死自期。肉飽烏鴛。骨孽螻蟻。亦爲考終。汝輩勿望我生還。亦無處求歸我骨。望湖西嶺北。而招魂以歸。故鄉魂氣無不之也。孝弟忠信。禮義廉恥。平生訓汝曹。童而習之。別無遺命。卽此是遺命也。贛州被圍。固守半載。十月。奸民內應。大清兵潛上小南門。期生亟開篋。取手書遺囑五紙。分授五僕。曰。五人中有一人生還。此卽訃音矣。遂冠帶自經於章貢臺之寶蓋樓下。湖西人識其遺骸。解縊。排牆覆之。越兩月。廬陵人杜鳳林。桂芳。啓敗垣拾遺骸。膚理已委謝。惟胸臆以上不壞。無處覓棺。聚屋薪焚化。薪盡而心不燬。遂殮以石函。瘞臺下。殉節處。墜鐘記之。

靜志居詩話。先生與楊萬諸公力保孤城。死之日。守備楊大器潛收真尸。瘞於萬安縣之百家村。仲子孫貽訪其遺骸未得。久之。鄉人胡樞知萬安縣事。一夕。夢先生語曰。遺骸在縣境。君能歸之。故鄉幸甚。會大器之友曾幾。亦以狀白樞。樞資遣之。至海鹽。家人詰其事。皆合。子女旋以血漬遺骨。俱沁入。乃慟哭葬之。說者比於溫序之思歸焉。

田按。公子孫貽有虔。寒食怨詩云。虔南草枯向南樹。吹作虔臺塚旁土。望帝思君君未歸。曠盡贛江寒食雨。紙錢溼煙飛不起。五父荒墳石無主。幾人江上共招魂。瘴海青蠅弔泉戶。平原門下客劉生。沽得梨花一杯乳。獨洒西州淚數行。滴入泉臺草枯苦。嶺頭孤兒望臺哭。跪問道旁雙石虎。何處龍蛇綿上灰。浩浩東風鷓鴣舞。當是孫貽訪其遺骸未得時作也。詩中平原門下客劉生。虔人劉旭章也。

過湖上僧寮觀壁間伯兄題句感懷二人泫然成詠。

三載重悲廢蓼莪。不堪蕭寺屢經過。明湖似亦知人怨。故遣寒波著雨多。

馬懋功三首

懋功字長卿。桐城人。萬曆乙酉副榜。福王時。以薦除杭州通判。擢監軍僉事。進參議。守吉贛。出督水師。兵敗赴水死。有介石齋稿。

桐舊集。胡業宏曰。先生久居戎幕。晚被薦章。洊歷參藩。遂成大節。詩上規杜老。下法劍南。不啻吉光片羽。姚椿曰。公精天文象數。所爲詩五七律沈雄感憤。使人流涕不已。

送羅給事

相逢更何日。握手淚沾襟。封事傳西掖。遷官去上林。風雲雙闕迴。煙水五湖深。宣室終前席。無爲澤畔吟。

經國

水旱繼兵戈。閭閻病若何。桑麻非舊業。賦稅有新科。竊恐流亡甚。還令盜賊多。樞臣經國計。猶望凱旋歌。

書事

上相專征出未央。御門推轂重恩光。正從三楚收三峽。頓破襄陽與洛陽。裘帶從容空自翊。甲兵精銳恐全亡。中原回首成殘局。一念遺黎一斷腸。

吳應箕十五首

應箕字次尾。貴池人。崇禎壬午副榜。唐王立。除池州推官。監紀軍事。兵敗被執。不屈死。乾隆中。賜諡忠節。有樓山堂集二十七卷。

蘇桓武子集。次尾爲詩。精於辨體。不襲古人。不趨時尙。眞樸澹老。惟自見其志。與有益於聞者而止。

劉城嶧桐集。次尾論詩之指曰。詩古文辭。其義一也。古文之道。惟樸與堅。斯其至者。詩何必不然。且詩本性情。述志意。心口相傳。宜無他假者。而以諧聲傳韻。裁取成章。已不能不在離合間。況復資之擷拾。專尙華麗。其失也僞。是謂無詩。吾生平不爲擬古。強笑不歡。非中懷所達故也。蓋次尾之論如此。相其旨趣。要不離所持論。

陳忠裕集。次尾博極羣書。通世務。善古文。獨慷慨負大略。此其可以詩人目之哉。顧天下之善詩。未有如次尾者。嘗與余酒酣。細論其言曰。弘嘉諸君之失。以拘體法而詩在。今人之得也。以言性情而詩亡。豈性情之言。足以亡詩。飾其未嘗學問者。以爲詩人之妙。不過如是。嗚呼。與其得也。則甯失而已。次尾之詩。其學問可考而知也。豈與今之人同日語哉。

自靖錄。甲申。應箕上書當事。言江北三鎮。靖南侯黃得功。獨忠勇。東平侯劉澤清。廣平伯劉良佐。反覆不可保。武昌上游。甯南

侯左良玉萬難恃。而其大要。則以史可法宜在內閣。不宜駐維揚。金陵不守。應箕與同邑徵士劉城。痛哭約鄉人果烈有心膽者同事。得四五萬人。應箕指揮。分爲四師。一師出東流。一師出建德。一師間道窺金陵。一師自率攻池州。與徽州金聲相爲犄角。聲勢頗震。屯兵池州城南九十里泥灣。池州知府遣人招降。應箕斬之。大將于永綬率師從徽州間道出。應箕後腹背受敵。應箕拔營大樓山上。與大清兵鏖戰。殺傷相當。終以衆寡不敵。被執。引頸受刃。神色自若。授命處血。迹久存。洗之不去。

靜志居詩話。先生羅九經二十一史於胸中。洞悉古今興亡順逆之迹。當崇禎中。預慮燕都之必不能守。聞者皆笑其迂。而先生持論侃侃不阿也。名雖不登朝籍。而人才之邪正。國勢之得失。瞭如指掌。撰有嘉朝忠節傳二卷。兩朝剝復錄十卷。留都見聞錄三卷。東林本末六卷。續觚不觚錄二卷。其書或傳或不傳。可以當龜鑑矣。分宜張爾公稱先生人文似陳同甫。自誠知言。田按樓山詩五言樸老。長於詠史。復社中殉節諸公。義魄鬼雄。如樓山。維斗。日生。存古。武公。公且輩。難更僕數。可以雪結社亡國之恥矣。

## 立秋

五載屆斯辰。風塵悵擾攘。今茲肅高居。忽復逢秋爽。微雨洗繁林。輕颿蕩纖幌。庭植相與鮮。煩襟亦以蕩。憩松說沈陰。撫琴弄新響。清商未央來。積暑漸以往。宿志耽墳籍。欣承氣清朗。把卷欲忘言。散髮酬心賞。別姚子雲。元台韓姬命。如璜陳士業。弘緒姚子句。吳秀吐氣薄氤氳。韓生雅澹才。閉戶日雕文。往來陳與吳。杯酒何慙慙。一朝場秋翮。惜別長江濱。涼颿厲霜夜。葉隕空紛紛。離獸多悲音。高鳥哀遠羣。矧予敦情好。悵焉襟袂分。川原杳無極。何以接芳芬。人生無常聚。飄如風中雲。自此慎歧路。久暫非所云。

和周仲馭十四哀錄六

楊忠烈公漣

憶昔甲子年。逐獵聚京陌。時傳中丞疏。讀之摧肝魄。豈期激禍機。滔天生蝥隙。趙高鹿且馴。王聖天方劇。悲哉陳寶身。鍛鍊銷金石。貫木骨已糜。埋草血成碧。嗚呼天聽高。甯念捧遺冊。忠臣不恤死。要在安宗祏。大義爭移宮。烈風號窅窅。

魏忠節公大中

魏公既通籍。十年懷一衣。天性好峭潔。攬轡願無違。豈不歎明哲。義激履危機。鄭崇死規節。王章僂訕譏。銀鑪骨一具。烈烈生光威。予也感獄對。淚落不能揮。悲哉賢茂才。父子同所歸。

周忠介公順昌

道喪善類殃。高張譎夫喜。吏部千載人。脫鉤良獨恥。魏公躬就逮。慷慨悲不止。締婚非急交。用以羞儉鄙。李膺囊三木。范滂無生理。生平冰雪姿。蟻螻拚一死。天地爲震怒。風雷立移徙。招魂江上來。惻悽滿蒿里。不見彪虎儔。駢僂同羊豕。

高公攀龍

梁谿高夫子。蹈道本洙泗。當其秉憲時。搏擊先梟鷲。一自鉤黨連。爲善無遺類。皇甫恥已滿。景毅志亦遂。



傷哉故大臣。而敢煩獄吏。拜表入清流。汨羅榮易箠。自古皆有死。烈者罹官寺。趨游和藥來。視茲無異致。

萬公燭

郎中抗疏時。聖朝驚一鶚。誰知鷓鴣張。白日沸鼎鑊。解衣趨就烹。談笑若綽約。男兒既讀書。志在辦溝壑。得從龍比游。豈不賢圭爵。長安大道傍。千載憐孟博。節甫安在哉。嗟彼空狐貉。

劉公鐸

磊落劉知府。十年始一麾。題詩決西市。長夜使人悲。秦刑腹周內。漢律意增移。悲哉文字劫。有道恥言危。巍巍九千歲。頌德不自嗤。誰能呪詛死。風流亦可師。

述懷

舉世急干祿。小儒矜詞章。爛然麗雲錦。誰知大道亡。絕學恥非聖。況以鶩荒唐。所貴炳星日。析義訖精茫。董生蔽災異。王何繆老莊。微言苟未絕。歧路慎轉張。

苟或事賊曹。晚乃飾名迹。嗣宗躬放達。而暱司馬側。既爲鳳凰姿。故不矯厲翼。豈有麒麟德。受羈于犬食。辭婚善全宗。至慎巧販國。詠懷好詩詞。能無自愧慙。

魏晉賤守節。頑執稱通人。爲文事靡麗。誰能窺道真。六代一元亮。邈焉至德鄰。讀書非不解。恥爲詞章倫。賦詩時見志。飲酒亦還醇。尊聖契經理。狂歌不厭貧。達生寓自祭。深懷記避秦。劉宋何能屈。陶然漉葛巾。

相如射財利。竊婦良不恥。得志還成都。縣令躬負矢。詞賦工詭奇。駟馬何足齒。嚴助仇友壻。主父勢相倚。賤貧意氣卑。富貴誇戚里。大道忘寒炎。達識齊通否。衣錦世所榮。無爲君子鄙。

寄嚴印持西湖兼問子岸

自昔風流在高居。靜若禪。曾蒙十日飲。尙缺一書傳。鶴嶼秋誰問。鵝經老更妍。嚴工書過庭應閣筆。魯殿可  
巋然。

和州

高皇昔神武。和州初濟師。豈知壯哉縣。遂爾汗爲池。汝穎空連絡。江淮斷鼓鞮。殺人十五萬。莫使聖明知。  
閒看

閒看處堂喜。真稱舉國狂。人猶殺李范。運不及齊梁。寂寞臨春閣。悲涼石子岡。只餘諸葛恨。頸血濺淮揚。  
史公  
遺鄰。

金聲一首

聲字正希。休甯人。僑寓嘉魚。崇禎戊辰進士。選庶吉士。遷山東道御史。告歸。起故官。及山東僉事。均不赴。福王時。超擢左僉都御史。不赴。唐王立。授右僉都御史。兼兵部侍郎。巡撫徽甯池泰等處。提督軍務。大兵下江南。被執不屈死。贈禮部尙書。諡文毅。乾隆中。賜諡忠節。有燕詒堂。尙志堂集。

自靖錄。大學士漳浦黃道周過新嶺賦絕句云。殘棋唾手已難工。又是論人成敗中。但說丹心何所用。一時張眼念臧洪。自注云。新嶺上弔金正希死時有江天一諸賢從之。足爲吐氣。中書舍人華亭夏完淳賦六君詠。其第五章輓金司馬聲云。司馬盛才氣。豪舉不可親。翩翩雲中龍。渺忽誰能馴。牙旗風蕭蕭。慟哭驚鬼神。輕生貴任俠。英英殊逼人。功名盡一劍。壯志苦不伸。縱橫一世間。卓犖誰比倫。

### 賦得拊髀思頗牧

郎吏道已雜。買官牧牛羊。爵祿雖武功。買官入疆場。壯士負才氣。百戰裏千瘡。大傑觀時務。隱身自迴翔。天子難得見。當路重筐筐。莫有念亂人。覆謂將才荒。孰肯蹈死地。反傾橐中裝。孰敢擲平生。付人論短長。衛霍絕大漠。漢廷無鼓簧。惟願天子出。停車式螳螂。郭開言一入。廉李氣不昌。諫罷隨拊節。古人快馮唐。誰秉國成者。搜才應多方。明主可忠言。何哉尙括囊。

### 江天一首

天一字文石。歎人諸生。從金聲起兵。唐王授監紀。推官參軍事。兵敗被執。不屈死。乾隆中。賜諡節愍。有止菴集。

### 拜御史大夫景公墓

委質原來卽致身。不因富貴喪吾真。燕雲甲冑無榮爵。湯武衣冠有愧臣。斷首死猶爭順逆。孤忠氣已歷星辰。山深徑仄鳥嘯急。疑是魂悲志未伸。

麻三衡六首

三衡字孟璿，宣城人。貢生，屯師姑山，兵潰被執，死於市。唐王時，贈國子監學正。

陳貞慧山陽錄：孟璿偉幹疏髯，有志節，好將帥之略，然淹雅博文，所著花瑣志、古香流麗，得晉唐風氣。

自靖錄：孟璿博學能文，與徵士沈壽民俱知名復社中，身長七尺，美鬚髯，喜奇服，力能挽強射堅，好馳馬擊劍，談兵法，習天文，五行奇門六壬諸家言，家故富，輕財好施，客多歸之。至是益出家財募士，旬日得數千人，遂起兵於稽亭，兵敗被執，作詩題所繫室中牖上云：吳越連沙漠，天心不可謀，漫留千丈髮，笑看百年頭。若水心猶烈，平原志未酬。清風吹宛句，朝暮五湖秋。

靜志居詩話：孟璿注名復社，遽賦無衣，陳安未克生還，狼躓已得死所，詩殊超超朗朗。

西山四首

西山不可望，萬里遠傷心。落日照荒野，亡猿懷故林。亂流吾欲渡，歧路亦何深。誰是冠纓者，蕭蕭薇蕨吟。  
黃河流不盡，北燕至何爲。冠蓋空三輔，鯨鯢盡赤眉。魂銷分劍日，心折覆巢時。野哭千山暮，無人慰黍離。  
世亂忽如此，國恩誰與倫。徵兵到甌脫，揖盜自重關。貧賤懷知己，弓裘忘至尊。中宵望北斗，不敢賦招魂。  
終日如有失，相看何所求。一身隔江海，雙淚滿滄洲。父老疑猶在，東南渙不收。中原多李郭，早晚急同讎。

玉河

玉河水背漢宮秋，故國煙花生遠洲。青女明璫爭夜月，黃頭翠羽舞伊州。夢回塞上雙流淚，家在淮南獨倚樓。多少東門種瓜者，飛蓬搔盡不勝愁。

徐復生移家丁橋予亦移家稽亭

風雨西村烏鵲稀。南州孺子臥牛衣。南山茅屋白雲滿。十里句溪紅葉飛。亂後知交斷消息。愁中耕鑿聊因依。卜居我亦入山去。輸爾江鄉蝦菜肥。

沈壽堯一首

壽堯字景山。宣城諸生。舉兵應金聲。戰死。

山晚

山外日初夕。山中人已歸。風來移鳥宿。月出照螢飛。竹氣寒生榻。荷香冷襲衣。一村深遠樹。燈火自依依。

楊文聰十一首

文聰字龍友。貴州衛人。參政師孔子。萬曆辛酉舉人。除華亭教諭。遷青田知縣。改永嘉。江甯。以事奪官。福王時。起兵部主事。歷員外郎。中。遷兵備副使。擢右僉都御史。巡撫常鎮。兼督沿海諸軍。唐王立。拜兵部侍郎。進浙閩總督。大兵入閩。執被不屈死。有山水移。洵美堂兩集。

陳子龍安雅堂集。龍友詩有幽峭之思。沈鬱之色。壯烈而不失和平。夷曠而中存莊雅。

邢昉石臼集。洵美堂詩。紆徐以導遠。篤摯以達情。引物連類。廣博曼衍。歷出靡涯。而源流師法。燦然可指。

畫禪室隨筆。龍友生於貫竹。獨破天荒。所作台蕩等圖。有宋人之骨力。去其結。有元人之風韻。去其佻。出入懸崇。巨然之間。觀止矣。

讀畫錄龍友工畫善用墨初爲華亭學博從董文敏精畫理然負質頗異不規規雲間蹊徑也後貴陽之勢漸張急於功名不復唱渭城人有求者率皆盛伯含林玉兄弟及施雨咸捉刀

點詩紀略龍友少負奇偉文章劍術兼擅其能尤耽書畫好短衣矢箠馳惡馬逐健兒射生坐草間燒燖爲樂意有所會卽伸紙潑墨如風馳雨驟不能自休移家南京日與諸名士結社角藝酒酣耳熱抵掌時事意氣橫出一座盡傾好游覽遇佳山水賦詠圖畫允物行囊尤蓄忘天台雁蕩崇禎元年其父師孔參政浙江乃得游焉哀所得詩文圖畫題曰山水移是時龍友年才三十三畫名噪大江南北迺在詩文之上其後以職方監軍京口吳梅村爲畫中九友歌云阿龍北固持戈矛披圖赤壁思曹劉酒酣灑墨橫江樓葦山落月空悠悠以龍友與董文敏王太常王廉州諸人並稱其傾倒一世可知矣龍友修結納耽聲伎一歲費常鉅萬豪士每略小檢逮明社既屋士夫多肥遯自全獨須臾不忘故國間關流離中獨阻兵負固屢抗六師父子家人胥斧鑕而不悔大節錚錚亦可謂烈丈夫也已

田按龍友詩畫均負異才南遊江浙畫學得師友而精遂爲吾黔一大宗詩則與王季重陳木叔輩遊頗染時習然後骨妙趣猶時露於字裏行間也大節棱棱豈徒踞畫苑騷壇一席

### 與董玄宰先生論筆墨

惜墨不在墨要知先惜水苦心不問手對鏡豈謀紙看君潑墨時濃淡皆有理毫端噓董巨硯池活范李  
滴滴生氣飛尺幅幾千里

### 過胡元振齋中看畫

散步啓衡門初桐引修逕巷若無居人冷翠自相映爲尋太始音閒叩山水性置吾羲皇間泉源在微磴

墨光冷山候。素氣澄水暈。坐久忘丹青。倚壁究觀聽。

廢宮

亂巖如犬牙。適與哀湍會。不知何代宮。傾倚衰草外。畫壁滿蟲涎。石蘿相映帶。古柏饒幽姿。童僕擁青蓋。悲風薄暮生。遠近咽竽籟。初制豈不偉。吾生亦有在。歎息緩行坐。前望車馬晦。

梁溪喜逢唐季陶依韻奉答

各看鬚鬢憶當年。纔得逢君又黯然。煙水款留高士榻。黍雞供應故人船。新篇嚼雪魂相勞。舊事流雲夢已傳。汲取泉香頻翦燭。渾忘逆旅韻俱仙。

吳門別薛千仞還四明

俗薄唯君古道存。不於臨別始銷魂。身餘白髮酬朋友。家習青箱善子孫。西閣雲歸遲返棹。南枝花發待開樽。四明山水神仙宅。應羨文星隱鹿門。

縉雲道中

板輿終日聽無窮。半是松聲曳亂峯。野水若迎奔道白。山花如訴照溪紅。鳥忘煙火非凡羽。人習耕耘帶古風。樹頂殘陽時作彩。丹爐隱隱欲相通。

京口與潘無隱



坐擁澄江意自閒。好峯如戟障蛟關。帆吹雲影憐知己。月送潮音慘客顏。酒浪夜深高鐵甕。筆花醉裏撼金山。獨愁把臂翻成別。明日橋東第幾灣。

題畫

一抹寒林水一灣。幽人情性頗相關。胸中自寫塊礪氣。筆底何妨斧鑿斑。生卷老雲皴白石。不將媚骨點青山。便如個裏幽棲客。更要何人相往還。

雪霽訪山中友人

凍色一千尺。峯峯依去馬。應有素心人。出沒溪煙下。

雜題

煙火岸邊村。鶯花溪上寺。獨有素心人。放歌時一至。

朱雀航

野航月冷草蕭蕭。曾照當年劫火燒。遺恨至今流不斷。酸風昨夜返寒潮。

孫臨六首

臨字克咸。一字武公。桐城人。貢生。唐王時。授監軍道副使。兵敗被執。不屈死。乾隆中。賜諡節愍。有楚水吟。我惺集。肆雅集。大略齋稿。

張子烈。芑山集。克威負不世出之才。年甚富。學甚博。故修詞典麗。氣尙淵穆。方以智密之集。克威肄雅集。自樂府以下。反復詠歎。其指遠。其思深。

錢秉鐙。田間集。武公。魯岳方中丞之壻。爲人風流俊爽。曉聲律。習騎射。嫻技擊。會中丞撫楚。歷與賊戰。武公嘗雜騎士中。躍馬深入。時於馬上賦詩爲樂。避寇白下。嘗大雪。挾所匿妓騎而游鍾山。每感慨時事。輒悲歌泣下。南渡立國。武公避地雲間。與陳臥子。徐復菴。謀舉兵。不果。後往依其兄於台州。會蘇撫楊文驄募兵龍泉。以書招君。遂奏授副使。監其軍事。丙戌七月。大兵取濁。與文驄行至浦城。追及之。遂俱死。

蠶尾續文。武公少讀書任俠。與里中方密之。爾止。周農父。錢飲光。齊名。所爲歌詩古文詞。流傳大江南北。好談兵。手製木牛流馬式。著平地。能自旋轉如生。陳大樽贈詩曰。孫郎磊落天下才。龍文手握雙玫瑰。自言三卷授黃石。談兵說劍如風雷。著其事也。

莫友芝。邵亭集。始余讀余懷雜記云。楊中丞文驄父子三人同日殉難。又云。楊龍友殉節閩嶠。無遺種也。唯老女勾歸金陵。依家僕以終天年。每歎錚錚義烈如楊公。竟斬焉弗嗣。揜卷不怡者久之。意仙霞忠魂欲求梅花嶺之衣冠一抔。益不可得矣。道光末。桐城孫起瑞心筠來巡貴州糧儲。備讀其家譜。乃知龍友骨歸孫氏。與觀察高祖之父。武公副使合葬。又附見楊氏後裔。於是鄉積不能解者。一旦釋然。龍友好推獎名士。士亦附之。獨不幸爲馬士英戚。予人譏端。當福藩時。大獄疊興。阮大鍼羅織善類。必致死者。龍友必委曲調護。保全蓋數十計。固宜其有後也。

田按。武公與楊龍友同事。死則孫氏與尸同歸。方爾止哭龍友。武公同日死。難詩云。姑蘇城外轉旌旗。士馬蕭蕭我獨隨。自愧江東行不果。祇因堂北養無兒。周郎再造威重震。漢鼎難移死自期。況有參軍同志節。臨行慷慨復何悲。可以見其義烈矣。

## 短歌行

明詩紀事 辛籤 卷六上

撞鐘伐鼓。誰將爲歡。日月迭微。良時盤桓。一解 感感靡騁。瞻彼四方。心之憂矣。難解杜康。二解 肅肅秋風。首如

飛蓬。座客常滿。樽酒不空。三解 冬有肥羜。夏有肥羴。乃飭爾肴。用速爾徒。四解 南飛烏鵲。繞樹哀吟。縱橫烈士。

撫劍雷音。五解 哀今之人。單榆不周。安望衣被。禦寒九州。六解

哀長平

長平日夕悲風起。四十萬騎一時死。燐火蕭蕭陰雨青。茫茫白骨土花紫。衰草黃沙寒日曛。山空曠野度  
愁雲。西望咸陽杜郵道。不須重弔武安君。

夕安憶歸

江流亦何急。游客思方深。動是經年別。空懷故國音。青山時入夢。白草日相侵。安得理輕棹。行行慰我心。  
客居金陵。張兆蘇曹梁甫見。訪卽聞賊信。

荒煙朝夕暗城東。懷夢階前青草叢。兩馬日中知赤白。雙龍江上定雌雄。聲悲柚實千夫壘。影落藤蕪六  
代宮。兵火與君皆痛哭。長纓猶望請終童。

塞門歌

白草胡兔驕。控弦天山下。健兒聞笳聲。一聲齊上馬。

江上曲

曉月孤鴻夜雨霜。悠悠江水一帆長。傷心兵火無消息。不願逢人問故鄉。

錢棟三首

棟字仲馭。嘉善人。大學士士升子。崇禎丁丑進士。除南兵部主事。遷郎中。改吏部。擢廣東僉事。未赴。乙酉起兵蘆。衢兵潰。至震澤投水死。贈太常寺卿。諡忠貞。有新儒園詩三卷。文部園詩三卷。

自靖錄。仲馭乙酉起兵蘆。衢三吳志士多挈家依之。八月兵潰。將從問道至徽州。十七日泊舟震澤。聞湖中噦聲震天。衆寡不敵。投水死。小僮秋煙從而赴水。持其衣襦不舍。明日有友人錢秉鐙在上流呼棟字。秋煙屍卽挽主屍逆流上浮起。乃得歛焉。姜孩貧。篋集。仲馭好學。能下士。請養歸里。築南隅以待賓客。擊鉢成吟。天葩燦發。或有未嫌。應手改竄。性穎敏。嘗與余谈心。誦漢書相如。揚雄。呂后等十數傳。晨而上口。酉而背抄。淡心差十餘字。仲馭差三十餘字。仲馭謝曰。僕去君遠。奚啻三十里。其謙下若此。

啓禎兩朝遺詩。吏部忠孝人。心有憤觸。衝口而發。不拘聲病。而才藻爛然。

文園雜詠

天際浮雲散。登臺攬翠微。西來風雨是。北去雁鴻非。第宅悲金管。關山念鐵衣。中原兵氣壯。未敢說漁磯。

金陵感懷

上游千里廢耘耔。南國流人敢告饑。荒歲榆皮供父老。戰場燐火哭孤兒。防江總恃波濤急。草檄誰嫌斥堠遲。獨少武陵吹一曲。悠悠羌笛滿旌旗。

秦淮詞

春波幾尺浴鷓鴣。姊妹同舟笑語添。每到日斜簫管發。一時人盡捲珠簾。

魏耕五首

耕原名壁。字楚白。甲申後改名耕。字白衣。又名更。慈谿人。有息賢堂前後集。

全祖望甬上耆舊續集。雪竇山人魏耕者。本慈谿人。少失業。學爲衣工於苕上。然能讀書。有富家奇其才。客之。尋以贅婿居焉。成諸生。國亡。棄之。山人所交皆當世賢豪。講求大節。與于苕上起兵之役。事敗。亡命走江湖。妻子滿獄中。弗恤也。久之。事解。乃與歸。安錢纘曾居思溪。閉戶爲詩。酷嗜李供奉。長洲陳三島尤心契之。東歸遊會稽。有張近道者。好黃老。管商之術。以王霸自命。時人輒唾之。而其里人朱士稚與山人論詩。極傾倒。近道見之。亦輒痛罵不置。然三人交相得。因此并交纘曾。三島稱莫逆。山人又因此與祁忠敏公子班孫兄弟善。得盡讀淡生堂藏書。詩日益工。然山人於酒色有沈辭。一日之間。非酒不甘。非妓不寢。禮法之士甚惡之。惟祁氏兄弟竭力資給之。每山人至。輒爲置酒呼妓。久之。山人又遣死士致書延平。謂海道甚易。南風三日可直抵京口。已亥。延平如其言。先下金陵。已而退軍。山人復遮道留張尙書。請入焦湖。以圖再舉。於是復有刊章之捕。纘曾以兼金賄吏。索稍解。癸丑。有孔孟文者。從延平軍來。有求於纘曾。不暨。并怨山人。以其蠟書首之。山人方館於祁氏。被執。至錢塘。與纘曾俱不屈死。

靜志居詩話。白衣僑居吳興別鮮山。爲晉沈禎。沈聘避地所居。有渡曰息賢。遂以名其堂。其論詩云。詩以達情。情貴極其所至。故樂必盡樂。哀必盡哀。由唐以前。諸家體不必相蒙。而其爲至則一也。學者各盡其塗徑而入之。愈深。見其畛域愈廣。恣睢淫佚於其際者。久之。乃始得其滂澆之樂。故涉獵衆家。不若專致一家。一家之趣既竭。而後馳而去之。再適一家。其於一家。猶是也。然後古人之長見。而我之長亦見。余之於詩。初無矜飾。務達其情。凡博奕飲酒。朋友酬酢。以至山川風俗。城郭之所歷覽。

遺迹之所辨證。有觸於懷發之詠歎。以爲合於作不能自己之旨。此則余之所自道已。故其中年專學子美。末年專學太白。惜乎未見其止也。

### 慷慨歌

猛虎不處卑勢。勁鷹不立垂枝。豪傑徒步言歸。恥就鄉里小兒。

### 初住茗溪與鄰叟山行過張醜別廬置酒

茗溪勝剡涇。鳥鳴春復幽。草生明月峽。花滿銅峴洲。相移鹿門侶。結廬臥崑邱。清晨出郭門。卻披紫綺裘。杖者四五人。與我同遨遊。遂酌張野叟。登其池上樓。天目雲外秀。笠澤天邊流。暮雨向之來。窗竹颯鳴秋。頽然不知返。行樂何悠悠。

### 湘湖遊眺

渺然湘湖裏。西望富春山。雲景鮮且秀。彩翠雙眉彎。迴潭下石蟹。層谿接潺湲。村村攢雲樹。處處眠白鷗。遙見隱居者。臨流採芳蘭。願言訪丹術。餘光駐頽顏。谷口弄明月。棹歌不能還。

### 韓子遽棗駟行

當今馬癖最有誰。苦心只數韓公子。昔買驪駒寵且矜。今得棗駟狂欲死。腹旋點點汗斑斑。毛比桃花色更鮮。牽來吳王鬪雞道。騎出孫楚酒樓前。頭絡瑤題傾城見。蹶高玉蓋傍人羨。撇眼驚塵霹靂飛。不讓蘭

池追紫燕。公子豪邁真風流。胸中曠達那用愁。青溪小姑春可惜。白社支郎曉更留。聞君更有飛龍影。亦是龍種聲價逾。何當與君並轡起。馳驅峻坂風颼颼。長鉞突羽隨手抹。南山射虎同悠悠。

答故人問

尺書遙借問。我家茗鬢裏。朝見弁山青。暮見弁山紫。

錢梅一首

梅字彥林。嘉善人。崇禎癸酉順天鄉試舉人。福王立。以薦除兵部主事。進郎中。坐事死于市。有白門集。

橋李詩繫彥林隨父官津海。濱南。及歸。築園開逕。外延賓客。內貯聲伎。以及法書名畫。尊彝帷帳之屬。充牣其中。然素無藥中。金多棄產。以給其天性然也。甲申後。陳臥子薦授職方郎中。奉勅視江浙城守。還里而南都潰。避迹村隲。丁亥。松督變作。捕臥子不得。傳匿彥林所。亦被逮。其壻夏完淳。又以閩疏事發。語多連及。遂同日死于市。其妻徐孺人亦赴水死。

悼友

身後方知吾道尊。悼君原不望君存。三江自合流忠性。五嶽還能勒鉅言。國破早應摧獨木。巢傾尙恐覆芳蓀。暮潮聊爲增千尺。添瀉東南士淚痕。

楊廷樞一首

廷樞字維斗。吳人。崇禎庚午舉人。福王時。授翰林院檢討。兼兵科給事中。避居石泚山。被執死。



於市有古柏軒集。

靜志居詩話。先生倡應社於吳中。評隲五經文字。張溥天如。朱隗雲子。主易。楊彝子常。顧夢麟。士主詩。周銓簡臣。周鍾介生。主春秋。張采受先。王啓榮。惠常主禮記。而先生與嘉善錢梅彥林主書。後與復社。幾社合。領解之後。聲譽日重。門下著錄者二千人。詩雖游好。然如吉光孔翠。片羽皆足爲珍重。且勝於服習。竟陵派者多矣。晚歲廢居。忽罹維繫。其舟中遺書云。廷樞幼讀聖賢之書。長懷忠孝之志。爲孝廉者一十五載。生世間者五十三年。作士林鄉黨之規模。肩綱常名教之重任。惜時命之不猶。未登朝而食祿。值中原之有難。遂蒙禍以捐生。其年則丁亥之歲。其月則孟夏之中。方隱遯於山阿。忽陷身於羅網。時遭其變。命付於天。雖突如其來。亦已知之久矣。生平所學。至此方覺快然。千古爲昭。到底方覺不沒。但因報國無能。懷志未展。終是人臣未竟之事。尙孤累朝所受之恩。留此血衣。以俟異日。舟中矢志。不能盡言。

送辟疆省親禮嶽

美人南國去。春煖洞庭波。獨以瞻依切。因之登眺多。衣翻堂下彩。囊貯郢中歌。作賦娛親意。茲行快若何。



# 明詩紀事卷六下

## 辛籤

### 韓上桂四首

上桂字孟郁番禺人萬曆甲午舉人除易州學正遷南國子博士歷助教監丞改永平通判遷建甯同知甲申京師陷悲憤不食死乾隆中賜諡節愍有朵雲山房詩文稿十二卷

列朝詩集孟郁少攻騷賦驚才風逸天官兵法王遁之書無不通曉風儀蕭散悠悠忽忽如山藥野鹿與之遊處敦篤友誼聚首摩腹譎如也爲詩賦多倚待急就方與人縱談大噓呼號飲博探題次韻紙上颯颯然如蠶之食葉俄而筆騰墨飽斐然可觀顧不能爲深沈之思爛漫放筆不自顧惜稿或隨手散去常問其所就於予予曰孟郁才氣可方吾鄉桑民懽要是萬歷間嶺南第一才子李長蘅歎之以爲知言孟郁之才長於古詩歌行於今體殊不經意

嶺表詩傳錢受之推孟郁爲萬歷間嶺南第一才子其實氣格遠不逮海日蘊藉遠不逮人情而筆墨馳驟亦足動人田按孟郁才筆揮霍長篇動輒千言今錄其稍有節制者

## 古怨

九月初高天氣涼玉壺迸水更漏長孤燈不翦蘭缸冷新月斜函翠幌光夜深沈沈望風色銀漢迢迢杳難卽梧桐樹上怯雙棲菡萏池中羞比翼慘淡鉛華秋復秋婉轉屏幃愁更愁班姬此日題紈扇衛女當

年怨柏舟。不堪念此意。辛苦願學秦。簫逐鳳遊。

京洛行

京洛多貴盛。子弟盡輕豪。千金裝寶劍。八綵綴弓裘。依倚父兄勢。傳誇禁闥高。一門三繡節。兩族九旌旄。抗體尙書省。平交左右曹。家滿珊瑚樹。燈殘鸞鳳膏。玉梁施翡翠。寶杓酌葡萄。分曹賭一擲。梟勝奪珠袍。酒酣發巨鐘。絲管競啁嘈。侍女展朱唇。織聲遏雲璈。狂來驅賜馬。卻走南山臯。便欲揚鞭去。因之赴臨洮。聖代勤征伐。吾家舊有勞。

七夕後一日望月姬渡珠海戲贈

寶月輝銀漢。瑤華麗綺筵。歌從鸞管合。舞逐綵雲翩。小笑渾生豔。迴眸盡可憐。偶來依洛浦。人道水中仙。

望羅浮

東望羅浮四百峯。峯峯鬪削青芙蓉。崖欹轉覺白日礙。洞古況有陰雲封。瀑布銀河紛錯落。玉書金簡光玲瓏。師雄夢後有何見。春去梅花不易逢。

林說一首

說、字傅公。莆田人。崇禎壬午舉人。國變後絕粒死。有寸草堂集。

蘭陔詩話。傅公詩。清勁拔俗。不沿時調。甲申後。走入深山。餓死。清風亮節。可以遠希西山。近比疊山。

偶成

四方耕稼地。處士歎無田。貧省輸官稅。荒添糴穀錢。療饑資木石。卻老學安禪。歲歲肌膚減。齒牙幸尙全。

文震亨五首

震亨字啓美長洲人。大學士震孟弟。貢生。官武英殿中書舍人。國變後投水死。乾隆中賜諡節愍。

有金門集一葉稿。

列朝詩集啓美符詔之曾孫。開學文起之弟也。風姿韻秀。詩畫咸有家風。爲中書舍人。給事武英殿。先帝製頌琴二千張。命啓美爲之名。又令監造御屏圖九邊。阨塞皆有賞賚。

靜志居詩話啓美相君介弟。名挂黨人之籍。王尙書覺斯有言。湛持憂讓畏饑。而啓美浮沈金馬。吟詠徜徉。世無嫉者。由其處世固有道焉。

題張平仲五鹿山房圖

樓臺幻出擬仙都。遠水蒹葭在有無。縱許輕舟懸畫鷁。甯容歸棹飽江鱸。狐裘漫自思公子。鹿苑今看屬大夫。解道關門明月冷。蒼茫紫氣未全孤。

秣陵竹枝詞

據床開印翠微間。朝請全稀退食便。呵殿也堪成韻致。此中官府亦神仙。

尙食宮監住直廬。退閒丞相府中居。貂璫一樣中常侍。三日湖頭打飯魚。留都中貴居胡惟庸故府。每歲於玄武湖中敕賜打魚三日名。

魚飯

同姓編氓異姓侯。上公出不避行驕。諸曹未識勳臣貴。每到朝陵壓上頭。  
秦淮冬盡不堪觀。桃葉官舟閣淺灘。一夜渡頭春水到。家家重漆赤欄杆。

張秉純一首

秉純字不二。含山諸生。弘光乙酉。南都破。絕粒不食死。

田按。不二。含山諸生。弘光乙酉。聞變。作絕命辭。不食而死。戴敬夫和其辭云。先生影未出青山。如此從容一死難。新史不勞高士傳。殘詩留著野人看。嵯峨千歲首陽山。欲往從之道路難。鈔得漢書龔勝傳。南風危坐把兒看。賊臣嘔笑擲江山。最快陳東罵死難。今日相從游地下。神州沈陸有誰看。

絕命辭

逢人漫說宋文山。樓上三年坐臥難。我本布衣饑不死。西山無面復相看。

許士楷一首

士楷字節齋。句容人。諸生。

金陵詩徵。節齋。明亡七日不食死。

述志

惆悵虞淵黯夕暉。新亭風景淚霑衣。桃源不是無舟到。恥向春山飽蕨薇。

李之椿一首

之椿字大生。如皋人。天啓壬戌進士。除行人。遷吏部主事。福王立。起尙寶司卿。督糧浙東。順治中。被收死南京獄中。有霞起樓集。

五山書齋集。大生解官自浙東歸而難作。以藏故。明勅印未繳。論流。順治六年。詔旨。勝國初亡。人人有故主之心。況居官食祿者乎。凡順治五年以前犯者。勿作叛論。罪既雪。卽贖。登入武夷山。後中畫語。繫之石城獄中。遂絕粒。勺水不入口。積十四日而死。

明詩綜。朱雲子云。徂徠五律工秀。起句尤用意。如春曉淨江天。青山入畫船。家家楊柳青。車馬不曾停。真不減唐人風致。

馬稗游招飲北山

繫艇登危閣。諸天杯酒間。孤雲偏入塔。亂水不藏山。謔語隨花下。嬌歌帶雨還。往來何事急。輸卻老僧閒。

項禹揆一首

禹揆字子昆。秀水人。諸生。與李之椿同死。

落花

一番風信客心驚。怨粉愁紅迭送迎。香篆三更雞舌冷。錦泥十里馬蹏輕。夢回故國無知己。流落天涯不問名。最是芳顏憐易改。難將綵縷繫長生。

黃周星四首

明詩紀事 辛籤 卷六下

周星登科錄作姓周名星後復姓黃字九煙上元人崇禎庚辰進士除戶部主事有夏爲堂芻狗齋集

靜志居詩話九煙晚號名曰黃人字曰略似又號團菴又曰汰沃主人又曰笑蒼道人布衣素冠寒暑不易人有一言不合輒慢罵嘗賦詩云高山流水詩千軸明月秋風酒一船借問阿誰堪作伴美人才子與神仙年七十忽感憤於懷仰天歎曰嬉而今不可以死乎自撰墓志作解脫吟十二章與妻孥訣取酒縱飲盡一斗大醉自沈於水時五月五日也

瞿源洙〇〇集當己未庚申間羅天下才儁殆盡而關西李中孚陽曲傅青主甯都魏冰叔三人獨超然遠引乃黃先生以死殉之或疑其過激此非篤論也夫偃息榮榮者易棲遲王官者難爲吳越之江東生易爲荆南之前進士難而況四海同風託迹無所薛方可以冀由解免而龔勝必至絕食何點可以齊書笑侮而袁昂之爲義士不終舉羽思肖諸人所以能匿迹潛形疊山先生所以對小女子而決然自奮也然則先生所處較難於三人而節亦倍烈矣

卓爾堪逸民詩選九煙性孤介寡言笑少年多著作從長沙過洞庭夜半爲劇盜所掠盡取舟中圖籍投之水後復著成集已西夏時際百六避迹蕪陰蒼皇從矛鏑叢中攫得一集挈之以行復爲盜所掠今所存者鼎革以後所作頗近於騷素懷靈均之志終投水一死

田按九煙長歌真氣噴薄而出微嫌雜拉近體傲兀自見風節

得陶仲調書卻寄

陶生今不死吾道尙嶙峋天地留松柏庖廚赦鳳麟十年書到喜再世夢回真歌涕知何日東籬歲月新

江館歲暮二首

鬱鬱誰能遣冥冥自可飛蟄龍原不死野鶴竟何依抱膝春風老埋頭夜雪饑儘教萊婦笑還似著麻衣



歲月泥犁底。生涯羅刹中。無人堪說鬼。有事只書空。拍岸驚濤白。開門返照紅。怪來茅屋破。日日嚙西風。

觀凌歊臺故址

霸業文明總寂寥。夕陽荒草弔凌歊。若教頑石能言語。便與從頭話六朝。



# 明詩紀事卷七

## 辛籤

### 黎遂球十二首

遂球字美周番禺人天啓丁卯舉人唐王立除兵部主事守贛州城陷巷戰死桂王時贈太僕寺卿諡忠愍晉贈兵部尙書乾隆中賜諡烈愍有蓮鬚閣集二十六卷

萬時華激園集美周思以才靈學以才化識以才通語以才妙讀其詩覺有靈光異采在目光離合間

榆墩集美周詩讀之如春風駘蕩夏雲崔嵬如坐百花雜聽蕭韶美人劍客翻動左右

廣東新語美周詩五古最佳有古俠士磨劍歌云十年磨一劍繡血看成字字似仇人名難堪醉時視結客少年場云生兒未齊戶結客少年場借問結交時不數秦舞陽泣者高漸離深沈者田光醉者名灌夫美者張子房感恩思報仇相送大道旁其困守虔州臨危時擊劍扣絃高吟絕命有云壯士血如漆氣熱吞九邊大地吹黃沙白骨爲塵煙鬼伯舐復厭心苦肉不甜一時將士聞之皆爲之袒褻爭先淋漓飲血壯氣騰湧視死如歸以視李都尉兵盡矢窮委身降敵韋鞬椎結對子卿泣下沾襟相去何啻天壤哉美周又有花下口號云生平不事求神仙願上東海求仙船童男童女各三千教之歌舞及管絃逍遙行樂二十年遂令婚配同力田可得萬人馳九邊大雪國恥銘燕然老夫鬚眉鬪凌煙結屋花國臨酒泉名儒俠客列四筵等閒詩賦人爭傳乞得一字十萬錢此篇予亦愛之是皆不失英雄本色他體彷彿西崑則偏於綺靡矣

田按。粵東詩派。自南園五子以逮黃才伯。梁公實。黎瑤石。歐楨伯。區海目。皆講風格。未及靡曼。至美周醉心六朝。乃爲輕豔之詞。歌行短曲。風致嫣然。然時有壯健之篇。此其超邁之性。不汨沒於綺語冶詞者也。生爲詞伯。死作鬼雄。豈不偉歟。

擬古

醉臥仰視天。天星亦胡然。卷舌能食人。一卷百禍連。壯士血如漆。氣熱燒九邊。大地吹白沙。白骨爲塵煙。鬼伯舐復厭。心苦肉不甜。生年只滿百。見此良憂煎。不如且行樂。樂意誰能宣。陌上多游魂。紛來纏竹絃。

寄懷徐巨源

可憐少殊色。我輩如佳人。傷春苦相念。慰藉惟保身。自從過子門。相留坐明月。得句如折花。簪花爲梳髮。猶恐外人看。不似初離別。離別幾何時。春風吹柳枝。新月照客牀。不作蘇臺期。前日有客來。言子涉江水。敢望不敢信。吹簫待吳市。昨夜有客還。送子酒一石。寄酒不寄書。結言在疇昔。碧水自悠悠。炤花花不流。還來與子期。作賦同悲秋。

莫愁曲

茸茸沙樹煙。沙白高如山。青山搖水動。歡去幾時還。葉黃有時綠。搖櫓聲相續。載夢過江來。聽我莫愁曲。身是江南人。不見江南春。春風吹裙帶。拂起落花塵。

中秋十七夜宋令申給諫招同陳藥亭吏部待月虎邱石上作

石澗聽泉冷。銀瓶轉長綆。美人發纖喉。汲起霓裳影。露垂髮簪重。杯光墮金鳳。三絃學人語。四坐嘿如夢。節短又聲長。但覺吹微香。賦風憐宋玉。爲雨恨襄王。

聶娘婉眉歌并序

崇禎壬午。賊出增江口。肆擄掠。有殊色聶五娘者。賊得之大喜。因戲謂恨其眉未甚婉。娘從容語曰。女醮始掃眉。若欲婉。請假我刀。刀得而刎。寶安李子定夫爲詩旌之。以寄黎子。黎子感其意。作聶娘婉眉歌和之。

聶娘不用眉如柳。雙劍玲瓏腦前後。官兵斂手賊狂嘯。娘舞長眉對之笑。朱絃一夜芙蓉毀。雲雨模糊遠山委。丈夫髭髯總如此。半尺垂虬掀不起。紫石棱棱婉婉爾。翠娥如鐵真男子。白頭天姥惜飛光。續命只有文中王。從他烏爪未肯禿。更買黛螺千萬斛。人生安能知死期。癡情豔骨東風吹。借娘眉鋒不斬賊。先斬偷生巾幗兒。

短歌行

酒酣月滿地。爲君歌短歌。願君漏壺箭。刻作魯陽戈。夏姬老矣。嬴女如何。維南有箕。維北有斗。持播南山塵。戰挹東海酒。明明如月。仙人見之腸斷絕。嫦娥倩靈藥。玉兔如春雪。何不醉挾羅敷採扶桑。燭龍移招合歡床。

慰梁非馨

爾明休便喪。雙眼好逢人。骨肉已看盡。肝腸誰最親。壁將明月立。門掩落花貧。只當長爲客。艱難剩一身。

無錫舟中偶成

過江纔幾日。次第品新泉。信宿山山翠。餐眠事事仙。香深花港月。茶入竹橋煙。覓得鐘聲寺。呼童復繫船。

雨夜懷徐巨源

高閣桐陰半。雲浮山翠香。經時枕詩卷。率爾興琴張。詞賦終難敵。行藏各自商。兵戈自天地。搔首計應長。

和劉安世園居

燕卽新堂乳。鶯多隔水鳴。鑿湖兼出石。惜樹小添楹。窗預圖秋色。蕉堪種雨聲。沙洲亭子路。鷗席故須爭。

揚州同諸公社集鄭超宗影園卽席詠黃牡丹

誰買長門作賦才。守宮砂盡故徘徊。燕銜落葉成金屋。鳳蝕殘釵化寶胎。三月繁華春夢熟。六朝芳草暮霞堆。上尊合賜詞臣關。邀賞還宜八駿來。

廣東新語。黎美周嘗客揚州。於鄭氏影園。與詞人卽席分賦黃牡丹七律十章。已糊名殿最。錢牧齋拔美周第一。鄭氏以書報曰。君已錄牡丹狀頭矣。以二金壺資之。其後美周過吳下。人皆稱牡丹狀元。

楊柳枝詞

參差楊柳又如齊。二月雛鶯上下棲。怪得多情青眼便。春風常笑雨常颺。

溪上晚步

餘杭城外石橋斜。不見清溪道士家。惟聽小姑閒唱曲。茜裙臨水摘梅花。

鄮露十三首

露字湛若。南海諸生。桂王立。以薦爲中書舍人。大兵下廣州。抱琴死。有嶠雅。

廣東新語。湛若爲人。好詠諧大言。汪洋自恣。以寫其牢騷不平之志。或時清談緩態。效東晉人風旨。所至輒傾一座。至爲詩。則憂天憫人。主文譎諫。若七哀。述征之篇。雖小雅之怨誹。離騷之忠愛。無以尙之。

漁洋詩話。鄮露著嶠雅。有騷人之遺音。

靜志居詩話。湛若工諸體書。學使者試士。以恭寬信敏惠發題。湛若制義五比。用大小篆八分行草書于卷。學使者大怪之。然不罪也。居恆以才畧自負。見海內多事。因學騎射。跨馬出門。衝縣令頭。臨令怒。申文學使者除其名。將加以桎梏。乃亡命之廣西。遍尋鬼門。銅柱舊蹟。遊于岑。藍。胡。侯。槃五姓土司。爲孺女執兵符者。雲輝孀書記。歸撰赤雅一編。紀其山川風土儀物。及女君。天姬隊歌。舞戰陣之制。家蓄藏真墨跡。享帚千金。素問業於香山。何閣老吾驕。閣老見而愛。甌不已。湛若分手脫贈。既而大悔。拏舟抵香山。升閣老之堂。欲自挂梁上。閣老亟還之。又蓄二琴。一曰南風。宋理宗宮中物。一曰綠綺臺。唐武德年製。明康熙御前所彈也。出入必與二琴俱。廣州城破。湛若抱琴死。綠綺臺爲老兵所得。以鬻於市。歸善葉錦衣解百金贖歸。至今在其家。詩曰嶠雅。手書開雕。極精楷。予嘗見其駢體文。亦佳。

全祖望鮚埼亭集外編。湛若先生大節不待言矣。顧其少時。曾入阮大鍼之門。大鍼文集。湛若爲之序。稱門生焉。蓋湛若少時

好聲樂。大鍼在留都。羅而致之也。非後來大節。則湛若澣不免爲奄人之徒。人所以貴晚詣也。湛若嶠雅係其手書開離。古香可掬。東莞袁督師曾於粵中邀贈證。非嶠雅無以知之。黎洲先生謂桑海諸公集可備詩史信夫。

明詩別裁。湛若詩原本楚騷。五言尤勝。五言佳處。全在氣韻。不求工於語言對偶之間。得此意可與讀湛若詩。

明三十家詩選。湛若詩清曠超妙。如月冷江空。孤鶴夜警。

田按。謝山謂湛若爲阮大鍼門人。余檢詠懷堂集。良然。嶠雅中所稱石巢先生。卽謂阮也。湛若大節自光天壤。不得以此爲累。集中五言律。具有謫仙意境。如蘇門清嘯。彷彿鸞鳳之音。

張侍郎家玉

供奉天廟姿。飛躍及犇馬。錐秦誤索韓。策漢動方賈。義聲振龍荒。號召遍區夏。逐日功詎虧。蹈海志迺寫。俠骨馨馬革。裂眦東城下。

登九子

朝參九華雪。莫宿九華鐘。言尋金舍利。行傍玉芙蓉。兩腳移春殿。雲衣挂亂峯。悠然秋浦月。來對海門松。

西湖上春

行逢新歲月。驕馬踏城橋。旭日催衝帶。春人豔柳條。香車流水擊。僊袂逐風飄。小鳳銜花去。空傷雲漢遙。

洞庭酒樓

落日洞庭霞。霞邊賣酒家。晚虹橋外市。秋水月中槎。江白魚吹浪。灘黃雁踏沙。相將楚漁父。招手入蘆花。



道明水望三十六峯

崇山道明水。皦皦石潭清。上有木龍樹。葳蕤聞鳳聲。開琴待明月。月向清溪生。三十六峯裏。羣仙抗手迎。蔣陵送孫枝遊華嶽

相逢彭蠡月。相失蔣陵鐘。自別東林社。君言西躡雍。金天開太華。玉井見芙蓉。余亦汎滄海。南山歸祝融。皖城謁石巢先生

披衣皖城口。言就皖城坳。辟世歸愚谷。移山到石巢。鶴林松露滴。魚浦荻花交。廡下聞清嘯。長謠賦樂郊。杏花堰訪紫浩隱居

楓林二月雪。雪霽問君家。玉笈芝房氣。銅陵杏堰花。更清躡出瀑。笙迴鶴梯霞。不注丹臺錄。吾生信有涯。人日登粵王臺

登臺試人日。此日謂宜人。日照高臺色。臺非故苑春。青山白雲路。綠水流花津。醉欲呼鸞去。遙遙芳杜鄰。文選樓眺望

春風將柳色。駘蕩入西樓。遊子褰簾望。宛如變女愁。雜花開陌樹。歸雁隔河洲。京國浮雲外。長江日夜流。姑蘇送雲將入雒

崇林秀春木。歸馬激鮮飗。濁酒不肯飲。旅懷何處銷。莫天吳苑樹。明月雒城橋。無絕尋君夢。緱山碧玉簫。

浮湘禮三閭墓田尋賈生故宅

浮湘孤月下靈渠。牢落殘魂伴索居。庚子日斜聞野鳥。端陽沙渥見江魚。天高未敢重相問。年少何勞更上書。此去樊城望京國。定從王粲賦歸歎。

後歸興詩乙酉六月

南北神州竟陸沈。六龍潛幸楚江陰。三河十上頻炊玉。四壁無歸尙典琴。蹈海肯容高士節。望鄉終軫越人嗔。臺關儻擬封泥事。回首梅花塞草深。

陳子壯十六首

子壯字集生。南海人。萬歷己未第三人及第。授編修。以發策忤魏忠賢削籍。崇禎初起諡德。擢少詹。進禮部侍郎。以言事下獄。放還。起故官。未上。京師陷。福王立。起禮部尙書。桂王時。進東閣大學士。兼兵部尙書。大兵克高明。被執。不屈死。贈番禺侯。諡文忠。乾隆中。賜諡忠簡。有練要堂集六卷。秋痕集五卷。

田按。忠簡集有罪言云。宗才改秩一事。疏三易稿成。乙亥十一月十六日。親齋上。時上修省齋居武英殿。聽數日。傳改票。又數日。傳有非祖問親。欺罔恣肆字樣。且下駕帖廷杖矣。越二十六日。奉旨。宗室有文武才能。考驗換職。正宜公同詳議。妥確以聽裁奪。陳子壯敢於非祖問親。欺罔恣肆。著革了職。刑部問擬。予擬席蕙在寓聽擬。政府使人謂曰。昨疏入。上改容推案。此番嚴旨。可畏。當小心就獄。不爲屈辱。毋甯囑強。後悔無追也。兒童送入圍門。刑部初擬杖。不准。再擬徒。得旨。准配贖。凡五閱月出獄。

時丙子四月二十四日也。而唐王聿鍵先四日有疏參予議禮不合。復啓故違格式。反覆數千言。欲構之重典。幸放釋後二日。奉旨。陳子壯已經處分。姑不究。史傳云。唐王上疏。詆子壯。遂除名下獄。非其實也。明亡後。魯王以海與唐正聿鍵立於閩。浙。唐王聿鏐又與桂王由榔割據於兩粵。無異蠻觸之爭雄。而其間貞臣義士。各爲其主。殺身沈族而不悔。若公之與巖野起兵攻廣州。事雖不成。其大節自磊落天壤。公詩律絕聲。蘊藉詞曲。亦婉麗動人。

### 補沈休文憶詩

憶起時。酣暈半不銷。粧鏡直須倚。鉛粉若爲調。唯應憐夜夜。乃復有朝朝。

### 送何龍友太史還朝

欖水臨將發。風流得雅裁。美人明月夢。仙吏白雲臺。海鶴招琴曲。江鷗勸酒杯。濯纓清可聽。不覺榜歌催。

### 宿吳宏文湖上樓

秋風餘十度。燕子爾輕過。鄉思登樓減。湖光下榻多。花開雲母帳。詩付雪兒歌。自己遷延甚。幽期更若何。

### 南浦不泊

秋色何迢遙。漚輕舴艋搖。多爲名姓累。遂畏友朋招。霞鷺堪孤起。風狔得並驕。南州紛在望。輿寄一長謠。

### 題綠珠祠梧州

逝水徒傳金谷園。荒山誰識綠蘿村。生辭故井難銷豔。命薄高樓敢負恩。燕子頻來多戀主。杜鵑噓斷爲

招魂。憑君一和懷儂曲。自有人將孤笛翻。

送劉半舫大司空總督河道

殿履新高面拜除。轉咨臣計重河渠。蛟龍始識園陵在。鴻雁終招澤國居。棠蔽東人更竹馬。葭明章曲自  
檣車。可知職貢千艘入。不礙飛流九派如。

九日

講殿陰移得暫閒。餈盤節宴已先頒。憶家夜損三秋夢。傳蹕朝登萬歲山。獨馬微風沙帽著。斷鴻新月菊  
枝慳。清時易許論勳業。消受光榮一醉顏。

送董思白大宗伯加太子太保予告馳驛

帝念先朝有秩宗。班階流輩盡雲從。近傳宮保歸黃髮。遙望天人問赤松。楊柳青門看祖道。桃花春漲憶  
吳淞。纖塵拌不隨清夢。還傍東華五夜鐘。

題水月菴

觸熱逢人自不勝。開寮茗飲當敲冰。失途時現抽衣寶。欲濟渾如禁足僧。蟬引一絃凡響寂。柏臨雙蓋妙  
香凝。亦知過去皆漚幻。莫話從頭有葛藤。

胥江曲二首

削竹青青作挽長。竹條雖小挽須強。峽口灘高郎斷挽。胥口灘深儂斷腸。  
三水西南舟已遲。不知郎去定迴歧。聲聲山鷓行不得。日日江頭歌竹枝。

美人操琴

梧桐入戶淨琴張。玉軫輕移已叶商。一曲還應神女聽。無人知道楚明光。

五日珠江曲

琵琶洲上載琵琶。碧玉粧成自小家。樓船裏面籠珠翠。亦學鄰舟叫買花。

留春詞

霸國江山錦作堆。一春無恙幾登臺。木棉花落嘯山鷓。歌舞岡前許再來。

賞花詞二首

脈脈含情望阻修。風光到此伴清遊。誰言不敢思公子。能寫花枝一段愁。  
匡床斗帳淨無塵。小有花枝逐節新。幾處花飛不成醉。眼前看醉賞花人。

陳邦彥三首

邦彥字會份。廣州順德人。隆武乙酉舉人。除監紀推官。遷兵部主事。桂王立。擢兵科給事中。起兵守清遠。城陷被執。不屈死。贈兵部尚書。乾隆中。賜諡忠烈。有雪聲堂集十卷。

靜志居詩話巖野僻居嶺南與黎美周歐子健陳喬生以文章聲氣遙應復社卒殺身成仁其南上草自序云商音曼歌慨常以懷亦各言其志也又臨命歌云書生漫談兵時哉不我與君子誦其詩而悲之

田按公子恭尹述公行狀明史據此作傳事實完備此史家所以貴採家狀也公殉節時走清遠朱氏園題詩於壁曰平生報國懷深望斷西方好音已共襄宏化碧還同屈子俱沈又曰懋爾孤懷盡懸絲一命微負傷如未覺無淚不須揮魚吮艱貞血水爲賻襚衣祇應魂氣在長繞玉階飛書畢赴池水淺不死檻車致之廣州死於市

丁亥仲春余歸自嶺右暫憩鄉園讀杜工部秦州雜詩因次其韻

物產川原盡生涯寇盜間無愁應岸柳不改是春山古戍饑烏集江村乳燕還未須愁遠道多恐淚痕斑  
薄遊

極目楓林外故園安在哉山川曾有約秋半未歸來暝色千峯雨江聲萬壑雷薄遊仍度峽鄉夢莫輕催

西征雜詠

名園春事動招尋一騎蕭蕭細雨侵最愛草亭西畔路玉蘭花發石潭深

梁朝鐘三首

朝鐘字未史番禺人崇禎壬午舉人唐王弟聿錞浮海至廣州朝鐘等擁戴立除檢討再遷祭酒事敗死乾隆中賜諡節愍有喻園集

蘭谿取道入靳水與都護汪祥麟偕有懷熊心開總理

幾年石室雨一半畫蘭谿此日看山色春風憶馬蹏麥漂橫水渡花落廟前泥征戰何時盡林深倦鳥棲  
送周仲謨遊海北

夏景行將及扁舟向雁湖舊城秦郡縣新綠漢莓蕪野戍春雲在離亭落月孤故山秋色好須待插茱萸  
海珠寺

南漢城邊菰葉落流花橋下水趨東煙籠碧樹春分後月浸寒江子夜中潮上石沈僧語歇笛殘人去蠟  
燈紅分明一幅蓬山景吹入鵝潭影自空

張家玉一首

家玉字玄子東莞人崇禎癸未進士改庶吉士唐王時擢侍講以右僉都御史巡撫廣信桂王立  
進兵部尙書兵敗投水死贈少保武英殿大學士吏部尙書增城侯諡文烈有名山西征燕山三  
集

王夫之南窗漫記東莞張太史家玉以全髮起義兵敗墮馬而卒家人刻其軍中遺藁有詩近百首唯記其一聯云真同喪狗  
生無賴縱比流螢死有光

田按玄子先迷後得卒能死節君子諒之

舟中月夜

渺渺長江水接天。帝京西望轉淒然。金戈鐵馬無甯土。錦纜牙檣有戰船。離亂烽煙叢此日。風流簫鼓換當年。誰堪舊日長安月。多照平沙白骨邊。



# 明詩紀事卷八

## 辛籤

朱繼祚一首

繼祚字立望莆田人萬歷己未進士改庶吉士授編修歷中允諭德庶子少詹事遷禮部侍郎以病去起南禮部尚書福王時召拜故官未赴唐王立進東閣大學士魯王監國舉兵應攻取興化城破死之乾隆中賜諡忠節

自靖錄莆田縣鄉紳朱繼祚以協理詹事府禮部尚書還閩拜相閩潰題其柱曰臣罪當誅生奚補死奚遲故國舊君安在帝臨有赫身可灰家可燼周頑殷義若何招箸戶王士玉等數千人據興化府入覲監國魯王於海中大清兵攻城將破賦絕命辭曰嗟予生兮不辰逢慘禍兮嬰身乾坤崩隕兮陸海爲塵日星掩晦兮萬象沈淪人誰無死兮鴻毛泰岳惟其所處兮殤延彭促旦夕畢命兮去將安之夫妻子母兮不得相依上告蒼天兮鑒此微詞雖爲齏粉兮安之若飴千秋萬古兮誰其予知與化俱徂兮於戲噫嘻城破被執不屈同子汝極死之

田按天啓六年魏閹擅權羅織正人特修三朝要典其總裁爲顧秉謙黃立極馮銓副總裁爲施鳳來楊景辰孟紹虞曾楚卿纂修爲徐紹吉謝啓光余煌朱繼祚張紳華琪芳吳孔嘉吳士元楊世芳凡與斯舉者士論不齒立望雖官通顯累以修要典爲清議所持罷去晚能死節人之所以貴晚蓋也余煌亦以死節傳

恩假旋里感賦

供直綸屏十月餘，平章底事竟何如。久知歇後推鄭五，敢謂辭榮附二疏。到處烟塵驚旅夢，故園花竹漫安居。出師未捷身先病，慚愧埋頭老蠹魚。

張國維一首

國維字玉筍，東陽人。天啓壬戌進士。除番禺知縣，擢刑科給事中。進禮科都給事中，遷太常少卿。以右僉都御史巡撫應天、安慶十府。進工部侍郎，總理河道，改兵部，兼督淮、徐、臨、通四鎮兵。拜本部尚書，以事解職，下獄，尋復官，督江南浙江兵餉。福王立，召令協理戎政，加太子太保。魯王監國，進少傅，兼太子太傅、兵部尚書、武英殿大學士。師潰，投水死。乾隆中，賜諡忠敏，有玉筍剩稿。

重遊白雲洞

不到幽巖十五年，昔遊猿鳥尚依然。流泉訴別鳴還咽，盤石標貞兀且堅。池上醒眠青眼放，松間醉倚白頭妍。晚尋歸路層雲鎖，便與山靈訂後緣。

張肯堂一首

肯堂字載甯，松江華亭人。天啓乙丑進士。除濬縣知縣，徵授御史，遷大理寺丞。以右僉都御史巡撫福建。唐王立，拜吏部尚書，加太子少保。魯王監國，加太傅、東閣大學士。舟山不守，自經死。乾隆

中賜諡忠穆

自靖錄。晉王監國駐蹕舟山。肯堂與沈宸荃並相。舟山陷。其門生中書蘇兆人闔門自縊。肯堂義之。爲之下拜而殮焉。遂服蟒袍。南面坐。視其妾周氏。方氏。姜氏。畢氏。璧姐。媿沈氏。孫女茂漪皆縊死。一女投荷池死。卽題絕命辭云。虛名廿載著人間。晚節空勞學圃閒。漫賦歸來慚靖節。聊歌正氣續文山。君恩未報徒憂瘁。臣道無虧在克艱。寄語千秋青史筆。衣冠二字莫輕刪。乃北向叩首自縊於雪交亭。

田按。張蒼水奇零草。有晚張覲淵相國詩云。一身真可繫危安。垂死威儀尙漢官。魂返黃墟應化碧。顏留青史卽還丹。千秋共惜遺金鑑。十載何慚戴鐵冠。也識公歸箕尾上。定依日月倍芒寒。紗籠姓字迴無瑕。晚節何如五柳家。欲報君恩餘白髮。祇留相業在黃麻。樓空燕子從風墜。門冷龍孫帶雨斜。一自鬢胎歌斷後。華亭鶴唳更堪嗟。垂死威儀尙漢官。蓋紀其臨難時蟒袍就縊。樓空燕子從風墜。蓋紀其諸姬同殉也。

九日同僚佐登大伾山卽事

筍輿到處卽山家。霜葉微紅欲作花。結伴入林皆惠遠。清譚出世總烟霞。月明交映藤蘿合。醉步多忘石徑斜。此夕幽尋不成寐。城烏嘯曙復朝衙。

張煌言五首

煌言字玄箸。鄞人。崇禎壬午舉人。魯王監國授行人。賜進士。加翰林院編修。擢右僉都御史。進兵部右侍郎。桂王立。加兵部左侍郎。兼翰林院學士。進本部尙書。大兵平滇南。散遣部曲。進居懸壘。

被執不屈。死于市。乾隆中。賜諡忠烈。有奇零草十二卷。冰槎集四卷。

徐孚遠。字彥士。其氣昌明而宏偉。其辭贍博而英多。蓋明堂之圭璧。清廟之賁黼也。

三岡識略。紹興張君煌言。仕魯藩。周旋海島二十餘年。後知事無成。散遣部曲。入普陀爲僧。至是就擒。賦詩見志曰。海島縱橫二十年。孤臣心事意茫然。桐江空繫嚴陵釣。震澤難回范蠡船。生比鴻毛猶負國。死留碧血欲支天。魯戈莫挽將頹日。敢望千秋青史傳。諸將重其義。欲降之不可。且曰。予窮海孤臣。豈知今日而復改節耶。詞氣慷慨。至死不屈。識與不識。莫不流涕。

南雷文定三集。宋明之亡。其傳之忠義。與不得而傳者。非他代可比。就中險阻艱難。百挫千折。有進而無退者。則文文山。張蒼水。兩公爲最。

姜宸英。湛園。未定。彙。公自督師。未嘗受強藩節制。及九江遁還。漸有掣肘。始怏怏不樂。而其歸隱於海南也。自製一棹。實糗其中。誓糧盡而死。邏卒至門。忽有二猿跳躑哀鳴。牽裙泥之。公乃毅然出就執。既被羈會城。遠近人士。下及市井。屠販賣餅之兒。無不持紙素至。羈所。爭求翰墨。守卒利其金錢。喜爲乞求。公隨手揮灑。應之。皆正氣歌也。嗚呼。天地晦冥。風霾晝塞。山河失序。而沈星隕氣。於窮荒絕島之間。猶能自出其光。誠以爲有目者之悲喜。而幸覩。雖揜抑於一時。要以俟之百世。欲使之終晦焉。不可得也。

鮑琦亭。集外編。尙書詩古文詞。皆自丁亥以後。才筆橫溢。藻采繽紛。大略出華亭一派。華亭陳公。人中爲節。推於浙東。行其教。尙書之薪傳。出於此。及在海上。徐都御史閣公。故與人中同主社事。而尙書壬午齊年也。是以尙書之詩古文詞。無不與之合。嗚呼。古來亡國之大夫。其音必淒楚鬱結。獨尙書之著述。嘈啾博大。含鍾應呂。儼然承平廟堂巨手。一洗亡國之音。豈天地間偉人。固不容以常例論耶。當是時。以曠灘繫背爲金湯。以鮫人疑戶爲丁口。風帆浪楫。窮餓零丁。而司隸威儀。一縷未絕。遺臣故吏。相與唱和。其遇雖窮。其氣自壯。斯其所以爲時地之所不能囿耶。

田按明社之屋久矣。公猶以殘兵支撐於天涯海角之間。訖二十年。艱阻崎嶇。百折而不悔。嗚呼烈矣。史不立傳。蓋有待也。至乾隆四十一年。得與樊忠之典。通諡忠烈。仁矣哉。

贈盧牧舟大司馬

自昔公爲兵使者。於時我作上書人。鑑湖一曲皆棠樹。碧海重逢並葛巾。劍氣終當開日月。履聲早已傍星辰。并州正有來蘇望。忍說桃源可避秦。

輓朱聞玄少宰

極目烽烟點鬢毛。間關已識義難逃。黍離社稷無薪膽。草昧朝廷有節旄。自許孤忠遺海岸。人悲啓事失山濤。臨風不盡招魂賦。那忍重看舊佩刀。

沈彤菴閣學艤舟南日山遭風失維不知所之雖存亡未卜余猶望其來歸也

昨夜驚濤勢轉雄。孤帆何處御長風。沃焦不信膠舟解。博望初疑銀漢通。欲問馮夷愁莫應。儻成精衛恨何窮。袖歸當有支機石。豈遂騎鯨向碧空。

弔沈五梅中丞

香臺咫尺渺人琴。萬里寒潮送夕陰。報國千年藏碧血。毀家十載散黃金。名山難壑孤臣骨。潮海空磨戰士鐔。留得荒祠姓氏古。春歸惟有杜鵑吟。

張書紳與范子瞻論余十餘年來戎馬勞苦孤危以詩見贈讀之悵然因次其韻

相業侯封非我望。伯圖王業向誰論。可憐節在旄全落。獨恨交亡劍尙存。上客攝衣空有缺。孤軍裹甲已無禪。也知戈朽難回日。誓死何妨絕影奔。

馮京第一首

京第字躋仲。慈谿人。僑寓鄞。唐王立授兵部主事。改監察御史。魯王監國。擢右僉都御史。進兵部侍郎。被執不屈死。有篋谿集。

續甬上耆舊詩集。馮公少負高才。諸父都御史元颺。兵部尙書元颺。世所稱大小馮君。東林之巨子也。公內承二父之教。出則師事蕺山。漳浦兩先生。退而與復社諸名士上下其議論。四方士子來謁大小馮君。必先登公之堂。公爲之次第。其姿詣而甲乙之。以進之二父之前。莫有失者。都御史撫津門。有牆子橫卻敵功。公豫其勞。殺宗錄之。尙未及用。公將從津門大興屯田。募勇士於膠、萊、金、復等地。自成一旅。以爲神京捍衛。其所舉已數千頃。而北都亡。南都奄禍大作。公不復入南中。乃遊於閩。而南都又亡。閩人奉唐王稱制。公上中興恢復十二論。召對慷慨。聲徹殿陛。思文大奇其才。授職方主事。已而改監察御史。按浙。甫入浙。而浙東陷。閩亦隨亡。公集慈水諸大俠。將起兵。而爲大兵所捕。乃跳身入潯州。潯州爲威虜侯黃斌卿所守。浙東之未入版圖者。也是時大兵雖定江南。而吳中豪傑出沒太湖。皆以潯州爲外援。尙書陳公子龍輩說松江提督吳勝兆來歸。而以帛書告潯州。欲得一軍應之。斌卿竟不欲往。富平伯張名振時在石浦。與公善。公勸之行。乃刻期以往。至崇明。颺風覆舟。沈侍郎廷揚死之。公等皆被執。中途得逃歸潯州。而松江以失期事洩。俱被戮。斌卿本志在自守。而名振之軍盡喪。公鬱鬱無可計事者。乃至日本乞師。不得。又責斌卿。令以奇兵西略甯、紹、台三府。會鄞之董給事志甯。華職方夏。楊推官文琦。以帛書連衡李侍

御長祥王職方翊而欲借潯州之師應之。乃告公公大喜。強斌卿從蛟關入。一日爲謝三賓所告。城中有備。長祥翊志甯亡去。更等死。斌卿速引還。公益鬱鬱不懌。乃之湖州。時太湖尙未靖。而公起兵於天目山中。大擾歸安。烏程諸縣。尋敗復歸。四明。乃募溪上義從。與王職方翊合軍守杜畧。大兵以圍練。兵破之。職方走天台。公匿山中。職方以天台之兵至。公亦振旅出。復合軍守之。時戊子之冬也。明年監國自閩中至。健跳所發使晉公都察院右僉都御史。是冬。再乞師日本。卒不得。還後與王職方合營於西山之回風洞中。初公以華董之故。刊章大索。大吏遂以其事聞。詔取家屬羈之京。公太夫人尹氏年高。夫人葉氏聞有徒燕之報。微言勸以自裁。毫不甚者。夫人嘆曰。婦無事不當聽命於姑。至今日難守此小諒矣。夜半投閣不死。強起縊而死。大帥又戮公子頌以脅公公。仍不至。太夫人遂徙燕。道卒。又得所寄妾於他所。令作書招公。妾曰。頭可斷。書不可作。卽作亦保公不降也。監國再加公兵部右侍郎。公憑依空山。偕大兵百餘戰。雖無成績。然亦屢挫大兵。庚寅。公麾下親將王昇私約降。械公於灌頂寺。支解死。

### 寄李研齋

在昔慚溫嶠。於今恨趙苞。國仇與家難。都逐礪灘潮。

### 錢肅樂一首

肅樂字虞孫。一字希聲。鄞人。崇禎丁丑進士。除太倉知州。徵授刑部員外郎。魯王監國。加太僕少卿。歷右僉都御史。右副都御史。兵部右侍郎。晉東閣大學士。贈太保。吏部尙書。諡忠介。乾隆中。賜諡忠節。有集二十卷。

田按魯王監國江上。驕將專權。紹璫干政。政亂於上。民困於下。變觸爭衡。闕於一隅。忠介上疏言國有十亡而無一存。民有十

死而無一生。識者早知其事之無成矣。錢公徒以舊國遺臣。支撐天墜。卒至憂憤以觸枕絕食而死。悲夫。

孤雲

孤雲無意緒。獨挂山之峯。聖賢尙神化。轍迹友蛇龍。鳥道八千里。關山一萬重。吾其奈何哉。洗耳空聞鐘。

陳函輝 六首

函輝初名煒。字木椒。改名後字木叔。臨海人。崇禎甲戌進士。除靖江知縣。福王立。起兵部主事。魯王監國。擢太僕卿。進兵部侍郎。兼侍讀學士。江上師潰。入天台雲峯寺。自縊死。乾隆中。賜諡忠節。有寒光集三卷。

自靖錄。函輝擁戴監國魯王。擢太僕寺卿。福建詔使至浙東。諸臣皆思奉詔。函輝獨上魯不臣唐疏。衆議不合。督輔張國維在江上聞之。力主函輝說。事乃定。未幾。遷侍郎。奉監國命聯絡溫台。江上師潰。自書年譜後云。徐陵五願。惟暫出家。文山七歌。尙思殺賊。函輝得死所矣。魯王入台州府城駐蹕。聞警欲避入解門衛。函輝哭入天台山雲峯寺。在僧湛明處。作自祭文。七七自讖文。埋骨記。乃賦詩別親友云。廉泉同義魄。萬古在禪林。故國千行淚。孤臣一寸心。深山空有恨。異日或相尋。身後遙爲託。應懷鍾子琴。又賦絕命詩十首。其一云。生爲大明之人。死作大明之鬼。笑指白雲深處。蕭然一無所累。其二云。父母恩無可報。妻兒面不能親。落日樵夫湖上。應憐故國孤臣。其三云。子房始終爲韓。函輝生死爲魯。赤松千古成名。黃蘗寸心獨苦。其四云。斬盡人間情種。獨留性地靈光。古衲共參文佛。麻衣泣拜高皇。其五云。去年六月廿七。虛度一年世法。但嚴心內春秋。莫問人間花甲。其六云。慧業降生文人。此去不留一字。惟將子孝臣忠。貽與人間同志。其七云。臣年五十有七。回頭萬事已畢。徒慚赤手擎天。惟見白虹貫日。其八云。手著遺文千卷。尙存副在名山。正學焚書並出。所南心史難刪。其九云。今日爲方正學。前身是寒



山子徒死尙多抱慙。請與同人證此。其十云。敬發徐陵五願。世作高僧法眷。魂遊寰海名山。身到兜律內院。投筆令僧遠屋。誦經從容扇戶。以襪帶自經死。

田接寒山五古質。慙有元道州遺意。近體近纖近俳。多爲公安派所染。令靖江日頗好內。以風流作仙。令名士悅。傾城自居。卒能死國。殆亦如文山。早近聲色。晚殉大節者耶。其赴選早朝詩云。聖主正當陽。銳意垂衣被。狹小前哲章。皇皇專求治。求治疑太急。求賢或太遲。有君而無臣。識者共嗟喟。三疊隙初兆。十漸幾旋備。外皆河北賊。內猶朋黨比。閭閻甚削窮。市井轉詭詐。反聞告密風。投匭紛羅織。雷霆失其時。蕭霜殺羣卉。昨聞下陳蕃。今見逐賈誼。此十數語。均中思陵之失。所謂如燭照數計者。

### 馬馱沙一名驥渚

靖自吳大帝時始成洲。蓋圍人蕃牧之地。故名驥焉。相沿立一墩守之。成化七年始改縣。直可謂草昧建侯耳。輝捧檄來。是中簡書可畏也。瘠土可懷也。恫而作詩。

良牧不病芻。良馬不愛秣。朽索馭天下。一方慎宰割。邦本民之心。釐舉皆厥末。孤城荒草深。近市艱作活。十年蛋君都。支祈挾旱魃。石畚半禳凶。窮戶死搜括。寡嫗路旁嘯。誅求老困康。青青子襟子。五月猶被褐。奉命長島中。下車增慘怛。委吏與乘田。何以副審估。既愧宓子堂。敢歌召公芟。安靖矢素心。先祛衆譏聒。良族共此庖。鉛刀效一銛。神駒起渥洼。千里亦騰越。

### 守官有小引

輝承乏荒江。不半年所而更調之檄數至。豈真以令也才。不過欲遺之艱大。試厥盤錯。駑馬負鹽。

車而登太行。伊可慮也。賴靖之士紳父老。遮道留使君。如申包胥。哭於秦庭。諸當事念其籲呼。得允所請。予愧獎借於上。臥扳於下。不素餐兮。何以畀之。乃作是詩。

張官如置器。唯其所布之。一民亦難狃。而況荒島黎。尸位鬼有責。曠鰥魚將噬。格哉先哲訓。弗以小不爲。靖雖五十里。土瘠俗久疲。哀鴻正在野。駭鱷未遠移。十室九罄懸。揮涕靡寸裨。穀絲環相迫。瘡肉痛獨貽。今自莅茲土。疾苦詢叟耆。祇有安靖心。弊祛福可禔。廉吏拙自守。讜才陋更宜。父老信其上。自我歌居居。先世清白譜。輒畏人所知。不謂芻狗質。誤受丹鉛推。題材於爨下。顧鴛以齧蹠。終歲檄五至。艱大相加遺。短綆而深汲。覆餗欲貽誰。尺書馳長吏。長跪三致辭。士故各有志。守官敢自欺。況從去秋後。孱軀困支離。胸旣藏二豎。鬢復織兩絲。以此勵臣朔。五斗甯樂飢。百姓敦親長。亦復戀恩私。願言借寇君。臥轍且築埤。仁風旣再見。古意殆未漓。庶幾少罪戾。兼以永撫綏。三徙名豈成。將無類奕棋。當路賴知我。慨然堅執持。自今矢初志。或不泣路歧。

閣悔

高閣在荒郊。主人夕鐻鑰。杖策偶問奇。清風滿林薄。鳥無城郭音。人解塵寰縛。顧視而樂之。橫琴命獨酌。河朔敢自詡。取意避煩虐。不如北窗人。游神友寥廓。羲皇去已遐。陶令不可作。三逕日就荒。秫田空負郭。豈是饑來驅。而爲一官瘼。鑄鐵凡幾州。到底不成錯。請讀歸來辭。悟者何今昨。

丹陽晚泊

江魚分饌野菱香。澤國秋來芋袂涼。斷岸有雲依小舫。孤帆隨雨宿前莊。漁歌唱晚茶初熟。雁影書空字幾行。因過丹陽懷古調。肯教皮陸霸詞場。

送李端木還茗上

島外風光似夜郎。清時隨牒類投荒。沙痕一曲紆村郭。漁市三家倚夕陽。豈有酒樓眠太白。過聞驛騎召賓王。漢皋亦只須臾事。解珮偏留話柄長。

河西新闢

忽思湖上宅。蘇白二公堤。放鶴孤山下。梅花隔水西。

詹兆恒一首

兆恒字月如。永豐人。崇禎辛未進士。除甌甯知縣。徵授南御史。福王時。擢大理寺丞。進本寺少卿。唐王立。拜兵部侍郎。攻開化。兵敗死於陣。乾隆中。賜諡忠烈。

靈壁道上

姹女如雲蠟板歌。月明輕棹泝廻波。只今隄上青青柳。曾見當年綵纜過。

吳鍾巒一首

鍾巒字峻伯一字穉山武進人崇禎甲戌進士除長興知縣謫紹興照磨遷桂林推官福王時授禮部主事唐王立進員外遷廣東副使未赴魯王監國拜通政使擢禮部尚書大兵下甯波入孔廟積薪自焚死乾隆中賜諡忠烈

鮑琦亭集外編吳公弱冠讀王文成公傳習錄悅之顧端文公講學東林執經從焉又遊高忠憲公之門而所宗主者爲孫文介公之困思鈔年未三十已獄獄稱人師門下江陰李忠毅公應昇其最著也崇禎甲戌成進士年五十有八矣知長興縣與諸生講學從之者如雲奄人崔璘巡視鹽糧令守見之蒲伏公獨不往及以公事見長揖不屈璘怒太守亦怒中以蜚語削籍既罷官卽有投老之意宜興再相頗以延攬清流爲事遣所知道意公笑曰公爲山巨源請容我爲嵇叔夜公爲富彥國請容我爲邵堯夫甲申聞國難絕而復醒曰吾友馬素修必死矣已而果然公憤士大夫多失節乃作十願齋說其一曰吾願子孫世爲儒不願其登科第其二曰吾願其讀聖賢書不願其乞纒於西竺之三車其終曰吾願其見危授命不願其偷生事仇舟山師潢公曰昔者吾師高忠憲公與吾弟子李仲達死闈難吾爲詩哭之吾友馬君常死國難吾爲詩哭之吾門生錢希聲聲從亡而死吾爲詩哭之吾子福之倡義而死吾爲詩哭之吾老友一旦疾病死何以見先帝謝諸君於地下哉公至文廟右廡從高坐積薪其下捧先師神位舉火自焚賦絕命詞曰只爲同志催程急故遣臨行火浣衣時年七十有五

聞李仲達訃寫哀

落落心期在悲吟寄大招迷離南北樹淒斷去來潮黨禍今何烈清風古不遙應知首陽側孟博已相邀

楊文瓚一首

文瓚字贊玉鄞人崇禎己卯舉人魯王監國授御史起兵事洩死於市乾隆中賜諡烈愍

拜正學先生祠

一死貞心天地知。龍山崇建報忠祠。嘯鷗十族甘爲血。扣馬千秋更有碑。落日平原理舊恨。淒風古木積新悲。遺編未泯猶堪讀。哭向蒼天問所私。

林尊賓一首

尊賓字燕公。莆田人。崇禎壬午舉人。唐王時授兵科給事中。大兵下興化。死之。有雁園集。

蘭陔詩話。燕公從朱孚岡起兵。及興郡城破。燕公具衣冠坐廳事。作絕命詩別其兄。師入。大呼曰。我給諫林尊賓也。速取頭顱去。遂見殺。

南山行

南山起雲。北山起電。孤身中央。不知其變。解一平村落虎。四鄰伐鼓。雖則伐鼓。不如伏弩。解二河水淫淫。人知其深。下有游魚。上有飛禽。解三風雨蛟龍。以類相從。鳴鳳無陽。不如寒蛩。解四東園種瓜。西園種麥。澆石生苔。何時可摘。解五

林洵一首

洵字習修。東莞人。諸生。與張家玉起兵。事敗死之。

寄門人張芷園閩中

明詩紀事 辛籤 卷八

聞君江上擁旌旄。共羨書生膽氣豪。家學舊傳黃石略。漢恩新賜紫貂袍。一身許國風霜苦。半壁支天汗馬勞。此日艱難知不惜。沙場麟閣屬吾曹。

# 明詩紀事卷八下

## 辛籤

鮑琦亭集外編跋。明崇禎十七年進士錄。嗚呼。此結有明一代之局者也。高皇帝三百年鼓鐘之澤。烈皇帝十七年夢卜之誠。於是乎燔。是科以邊警阻隔。貢士之副計車者不能前。詔書特改試期於秋仲。倥偬釋褐。未及題名太學。而國已亡。通州閣學由庚辰進士第二。不三年遽大拜。又驟越同事三相。副井研閣學主省試。蓋遭遇之曷隆者。鼎湖之役。井研已賜歸。徘徊闕下。借通州蒲伏賊營。以遭戮辱。而相傳是科館選。流賊密令山西巨商主之。凡求讀中祕者。巨商卽招致之。爲納賂於宦者。無不得。及城陷。牛金星大言曰。新翰林尤宜速報名。諸人始悟前此來招致者之爲賊也。內負疚而外畏禍。逡巡而出。盡汗僞命。第一甲三人無論已。三十六庶常。不得免者三十四。嗚呼。是館閣未有之恥也。以是知君子之守身。必無可資緣幸進之理。而當時苞苴之詭如此。亦不可謂非亡國之君矣。予嘗得流賊所授降臣官簿一冊。頗與諸野史所紀不同。金壇周鍾以勸進撰表得檢討。最幸。夷陵黃燦納貨五千得編修。華亭朱棨引見同年得檢討。西鄉楊棲鸞得直指。豐城史垂鑿。寧化李呈祥並得禮儀從事。嘉善魏學濂得戶司務。晉江楊明煊得順天安撫。晉江張元琳得關門防禦。遂平魏天賞得兩淮運副。東莞張家玉。大典史可程。懷甯劉餘謨。真定梁清標。安福劉肇國。山陰魯粟。昆明龔鼎。韓城李化麟。晉江王九雲。會稽王自超。新喻萬發祥。皆以庶常留館。下此則盡改爲縣令。南昌羅憲汝得遷安。番禺劉廷琮得內江。麻城傅學禹得長安。杞縣何胤光得井陘。陽城白胤謙得南鄭。淄川高銜得襄陵。掖縣張端得仁壽。項城趙穎得大名。武陵胡統虞得曲沃。清苑張元錫得武功。大名成克鞏得華陰。崇德吳爾撫得蒼溪。就中惟張家玉不入朝。捕至不拜。縛嶺門者五日。釋之。遂投書喻賊。賊又臨以刃。不動。賊必欲授以

官家玉忽遜詞受之。人皆疑焉。不知其以此乘間而逃也。萬發祥則爲耳聾。且毀面。賊怒夾之。亦逃去。吳爾壘詐爲將之任者。得逃。其後家玉殉於增城。最烈。發祥殉贛關。爾壘殉江都。蓋三十四人中之孤鳳也。魏學謙亦終死。要不失爲晚。蓋其餘則皆已矣。幸得不預者二人。達州李長祥。其後間關戎行。累起累蹶。事敗行遯。不知所終。最稱完節。而其一亦不終。散官則全椒吳國龍。待詔。宜興吳剛。思得禮儀從事。清苑王爾祿。得戶從事。無錫秦沂。得禮司務。并研胡顯。得中書。常熟歸起。先得西京留守經歷。安邑呂崇烈。得屯田防禦。鄞縣徐家麟。得山東防禦。涇陽武慄。得淮陰防禦。安邑王道成。得青州防禦。宛平楊繳。得揚州府尹。掖縣姜金胤。得口州府尹。全椒吳國鼎。得濟甯令。津江程玉成。得山西學正。而如吉水鍾性。樸之降於路者。尚不在此數焉。龔鼎。程源。再亂滇中。嗚呼。有明中祕。禮絕百僚。而甲科亦最重於流輩。一時喪亂。士失所守。竟攘攘至此。悲夫。南中解尚書。龍再定六等逆案。傳聞不甚有據。如家玉。發祥。反誤入之。而得脫者甚多。後世將何所信焉。予之詳錄而不諱也。殆以爲百世之戒。雖或觸孝子慈孫之恨而不恤也。雖然。莫謂是科之人止此也。澤州孟章。明隨其父刑部侍郎兆祥。殉京師。清苑張羅俊。與弟光祿卿羅彥殉保定。三原石崑。以佯狂死。南中之亡。歙縣凌嗣。殉河南。孟津陳燻。殉洛陽。鄞縣周志畏。殉江都。無錫龔廷祥。殉江甯。江都梁于淡。殉萬安。崑山顧咸。建殉錢唐。其起兵者。掖縣劉允浩。殉建昌。溧陽史夏隆。殉吉安。烏程溫瓚。殉休甯。華亭李待問。殉華亭。嘉定黃淳耀。殉嘉定。宜興盧象觀。吳江吳易。殉太湖。而長洲劉曙。亦以謀起兵死。閩中之亡。江都鄭爲虹。殉仙霞。廣安歐養素。南昌熊緯。殉汀州行營。晉江郭符甲。殉晉江。其守贛而死者。京山楊文薦。錢唐姚奇胤。南昌龔棻。而休甯吳聞禮。殉永豐。南昌周定初。殉廣信。浙東之亡。吳江汪景亮。殉三衢。海甯俞元良。殉海甯。錢唐徐復儀。殉會稽。監國魯王入國。莆田林帽。海甯湯棻。殉興化。侯官林空。殉福清。而閩縣林之蕃。亦以謀起兵死。粵中則山陽朱日昇。家居以通表事洩死。孫賊之難。嘉定羅國瓚。殉虔南。晉江郭承汾。殉貴陽。而宜興吳貞毓。亦以孫賊死。滇中之亡。廣安鄧思廉。殉緬甸。其遜入海島而死。終不食周粟者。慈溪馮元嘏。同安沈倅。期嘉興譚良良也。此外如雲南楊永言。會稽余若水。青浦張若巖。山陰金廷詔。鄞縣周齊賢。餘姚李安世。遂甯呂潛。嘉善錢默。順天李孔昭。皆固守殘山剩水之節。以終其身。嗚呼。觀於前此四十餘人。十五宗之



所飲泣也。觀於後此四十餘人，亦足以雪死者之恥矣。

### 吳易五首

易字日生，吳江人。崇禎癸未進士。福王時授兵部主事，監史可法軍，募兵屯長白蕩。唐王立，授兵部侍郎，進尙書，兼都察院右副都御史。魯王監國，封長興伯。師敗被執，死。乾隆中，賜諡節愍。有東湖倡和詩。

自靖錄：甲申三月，京師陷。五月，南都立君，久之而不聞爲先帝討賊。易遂發憤，與同邑舉人孫兆奎、諸生沈自馴、沈自炳、武進吳福生、徐安遠、警衆舉兵。旬日間，得水師千餘人，屯於五湖三泖間。出沒多近諸縣，轉戰互有勝負。既而援絕勢孤，且兵皆烏合，不堪大戰。夜潰，易父承緒、妻沈氏、女吳氏等全家赴水死。易僅以身免，乃收集散亡，與浙東爲聲援。以梅墩之捷，連晉顯要。丙戌六月，浙東亦潰，易乘小舟遁去。匿嘉善錢氏園中，爲仇家所執，解浙江。不屈，作詩數章，意氣自若。死於武林之草橋門，年三十五。無子。義僕周孝相依不去，同邑友人包捷瘞其遺骸。

百城煙水，東湖草堂在柳背。吳日生易所居，與史弱翁、趙少文有東湖三子唱和集。

靜志居詩話：啓禎之間，風雅浚替，古風尤置不講。日生奮跡松陵，誦六公詠，原本杜老八哀之作，是時第知臥子有起衰之功，然臥子豐縵，日生戍削，各有其長。

### 辛巳秋七月觀漕船臨發紀異

往年漕船制過洪，必三月。今年七月秋，漕船始見發。撫時興萬慮，國命心所切。荒哉久紆滯，觸眼重驚惕。東南四百萬，仰給須旦夕。吁嗟支兌廢，運道直如髮。清淮隔會通，黃流此中截。洪波挾濁沙，歲歲苦衝沒。

呂梁平徐城。厥勢更險絕。譬之馴虎豹。時復被吞齧。避黃全用汶。羣議得長策。穿沕達夏鎮。新河乃加闢。駱馬後復通。兩朝見底績。所未開石滌。事便功易掇。安流洵無虞。失防在枯渴。汶勢誰最高。南旺爲之脊。北分白衛入。南引沂泗接。泉湖相輔佐。湖六泉三百。封遏使其贏。所以時蓄洩。曩時正全盛。神人兩安悅。桃花汎春瀾。銜尾萬艘捷。暑盡事云竣。中秋動歸楫。當茲風潦清。迴帆想超越。胡爲沮江干。牽挽方据拮。吾聞秋冬交。水工急挑刷。湖陂久淤澱。泉源爭盜竊。啓視不盈掬。經川盡焦圻。河臣初經綸。盡瘁毀心骨。人功匪不臧。適此天行厄。俗宗意如何。牲璧忍衰歇。回空旣守凍。冰泮始滑滑。及乎抵水次。春徂夏已迫。強半壅不來。官差捉船隻。此鄉同亢旱。草樹代魚麥。斛米數千錢。蒼生苦貴糴。軍旗志豈壓。咤叱恣狼藉。仰維軍國憂。孰敢愛膏血。伏願道路平。飛送到京闕。羣盜滿中原。青齊暗長戟。孤懸止一道。何以禦倉猝。臨發意無憑。鼓聲雜鋒鏑。軍船旣徬徨。民船尤慘戚。傷心述祖制。四倉何絡繹。豈獨備非常。兼規數年積。漕事凡五變。經始平江伯。是法祖劉晏。富強垂石畫。臨徐宿重兵。況可杜萌隙。簡練得其人。護漕皆勁卒。輓輸疾無時。夫何患淹格。近議復海運。所懼非漂溺。出淮鑿膠萊。取道良徑帖。襟喉委榛莽。此計無乃拙。自今霜月涼。冉冉青楓赤。逡巡忽後時。千里增冰雪。安得傾天河。懽笑歌利涉。川竭古所誠。廟堂有調燮。

東湖雜詩三首

大澤千年在。英雄一戰場。魚鼈出古戟。燐火聚頽塘。沙走三江白。風驅百瀆黃。怒濤東到海。流恨總興亡。

浩蕩晴波遠。森疏古岸秋。沙明矜獨鶴。風澹悅羣鷗。此日五湖長。浮雲萬戶侯。臨淵尋片石。真欲老披裘。柴門聞獨嘯。史趙日經過。四海煙塵半。三人涕淚多。富強書共論。出處事如何。爲歎龐公隱。仙雲掩薜蘿。

亞父冢

河決川原幾變更。高邱何事獨崢嶸。五陵王氣銷煙草。玉斗千年恨未平。

楊文薦一首

文薦字幼字。一字又如。京山人。崇禎癸未進士。除南兵部主事。唐王立。遷兵科給事中。以右僉都御史巡撫南贛。加兵部侍郎。守贛州。城陷被執。絕粒死。乾隆中。賜諡忠節。有茗溪集。

自靖錄。楊文薦以兵部武選主事入閩。改兵科給事中。丙戌五月。奉使湖廣。道出江西。適座主萬元吉督師贛州。留與協守。陞巡撫。文薦歎曰。誰非王臣。忍使吾師獨爲君子乎。吾當死此矣。日夜登陴。積勞成病。十月城陷。被執不屈。執送南昌。提督親解其縛。曰。公宜識時務。毋徒自苦爲也。文薦曰。吾受命撫贛。贛亡則吾當死。毋多言。斷吾頭懸贛門。以謝贛人。絕粒數日。嘔血數升。丁亥元旦。強扶下榻。南向哭拜。一痛而絕。

西湖竹枝詞

殘夢驚心睡起遲。春情春雨惱花枝。畫樓無限傷心事。都在湖邊十二時。

易本煨雲杜故事。京山楊文薦西湖竹枝詞。蓋南都已覆。公由浙入閩時所作也。公所著聽湘集久佚。其僅存者。京山志二詩及此耳。

萬發祥一首

發祥名養正。以字行。新喻人。崇禎癸未進士。改庶吉士。唐王立。授編修。兼兵科給事中。大兵下贛州。殉難死。乾隆中。賜諡烈愍。

自靖錄。萬發祥。崇禎癸未進士。同凌嗣。陳熈。吳易。出吳忠節公麟徵之門。甲申遇國變。閉關南旋。寓居吉安。賦哀哀吟以見志。丙戌。在贛州死之。

寫懷

袁字難爲歲。棲山且有身。燕鶯春事老。豺虎世途屯。中夜嚴天告。窮年望俗淳。公圭如可用。先事席儒珍。

溫璜一首

璜。初名以介。字于石。烏程人。崇禎癸未進士。除徽州推官。城陷自刎死。乾隆中。賜諡忠烈。有寶忠先生遺集十二卷。

靜志居詩話。溫公少孤。母陸孺人鞠之。破屋一間。無帷帳。姑沈病且餓。同坐臥一板箱。種火煨粥以爲食。教其子讀書。姑卒。孺人哀毀如子。天啓七年。公請於有司。聞於朝。詔旌其節孝。又一十八年。而公成進士。年六十矣。司李徽州。聞國難。恆引佩刀歎曰。此身當付汝。及城破。先殺其女寶德。次殺其妻茅。妻女皆延頸就死。乃自刎。公初名以介。注名復社第一集。不以兄在相位。見預於清流。後禱夢於于忠肅祠。夢忠肅語之云。子不當名以介。宜更曰璜。遂更焉。陸孺人著有家訓行于世。鮑增亭集外編。公於體仁落落。而閭訟事則頗不以復社之言爲當。方南都以防亂揭。遂阮大誠。公曰。阮大誠爲真小人。錢謙

益則僞君子。眞者易知。僞者難測。斯人得志。卽小臣亦當裂麻爭之。

田按。寶忠集中有見聞偶錄一卷。皆爲體仁昭雪之詞。又壽家少師六套序。文章理學。節義功業之頌。不一而足。皆爲誣罔之言。此可謂不知天下有公是非也。其涉世偶錄有云。天下事儘有逃遁不得。便可立地決絕。挺起脊梁。掀著鬚眉。濟不濟。落得轟轟烈烈。此其行能踐言。守徽州而死難也。一節千秋。豈不諒哉。

### 獨立

壇坫滿天下。吹氣與雲通。鳳鳥莫與匹。抱潔懷孤桐。人世尙膠結。獨立誰相容。所不患增繳。慮其有物蒙。譬彼薦蘿託。纏擾同其凶。狗謗莫非命。君子省厥躬。

### 楊永言一首

永言初名瀾。字岑立。昆明人。崇禎癸未進士。除崑山知縣。流寇陷雲南。巷戰死。乾隆中。賜諡烈愍。滇南詩略。楊公哭莊烈帝詩云。天步艱難可奈何。九重無計起沈疴。幸除閹寺滔天惡。忍見滇他捲地波。虛席求賢賢獨少。禁人納賄賄偏多。問誰專閹誰當軸。致此秋風麥秀哥。後四語明季之弊。實亡國不由。聲淚俱下。

### 舟行

歸路迷芳草。鄉思倍黯然。詎期遊子權。漫附使君船。江繞青山曲。心隨白日懸。不堪停泊處。涼月慘嘯鵲。

### 梁于涖二首

于涖字飲光。一子滿至。江都人。崇禎癸未進士。福王時。除萬安知縣。城陷投水死。乾隆中。賜諡節。

感有谷菴詩集

揚州府志于浹少有詩名與鄭元勳鄭爲虹等結竹西續社元勳影園開黃牡丹遠近徵詩以番禺黎遂球詩第一于浹次之

小閣賞梅同許倩蘿餞送辟疆盟兄之衡永

新築茅堂貯風月。雪後山花盡力發。有意招君君忽來。吞花臥雪真癡絕。君來江上故多情。藁蘋齊葉白芷生。何事江頭不肯住。十里晴煙散香霧。鉤鉞潭邊竹樹幽。胡不從君天上舟。錦香和處輕離別。玉壘高寒託蹇修。此番識得漫郎意。欲遣徐緩續春思。妬花風雨不可期。判誰護惜待君至。

哭萬茂先

海內存聲氣。遺骸爲爾收。囊空書劍在。人去詠歌留。楓冷楚江月。蘭摧隋苑秋。懷君存短什。迸淚湧江流。

李待問一首

待問字存我。松江華亭人。崇禎癸未進士。除中書舍人。守松江城陷死。乾隆中。賜諡忠節。

南吳舊話錄。李舍人當松江將失守。百戶某挽之曰。聞君讀爛四書。今日將安之。舍人笑曰。臣死忠。古人常事。弟下城與家一訣。稍盡其私。百戶曰。君能如此。我先斷頭。待之泉下。卽拔刀自刎死。舍人懸尸而哭。倉卒抵家。少妾挽衣涕泗。衆爭勸之逃。舍人曰。若一旦苟活。夢寐何以對此老兵。引繩自經。氣未絕而追者至。遂遇害。

松風餘韻。舍人性嗜臨池。遇筆墨無論精拙。輒爲濡染。聲價與文敏埒。

廣陵同鄭超宗諸子郊外宴集

並轡出春城。春山帶郭明。穿林遊屐亂。隔水麗人行。有酒聊隨俗。無營且樂生。眼看車馬盡。邱壑幾關情。

林嶠三首

嶠字小眉。莆田人。崇禎癸未進士。除吳江知縣。唐王立。除禮科給事中。興化破。死之。乾隆中。賜諡節愍。有彭蜩集。

十五國風高言集。董蒼水曰。小眉筆有靈氣。胸無滯藻。

蘭陔詩話。小眉幼有神童之譽。爲人磊落負奇氣。從朱相國起兵。及師敗被執。在獄中草絕命詞三首。嘔血數斗而卒。其詩取法青蓮。當時詩社中之巨擘也。

越王臺

水國何年闢。中央駕碧臺。靈妃不可見。遺迹白雲開。宮樹參天出。江帆逐霧來。至今秋色裏。環珮玉聲哀。

吳素求守紹興。念予安先生新有西河之恨詩。以訊之。

君到紹興日。鶯花作好春。此時探耆舊。我友正風塵。地下憐埋玉。人間恨積薪。無由一相慰。淚落自霑巾。

江行

小港纔通市。孤亭不礙山。杜鵑嘯竹外。別有巴陵灣。

石磴一首

蔭字長卿。一字映崑。三原人。崇禎癸未進士。聞北京破。不食死。乾隆中入祀忠義祠。

西安府志。長卿少好騎射。尤善古文詞。癸未聯捷。憤時政。擬上書爲權貴所遏。賊入秦。曲沃李建泰督師。長卿慨然請纓。願復三邊。自黃甫川渡河。聯絡榆中。靈夏。建泰不能從。遂憤鬱成疾。避地江南。甲申五月。聞北都陷。痛哭數日。不食死。湖口友人劉湘客經紀其喪。

入京時詩

從來趙括易言兵。寇盜於今盡據城。幾點烽煙銷漢壘。萬家風雨泣長平。將軍格鬪徒持戟。文士空談欲噉名。密邇晉陽憂不細。誰能先立亞夫營。

凌駟一首

駟字龍翰。休甯人。崇禎癸未進士。除兵部主事。福王立。授浙江道御史。巡安山東。改河南。大兵下。歸德。自縊死。

偕陳涉江訪劉伯宗以詩見贈用韻奉答

觸途得坎壈。境躑心自休。長安寡知交。鍵關絕繁稠。北騎便橋南。敢代墨者憂。一聲驚碎琴。舊友來相儔。顏色照青松。志合以不謀。聞聲懷徵君。天祿方校讐。出處卜安危。元勳疊相求。乘軒來燕都。風雲會於留。仰止兩君子。雙鳳儀青邱。啾啾聚紫庭。胡爲雜鷓鴣。温然服德音。襍裂增重裘。



# 明詩紀事卷九

## 辛籤

何騰蛟一首

騰蛟字雲從。黎平五開衛人。天啓辛酉舉人。除榆次教諭。遷介休知縣。改汾陽。南陽徵授兵部主事。歷員外郎。中出爲懷來兵備僉事。改山西口北道。以憂歸。起淮徐兵備僉事。擢右僉都御史。巡撫湖廣。福王時。拜兵部侍郎。兼撫湖南。以故官總督湖廣。四川。雲南。貴州。廣西軍務。唐王立。拜東閣大學士。兼兵部尚書。封定興伯。永明王立。進武英殿大學士。加太子太保。再加太師。進爵爲侯。大清兵下湘潭。被執不屈死。贈中湘王。諡文烈。乾隆中。賜諡忠誠。

張應詔。國朝集。文信國公宋末。竭力盡忠。輔二王。何文烈公明末。竭力盡忠。輔三王。險阻艱難。其時同。其勢同。其志同。元執信國公於五坡嶺。張宏範曰。國亡。丞相忠孝盡矣。能改心以事宋者。事今。將不失爲宰相矣。信國公。竝然出涕曰。國亡不能救。爲人臣者。死有餘罪。况敢逃其死而二其心乎。國朝執公於湘潭。遺之書。其略曰。今天厭於明。神器有主。尙思收既覆之水。然久死之灰。棄身不顧。而單騎被執。心與文文山一轍。而境遇之艱難。倍蓰過之。忠貞亮節。誰不憐惋。先生之道盡矣。若肯承合天意。知命來歸。當不讓洪承疇之一席也。公報書曰。某少壯從王。運逢屯蹇。甲申三月。自分一死。所以苟延至今者。思躡汾陽後

塵也不意志切才疏。致滋狼狽。負恩辱國。臣罪當誅。尙可苟延人世乎。邱墓妻子不敢顧。頭可斷。心可剖。先王先公。實式憑之。不爲利動。不可威劫。百鍊之剛。又自相同。信國公。過金陵詩曰。從今離去江南路。化作鸞鷗帶血歸。公自悼詩曰。盡瘁未能時已逝。年年鷓鴣血染宗周。其慷慨悲歌也。無乎不同。

述懷

列祖艱難業。諸臣敗亂重。揭竿何太夥。制梃竟誰從。國是成剝肉。軍謀競養癰。劇慚心力竭。無計埽羣凶。

瞿式耜一首

式耜字起田。常熟人。侍郎景淳孫。萬歷丙辰進士。除永豐知縣。改江陵。未赴。擢戶科給事中。坐事下獄。贖徒。福王時。起應天府丞。以右僉都御史巡撫廣西。唐王立。擢兵部侍郎。不赴。永明王立。進吏部侍郎。東閣大學士。留守桂林。進文淵閣大學士。兼兵部尙書。封臨桂伯。大清兵下桂林。死之。贈少師。建極殿大學士。吏部尙書。粵國公。諡文忠。乾隆中。賜諡忠宣。有集。

崇禎忠節錄。瞿公受命時。門下士吳江楊藝字二癡者。衣衰絰。號哭於營中。見文武將吏。卽叩頭請收葬。凡二日。聞者感動。令備棺衾殮焉。常熟馮班有過臨桂。伯墓下詩云。馬鬣悠悠宿草新。賢人聞道作明神。昭君怨氣衰弘血。帶雨和煙又一春。

梅村詩話。稼軒爲給事中。好直諫。爲權相所訐。與其師錢宗伯同罷歸。築室於虞山之下。曰東臯。極遊觀之勝。酷嗜石田翁畫。購得數百卷。爲耕石軒藏之。未幾。里中兒畫文誣染。借宗伯逮就獄。余時在京師。所謂東臯草堂歌者。贈稼軒於請室也。後數年。余再至東臯。則稼軒倡義粵西。其子伯升門戶是懼。故山別墅。皆榛蕪斥賣。無復向日之觀。余爲作後東臯草堂歌。蓋傷之也。又二年。知稼軒以相國留守桂林。城陷不屈。與張別山俱死。別山者。江陵人。故相國文忠公曾孫。諱同敵。爲督師司馬。稼軒

臨離遺表曰。庚寅十一月初五日。聞警。開國公趙印。遷移營先去。衛國公胡一清。甯遠伯王永祚。綏甯伯蒲縵。武陵侯楊國棟。甯武伯馬養麟。盡室而行。唯督臣張從廠。從江東泗水過江。相期同死。其赴義則閏十一月之十七日也。梟囚一月。兩人從容倡和。稼軒得詩八首。曰。二祖江山人盡擲。四年精血我偏傷。又曰。願作須臾階下鬼。何妨慷慨殿中狂。別山和章云。棲棲瘦骨不成眠。祖德君恩四十年。腰膝尙存堪作鬼。死生有數肯呼天。又云。白刃臨頭惟一笑。青天在上任人狂。又云。亡家骨肉添新鬼。多難師生共哭聲。又云。此地骨原堪朽腐。他時魂不待招尋。二公死有舊給事中後出家號性因者。收其骨。義士楊碩輔藏其稿。稼軒孫昌文間關以歸。以其詩與表刻之。吳中爲浩氣吟云。別山死事最烈。其未死也。受拷掠。兩臂俱折。目睛出。語不爲撓。稼軒有初六日紀事詩云。文山當日猶長揖。堪笑狂生禮太疏。別山和云。臂先頭斷生堪賤。身爲城亡計豈疏。衛木焉知舌在否。傷睛自笑眼多餘。此其被刑事也。稼軒以義命自處。從容整暇。詩云。死豈求名地。吾當立命觀。又自艾曰。七尺不隨城共殉。羞顏何以見中湘。蓋指何公騰蛟以殉。雖封中湘王也。若兩公者。眞可謂殺身成仁者矣。

### 獄中

年逾六十復奚求。多難頻經渾不愁。劫運千年彈指到。綱常萬古一身留。欲堅道力憑魔力。何事倅囚學楚囚。了卻人間生死業。黃冠莫擬故鄉遊。

### 張同敞一首

同敞字別山。江陵人。大學士居正曾孫。崇禎中。以蔭授中書舍人。唐王時。改指揮僉事。永明王立。拜侍讀學士。改尙寶卿。擢兵部侍郎。總督諸路軍務。大兵下桂林。被執不屈死。乾隆中。賜諡忠烈。有純忠堂集。

殷頑錄。張同敵。江陵相居正曾孫。蔭中書舍人。令往雲南調兵。兵至江西而國變。永明王時。累擢兵部侍郎。總督衡永兵。庚寅冬。大兵圍桂林。同敵自靈川赴桂。謁留守瞿式耜曰。事迫矣。將奈何。式耜曰。封疆之臣。當死封疆。同敵曰。君恩師誼。敵當共之。敵。式耜門人也。明日同就執。十一月。同戮於城北風洞山下。

自訣

一月悲歌待此時。成仁取義有天知。衣冠不改生前制。名姓空留死後詩。破碎山河休葬骨。顛連君父未舒眉。魂兮莫指歸鄉路。直往諸陵拜舊碑。

郭之奇四首

之奇。字仲常。揭陽人。崇禎戊辰進士。選庶吉士。改禮部主事。歷郎中。出爲福建參議。桂王時。授文淵閣大學士。吏兵二部尙書。被執至廣西省城。不屈死。乾隆中。賜諡忠節。有宛在堂集三十四卷。

舟暮對秋山有感

清溪含素秋。蕩漾令人愁。如何碧山色。蕭條對此流。霜葉飛斜照。疏煙縈晚洲。日暮不自聊。蟋蟀鳴啾啾。

舟夜彈琴

舟宿寄幽林。難了清夜心。冥神外喧寂。發我靜中音。遂然林月開。滅燭光已臨。曲罷歸煙水。浦溆各淒深。

春閨

池前君栽柳。君去碧絲長。不解留君住。偏能斷妾腸。

捨陸就汀州喜見家鄉在卽

青山頻過不知名。但憶鄉關此送迎。昨夜歸魂先識路。秋風吹向綠榕城。

范文光一首

文光字仲闇。內江人。天啓□□舉人。歷官工部主事。南戶部員外。告歸。張獻忠寇蜀。舉義兵。奉鎮國將軍朱平櫛爲蜀王。除副使監軍。永明王立。拜右僉都御史。巡撫川南。大清兵克嘉定。仰藥死。乾隆中。賜諡忠節。有石鼓山房詩集。峩眉集。

峩眉山萬年寺送費此度往榮經省親

敵衣猶賸老萊斑。負米雖歸不是還。世到亂時都作客。途當險處更閒關。幾年草檄伸孤憤。累月移家近百蠻。瓦屋峩眉俱歷遍。滿頭風雪當遊山。

揭重熙一首

重熙字祝萬。臨川人。崇禎丁丑。以五經成進士。除福甯知州。福王時。擢吏部主事。唐王立。遷員外。兼兵科給事中。擢右僉都御史。桂王立。拜兵部尙書。兼右副都御史。總督江西。戰敗被執。不屈死。乾隆中。賜諡忠烈。有蒿菴集。

勝朝殉節諸臣錄。重熙事唐。桂二王。屢率兵攻撫州。邵武不克。爲大兵虜。執送越甯。不屈受戮。

靜志居詩話。洪武庚午。應天鄉試。長泰黃文史以作全場五經題領解。迨天啓甲子。龍溪顏公茂猷亦作五經題。謄錄官惜其才而嫌其違制。止膾四子書義三篇。易義四篇以入。同考官郝公彪佳取之。旣放榜。始知爲五經也。崇禎甲戌會試。以知貢舉林公紆言。士子有作五經全題者。得俱膾進。允之。於是顏公中式。禮部刊會試錄。特旨命題顏公姓名於第一人李青之前。蓋異典也。至十年丁丑。則臨川揭公重熙。十六年癸未。則嘉興譚公貞良。慈谿馮公元慶。武鄉趙公天麒。皆以五經舉鄉會試。又萊陽宋公翊。十二年己卯亦以五經中。山東鄉試。此科場盛事也。

仙人石

仙人何處去。空有仙人跡。時一聞笙簫。玄雲來絕壁。

李含乙一首

含乙字東生。渠人。崇禎甲戌進士。除高郵知州。遷禮部主事。告歸。張獻忠寇蜀。死之。乾隆中。賜諡忠烈。有秦郵草。

劍閣芳華集。東生乞假歸里。值張獻忠據蜀。僞令某索之急。赴水拯起。不屈。縶於獄。邑人攻殺僞令。東生後與賊戰死。

晚發海陵至江都

日落孤舟發。漁歌極浦聞。江光涼泛月。山色晚含雲。喚渡歸人急。揚帆估客勤。繁華今古夢。惆悵杜司勳。

梁若衡一首

若衡字簡臣。廣州順德人。崇禎庚午舉人。壬午特用進士。除永福知縣。遷左州知州。不赴。大清兵下廣州。與陳子壯謀舉兵。事洩。被執。死。乾隆中。賜諡節愍。

旅次

經秋書劍半江湖。楚水吳山問去途。十載煙霜餘夢寐。朔風吹雁斷菰蘆。

鄭鴻一首

鴻字劇孟。南海人。中書舍人。露子。贈錦衣千戶。

廣東詩粹。劇孟少負才不羈。能詩善擊劍。丙戌之變。率北山義旅千餘。戰於廣州東郊。死之。贈錦衣千戶。

關山月

關山一片月。秋色夜初闌。影入湖天冷。光流隴水寒。暫同兵氣白。翻與角聲殘。辛苦樓闌戍。多因掩淚看。

朱實蓮一首

實蓮字子潔。南海人。天啓辛酉舉人。官刑部主事。大清兵入粵。攝高明縣事。城陷。死之。乾隆中。賜

諡烈愍。有積雪軒集。

樵陽雜詠

行行谿路采芳荃。古木千章落照邊。雲裏轆轤聲不斷。幾家齊汲九龍泉。

邱懋樸一首

懋樸字若木。新添衛人。庶子禾實子。崇禎癸酉舉人。除徐聞知縣。累遷湖廣僉事。大清兵入楚。城陷死之。康熙中贈太僕卿。乾隆中賜諡節愍。

田按。節愍弟懋素。崇禎庚午舉人。歷官南陽知府。崇禎八年。李自成再陷南陽。懋素罵賊不屈。闔門被害。屍陳野外。烏鵲環繞。數日不散。土人異之。累塚立石以表其烈。弟兄先後死國。世以比顏氏。杲卿。真卿。無多讓焉。

送寶華上人遊雞足山

莫更參禪莫掩關。饑時喫飯倦時還。名山不在雲深處。祇在吾師錫杖間。

鄔昌期一首

昌期字□□。都勻人。以貢選廣西知縣。桂王立。遷柳州同知。擢湖廣道御史。以言事廷杖除名。尋復官。改河南道。掌六科。從王入緬。遇害。乾隆中賜諡節愍。

田按。節愍隨桂王入緬。君臣草次。結茅以居。緬酋進米給從官。常不得飽。鵠面藍縷無人色。暨緬酋逼王官呪水。駢死者四十人。節愍其一也。哀哉。

讀郭青螺黔書烈女傳六首錄一

有夫十四歸。囹圄早判單。棲了此身。不是郎中鄒潤甫。妾身那得暫分明。

詩紀略。五開衛舍人王言娶袁氏。百戶傑女。幼許字官。嘉靖五年。言年才十四。父指揮以侵餉逃亡。逮言監追。久之。產。遂。



書哀父母令改適。氏誓死不從。四十一年。恤部鄆郡中兩憫之。暫縱言歸完喪。甫二月。言復就獄。隆慶三年。度死。袁守節如初。御史雷稽古上其事。有旨免職。旌表復其家。

### 馬士升一首

士升字□□。貴州衛人。諸生。流賊入黔。被執。罵賊死。乾隆中。入祀忠義祠。

黔詩紀略。士升父文卿。字瑞符。萬歷進士。選庶吉士。擢御史。巡按廣東。以愷直忤當道左官。遂不赴銓。家居杜門數十年。乃卒。士升承乃父之恬退。清風勁節。光耀里閭。而其從昆弟士英。乃千進誤國。黃口亦羞道之若浼。一家之中。而薰蕕不同器。乃如此。惠。迹耕。魁。真不可解也。

### 時事

時事已如此。杞憂將奈何。可憐蒿作柱。豈止鏡爲荷。屏跡青山淺。逢人白眼多。此身無著處。行坐一悲歌。

### 蔣勸善一首

勸善字夢范。一字小范。威清衛人。萬歷乙卯舉人。除孟津知縣。遷河間同知。請告家居。孫可望寇黔。被執死之。乾隆中。賜諡節愍。有秦遊草。峩石齋集。

黔詩紀略。節愍弱冠舉萬歷四十三年鄉試。主司竟陵鍾惺尤賞異於諸生。選孟津知縣。清苦自持。請蠲民間逋賦萬餘金。縣人得蘇息。遷河間同知。不善逢迎。與當道左拂衣歸。臥林下者二十餘年。丁亥。流寇入黔。被執不屈死。節愍歸田時。年才逾壯。力以提唱風雅自肩。吳滋大求蔣夢范先生遺稿詩云。囊空惟有句。筆妙總無塵。大力全歸漢。奇文半燼秦。一篇存氣韻。萬古鑒艱辛。其詩格之高可見。又云。我嘗登大雅。誼復忝周親。書籍曾云付。精光豈盡泯。是滋大又感誼從之遊。潘士雅集中。有春

興及長安秋吟各三十首俱云和夢范先生韻是士雅當亦其弟子。滋大詩又云遺草非封禪佳兒可負薪則其子亦能承家學。今秦遊草蛾石齋集俱不可見子亦不知誰某當更訪之。

鋤園

獨向荒園把一鋤。菜根爛煮月月初。正須盡摘芭蕉葉。好做顏家乞米書。

譚先哲一首

先哲字光美。平壩衛人。萬歷壬子舉人。累官戶部郎中。請告家居。孫可望寇黔。被執死之。乾隆中。賜諡烈愍。

黔詩紀略。甲申明亡。福。唐。桂三藩相繼稱號。貴州尙未入大清版圖。流賊張獻忠屠蜀人盡。漸及其兵將。適獻忠中流矢死。其將孫可望率其衆破遵義。入據貴陽。威清。平壩。龍里。新添之間。殺戮無算。攻定番州。陷之。大清兵西征至遵義。可望屠貴陽。西遁入滇。伏屍千里。雞犬無聲。光美聞賊逼境。率重走保衛東長沖。賊大至。度衆寡不敵。率家人南向拜永歷君。嚼指血書。寄弟先召。圍破。光美及妻劉被執。罵賊不屈。遇害。舉家同殉焉。惟子瑄在先召所。得不死。光美屍與劉屍相枕藉。月餘顏色不變。其弟先召合葬之。衛西蝦蟆關側。人呼爲雙節墓。長沖有石梓。今猶傳爲光美夫婦臨死時拜闕石也。

長沖圍寄弟辭

明社已矣。何有於黔荒。國存我存。國亡我亡。惟瑄與弟。生死不見。惟弟撫瑄。以存一綫。嚙指灑血。血與淚漣。弟乎瑄乎。他日收吾骨於長沖之原。

尹思民一首

思民字□□定番州人崇禎時以貢生官上杭知縣致仕家居孫可望寇黔陷定番死之乾隆中入祀忠義祠

城破題壁詩

省會無人守九城那復論文章難報國軒冕太辜恩妖火連山赤腥風揜日昏死如能殺賊糾此萬忠魂

唐誼一首

誼字正之武陵人考授推官甲申後起義兵保辰龍關

登善卷壇

路自攢峯入盤旋邃谷中山深遲見日樹老易驚風梵刹依巖出龍泉與海通塵蹤從此隔未許往來同

謝如珂一首

如珂字鳴玉耒陽人張獻忠陷衡州拒戰死

夢題杜陵集

搖落荒林樹色秋瀟湘江上思悠悠知公時有憑軒淚淒斷天涯故國愁



# 明詩紀事卷九下

## 辛籤

王錫衮二首

錫衮字龍藻。祿豐人。天啓壬戌進士。選庶吉士。授檢討。歷侍講。南國子司業。諭德。庶子。祭酒。少詹事。拜禮部侍郎。進吏部尙書。以憂歸。唐王立。起禮部尙書。兼東閣大學士。桂王立。申前命。皆不赴。土酋沙定洲作亂。執至會城。詭草錫衮疏上桂王。請以定洲代黔國公鎮雲南。疏既行。始知錫衮大恨。愬上帝祈死。數日卒。

聖駕臨雍恭紀二首

乍挹方諸水。來湘伴沼芹。金樞淡華月。玉露展蕭辰。俎豆三千士。都俞十九人。公庭看萬舞。未許羽衣陳。  
樸學皋謨古。昌言聖主吟。硬黃摹獵碣。淡墨捧名經。胄子齊歡洽。眞儒足典型。自今隆祀典。長照簡編青。

靜志居詩話。崇禎十四年八月。太學當釋奠。思陵有詔再臨辟雍。於是罷道閣臣及分獻官。時龍虎山真人張應京適在都。疏請入監觀禮。尙書蔣公德環。環王公咸持不可。駁回。十七日。王公奉道祭夕月壇。二鼓始詣國子監。十八日卯初刻。駕自長安左門出。由崇文街至成賢街。入廟門。兩公導帝升階。坐御幄。內官持金餅金甌金爐者六人。天漸明。行釋奠禮畢。幸華倫堂。祭

酒南居仁講學陶謨。自天敘有典。至敬哉有土。司業羅大任講易咸卦。尋命賜茶。文班自行聖公及閣部共一十九人。武班三十八人。分東西坐。帝命禮臣將進士題名碑并石鼓。悉摹拓進呈。又諭閣臣周稭、張邵、朱六子不當概置先儒之列。乃定議。改稱先賢云。是舉也。蔣公紀之特詳。今節錄以證王公之作。

徐孚遠二首

孚遠字闇公。松江華亭人。崇禎壬午順天舉人。唐王立授福州推官。進兵科給事中。魯王監國授左僉都御史。桂王至滇。遙授左副都御史。卒於臺灣。有幾社六子詩集。交行詩集。

陳忠裕集周徐輩六子皆與余同學詩者也。其才情雄駿。用功深微。十倍於余。然覽其詩。可以泐獨立而厲古人者。人不數篇耳。

靜志居詩話。先生達齋侍郎之裔。太師文貞公族孫。與馮子。蔡仲。勣。苗。輩六人。倡幾社於雲間。切劘今古。文詞傾動海內。既而乘桴遠引。騎鶴重歸。矢詩不多。類有身世之感。

館埼亭集外編。公從亡入閩。時島上諸軍。盡隸延平王。鄭成功。延平之少也。以肄業入南監。嘗欲學詩於公。及聞公至。親迎之。閩中自無餘開國以來。臺灣不入版圖。及鄭氏啓疆。老成耆德之士。皆以避地往歸之。而公以江左社盟祭酒。爲之領袖。臺人爭從之遊。公自歎曰。司馬相如入夜郎。教盛覽。此平世事也。而吾以亡國之大夫當之。傷何如矣。至今臺人語及公。輒加額曰。偉人也。嗚呼。明季海外諸公。流離窮島。不食周粟以死。蓋又古來殉難之一變局也。幾社殉難者四。夏陳何三公死於二十年之前。公死於二十年之後。九原相見。不害其爲白首同歸也。

松風餘韻。先生與陳夏諸君爲幾社盟主。乃壬申文選。幾社六子詩外。罕有存者。豈身蹈東海。盡問諸水濱乎。佳句如君子行。秋風多辭葉。激波無安鱗。悲哉行。壯心不在骨。安用千金裝。古詩詠懷。浮雲不盈掌。白日爲之陰。江南曲。皓腕約錦帆。笑狎輕。

煙裏咏史。黃金生羽製。癩瘡安足論。田家詩。涼風帶曙星。夕陽接煙火。秋行雜詠。路入兼葭細。江從草樹低。雪後渡浦。雨餘潮氣白。燒盡草根青。何可多得。

### 梅南草廬

日暮南園色。孤亭萬木中。落花時渡水。怪鳥急呼風。人靜蜂聲出。巖深草氣通。惟餘高閣恨。猶是掩殘紅。

### 舟行諸大澤書所見

蓼花初起白蘋齊。行到荒村古墓西。樹裏雲深疑渡鶴。湖中日午不聞雞。蒼蒼野廟飄殘瓦。白白圩田覆淺泥。過客莫愁頻失路。近前猶颺酒旗低。

### 路振飛一首

振飛字見白。曲周人。天啓乙丑進士。除涇陽知縣。徵授御史。以事謫河南按察使司檢校。入爲上林丞。屢遷光祿少卿。擢右僉都御史。總督漕運。巡撫淮陽。加右副都御史。唐王立。拜左都御史。加太子太保。遷吏部尙書。兼文淵閣大學士。汀州破。走居海島。赴桂王召。卒於途。贈太傅。諡文貞。

### 重陽後一日步韻

勝日登臨望楚南。一天風雨隱浮嵐。酒逢佳客頻移坐。憂到關心屢罷談。客散鶴雛呼引徑。醉餘叢菊倚清酣。光陰易逝行難滯。待到明朝日又三。

堵胤錫一首

胤錫字仲緘無錫人崇禎丁丑進士除南戶部主事長沙知府福王時遷湖廣參政唐王立拜右副都御史巡撫湖北進兵部侍郎總制諸軍桂王立進本部尙書兼東閣大學士封光化伯卒於潯州贈潯國公諡文忠

田按牧遊身丁明季支持殘局所部軍士皆叛將降卒驕橫不受約束崎嶇盡瘁以死雖規爲未盡合宜然其志亦苦矣

宿孤川僑居有感

湖山不改舊風流萬頃波光照荻洲聽我好吟當日句懷人芳草積天愁半生蕉葉難爲夢一樹梧桐忽到秋大笑開言原不易傾尊莫負故人留

章曠三首

曠字子野松江華亭人崇禎丁丑進士授沔陽州知州擢湖廣僉事遷副使福王時進五省監軍唐王立擢太僕卿遷右僉都御史提督軍務桂王時進兵部侍郎再進尙書加太子少保武英殿大學士卒於永州諡文毅贈華亭伯有詩集一卷

王夫之永歷實錄何騰蛟開府堵胤錫解學政勤王傅上瑞久攝巡下湖南均與諸帥周旋章曠屢革削望尤輕諸軍帥不知有曠及受監軍之命從胥隸數十人輕軻東下敝巾葛衫與諸將相見流涕握手推心盡慮與謀興復諸將皆感動時將胤兵驕不知節制王進才郝永忠尤以新附猜暴大掠巴湘間曠既得諸將心申約束斬筭如法諸軍乃斂手聽命隆武二年清大



舉從間道窺湖陰。曠禦於瀟溪。自江南用兵以來。與清兵合戰。仍得捷者。自曠瀟溪之戰始。

錢邦芭集。章華亭與督師何公。總督堵公。戮力三楚。思挽天命於既去之後。雖之難矣。章公最得將士心。朝暮與同甘苦。故能悉知其賢否。情僞而駕馭之。是以樂爲之用。而不敢欺。何公雖乘重權。實倚章爲重。凡內外兵事。皆稟章策。何受成而已。已時徵兵入川。與諸公聲勢相倚。後聞章公沒於行間。知楚事必壞。輒徬徨失措。未幾。何果以失助不支。竟用身殉。

南窗漫記。河山無地求弓劍。臣子何心飽稻杭。滅絕耳根猶有恨。破除心事倍多情。章文毅公守湘陰時作也。見之巴陵李天玉扇頭。天玉公門人。攝臨武令。城陷死之。

田按。明季朝廷水火。以至於亡。至章公支持殘局。安輯楚北。京山楊文鶴。曲周路振飛。皆一時名臣。與章爲難。幾誤大局。君子與君子相陋。真不可解。惟何公靈從。深相委任。暨公病卒。而一敗不復振矣。

### 別張子建

秋氣日以悲。大路日以昏。行行昧所止。居者出無門。去年子先去。今年子獨存。高車荒惻惻。子甯無所言。攬袂不能盡。夢與淚俱吞。人生努力別。數載安足論。

### 雜興

道路自遼闊。山川繚結之。僕人金鑰佩。邸市紫霞卮。水氣連荷味。蟬聲切樹枝。小憩心魄悅。杳杳更何期。

### 九日病中

物慘雲愁又節辰。兀然天地大江濱。愛親燈火尋鄉夢。強插茱萸感客身。風雨不多登覽廢。愁思無厭酒。

杯頻。年年此會皆山水。臥病蕭齋羨健人。

李長祥一首

長祥字研齋。達州人。崇禎癸未進士。選庶吉士。福王時。改監察御史。魯王監國。以右僉都御史督師。加兵部侍郎。有天問閣集四卷。

麟琦亭集外編。研齋喜言兵。獻賊從橫蜀中。研齋練鄉勇。躬擐甲冑。以助城守。自癸酉至壬午。賊中皆知有研齋名。癸未。選庶常。時沈自彰任吏部。方蒙上眷。薦之。謂當援劉之輪。破格不次用之。使備督師之選。或問之曰。天子若果用公督師。計將安出。研齋歎曰。不見孫白谷往事乎。今惟有請便宜行事。屏邸鈔不寓目。卽有金牌。亦不受進止。待平賊後。囚首闕下。以受斧鉞耳。聞者吐舌。而同里井研爲首輔。欲引之爲私人。研齋不可。故不得召見。賊且日徧。研齋上疏。請急調甯遠鎮臣吳三桂。以兵拒戰都城下。有新進士袁彞者。具將才可令輔之。而令密雲鎮臣唐通與臣從太行入太原。歷甯武。雁門。攻其後。首尾夾擊。賊可擒也。思宗下其議。未定。密雲帥已至。詭請守居庸關。則放賊至抵昌平。侍郎上疏請急。令大臣輔太子出鎮津門。以提調勤王兵。皆不果行。而京師潰。南奔。改御史。而南中又潰。起兵浙東。監國又加僉都御史。督師西行。而七條沙之師大潰。研齋以餘衆結寨上虞之東山。與張翰林煌言。王職方翊且屯。且耕。監軍華夏者。鄞人。爲聯絡布置。請引翁州之兵。連大關。請寨。以定鄞。慈五縣。僉議奉研齋爲盟主。刻期將集。鄞之謝三賓告之。大兵急攻東山。中軍汪彙者。已受大兵指爲間。期縛研齋入獄。有與汪共事者。曰。奈何殺忠臣輸款。研齋乃匿丐人舟。入紹興城。又遁至甯之奉化。依平西伯王朝先。朝先亦蜀人。復合衆於夏蓋山。入朝監國。請合朝先之衆。聯絡沿海。以爲翁州衛。張名振不喜。屢殺朝先。研齋僅而免。翁洲又潰。亡命江。淮。間。總督陳公錦得之京口。都統金瓚。巡道沈澗。力主殺之。陳獨不可。釋之。乃居山陰澗谷中。尋遊錢塘。大吏終以爲不可測。安置江甯。總督馬公陽禮之。而終疑之。曰。是子然者。誰保之。研齋徵聞之。時江甯有閩秀曰鍾山秀。才者。善墨竹。容色絕世。乃娶之。總督私謂

人曰。李公有所戀矣。未幾。乘守者之意。竟去。由吳門渡秦郵。走河北。遍歷宣府。大同。復南下百粵。與風大均處者久之。天下大定。始居毘陵。築讀易臺以老焉。

### 秋懷

江上烽煙正暮秋。石城涼雨入高樓。金山雲暗天方醉。滄海星飛水自流。白下露催園菊老。紅橋風送井梧愁。老夫起舞恆通夕。不待荒雞已白頭。

### 戴重十首

重字敬夫。和州人。貢生。召試第一。除湖州推官。大兵下湖州。起兵復城。戰敗。中箭洞腹。走鷹阿山中。創發死。有陟帖吹篴。鍾山橫望。姑谿陶窳。石臼茗雪。間北山師陶等集。

蓮鬢閣集。敬夫詩。磊落孤憤。凡所爲流離顛沛。國難家愁。與夫鬼號燹燼。天荒地沸之景。森森烟烟。在人目中。

劉城嶧桐集。敬夫有古學。敦行誼。不苟同俗。余與交十餘年。道義相劘。如一日。乙酉四月。挈余同避兵。轉徙至湖州。余歸而敬夫有所事。遂中箭洞胸。乃薙髮爲僧。卒以創死。

張自烈芭山集。敬夫詩。惑時諷俗爲多。以視西臺慟哭。異世同揆。

湖錄。重有北山集。中有憶在吳興七律。悲歌感慨。情見乎詞。

感齋集補傳。敬夫甲申後。遜迹河邨。嘗絕粒不死。臨終作絕命詞。秦澗泉大士記其二云。平生不願垂床死。今日甯知死臥床。忒是便宜兒。女子不將馬革走沙場。古人詩。辭兼吟興。只頌梅花又菊花。兒孫能種盈餘壑。春雪秋霜纔是家。

自靖錄。戴重同諸生韓釋祖。王光祉。布衣金有銓等起兵太湖。復湖州府城。及兵敗。箭洞腰脇。賦絕命詞云。河村柳樹碧如煙。

父老留根三百年也。移幾檝盤泉石。候到春深巢杜鵑。前年三月十九日。與客登山披髮號。選得山空人絕處。好挑山菜酌溪。瓢難言五月傷心事。九鼎云亡又未知。莫翦孝陵陵上柏。童童萬壑倚天枝。

田枋敬夫詩。心苦語硬。師陶一集。稍覺和平。而艱苦之音。彌復滿紙。是以柴桑心事。爲西山痛哭者。

學歸田園居

以下四首和陶

余從先父自河邨入城。二十餘年矣。舊歲狼狽奉母復歸焉。輒行役去。不獲晨昏者。又將一年。今乃退息。省罪於此。時從諸父兄視田園。永言以歎。

父兄授經史。遂不事南陌。復然歸故田。徙倚意不適。春秋疾以周。朝不謀終夕。寒風淒人心。修身貴無隙。拙耕未免餒。俗學人所役。伊召亦固窮。乃有殷周績。苟不自黽勉。三歎復何益。

學和劉柴桑

石頭城春上

西山石頭城。獨行且躊躇。未慣操南音。不敢從羣居。高薨從橫出。細竹迷卑廬。大江城下流。東山城中墟。春郊懷老農。終身事菑畬。何爲狹邪子。醉飽還言劬。苦樂雖致殊。已復化爲無。一身有齒髮。與我迭親疏。黃鳥東南飛。長松立斯須。蚤齒遊京城。壯歲良不如。

學責子

四方遂多事。虛名以亡實。干戈不祥器。將復易刀筆。總角憐汝小。起處無嘉匹。貧賤不能守。富貴豈有術。汝父壯已老。十策失其七。況才不父若。履冰慎栗栗。昨遊在鄉里。所遇多異物。

學詠貧士

天地高以博。馮生羣依依。風雨爲寒暄。日星爲陰暉。秋草各垂實。春禽相奮飛。斯人邈無求。朝出暮言歸。衣食恆不足。未嘗知寒飢。時俗事富貴。沖沖心孔悲。

始至姑谿假憩逆旅作苦寒

老骨山澤耀。入市畏且慚。腰彊不能屈。舌鳴不能吮。乃與屠酤兒。叉手相二三。邱木在江北。藏書棄山南。羣盜破我家。食苦以爲甘。鬢鬢盈尺髮。冬落不可簪。室亡提甕妻。牀留覓栗男。秋風一頃豆。聚啜餘幾甌。低頭傍人戶。柅車聽喃喃。蝸牛背負廬。書壁自爲耽。玄螳銜厥卵。封沙不云貪。所求僅容膝。旬日無所堪。暮寒朔雲急。白霰長鬢攀。裹飯無我吁。解衣臥一龕。小兒未解事。擲蠹時親譚。痴女那敢唬。僵曲如冷蠶。北風自惻惻。長夜自潭潭。幽夢千道飛。騏驥安足矜。從橫意未已。鷗起城鐘鐺。賴有匣中劍。拔舞敲其鐔。左迴大江流。右拂青山嵐。自非履巇危。世事且弗諳。

釣魚臺

青山殘白骨。西日到東谿。石臼魚來少。天門雁去低。梅花開始折。藜飯裹誰攜。共說東風好。窮年客未栖。

不雨

獨夜瞻雲漢。裘裳涕泫然。山東且羣盜。江北況無年。母老危巢破。交貧舊榻穿。可憐今日事。但覺古人賢。

送劉伯宗應徵

矯首窺塵海。抽思在遠天。書生多好武。廟算亦求賢。頗牧年猶壯。伊姜事偶然。含窗秋浦月。未許抱經眠。

南京客舍

十載蕭條折角巾。只隨短髮走風塵。壯遊客散詩名廢。儉歲兒飢斗酒貧。銅井江邊鴉聚雪。瓦棺閣外柳迎春。閒愁已足消長夜。況說黃河虜騎頻。

歸石臼

雞籠山北孤雲客。石臼湖東近水家。到處結巢同燕子。逐年種樹是桃花。

錢邦芭三首

邦芭字開少。丹徒人。崇禎諸生。唐王稱號除御史。桂王時遷副都御史。巡撫貴州。孫可望入貴陽。棄官削髮爲僧。號大錯。

尊鄉贅筆。僞秦王孫可望雖陽奉永歷。誅殺任意。一時廷臣皆收爲腹心。有禮部主事方子宣者。搆編修。詔事尤甚。爲可望撰國史一書。稱張獻忠爲太祖。作太祖本紀。比崇禎帝爲桀。紂。又爲制天子鹵簿。定朝儀。言帝星明於井度。上書勸進。後可望爲

李定國所敗。投歸本朝。子宜自知禍及。時有錢中丞邦彥者。守死抗節。爲人心所歸。方馳書於錢云。欲糾集義旅。截擒可望。以報國。邦彥得書大笑。答以一絕云。修史當年筆削餘。帝星井度竟成虛。秦宮火後收圖籍。猶見君家勸進書。未幾縛至滇。竟得逃死。

黔詩紀略。錢苞。字開少。福唐。桂三藩稱號時。由中翰歷都憲。桂自粵移安龍。開少爲黔撫。孫可望入黔。自置官屬。遂退居餘慶縣之蒲村。避焉。開少又闢柳湖於村之他山下。自號他山湖。大可百畝。中有七十二泉。旁大柳數百章。結廬臨之。命曰小錢塘。命湖隄曰桃源。橋曰宛轉。舟曰怡受。四方隱流。聞風樂至。采幽擷勝。終日嘯歌。或聚邑人士講學。播北水西。有千里負笈者。孫可望素之急。遂祝髮。號大錯和尚。稱柳湖舊居爲大錯菴。蒲村舊居爲小年菴。小年其祝髮處。曾居數勇衛潮水寺。更名知非菴。故又號知非居士。永明亡。又居滇之雞足山。久之。走衡嶽終老。

### 還山

忽然出城郭。遂見無數山。散步隨雲適。輕身趁鳥還。遙知隱淪者。待我泉石間。乘月浩歌去。柴門應未關。

### 野寺

野寺雖荒僻。祇園在此間。栖禪雙樹老。洗盃一身閒。佛古燈常寂。鐘殘鶴未還。經過塵慮淨。何必掩松關。

### 晚步益孟菴

泉聲何處急。落葉滿溪梁。燈影明虛殿。松陰冷石床。茶煙山翠合。花雨屐痕香。回首歸鴉亂。千峯遞夕陽。





# 明詩紀事卷十

## 辛籤

邢昉五十五首

昉字孟貞高淳人崇禎諸生有石臼前集九卷後集七卷。

顧夢游茂綠軒集孟貞所尙在太祝蘇州隨州考功間上溯顏謝旁及郊島涵泳久之駸駸成家矣。

漁洋詩話余最許石湖邢孟貞五言詩以爲韋柳門庭中人悵未及友其人官祭酒時鄉人李君令高淳特屬訪其子孫李至訪之則老妻稚孫榮榮孤寡饑粥不繼李脫贈三百金爲置腴田其家竟不知余意也施愚山聞之造余再拜曰某交孟貞三十年不能卹其後人之窮公與孟貞未定交而能卹其身後令不凍餓以死某愧公多矣至爲流涕。

池北偶談順治辛丑李退菴過揚州余造謁舟中因論近布衣詩舉程嘉燧吳兆退菴曰終須還他邢昉第一。

施閏章愚山集孟貞詩以陶汰爲工以冲淡爲則以婉惻悲涼爲致其企而之峻潔也若病暈者之思清冷其厭纏綿而引避也若見泥豕而負塗而紈袖之蒙糞土也故其詩清越無纖埃人病之爲郊寒島瘦不卹也觀其所長則旣與錢左司劉隨州伯仲矣孟貞嘗謂余曰剝盡今人面皮斯成古人讀其集信然。

宋犖西陂類彙孟貞詩凄清悲壯山峙雲涌多濃厚之漬無怨誹之失具體少陵而出入韋孟錢劉以發其菁華才兼衆體誠名家也。

田按孟貞論詩謂漢魏不可爲唐人惟不爲漢魏故能臻於極孟貞五言取徑唐人而時涉柴桑籟籬以幽秀淡宕爲宗得儲

章之自然。筆韓孟之刻厲。明季布衣詩。邢昉第一。徇爲確論。

夜宿石門

越山青至天。越水綠如玉。霽霞盈一溪。落日絢幽谷。緬懷古昔人。結綬膺良牧。沈涵山水遊。放浪石門宿。顏色不可見。思踏嶺上躅。風榛寂遠聽。礪戶引高矚。一宿詎能忘。歷覽亦已足。霏霏巖下泉。飲掇共野鹿。

雜詩

幼安昔避地。茫茫涉廣川。踰海不謂遠。一去四十年。往往談名理。亶亶造深玄。問所與談誰。乃是公孫淵。口罔論世事。聊此相周旋。龍德旣無損。清風久逾宣。生世偶相符。其當師此賢。

和汪希伯雨後田家作

涼雨霑禾黍。晚風亦徐生。林木發華滋。乃得佳樹情。老農朝荷鋤。忻茲茅檐晴。出門旣有事。仰見浮雲征。孤雲有卷舒。予亦鋤且耕。

上翠微嶺訪煉丹臺三皇井觸熱至白雲菴是楞嚴安禪師道場

曉煙開衆壑。嶺表延炎暉。訪古荒臺下。軒皇迹已微。井渫尙未改。精廬開雙扉。冥冥麕窟境。杳杳人跡稀。昔聞道場鼓。花雨飄一圍。世外猶寂寞。白雲空霏霏。

由玄通洞至梅雨潭觀瀑

出洞逕已絕。恍惚迷所往。仰觀石壁峻。近見數峯敞。猗猗伏兕守。使轉騰猿上。砮鏑梅雨潭。素雪霏蕭爽。岸開一流奔。氣冷浮雲滃。乍疑節候殊。更疑天地廣。回轉得前路。始聞屐齒響。笑謂同遊人。誰能共俯仰。

澗墅迅風一日至嘉興作

江路忽綿邈。惆悵東風前。微茫歷吳縣。水上開寒煙。夜潮漲溪綠。夾岸桃花然。雲昏天欲雨。一鳩鳴桑田。越溪轉空朗。百道輕洄沿。新林吐微月。晚色猶澄妍。孤舟正寥落。況復聞扣舷。

龍友置酒江心寺避暑與無補各賦五首錄一

蕩舟入江嶼。輕橈撥淺瀨。羣木秀高岸。條與長風會。東南渺何許。曠然白雲外。至夜海色來。蕭條有餘慨。

段橋

橋北峯巒翠。橋南洑澇春。因看外湖水。分映六橋人。煖日縈絲柳。微波裊細蘋。海雲遙聚散。寺閣迴嶙峋。鳥度聞橫篴。魚驚避采蓴。沿流去何所。杳杳落花津。

泛甌江作

南登仙人巖。載汲三皇井。旣以思邃古。復此懷幽屏。燁燁巖下芝。可以駐迅景。兕虎相叫噪。欲采道路梗。朱鳳饑不食。粟麥延鳧頸。人寰不可處。悵望三山影。

古興二首

北風捲枯蘄。飛鳥各斂翼。陽光忽西墜。奔獸向我擲。凝寒盛肅殺。萬類莫能息。我胡亦復然。東西事行役。道傍有死人。已供烏鳶食。生者不自保。徒爲死者側。漢道昔再盛。投戈息羣姦。矯矯梁夫子。浩歌乃出關。舉目覽四海。忼慨涕潺湲。我方遭世亂。安能辭險艱。常恐白日速。不覩大運還。永隨霜與雪。泯滅蓬蒿間。

由金壇過見末田舍作

五載隔君廬。依依辨林木。帆帶甓橋煙。舟行石塘曲。扣戶寂無人。荆扉日日關。髻山雨初暗。長蕩水如環。雨多林氣溼。薄霽閒清晝。開扉指稻田。伏几看禾秀。聞君時抱犢。旦夕爲饔飧。舊穀幾時斷。中男昨歲婚。雖復少饘粥。新詩每逾帙。舒卷自悠悠。孤雲澹無迹。

五平五仄體

空林雲方生。廣澤月已冷。松間通微明。露下溼練影。枯榛聆鳴蜩。隔水見繫艇。孤懷終沈沈。永夜不復整。

憶兒詩

汝生初墮地。我遊五茸城。三月始入門。聞汝呱呱聲。從此更遠邁。越嶠東南征。三爲象浦客。六傍惡谿行。在遠日何多。在家日何少。屈指幾度別。垂髫忽已好。三歲別我時。門前牽我衣。宛轉學人語。問我幾時歸。四歲及五歲。別我涕能揮。七歲差解事。鞠躬步庭幃。去冬復別我。含悽扣所如。本言渡江去。卻寄白門書。

今年汝九齡。毛詩誦曹鄴。翩翩過父友。再宿傾肝肺。前月有書來。頗與人意會。世亂我已老。我衰汝始大。如何久契闊。喟焉發長嘅。

別介立上人

東林黃葉遍。返景躡幽境。入山鳥始棲。開戶迹逾靜。釋子於日閒。晏坐冥真性。客至方下床。齊餘忽聞磬。因投塵中語。不忘別時詠。露下籜猶飄。林中風稍勁。我耕湖浦田。子有雲山興。他日遠相尋。何方正禪定。

閒齋對雨

本非習世務。時亦涉紛糾。茲晨適無事。展書對虛牖。涼雨灑平野。輕風颺高柳。旣已盪煩蒸。又以濡田畝。志氣方自怡。耕作庶無負。稍知是日閒。但覺爲時偶。平生諒如此。於世復何取。

雨中作

季夏始苦燠。形羸憂未央。滂沱對簷雨。始覺絺綌涼。庭柯洗衆綠。瀟灑映虛堂。而我中所懷。遠在葭菼鄉。新苗香嘉澤。溝水生菰蔣。衡門俯畛隰。開戶時相望。歸歟豈必晚。庶及此登場。

陽邏汛

艤舟陽邏汛。紆步陽邏寨。壘石儼城堞。禦暴有深戒。頽牆幸未墮。猶是楚關隘。荒墟衆莽遮。數戶殘陽在。遠適棄柴荆。乍歸理畚箕。新穀始舂糧。中雜稊與稗。瓜青併芡紫。稍稍已充賣。昨過武昌兵。驚奔如避虺。

吁嗟麻城賊。復屯百里界。父老一二人。問答形羸憊。其言絕酸苦。兵賊迭逅避。破廬雖暫息。終亦成于邁。旦暮此偷生。吞聲死茅蒨。

冬日同徐州來崔季韞莫愁湖眺望

霜霽天更清。衆潦縮而小。澄泓莫愁湖。微波猶淼淼。演漾餘水木。彷彿動寒藻。耦勝樂嘉招。出城卽幽討。閒亭息游侶。煖日逢魚鳥。乍憩慮已遣。躊躇魂復悄。回思四海晏。樓閣此中好。風景豈復有。世事久紛擾。峨峨清涼山。黃葉落漸少。蕭條亦如此。雲煙互繞繚。

哭胡印度

衆人各貪生。同盡靡不然。君已祛斯累。憑化聊忽遷。哀樂復何有。顧余未能捐。銜悽追往昔。再歲逾緜縣。茅茨儼虛位。殯宮屋西徧。遊塵積素几。零露被荒阡。貧巷氣悽惻。潦縮無流泉。生死豈云隔。徒悲化者賢。傷于子柩

積雨動離舟。門前秋水次。別緒已含悽。緘書更徂歲。書中吐亮辭。於世無多意。思憶平生懷。躊躇熱肝肺。蒼旻何其悠。白日忽西墜。人生如春冰。一泮成東逝。日夕茅嶺遊。相看隨悲淚。於世無多意。子柩書中語。

梁山

宵泊蘆洲月。枕上聞潺湲。雞鳴峭帆起。洲勢多迴環。開牕眺前浦。忽見西梁山。蒼蒼朝靄裏。演漾晴波間。

東梁相對出。薜壁儼如鬢。翠削類中斷。絕頂殊可攀。凌風去何駛。聊得舒心顏。不及巖頭鵠。終年巢松關。  
離漢口

旅舟泊漢水。荏苒至寒節。朝看楚雲興。暮觀楚雲滅。此地雖破殘。井術稍成列。銀鱗日充市。食鮮每豐潔。客心復何苦。遇物轉淒切。茲辰忽返樞。脈脈情內熱。風土漸相諳。山川屢迴折。故鄉豈不懷。信美亦愴別。未逢漢陰老。令我憂思惓。

遊招隱寺有戴顓遺迹

東郊草色徧。出郭路已緬。登頓窮迴蹊。屢覺前山轉。招提頗闕寂。滿徑惟蒼蘚。一與人境遠。驟矜塵累遣。撫跡想曩賢。幽林此偃蹇。當時動萬乘。於道能舒卷。澗芳始馥郁。石溜彌清淺。白雲復層層。徘徊度遙巘。沈冥逾千載。礪戶欣來踐。窅然巖溪間。日入更遊衍。

答葛士元寄書

憶與君握手。句溪清且嘉。平蕪來燕子。野寺開桃花。衝雨過鐵澗。曲折尋幽遐。豈惟誇水木。亦以眷桑麻。甯料轉盼間。世變浩無涯。此地竟流血。鋒鏑脞龍蛇。荏苒別三載。簸蕩風中沙。寄書感疇昔。聚散同飛鴉。翩翩稚川孫。戟髯鬢未華。一水渺相望。漠漠春雲遮。著書且努力。勿遽事丹砂。

雲間西還別陸集生

陸生昂藏二十幾。聲名颯沓如流水。太華鋒高五千仞。文章突兀奇過此。家在吳淞一水涯。迴眸顧盼光成霞。少年生長三公里。數世寫奕尙書家。尙書風節古希邁。有子立朝少司寇。父子兩世皆蒙恩。陸生腰下無寸綬。甲第聯雲讓季昆。郭外流泉空在門。門前流水東入海。往往人號平原郎。白苧城中足風雨。獨共陸生相勞苦。鶴唳秋開島上煙。雞鳴夜聽樓頭鼓。相思千里何閒關。前人陳迹猶班班。黃歇尙餘鴻雁浦。吳王剩有干將山。陸生氣岸真輝赫。上策十年仍落魄。貧賤人看白面郎。功名誰識斑駁客。三載東來碧草芬。一朝揮袂有離分。莫愁湖上徘徊月。揚子津邊無限雲。我去五湖惟蕩槳。白鷗茫茫日更往。欲寄迢迢海岸書。鯉魚一尺隨潮上。

太白山人

太白高高西蠡秦。人言山人爲秦人。一生放浪入吳越。玉質曾不瀉風塵。縱心羽化事服食。丹砂恍惚輕千春。亦復高歌中宮徵。松風髮髮蒼崖裏。仍諧伉儷衣薜荔。服食求仙事皆已。山人氣勢亦罕比。咄嗟頽頽何與李。門前車騎丞相來。海上遙看赤雲起。嗚呼太白之峯安可攀。遠遊未厭辭人間。茗花如雪傷頽顏。千秋突兀道場山。

海雲歌送方爾止雲間返白下

海雲迢迢倏飄忽。白門歸客愁不發。芳蹊碧樹遠吳天。桂楫蘭橈蕩秋月。君家甲第何蟬聯。桐山秀出接



龍眠弱冠聲名起江介。片言落紙飛雲煙。平生少孤亦坎坷。脫略繁華厭尾瑣。讀書已破一萬卷。作賦談兵無不可。十載桐城戰血斑。峨峨白骨成邱山。登陴授甲何慷慨。指麾破敵如等閒。君抱奇才遭世難。長揖戎軒幘常岸。賭墅何當笑謝安。從軍不得同王粲。孤舟鼓柁滯江皋。感此踟躕心鬱陶。酒邊落落歌長缺。腰下時時看寶刀。酌酒與君勿嗚咽。古來才大轉愁絕。前年避地長干居。一回又向江門別。江門落日水悠悠。黃浦潮生逐去舟。相思鐵甕城南夜。獨倚危檣看斗牛。

觀楊龍友畫山水册子董宗伯書跋作歌

楊子性癖畫山水。胸中突兀眼中起。巒壑窈窕煙霧生。倏忽風雨如在耳。手拂絹素神已通。耳目不御遊鴻濛。鴻濛以前未有此。此時突出真神工。我觀此册凡十圖。千流萬壑態各殊。桃源輞川久寂寞。雲門若耶胡爲乎。誰言此境世所無。彷彿廬岳凝衡巫。楊子產夜郎。山水天下絕。牂牁以南峯插天。一一寫出森巖嶮。畫家惟取胎骨奇。細論流脈良足嗤。平生所好或彷彿。氣格頗似黃大癡。梅花道人亦其亞。一二迫肖非追隨。武陵楊公楊子師。擊節愛好渴且饑。十年購得萬松卷。縹囊什襲如鼎彝。妙手董宗伯。駕軼文與沈。歎息展此圖。摩挲盡題品。此圖在世珍瑤瑤。況有淋漓宗伯書。楊子腹中書萬卷。四十公車惟破硯。爲我且埽一疋絹。明歲長安見天子。放筆一揮大同殿。

題楊日補所藏楊龍友畫雲山圖

君家堂上開雲煙。乍披忽覲心惘然。畫者何人此好手。故人已沒今五年。故人昔爲永嘉宰。謝客山川宛相待。仙巖谷口睇煙霏。玉甌峯頭眺雲海。往往揮灑作畫圖。巖巒突兀茅堂孤。卽如此圖極瀟灑。松風彷彿聞笙竽。斯人歷落多情興。君與結交非異姓。繪事同誇楊契丹。兩家筆迹堪相競。寫罷遠山偶未閒。君爲點染巔崖間。圖成價已等尺璧。摩挲涕下空潺湲。生前粉繪人爭取。死後聲名尤冠古。可憐埋骨竟茫茫。四海九州無寸土。憶昔爲我一揮雲山小屏幃。縹緲龍湫與雁宕。正與此圖相頡頏。吞聲想像一惆悵。

過羅刹磯

澳陽江邊一月坐。船頭乍撥西風簸。五日已渡潯陽江。小孤娉婷浪中過。昨日狂風忽東轉。舵折橋欹太偃蹇。三宿始泊李楊河。蘆黃沙白潮痕淺。數戶蕭蕭破屋扉。黃昏月落雁飛飛。曉來舟子俄相報。起看江心羅刹磯。

銅雀臺

魏國山河在。雄圖勢已休。漳河遙入海。大陸莽生秋。井幹空遺恨。君恩不可留。誰憐歌舞罷。松柏晚颼颼。

王昭君

漢宮回望絕。青海路逶迤。一曲琵琶語。千秋羅綺悲。逝將黃鵠侶。沒向紫臺陲。怨結胡天月。悠悠無盡時。

周勒卣從新安還雨中過訪賦此

行李投于越。迴舟喜扣舷。夜潮初過肚。夏潦即稽天。少室千峯思。滄江一雨懸。茫茫各辛苦。去逐海門煙。  
勒甫去歲遊中州時將與子先後往白門也。

### 送宗遠入燕

江流渺不極。帆影復重重。國步方求駿。天心豈臥龍。離人揚子渡。愁思廣陵鐘。無限雲山隔。依依柳上峯。

### 晚過三山宿大勝關

峩眉亭上月。忽在數峯西。始見漁梁火。因聞關店雞。維舟三戶少。吹角片雲迷。自古江南地。詞人賦慘悽。

### 亂離詩贈黔僧利根次潭吉韻

故國兵戈地。風雲尙覺昏。亂離思舊鬼。驚定住新魂。行世已如葉。言愁別有根。三年蠻海淚。猶記昔成痕。

### 與九信至招往園中賦答

聞說長林下。淒清祇似冰。言招麋性友。如對鶴形僧。竹色涼舒履。桐陰安曲肱。此時延佇意。切怛諒難勝。

### 送九水還廬山

江舟彌不易。此日見朝霜。書寄他僧去。路因寒月長。彭蠡一枳遠。雲霧六朝荒。數雁煙邊沒。離心愈淼茫。

### 閩門遇穆倩因訊僧彌

一逢荀奉倩。吳市此相同。結客滄海。吹簫滿碧空。水浮鶴澗綠。花映杜鵑紅。爲問偕遊者。誰如臯伯通。

上嚴子陵釣臺

已躡千秋跡。因登百尺亭。潮生兩崖碧。天入衆峯青。獨戍嘯江鳥。孤槎訪客星。長思人代裏。幾得此鴻冥。

游城南栖霞寺

水際沂洄去。溪橋亘衆流。嵐煙仍自合。荷芰稍能幽。破壁饑鼯集。殘柯倦鳥投。賴因松雨細。一灑盡煩憂。

歲暮行經七里瀧

入瀧投暝色。瀧盡復煙霏。極浦桐廬縣。天空出翠微。鷓鴣浮凍港。沙岸動朝暉。愁思當窮臘。皇皇獨未歸。

雨中遣悶

三載來甌渚。滂沱釀夏寒。因憐江鳥熟。已作越人看。閒臥施桃簟。清羸岸葛冠。仲宣今有賦。歎息滯荆蠻。

和祖心上人遊城南方正學先生祠

寂寂荒祠野靄昏。蕭蕭殘碣倚松根。金川門又成亡國。石子岡偏欲斷魂。昔日麻衣慚叔父。于今青草失王孫。廢興自古須臾事。獨有先生戀主恩。

過齊尚書祠

尚書祠下千回過。此日沾巾淚未休。蘋藻已荒兵燹歲。江山忽似革除秋。眞人一姓猶甘死。流水孤城何限愁。寥落空庭惟繫馬。井欄摧折斷煙浮。

別爾止發舟往越中

驪歌惆悵莫愁湖。二月江城酒共沽。探藥謾尋春草去。披裘還似客星無。行追碧澗雲門近。轉憶青山皖伯孤。千里迢迢楊柳色。令人揮淚聽嘯烏。

送趙孟遷往天台因還山陰

赤厓障天白日冥。木葉四落黃滿庭。一客獨往賦窮鳥。五侯誰愛分嘉鯖。剡溪西歸窮夜壑。蜃水東下揚曉舲。石梁玉龍冰欲結。回望括嶺何青青。

立秋日晚登丹陽城樓

古堞崔嵬映碧流。長江萬里一含愁。城邊月出還聞角。水上雲來始見秋。鴻雁幾時穿塞路。白蘋無日不汀洲。丹陽郭外萋萋柳。夜送潮聲到石頭。

與高座寺介立期登木末亭未果

寺外高崖積靄凝。遙憐風雨不同登。坐看雲氣流寒壑。欲遣塵機對病僧。九日乍聞連雁過。千秋還見大江澄。蒼梧近在鍾山麓。愁上孤亭望舜陵。

黃州寄杜于皇

葦岸風淒日漸微。長隄繫艇晚依依。十年紅樹辭鄉去。八月黃州見雁飛。燒罷林廬殘址在。戰餘茅屋幾

家歸翻憐此夕君思我揚子潮回木葉稀。

漢江懷古

此共方城扼楚關。英雄消盡逝波間。微霜欲下漢陽樹。落日初銜大別山。蘭杜秋來洲尚綠。瀟湘南去竹多斑。燒殘崔顥題詩處。一眺風煙倍慘顏。

九日大別山登高

鸚鵡洲邊草盡黃。白沙如雪禹祠荒。古來哀怨多歸楚。此日煙波正望鄉。山翠乍連杯酒色。亂離頻過幾重陽。眼前不見茱萸紫。起傍峯頭數雁行。

錢塘潮

曉色千檣發。危濤萬馬奔。豈知此澎湃。中有子胥魂。

貞白墓

白日冲昇怪底遲。因緣本草事堪疑。茅家兄弟皆鸞鶴。卻見先生墓有碑。

橫塘曲

江宿鴛鴦浪宿鷗。芙蓉零亂木蘭舟。白蘋渡口橫塘女。箇箇生來字莫愁。

錢澄之二十首

初名秉鐙。字幼光。避禍削髮爲僧。名幻光。復冠帶。改名澄之。字飲光。桐城人。崇禎諸生。有藏山閣稿。田間詩文集。

徐乾學澹園集。飲光先生自甲申變後。南都擁立新主。姦邪柄國。羣小附之。濁亂朝政。而爲之魁者。其鄉人也。以夙負盛名之士。慷慨好持正論。與鄉人迕。及其得志。修報復。固欲得而甘心焉。刊章捕治。將興大獄。於是亡命走浙。閩。又自閩入粵。崎嶇絕。微。數從鋒鏑間。支持名義。所至輒有可記。

韓奕有懷堂集。飲光少負盛名。爲諸生祭酒。遭明季。崎嶇喪亂。與時消息。其用至妙。未易窺也。其爲詩。沖淡深粹。出於自然。度王孟而及於陶矣。

靜志居詩話。幼光禁網潛蹤。靡鞫問道。或出或處。或嘿或語。詩屢變而不窮。要其流派。深得香山。劍南之神髓。而融會之。牧齋錢氏錄其作入吾炙集。蓋深取之矣。昔賢評陶元亮詩云。心存忠義。地處閑逸。情真景真。事真意真。田間一集。庶幾其近之。

姚經三無異堂集。飲光南渡時。遭黨禍亡命。流滯嶺嶠。歸則皤然老頭陀矣。好飲酒。詠諧。放浪山水間。每酒後談說平生。聲淚俱下。時時吟詩。不拘一格。上有漢魏。下迄中晚。隨興所至。卽爲之。古詩感慨諷諭。婉而多風。真得古三百篇之旨。

明詩別裁。幼光自抒情性。無意工詩。五言似陶。亦在神理。不在字句。與高忠憲歸待詔所謂異曲同工者也。

徐菽桐舊集。飲光集詩說曰。詩有其才焉。有其學焉。有人才之。才。聲光是也。有詩人之。才。氣韻是也。有學人之。學。淹雅是也。有詩人之。學。神悟是也。故詩人者。不惟有別才。抑有別學焉。

田按。田間五古擬柴桑。七古擬張王。樂府亦近香山。殘明逸老。可與邢孟真。隨。

### 田園雜詩

人生會有盡。行止非自由。止亦不可趣。行亦不可留。如何柴桑叟。汲汲爲此憂。終年痛飲酒。冀以忘其愁。

吾身聽物化。化及事則休。當其未化時。焉能棄所謀。有子亦須教。有田亦望收。天心于人事。何息不同流。我不離世間。而願與天遊。焉能外親戚。視之同浮漚。乃知黃老書。不如孔與周。

詠史

中原昔喪亂。戎羯互塗炭。共偷江左安。坐看神州陷。壯哉劉宋公。直上咸陽殿。百年宿穢清。天日重相見。可憐秦父老。壺箠遍畿甸。天下望風降。拓跋不敢戰。一朝棄之行。急歸圖晉禪。闕中自足帝。方隅何用篡。空使向化民。再擢犬戎餽。功名不得收。古今一長歎。

寄藥地無可師

風動知歲晚。木落知天寒。居人篝火坐。各各掩其關。言念藥地翁。一身棲廩山。廩山在何所。草屋八九間。江右土氣薄。況經兵燹殘。緇袍豈能溫。粗糲甯可餐。又聞終歲病。鬚鬢不復斑。豈徒無與侶。枯淡恐無歡。念此不能往。喟焉摧心肝。

雜詩二首

步出城西門。荒隄何逶迤。衰柳夾隄植。上宿鷗與鷁。路傍有古廟。入門樞纍纍。借問此何人。云是義士屍。寄此頗有年。親戚不敢移。中有慷慨士。平昔心相知。始志在捐軀。臨危果不欺。旅魄滯曠野。冤魂當訴誰。徘徊不能去。愴惻傷肝脾。



鬱鬱青槐巷。中有壯麗居。華棖耀金碧。交窻結綺疏。高樓臨大道。豔色照通衢。昔爲富人宅。今爲丞相廬。行人不敢過。過者爲下車。別去無幾時。門巷忽荒蕪。雙扉白晝瑣。中有官物儲。問之丞相歿。得罪身被誅。妻孥遠戍邊。籍沒無復餘。識時稱俊傑。斯人計豈疏。屈節以保身。禍至還突如。悵念平生交。夷滅何欸歎。

贈胡處士星卿

榮榮畦中蔬。孌孌門前柳。畦以木槿籬。門用桑樹紐。茅屋入蒿萊。江聲通戶牖。中有避世人。言是東陵後。多年不入城。一卷常在手。客來問所爲。良久乃開口。有時還見招。臨流一觴酒。

雞鳴有序

客寢不寐。久之乃聞雞鳴。感而作此。展轉反側。再成諸作。

冬已過半夜偏長。愁人不寐獨在牀。寒雞擁翰不肯叫。老鷓得氣山頭嘯。山頭有虎伺人行。佞鬼騎虎學雞鳴。雞在牆根鼓兩翅。欲鳴不鳴時未至。邨南邨北聞犬喧。雞未三唱勿出門。窗前山鬼大無賴。低頭樹下學人拜。遙遙古寺打鐘聲。一聲一拜聲聲驚。雞鳴一聲天下白。千狀萬態從此滅。

泥鯁行

人家堂坳水不乾。疑有怪物水中蟠。田蛙無聲蚯蚓縮。爭傳此物頭有角。老巫見之禮最恭。云是洞庭行雨龍。作法燒符請龍子。雷火滿空龍不起。不知蜥蜴徑寸身。亂打雪雹猶有神。旁人還恐變化去。那知藏

在泥深處。汲水取泥投江流。蜿蜒乃是泥中鯁。泥中鯁。何足怪。空使老巫朝夕拜。

催糧行

催完糧。催完糧。莫遣催糧吏下鄉。吏下鄉。何太急。官家刑法禁不得。新來官長亦愛民。那信民家如此貧。朝廷考課催科重。鄉里小民肌膚痛。官久漸覺民命輕。耳熟甯聞冤號聲。新增有名官有限。兒女賣成早上縣。君不聞南村大姓吏催糧。夜深公然上婦床。

水夫謠

水夫往在長江邊。年年捉送裝兵船。上水下水不記數。但見船來點夫去。十年家門派一夫。生死向前無怨怒。衣中何有苦搜索。身無錢使夜當縛。遭他鞭朴無完膚。行遲還用刀箭驅。掣刀在腰箭在手。人命賤同豕與狗。射死紛紛滿路屍。那敢問人死者誰。爺孃養汝纔得力。送汝出門倚門泣。腐肉已充烏鳶饑。家猶望水夫歸。

胡星卿茅屋歌

白鷺洲接大江濱。牧馬兒來動成羣。先生避世何處去。合家住近公主墳。茅屋三間倚墳腳。門戶欹斜草繩縛。籬外時聞樵婦喧。樹下每有漁船泊。先生田無一石租。糊口祇賴青囊書。春深婦子競鉏菜。水落弟兄公養魚。可憐茅屋多年破。五柳陰中留客坐。風雨淹旬不出門。先生高臥舉家餓。先生本是公主孫。當

年駙馬最承恩。馴象門西起府第。至今基址宛然存。府基荒去墳園冷。細竹寒花空滿嶺。洗菜猶傳金水橋。灌畦爭汲琉璃井。東川戰功晚始酬。駙馬還蒙少主優。靖難師來家已破。子孫旋失東川侯。奪爵猶加主國號。上書乞恩無不報。下降聞在高帝年。問安尙覩英宗詔。詔書累朝墨有光。龍牋寶篆枕中藏。主家法物一朝盡。樸素惟留駙馬床。駙馬之床樸如此。想見國初俗不侈。當時賜出椒房宮。如今鎖在茅屋裏。茅屋相看幾度春。終年抱膝不知貧。叩門半是先朝爵。失路時憐帝室親。先朝帝室復誰在。茅屋栖遲人勿怪。君不見開平王後懷遠侯。妻子負薪身種菜。

### 湖孰種菜歌

金陵城東湖孰村。中有隱者開平孫。通侯甲第今已矣。意氣豪華無復存。開平去今凡幾代。五王之後惟君在。往昔爭言青門瓜。如今獨數湖孰菜。問孰種菜滿畦新。一家生計只三人。終歲把鉏菜畦裏。婦能炊飯兒負薪。爲君婦亦大辛苦。嬌貴當年難比數。翟珈賜出小侯妻。珠翠裹成上公女。都人猶記嫁時粧。如雲妾媵爛生光。臺前照鏡輪梳髻。架上薰衣派管香。一朝散去竟何有。相對惟餘雙白首。早從府內厭笙歌。還向村中操井臼。村中井臼倚柴扉。賣菜還愁終歲飢。夜長不肯燃薪坐。十指侵寒綻故衣。東川子孫公主裔。妻孥行汲心常愧。聞說君婦盡傷情。無心更擬求奴婢。

### 同左眠樵霜鶴遊碾玉峽因懷爾止

龍暝溪水自東來。穿崖瀉壑如奔雷。山腰峽闊不盈丈。東水水急聲喧豗。水聲束急勢轉大。噴珠跳玉不肯過。激浪驚濤晝夜爭。一條飛下青山破。左生本是樵牧羣。振衣躡級欲凌雲。傲我過水坐盤石。對面大聲語不聞。石頭坐久寒生粟。拄杖半染苔痕綠。想見方公此讀書。空山無人一茅屋。卽今茅屋已全傾。竹刺藤稍繞徑生。夜深或有精靈出。月白應聞嘯咏聲。飄泊遙憐方仲子。三十年來稱名士。一生作客不思歸。好山好水棄在此。

吳門晤姜如須令嗣奉詔有感

在昔同流寓。姜家兄弟賢。交深鉤黨日。客散過江年。梅福名難變。梁鴻噫不傳。淒涼逢令子。話舊淚潛然。

山居雜興

糧事聞人說。官徭果便農。儻能減科派。詎敢後輸供。僧徒施茶竈。鄰求造酒傭。今秋安水確。借與四鄰春。

過老鶴庵

野路通精舍。山門對面疑。客從林際下。僧在竹間窺。石磴到須坐。好房開始知。師徒欣接待。剛是焙茶時。

田間草廬初成

柴扉不擇向。只對遠峯開。日月當門出。江山抱屋來。入林惟少竹。滿徑自生苔。已訂牆東友。求花密密栽。

過曾庭聞蕪陰市上

白著緇衣萬恨平。窮途遇爾轉傷情。我從嶺外經年至。君向江南何處行。瓢笠喜無鄉里識。鬚眉猶使故人驚。相持莫便當街哭。爲到郊原一放聲。

卜居

板屋荆扉半欲殘。梧陰入夏覆窗寒。親除礙瓦藤千尺。獨護穿階竹數竿。好客來多頻缺坐。新蔬炊熟苦無盤。朝飢賴得鄰僧米。欲乞朱門一飯難。

寄吳梅村

秣陵煙樹已全空。回首登臨似夢中。祇課詩篇銷晚歲。別填詩曲哭秋風。同時被召情偏苦。往事傷懷句每工。卻憶清江陽伯起。屢辭麻詔薦婁東。

吳嘉紀三十六首

嘉紀字賓賢。一字野人。泰州布衣。有陋軒詩六卷。

四庫總目。嘉紀詩風骨頗遺。運思亦復剴刻。而生於明季。遭逢荒亂。不免多怨咽之音。

居易錄。泰州布衣吳嘉紀。居東淘苦吟。不交當世子。見其爲五言詩。清冷古淡。雪夜被酒。爲其詩序。馳使三百里致之。嘉紀大喜。過望。買舟至廣陵謁謝。遂定交。

汪懋麟百尺梧桐閣集。野人家泰州之安豐場。閉門窮居。蓬蒿土室。名所居曰陋軒。終日把一卷。苦吟自娛。晚年善病。或井日一食。近海多暴風疾雨。水涌數丈。兩地爲魚場。人絕粒。動稱凶年。野人廬舍污蓬。每歲水至。常及半扉。井竈盡塌。苦吟不輟。其

爲詩工爲嚴冷危苦之詞所撰今樂府尤淒急幽奧皆變通陳迹自爲一宗近代嚴悽之作鮮有過之者

鄭方坤名家詩小傳阮亭謂野人出遊後詩漸失本色不終其爲魏野楊朴今取其集讀之一卷冰雪文初終一致且野人晚節篤行潛修甘心餓死此其品概何等前說云云蓋別有爲言之也

別裁詩集漁洋詩以學問勝運用典實而胸有鑑治故多多益善而不見痕迹陋軒詩以性情勝不須典實而胸無渣滓語真樸而越見空靈然終無名位人予持此論而衆人不以爲然然其詩具在試平心易氣讀之近人中有此孤懷高寄者否養一齋詩話吳野人詩字字入人心腑殆天地元氣所結真陶杜之衣鉢

田按陋軒古詩序事得之史公沈痛得之少陵五七律俊爽亦不失爲元遺山明末詩家可與孟貞抗行

### 翁履冰行

老翁履冰手挈稚孫釜甑塵積貸粟前村村農穀富莫肯念故翁別倉庾跼踖歸路富人如虎顏色難干風壓河心骨重心酸翁泣語孫生無一可河伯應聲冰開人墮其子望見急遽來援欲引轉仆骨肉纏綿一門三世齊陷波裏飛雁哀號無手救爾

### 李家孃有序

兵陷郡城李氏婦被掠掠者百計求近不屈越七日夜聞其夫歿婦哀號撞壁顛碎腦出而死時掠者他出歸乃怒裂婦尸剖腹取心肺示人見者莫不驚悼咸稱李家孃云

城中山白死人骨城外水赤死人血殺人一百四十萬新城舊城內有幾人活解妻方對鏡夫已墮首腥

刀入箭。紅顏隨走。西家女。東家婦。如花李家孃。不辱強梁手。解二豈無利刃。斷人肌膚。轉噴爲悅。心念彼姝。  
彼姝孔多。容貌不如他。解三豈是貪生。夫子昨分散。未知存與亡。女伴何好。髮澤衣香。甘言來勸李家孃。解四  
李家孃。腸崩摧。篋撻磨滅。珠玉成灰。愁思結衣帶。千結萬結解不開。解五令下止殺殘。人生塞外人來。殊似  
舅聲。云我故夫子。身歿亂刀兵。慟仆厚地。哀號蒼昊。解六夫既死。妻復何求。腦髓與壁。心肺與譬。不嫌剖腹  
截頭。觀者殼棘若羊牛。解七東家婦。西家女。來日撤營北去。馳驅辛苦。鴻鵠飛上天。鸞兔不離土。鄉園回憶  
李家孃。明駝背上淚如雨。解八

挽劉昇有序

劉昇儀真人。歙縣潘楚玉僕也。楚玉性褊急。少違意。輒捶撻無虛。日昇不怨也。楚玉母病。昇割股  
肉和藥療之。楚玉死。家業中落。昇黽勉負荷。爲嫁女葬女。楚玉之子次璜稍長。爲娶妻。妻死復娶。  
家益窘。昇筋骨且衰矣。乃賃於人。力作以供幼主衣食。盡瘁至死。程雲家哀之。作義僕傳。余賦挽  
詩。

梁肉厭葵藿。麻泉薄蒹管。繇來棄卑賤。志士復何言。可憐一寸草。寄生桑樹巔。不自知微細。思欲庇樹根。  
身是主人身。何以能酬恩。撻膚不怨數。割肉不辭難。所嗟門戶衰。緩急日多端。精衛力已竭。死喪海水旁。  
洲渚徘徊。哀鳴下鷺鷥。在日慢斯人。鄉隣悔且傷。剖石出美玉。擘蚌露珠光。體質雖鄙陋。今日見中腸。

夏日題程梅愁洗桐圖

秋蘭娛屈子。籬菊媚陶公。如何程梅愁。乃好青梧桐。翳翳蔭林堂。蕭蕭緣澗水。已堪託琴書。還畏霑泥滓。澗聲上樹飛。林氣溼人衣。炎暉炙四野。此地陰霏霏。眼底無纖塵。心神亦清絕。翻笑穎上翁。祇令雙耳潔。

辛亥孟夏二十八日三兄嘉經歸葬東洵

二兄呼五弟。荷鋤隨我發。爾我將老死。應收三弟骨。行行見廢墟。荆棘何翳鬱。餓鴉啄狸髓。野蔓牽人膝。二十八年來。始有家人跡。朽槨在何處。形骸雜土木。肢體捨容易。砂礫亂爪脊。撥剔到天暝。全軀乃無缺。嗚呼甲申歲。兄禍生倉卒。身飽強橫手。命盡少壯日。官長來相視。行路色慘戚。磊磊聳人頭。指日白刃割。哀笳忽四起。鐵騎來萬匹。野積戰士屍。城流殺人血。羣兇出獄門。亦各操鈇鉞。依倚猛虎區。見者咸竦慄。飲恨歸去來。待時臥蓬蓽。次男名瑤琴。襁褓兄愛惜。衆謀立爲嗣。此支庶不歇。四歲離所生。命仰伯母活。不悟大人心。憐女不憐姪。綺繡擁外孫。兒也足無襪。弱膚受風霜。麤髮叢蟻虱。憊極走還歸。持抱生母泣。我時實貧窘。寸心與誰說。今年兒齒壯。摧殘膺疾疾。媒妁不議婚。徭役長被責。敢望吾宗大。仍愁兄祀絕。冤魂久飄零。今日就窀穸。夔夔鄉樹近。沃沃水菱碧。死者抱痛眠。生者吞聲哭。報讐事已矣。斜陽徧阡陌。

隄決詩六首

庚申七月十四日。洵之西隄決。俄頃門巷水深三尺。欲渡無船。欲徙室無居。家人二十三口。坐立



波濤中五日夜。抱孫之暇。作隄決詩。詩成對落日。擊水自歌。境迫聲悲。不禁纍纍涕下。

今日隨人去築隄。明日隨人去守隄。颶風霖霖無休息。土溼泥流積不得。杖藜登高看水長。東舍西隣白泱泱。蝦蟆入門坐蘋上。

浮來草屋如浮萍。蟋蟀啾啾屋脊鳴。家人延頸望天曉。水作北風寒氣早。桁無衣裳。甌無餐。空腸瘦骨當狂瀾。何時有暇愁飢寒。

暮年辛苦飼孤孫。黃口命依白頭存。餅餌斷絕已兩日。水中走來抱我膝。鵝鶻天上鳴嗷嗷。歎息汝祖非其曹。不得銜汝出波濤。

漉起甕中數升黍。竈沈薪溼不可煮。家僮營營欲何適。毒蛇蜿蜒徧阡陌。高歌落日慘我顏。膠漆故舊阻河關。安知我在洪濤間。

去年夏秋雨澤絕。嘉禾枯似翁媪髮。今年天漏夏日冷。黃魚黑鰲戲樹頂。無稅無糧官長矜。胥吏用錢求開徵。以災爲豐爾最能。

劉生<sup>岸</sup>寄我糴米貲。飯結簷頭乞火炊。炊熟欲餐轉踟躕。念生囊中錢已無。容易用錢俗所鄙。違俗更有程季子<sup>雲</sup>。刺船尋我漲瀾瀾。

我昔三首效袁景文

我昔客途逢敗兵。弦聲旆影魂俱驚。殘騎如狼散草莽。居人雜兔奔縱橫。漁船貪利夜賣渡。金多方許載人去。暝色潛行曙則隱。口乾腸飢我能忍。

我昔攜家亟逃難。海雲漫漫晝昏晏。野空蹶響賊馬近。我船欲速行轉慢。須臾燔燒閭里紅。風飄船入蘆港中。蘆葉菰葉蔽男婦。引衣掩塞噓兒口。

我昔兵過獨還家。畦上髑髏多似瓜。空村無聲鷄犬盡。籬菊自放霜中花。天南伯兄天北季。驚魂棄絕故園地。夜寒鬼語聚稍稍。細雨還聞九頭鳥。

晏谿送江虛中兼懷吳後莊

凜凜歲寒天。送君歸舊川。溪光浮佛舍。塔影壓漁船。客路閒雲外。家山落照邊。不愁逢酒伴。囊有賣文錢。

茉莉

深閣晚粧近。爭開羅綺前。芳馨風緩緩。採摘月娟娟。種自宜南土。根難到隔年。比來烽火靜。處處賣花船。

懷江象賢

邗江三月半。孤客此時情。病起家重憶。愁來野自行。落花關外舫。嬌女竹西箏。無數繁華子。春風送出城。

寄程蝕菴

練江巖岫內。沙白葦蕭蕭。鶴髮浮孤艇。漁竿閱兩朝。嶺雲流作瀑。澗樹側爲橋。不得來攜手。思君顏色凋。

廣陵過嘉樹堂贈汪左嚴孝廉

白岳白雲裏。松門石徑斜。半空飛瀑布。其下有人家。山響猿呼子。煙香樹發花。幾時隨我友。仙境醉流霞。

送王黃湄之海陵

是我還家路。扁舟汝獨行。千人初短氣。去國各含情。海水孤城暗。霜風一雁鳴。此鄉稱僻壤。誰更識虞卿。

宿從容菴

老僧借宿處。窗對大江開。茆屋無門戶。寒潮夜去來。火明揚子渡。鐘動妙高臺。蕭瑟憑風雨。繩床有舊醅。

晚發白沙

黯黯雲垂野。喧喧浪激沙。黃昏初放艇。白首正思家。江戍聞寒柝。漁燈見宿鴉。飛蓬真似我。歲晚更天涯。

附程翼士舟歸東淘作

客久吾逾拙。囊空汝倦遊。故鄉無百畝。壯日盡孤舟。村吠隔花犬。溪飛衝雨鷗。相攜應不厭。同是敝貂裘。

九日同夏五作

風雨朝如晦。乾坤日用兵。秋魂聽鬼哭。老眼看人爭。榛梗方爲害。東南稍輟耕。吾家二十口。溝壑正關情。

送人歸黃山

入雲山路碧重重。歸去追隨石戶農。幾畝秫田今有主。一間茆屋在何峯。煙崖芝草衰年採。雪嶺樵人落

日逢。悵望浮邱蹤迹遠。鍊丹臺上倚青松。

內人生日

潦倒邱園二十秋。親炊葵藿慰余愁。絕無暇日臨青鏡。頻過凶年到白頭。海氣荒涼門有燕。谿光搖蕩屋如舟。不能沽酒持相祝。依舊歸來向爾謀。

九月四日吳雨臣見過

俱是先朝戊午生。相知端不爲同庚。黃塵戰伐無年代。白首漁樵此弟兄。荏葦人稀雙雁下。茱萸節近一溪晴。疏籬陋室秋光在。莫厭頻來酒共傾。

舟中九日

過節淒然病裏身。強披敝褐對江津。初霜白雁隨遊舫。故國黃花怨主人。幾度登臨成老大。半生飄泊喪精神。干戈滿地親朋遠。愁見茱萸刺眼新。

送方爾止

出郭朔風吹敝裘。亭臯東望使人愁。隋宮綠酒離前飲。魯國青山老去遊。寒雁背羣飛夕照。霜砧何處搗殘秋。欲攀隄柳增惆悵。黃葉蕭蕭落馬頭。

舟中贈王子蕃

萍蹤空傍水邊鷗。鷗自忘機我自愁。歲儉業蕪泉廡下。天寒人在楚江頭。渚風亂聒羣飛雁。野日斜熏獨去舟。時晏路長多謝汝。酒錢攜共老夫遊。

送劉希岸歸呂四場

逸興應知中路增。紫狼碧漢樹層層。偕僧松壑霽浮權。乞火竹爐寒煮冰。萬里潮聲江海合。千尋石路杖藜登。何當共宿翠微裏。夜半開門看日昇。

過金山

屢向征途見此山。興來維艇一躋攀。忽開襟抱魚龍際。況載尊罍水石間。吳楚千年流白日。風塵半世損朱顏。留雲亭上人微醉。坐看江帆暮往還。

東歸道中

人煙四望稀。野雲不見路。歸鴉與暝色。稍稍隋宮樹。

冶春絕句和王阮亭

雜管繁絃奏野航。聽來聲調是伊涼。邊關子弟江南老。今日曲中逢故鄉。

送吳仁趾

秋山遶郭儘堪遊。暮宿城西孫楚樓。後夜酒醒思舊伴。烏啼殘月不勝愁。

慰隣人盧慎年七十無子

須知嫠獨易相存。積雨家家水入門。凶歲形容魚鰾笑。人生怨殺有兒孫。

王翊二十七首

翊字介人。嘉興布衣。有秋槐堂集。

樵李詩繫秋槐老人家故業染。一手挾書。一手數錢。與布販菜傭相應答。好製詞曲。作執扇記。忌者誣以詆毀里紳。訟之官家。計日落。然詩日益有名。

靜志居詩話。介人初擅詞曲。後研聲詩。志取多師。不遺僞體。其論詩於合處見離。於離處求合。啓禎之間。大雅不作。毅然以起。衰自任。而知者寥寥。惟平湖陸職方嗣端心賞之。嘗訪君於長水。值君洗硯河頭。挾之登舟。家人不知也。遍遊茗書。乃返。既而入越。謁陳推官臥子。方置酒送客。君詩有前路夕陽外。行人春草中之句。臥子擊節曰。此今之高三十五也。爲序其詞。遭亂所居不戒於火。惟餘小屋二間。一供婦爨。一吟詠其中。有故人官府察者造之。不見。尋卒於京口。五言如江湖長至日。風雪上方山。驛路通秦遠。峯陰入晉多。桃榔千樹雨。瘴霧百蠻天。日氣淫秋雨。嵐光變夕曛。楓林依水盡。雲物近秋多。一二故人在。飄零佳訊稀。江山雄白下。人物近黃初。山雪行人少。江梅臘月多。文章身後事。邱隴夢中山。白社遼人日。玄關閉子雲。江山開一望。吳越在孤舟。七言如夜月旌旗五馬渡。秋風草木八公山。周道秋風行黍稷。漢宮春雨長蒲陶。西蜀諭通司馬檄。中山謗滿樂羊書。秦塞忽驚三月火。漢家空待貳師功。三月晴風高戰鼓。九江春水下樓船。鑄語高華。此方虛谷所云律體也。

明三十家詩選。介人詩。沖澹處似襄陽。深婉處似龍標。沈摯處亦似少陵。禾中詩人。自清江。巽隱以後。竹垞以前。此其卓然成家者也。

田按。鈕玉樞觚牋云。介人攜詩藥過鄱陽湖。以文得罪湖神。遇羣盜搜介人篋。得唯詩稿四五帙。怒投於湖。及歸。得詩餘百闕。緘之藤笥。到家發視。諸物不改。而詞稿碎如刀割。迎風片飛無完紙矣。然則今之所傳者。盜擲神碎之餘也。

### 猛虎行

北山猛虎行斑斑。夜出索人晝不還。路無行人食不足。只向山中守麋鹿。可憐日久麋鹿窮。猛虎亦死深山空。

### 無可奈何曲

吳姬白皙妖且妍。雙鬟墮馬如雲偏。流波宛轉情遷延。琵琶暗撥鴛鴦絃。月華照夜明蒼煙。爲君酣歌樂當年。勸君莫惜黃金錢。明朝花飛月亦沒。青塚家家泣枯骨。

### 孝陵

鍾山石層層。冬夏積冰雪。松柏纏陰森。熊羆護巖穴。鼎湖龍去遠。弓劍闕幽闕。惟皇挺熙運。奮起乘黃鉞。一揮破蘄黃。再舉奠吳越。羣雄空鬪爭。所遇皆殄滅。赤手造區夏。率土賴重活。謨烈貽後人。大誥昭史策。燕雲旣殷遷。豐沛猶漢業。至今龍蟠基。王氣殊未歇。臣也草野人。不易窺聖域。艱難入都來。未敢忘一謁。精靈儼如在。杳冥心目懾。梓殿凝玉芝。隧道隱丹霓。萬禩翼休明。神哉報豐潔。

### 秋夜遣懷

八月天氣清。草堂轉深僻。長河流素影。遙遙瀉空碧。落葉盈寒皋。繁星爛秋夕。蕭風吹微月。竹露夜深白。偃蹇獨往來。悅焉慕疇昔。

北歸後得友書感賦

長夏風日炎。南歸且散髮。每懷故人好。索居又彌月。書來道相思。殷憂喜初豁。對使詢近事。一一言婉切。別後盜賊多。入徐恣衝突。州民百餘里。大半遭慘殺。倉卒聞此言。心膽幾若割。向使久羈旅。焉能至今活。生還有餘幸。悲歌守饑渴。縱使委溝壑。亦已欣後沒。干戈滿天地。原野厭膏血。裁詩雪涕淚。痛定轉嗚咽。

游弢光

西山鬱奇姿。茲峯實爲最。孤根生虛無。時與雲雨會。密竹青連陰。白日半成晦。泠泠多澗泉。清響落山背。曾聞住高僧。卓錫自何代。至今松林中。飄風墮殘唄。我來值秋初。炎暑猶未退。迴盤到諸天。勦劣慎所戒。歸途已蒼茫。想像白雲外。

顧山人貽畫賦贈

東風吹花隱蠟屐。臥起初聞叩門急。手持一卷花外來。宿昔知名武林客。君之手腕蓋有神。耕煙注墨生空雲。蕭疏幾筆起纖末。俄頃忽見山嶙峋。圓峯皴石石苔古。疊石成巒介平楚。葉重霜流遠勢寒。沿溪茅屋深宜補。君家虎頭不可得。阿瑛以後君無敵。蕭齋風日正佳時。畫裏看山幾重色。



荒原

荒原秋草積。緩步獨行歌。野水同天盡。寒煙入樹多。此生嗟老大。滿眼又干戈。北望風塵合。驚聞旅雁過。

與范尊甫

十年成往事。長嘯激悲歌。搖落當秋甚。蹉跎奈老何。風塵孤劍冷。天地一身多。更念幽居者。衡門掩薜蘿。

寄內

白門楊柳樹。蕭颯在江關。故國幾回夢。清秋千里山。遠懷應有淚。久客且無顏。歲晚愁歸計。冰霜道路艱。

渡錢塘

水驛渺難求。風帆颯未收。江山開一望。吳越在孤舟。客鬢逢秋換。鄉心近暮愁。浮沈無限事。觸目羨沙鷗。

冬日

蕭條西北風。吹斷北來鴻。歲月客程晚。冰霜天宇空。有時歸夢裏。盡日處愁中。昨夜傳鄉信。烽煙又浙東。

清河縣

小縣無城郭。河流到縣門。客舟經近市。漁網集空村。饑饉年頻告。逃亡屋半存。惟餘譙鼓在。猶是警黃昏。

薊北

薊北十年來。烽煙暗不開。秋高邊馬健。風急塞鴻哀。白髮將生鏡。黃金未上臺。徒憐憂國計。長屈幕中才。

登北固甘露寺

凌雲亭畔倚崔巍。明滅維揚望裏開。南國至今遺寺在。西風不盡大江來。日生滄海凌晨見。潮過金山向晚回。指點孫吳舊時事。馬蹏石迹半蒼苔。

竹夜

林風吹竹竹露微。幽人隔竹開柴扉。星河夜宿草堂靜。蟋蟀暗吟秋月輝。疏鐘杳杳坐來歇。流螢奕奕停還飛。石床一枕破清夢。寥落半生無是非。

雜感三首

縱矢彤弓寵錫頒。北門鎖鑰動江關。武侯師出名尤正。太傅功成鬢未斑。夜月旌旗五馬渡。秋風草木八公山。金湯萬里生民寄。麟閣期登指顧間。  
長城萬里羨當年。楚澤軍威蓋世傳。三月晴風高戰鼓。九江春水下樓船。韓彭心事應難論。李郭功名不易全。漫道勤王師獨正。江南處處起烽煙。

三十家詩選澄懷云。此詩似指左良玉。

淮海聊寧燕雀居。風高鼓角建牙初。寒沙畫戟秋陰重。雲壓孤城夕照虛。西蜀諭通司馬檄。中山謗滿樂羊書。將軍面矢誰堪敵。樽俎論功計已疏。

秋怨

芙蓉花落水無香。南國秋來夜有霜。邊月只將離夢遠。相思河外是西涼。

金陵懷古二首

煙草萋萋野色新。晚來驅馬見行人。不知何處含章殿。滿地梅花雪外春。  
寒江秋水盡無塵。棲隱當年有二倫。爲問山中明月夜。草堂猿鶴怨何人。

會稽竹枝詞

秋風秋雨正淒淒。荷葉荷花香滿溪。越女蕩舟愁日暮。歌聲盡在若耶西。

宮詞三首

上林春酒盡醍醐。醉倚新恩倩帝扶。翠輦不登遮袖去。兩行銀燭盡宮奴。  
禁中春樹藹晴煙。朝報簾聲下九天。官局進呈新鑄好。六宮齊賜草書錢。  
十里芙蓉內院秋。涼風先到殿西頭。君恩不是銅溝水。那得深宮處處流。

揚州

香瑣珠匣閉黃沙。泉下依然望翠華。芳草離宮三十六。春風吹滿玉鉤斜。



# 明詩紀事卷十一

辛籤

屈大均四十首

初名紹隆。字介子。番禺諸生。鼎革後。去爲僧。名今種。字一靈。返儒服。更名大均。字翁山。有翁山詩集八卷。

池北偶談。屈翁山少爲諸生。有聲。旋棄去。爲浮屠。久之。出遊吳越。又數年。忽加冠巾。遊秦隴。與秦中名士李因篤輩爲友。作華嶽百韻。固原守將某見而慕其才。以甥妻之。翁山愛玩少室。賦詩云。同棲紅翠三花樹。對寫丹青五嶽圖。自固原攜妻至代州。上谷。再遊京師。下吳會。自金陵歸粵。妻隨病死。其詩尤工於山林邊塞。一代才也。

王猷定四照堂集。屈五賦質既超。選材亦別。餘子在人海和酬。處士獨拔地作空中語。

靜志居詩話。翁山早稟儒服。託迹緇藍。予識之最早。其詩原本三閩大夫。自王逸以下。多屏置不觀。後復返儒服。入越。讀書祔氏寓山園。不下樓者五月。始具曹劉班左諸體。嬰之七言不如五言。五律勝於五古。至歌行長句。可無取焉。

廣東詩粹。一靈自謂五律可比太白。而氣體亦多似杜。

田按。翁山五言詠古詩。突兀奇崛。多不經人道語。七律雄宕豪邁。五律簡妙圓轉。一氣相生。有明珠走盤之妙。與區海目後先合轍。

詠古四首

神堯愛二女。盡以歸重華。長者爲女君。容顏如朝霞。少者爲夫人。亦若扶桑花。衫衣被南風。琴歌何紛葩。朝同蓬萊宮。暮去瀟湘涯。帝旣崩蒼梧。妾亦捐長沙。神光兩不離。月以日爲家。

維昔二周君。皆以誅秦亡。大義帥諸侯。王朝就有綱。惜哉無良將。九鼎歸咸陽。是時秦亦滅。嫡裔止莊襄。政也實姦生。呂代嬴氏興。二世不旋踵。趙高撼其吭。前秦祖蜚廉。後秦祖文信。無德易傾覆。虎狼總推刃。詩書亦何罪。儒生同一燼。痛絕驪山坑。多言說堯舜。

峩峩太華山。上有四毛女。苟非逃學仙。從死成黃土。光光人魚膏。泉下照歌舞。淚作水銀海。腸爲黃金縷。秦時女高士。麗英與爲伍。翩翩金精峯。相逐有毛羽。

漢帝亦多情。酒酣思猛士。悽悲大風歌。辭與招魂似。韓彭皆已亡。慷慨不可止。泣下爲淮陰。非是悲遊子。刻薄鐘室誅。終古帝王恥。忍以英雄人。以與兒女子。

過大梁作

浮雲無歸心。黃河無安流。神魚騰紫霧。蒼鷹擊高秋。類此雄豪士。滔滔事遠遊。遠遊欲何之。驅馬登商邱。朝與侯嬴飲。暮爲朱亥留。悲風起梁園。白草鳴鸞鷗。揮鞭控鳴鏑。龍騎如星流。超山逐羣獸。穿雲落兩鶩。歸來宴吹臺。酣舞雙吳鉤。驚沙翳白日。垂涕向神州。徒懷匹夫諒。未報百王讐。紅顏漸欲變。歲月空悠悠。

望五老峯

飛翠如煙雨。秋來山色濃。夕陽一返照。明滅金芙蓉。獨嘯此亭月。將尋何處鐘。石門精舍近。早晚巢雲松。

開光寺樓作

向夕樓中臥。天風忽起西。不知吹瀑水。飄落幾重谿。牕小雲爭入。林深雪已迷。無人愛幽獨。來共聽猿嘯。

從軒轅宅入迷居洞

曉起藥珠峯。行行花影重。林鳥飛落月。山鬼嘯寒鐘。野飲芝泉冽。秋衣竹翠濃。昨宵逢道士。疑是七星松。

松林

松林二三里。掩映帶平沙。煙火不知處。茅茨時一家。野衣無數葉。山鬢絕多花。樵路隨春草。盤盤上嶺斜。

寄何子

病裏知秋早。涼風生鬢絲。夢隨林葉落。心與海雲遲。明月不長滿。青山空有期。斜陽在南浦。每憶送君時。

馬陵

俯挹中州盡。河山表裏來。天懸句注險。水劃孟門開。一笑雄圖失。長歌故國回。遙從狐突廟。直下馬陵臺。

寄桐岑子

雨雪悲年暮。山川愛浙東。平生一明月。飛入鏡湖中。白拂懸天柱。清琴響碧空。期君揚帆至。相接有樵風。

避何子往桂林

桂林襟五嶺。山盡翠成嵐。去逐湘江北。歸從灘水南。故人待徐孺。太守是嵇含。巖穴多句漏。行春共玉驂。

遊太倉張氏學山樓

城裏多邱壑。名園更學山。何來峯十二。風雨恐飛還。抱石雲長冷。流花水不閒。人疑太湖上。銷夏第三灣。

入秋鄉江作

欲雨水風起。白雲初滿船。秋鄉多落葉。一半逐流泉。白鳥一溪影。人家幾處煙。片帆平嶺過。驚起鷓鴣眠。

寄蕭山張杉

聞君白魚潭。蘆花秋半含。持竿皎月下。沽酒寒溪南。我欲遊天姥。因之結草菴。會當遣雙鶴。來此迎蘇耽。

重至白門宿余鴻客山堂作

白下噓烏地。愁人自六朝。秋聲將落葉。此度益蕭蕭。山鬼弄魂夢。草蟲悲寂寥。那知垂老客。有道在漁樵。

琴臺

二月春風發。梅花滿洞庭。美人乘畫舸。采采入香溼。潮生胥口白。雪盡莫釐青。何處弔西子。琴臺碧玉屏。

桃溪

夾岸蒙茸竹。枝枝有鳥噓。夢飛芳草外。愁在夕陽西。水驛連三峽。人家各一溪。女郎祠畔望。煙雨一秋迷。



綠樹

江南芳樹滿。色似水波鮮。一半爲楊柳。風吹綠漲天。長因新葉好。益念故花妍。黃鳥藏何處。聲聲總可憐。  
自胥江上峽至韶陽作

六六玉芙蓉。鳴琴知幾峯。如何百蠻狩。不遣二妃從。絕徼餘城闕。荒祠尙鼓鐘。月明瑤瑟至。應渡水雲重。  
浮湘

兩日隨蘭槳。青青紫蓋峯。五峯江倒映。水底盡芙蓉。蒼翠楚天好。微茫湖日重。洲邊采香草。湘女暮相從。  
繇來曲

霜鬢欲成絲。多因生別離。無情是瑤瑟。未及曲終時。魂夢滿三楚。雲山紛九疑。天邊無限樹。總是一相思。  
唐晉王祠暮

何代丹青妙。雄姿動武皇。精靈猶白日。弓劍已秋霜。石馬嘶風急。沙河繞塞長。應州金鳳井。霸氣共蒼蒼。  
王有畫像武宗取入大內

懷同岑

空翠洞庭陰。松風吹滿林。白雲不可見。日與數峯深。聞在毛公洞。時時拂素琴。秋來摘朱橘。霜露溼衣襟。  
惡少

長劍短刀鋌。幽并惡少年。馬頭懸落日。鷹眼射高天。並飲桃花店。齊彈白紵絃。胡姬量酒罷。調笑索金錢。

送顧寧人

雁門北接常山路。爾去登臨勝概多。天上三關橫朔漠。雲中八水會渾河。飄零且覓藏書洞。慷慨休聽出塞歌。我欲金箱圖五嶽。相從先向曲陽過。

杜曲謁杜子美先生祠

城南韋杜瀆川濱。工部千秋廟貌新。一代悲歌成國史。二南風化在騷人。少陵原上花含日。皇子陂前鳥弄春。稷契平生空自許。誰知詞客有經綸。

金山口恭謁天下大師墓

讓帝飄零海嶠東。龍歸猶識未央宮。風雷豈敢疑周日。禾黍何當怨狡童。父老爭迎靈鷲錫。山河如棄鼎湖弓。傷心陵墓無封樹。秋草離離白露中。

平臺

在天壽東山口內一里。成祖嘗駐蹕焉。嘉靖十五年命作亭於上。名曰聖蹟。十七年四月。駕幸平臺。祀成祖於臺中。

翠輦紅旗去不還。平臺一片朔雲閒。宮邊流水通諸口。陵後黃花控二關。俎豆中宮修漢臘。松楸南國慘天顏。玉環何日歸廷尉。流落龍沙戰血斑。

宣府道中

花園北抵鴛鴦灤。一路闕氏往蹟多。恆嶽白雲連上谷。桑乾春水接洋河。紫髯日市牛羊入。紅粉時吹籥。築過此度關山無內外。漢時空費羽林戈。

宣府弔古

遼后宮臨鎮朔臺。明君祠傍拂雲推。天寒鷹隼三關落。日暮牛羊四野來。幾日玉鑾榆木返。無邊毳帳上。都開遼東一臂連。宣府誰使寧王罷鎮回。

大同作

飲馬東連白道泉。桑乾西接紫河煙。何年代邸淪秋草。幾處秦城出遠天。事去英雄羞一劍。時來遊俠喜三邊。哀笳莫奏思鄉曲。都尉臺前月正圓。

采石題太白祠

才人自古蛟龍得。太白三閩兩水仙。詞賦已同雙日月。精靈還作一山川。江間絕壁丹青出。木末飛樓俎豆懸。千載人稱詩聖好。風流長在少陵前。

墨胎

九世商侯是墨胎。盟津肯爲武王來。千秋書弒堪爲法。一代無臣正可哀。灤水風悲孤竹里。首陽雲掩采薇臺。黃農虞夏歸無處。多事天生十亂才。

見月有懷

知爾城南婦。愁心欲寄難。故將樓上鏡。懸與墓砧看。

湖上

春草接姑蘇。春煙望漸無。愁心與春水。流滿莫愁湖。

寒食

煙雨催寒食。江南又暮春。可憐三月草。看盡六朝人。

天邊

天邊明月迴含霜。夜夜哀笳怨望鄉。一片愁心與鴻雁。秋風吹不到衡陽。

客雁門作

三年作客傍淖沱。聽盡哀笳出塞歌。白髮不驚明鏡滿。秋霜只怨雁門多。

陳恭尹三十四首

恭尹字元孝。廣州順德人。侍郎邠彥子。有獨漉堂集七卷。

彭士望恥躬堂集。獨漉堂詩。諸體兼擅。手觸肩倚。莫不中音。意格渾成。發人神悟。

漁洋詩話。南海耆舊。屈大均翁山。梁佩蘭藥亭。陳恭尹元孝齊名。號三君。元孝尤清迥絕俗。如離憂在湘水。古色滿衡陽。映花

谿路閉。漱水石根虛。枕椰過雨垂空地。玳瑁乘潮上古城。家山小別吟兼夢。水驛多情浪與風。皆得唐人三昧。

居易錄。元孝寄余詩。索南海集云。酷似高人王右丞。在官蕭散意如冰。時名兄弟堪方駕。家學文章自一燈。滄海乘槎曾獨到。越山懷古記同登。南來新詠多如許。紙貴衡陽寫未能。予乙丑別於佛山。今六年矣。元孝詩如積雪迴孤棹。寒湘共此心。積雨

江漢綠。歸心楊柳初。三徑草生殘雨後。數家門掩落花中。皆唐賢佳句也。

靜志居詩話。元孝降志辱身。終當進之逸民之列。其自序略云。志學以往。皆爲患難之日。東西南北。不能多挾書卷自隨。而意有所感。復不能已於言。故於文辭。取諸胸臆者爲多。而稽古之力。不及其辭。可云不自滿矣。論其詩品。雖稍遜於翁山。然翁山祇工五言。又不若元孝之諸體相稱也。

張維屏聽松齋詩話。詩以沈爲極詣。沈不在貌。其骨重。其味厚。其氣蒼。其韻長。乃謂之沈。梅村獨渡之詩。皆沈。梅村沈麗。獨渡沈擊。

田按。元孝詩溫雅有則。身際滄桑。多感憤之言。而音調仍歸和平。則澤古者深也。

### 瑯琊王歌

寶馬鳴春風。馬上人如龍。下馬道名姓。言是廣平公。

### 行路難

君不聞蜀山多陰稀。見日羣犬吠之盈萬室。又不聞野人有婦一目偏。出見舉世皆不妍。是非好惡何有定。昨者高岸今爲淵。勸君且自酣盃酒。勸君不用狂開口。正言自古有戈矛。上士聞之皆卻走。

### 感懷二首

事君如四時。成功者爲客。君子慎其言。祇以求忠益。小人躁於名。噉噉沾其直。疾疾卒不除。上下成乖隔。爲臣固當戒。爲君獨宜擇。曲突弗先圖。頭額爲焦灼。忠言有如鴉。佞言有如鵲。鵲鳴人所喜。鴉鳴人所惜。覽鏡在中夜。莫辨影與形。人苦不自知。所賴友與朋。圭璧貴攻瑕。龍阿朝發矚。如何末世士。懷利忘平生。責望疑似間。讒間忽然興。陳張交里門。白刃王侯生。富貴尙相負。貧賤甯相能。結交始以義。全交終以明。安得兼黃金。以鑄鮑子靈。

雜詩

商風自何來。白雲起秋色。梧柯一下葉。百卉萋未息。天地方疾威。美者先受抑。捐生故有人。困餒焉足惜。豐此百年軀。祇爲螻蟻德。

遊七星巖

立馬眺平蕪。蕭蕭見蒼壁。不知何處雲。飛作茲山石。嵯峨各異勢。紛詭非一色。旁通類戶牖。中虛成室宅。藤杞上鬱盤。石乳下涓滴。時聞鐘磬鳴。宛若仙源隔。靈峯互蔽虧。微徑緣空隙。頗疑混沌初。有此機巧迹。遨遊茲已屢。歲月真如擲。川原無古今。世事空疇昔。徘徊倚層巔。北風感行客。

登羅浮

八桂祕南經。雙山雄粵望。偉哉昔所聞。於今覩其狀。彌天列青靄。絕地聯層嶂。掩苒草木平。陂陀谿谷壯。

誰言盛積阻。極目何超曠。雲巒時絕續。泉聲日奔放。飛樓候朝暎。倒影排溟漲。相傳蓬島來。復知陶唐尚。事往誠莫稽。迹湮理無妄。擣禽應白杵。暗虎懷仁讓。蟲書篆符竹。蜺化遺衣桁。翳維羽人宅。信此餘風暢。陰崖饒異產。神藥茲靈藏。名遣炎帝書。類絕嵇含訪。伊昔休明會。位與王侯抗。時勤玉璽封。未昧高山嚮。望秩禮久虛。早魅人猶仰。我來仲夏月。溽暑陽方亢。臥聞夜來雨。飛出龍池上。何因需九州。蒼生企靈贖。

沖虛觀

浮生無百年。脛質今二毛。言尋仙人居。焉憚登陟勞。褰衣遵澗曲。輟棹逾平皋。輕風澹餘雲。仰見巖岫高。真宮廠峻宇。飛陛凌層霄。羣峯列垣墉。衆壑深溪橋。石池曜紅蕖。乳竇凝金膏。緬懷著書人。丹書樂南交。幽洞俯日月。天路流雲璈。慮釋神必凝。理得形自超。安知後來者。澹蕩非吾曹。

西樵遲蔡良若

朝起望山路。雜花虧蔽之。日暮有來人。而非心所思。子行亦不遠。日歸何乃遲。清溪日澣濯。猶恐衣裳淄。柏舟行爲區。母陳太君賦。

太君、愧我陳太夫之女也。許適見五區大夫之子寶宸文學。文學早卒。太君當未笄之年。矢靡他之節。于今五十矣。同人嘉其志有成。繪圖爲祝。予旣爲之序。復作此歌。

柏舟兩髦猶可儀。陶嬰黃鵠曾雙飛。夫人爲婦已頭白。眼中未識君容輝。自言生長大夫女。經史胸中炳。

如炬。父母有命兒有心。縱不言承已心許。心期頡頏同一林。天教殊絕成辰參。人生意氣貴一諾。妾能負天不負心。妾父有男妾有姊。君家大夫君一子。有妻於俗得立孤。無妻爲殤終已矣。素車白馬入君門。繇來爲義非爲恩。身安分命甘如齋。半生衣枕無臙痕。當年十五今五十。嗣子成立皆有孫。嗚呼陷胸絕脰死容易。就義從容人所畏。青閨冉冉盛年徂。誰能誓死終不渝。千金之劍贈樹墓。至今談者猶區區。何況贈以千金軀。乃知未仕報韓者。古今所以爲丈夫。

發舟中湘將登南岳

芳草綠未已。孤舟發南湘。還當上巳日。遠適衡山陽。石積水光碎。竹多風響長。客途春有酒。波蕩感浮觴。

歸舟

積雨江漢綠。歸心楊柳初。芳菲空復爾。少壯已全虛。白髮何難得。青山不易居。從今向田里。所懼世情疏。

游尹瀾柱銓部園林

曲渚平無浪。扁舟晚不歸。如何垂綬客。亦有釣漁磯。天月欲隨我。水雲微上衣。小童輕把棹。莫使白鷗飛。

贈袁偉振林叔吾

珊瑚洲畔柳。可以贈依依。自我此爲客。而君遂不歸。夜吟銷畫燭。春雨共寒衣。未別先惆悵。他宵明月輝。

次鳳陽逢中秋



未到問沽酒。早投城北闔。莫令亡國月。得照渡江人。世薄功名士。秋銷戰伐塵。餘生付樽杓。留醉上車輪。  
漫興

借屋增江口。悠悠十八年。力窮羣籍內。身老衆人前。曲巷來風滿。閒門得月偏。有生同是寓。終戀墓邊田。  
冬草

無論南與北。一種白連門。豈不怨遲暮。會承天地恩。遠風疏勁葉。春色聚寒根。獨立觀元化。悠悠何所言。  
藤簾

一片燕山雪。千枝海上藤。結爲幾萬字。字字續成冰。縷結長欺髮。光寒不集蠅。暑天南地上。從此絕炎蒸。  
八月十夜泊舟長淮關懷故園別者

長淮今夜月。此是故人心。萬里送行者。徘徊楓樹林。維舟悵前浦。把酒戀同斟。自我不相見。知君愁至今。  
送滌上人

滌公到城久。忽憶邱中琴。積雪迴孤棹。寒湘共此心。獨歸紅樹外。相待碧雲深。借問茅菴路。衡山在隔林。  
葉世穎重之中湘茅屋行後有寄

楚國木葉下。西風行有霜。離憂在湘水。古色滿衡陽。幾日歇蘭棹。此時開草堂。山川教兒子。指點洞庭傍。  
同何不偕梁器圃魏和公梁藥亭陶苦子宿靈洲山寺東王說作王大雁

靈洲秋色淨無煙。水市山隅浪市天。落日客尋江上寺。出林僧放月中船。漁依別港燈侵閣。鶴宿高巢影在泉。欲與故人同夢到。夜來吟咏不成眠。

寄程周量

薇省仙郎安好無。別來三見落庭梧。西風不盡雁初下。明月相思天一隅。內詔寫歸金鳳紙。新詩擎出木難珠。故人落魄南江上。穩繫藤蓑作老夫。

送家中洲之青原訪藥地禪師

老依江徼謝名稱。門徑蒼苔日漸增。遠興忽生黃菊節。舊心期對白頭僧。吟過曉岸風千樹。舟並寒山夜一燈。想到吉州攜手地。石橋新瀑半爲冰。

夜起西山草堂口占別吳又札梁顒若梁亮圃

無成三十老漁蓑。舊國深慚此屢過。生計未知何事好。詩篇惟覺別人多。高城曉角收涼月。歧路西風長白波。猶幸交親不相棄。夜燒銀燭爲悲歌。

發舟寄湛用階鍾斐仙滿天石

扶胥古渡水淒淒。雨後移舟望轉迷。數口寄居秋草外。一身爲客水雲西。家無兄弟依良友。地夾河山畏鼓鼙。知己片言應不負。亂離妻女藉提攜。

送任克家歸皖江

楚國千峯入小樓。闌干環映大江流。夢中明月經年別。歸興吳山昨夜秋。菊徑乍開人並上。秫田多熟酒新篘。家園樂事遙堪羨。作賦潘郎未白頭。

夏至夜卽事

初晴天氣便炎蒸。小閣風多最上層。臘酒舊藏椎髻婦。春茶新惠住山僧。頻探落月移湘簾。自惜流螢掩夜燈。一歲算來今夕短。老夫猶爲幾回興。

鄴中

山河百戰鼎終分。歎息漳南日暮雲。亂世姦雄空復爾。一家詞賦最憐君。銅臺未散吹笙伎。石馬先傳出水文。七十二墳秋草遍。更無人表漢將軍。魏書明帝紀注。張掖柳谷口有開石得五馬文。曰大討曹。此魏晉代興之符也。

明妃怨

聽松齋詩話。獨漉先生七律尤多傑作。鄴中懷古一篇。議論含蓄。鏗鏘自然。七律到此地步。所謂代無數人。人無數驚者也。  
生死歸殊俗。君王命妾來。莫令青塚草。生近李陵臺。

江上曲

雙蛾畫不成。十五背孃行。獨自搖蘭槳。橫塘看月生。

東湖曲二首

大石樓連小石樓。上樓遙見珊瑚洲。洲邊花豔誰家女。笑擲紅菱打白鷗。  
垂楊橋晚歸人小。近水亭高遠岫孤。正是郭西難畫處。淡煙疏樹似倪迂。

陳子升三十首

子升字喬生。南海人。侍郎子壯弟。弘光時。以明經舉第一。隆武改元。拜中書舍人。桂王時。拜吏科給事中。遷兵科右給事中。有中洲草堂遺集二十六卷。

有學集。喬生學殖富有。才筆日新。以風雅爲第宅。以醜選爲苑囿。緜繡樓絃。蒙榮集翠。南海文忠公盱衡告余。有火攻伯仁之歎。

靜志居詩話。喬生古詩愛仿玉臺。金樓。五律規摹太白。浩然。時有單行之句。然其心摹手追者。區海目也。順德薛始亨。岡生序其詩云。洪。永。成。弘。迄今。天下之詩數變。獨粵中猶奉先正典型。自係典籍以降。代有哲匠。未改曲江流風。庶幾哉。才術化爲性情。無媿作者矣。此善言土風者。

梁佩蘭六堂堂集。中洲先生詩。有時空諸所有。有時實諸所無。有時高唱入雲。有時舟迴蕩漾。有時天然頽放。有時簇錦攢花。間或嗜險驅奇。畢竟雅人深致。

田按。喬生早擅才華。晚歸閒寂。集中諸體。各有擅場。五律尤有明珠走盤。彈丸脫手之妙。

短歌行

有酒盈樽。嘉賓在門。直須延坐。庭光已昏。悲當用歎。唇亡齒寒。魯酒伊何。園彼邯鄲。瓶之罄矣。惟蠹之恥。人生何爲。憂來不已。蕭蕭暮風。吹我欄櫺。悲滿君懷。醉顏不紅。交交好禽。枝間好音。胡不如鳥。人各有心。鶯嬌始簧。燕狂以眴。斷鶴續鼻。云胡短長。琴則可歌。笙則可吹。惠而好我。與子同衣。

行路難

我奏瀟湘二妃之寶瑟。西母白雲之仙謠。易京君明之龍笛。秦臺弄玉之鳳簫。君家堂中旣浩侈。洞房複帳留相調。中有一人字白雪。鳴蟬兩鬢鳳凰翹。未許千金韓挾彈。徒逢十八賈登朝。寶帳三千萬阿那。使君五馬躑躅驕。珊瑚懸鉤出海底。自言寡向上宮要。妙聲絲竹迭無間。羅帳忽已從風飄。翡翠窗疏眉語度。蓮花帶弱精魂搖。繁郎區區復叩叩。荆王暮暮復朝朝。金卮滿飲稱旣醉。思君此事非松喬。人生壽命當有盡。焉如聖匹望河橋。

雙鏡辭

照鏡欲照雙。雙鏡莫當窗。窗前花復柳。鏡影殊難偶。一鏡見妾容。雙鏡見妾背。鏡尙見妾背。妾面郎安在。雙鏡亦徒然。破鏡飛上天。

感遇

百年能幾時。何不逍遙遊。欲絕塵土迹。且居明月樓。高情屬遙漢。延睇舒層邱。待我凌雲翔。與子談九州。

玄墓山探梅

寒浦入輕舟。春山引孤策。煙開見飛鳥。雪澹無形迹。仄徑援山臂。高根逗泉脈。旁臨鄧尉卑。迴望閩門窄。日照寺微紺。湖涵梅盡白。諸天萎花供。大地成香席。石壁張丹青。茶山啜雲液。悠然遂終日。歸路思彌釋。

屈道人歌

雲中龍變化。隱隱見其鱗。支公與林師。髣髴云一人。方袍白足采蘭蕙。僧伽未必非靈均。屈上人。天下士。雜佩芳菲吾與爾。遠遊高舉今在此。只今吾見化鶴歸來之蘇耽。誰解昨日出關猶龍之老子。

昌華苑

南漢風流地。芳湖曲帶潮。芙蓉依殿腳。楊柳近宮腰。一往多疑塚。千年不復朝。空餘化螢草。霧縠彩虹橋。

明妃怨

物色歸驕虜。蛾眉鎖獨懸。遷延上馬地。決絕貫魚人。簾箬風相切。琵琶語不真。君王有飛將。妾有玉關塵。

上巳海目山禊飲

羽觴何處流。飛渡羽人邱。斗酒黃鶯語。山枝青翰舟。春叢煙霧氣。波蕩古今愁。楚水長相接。言歸芳杜洲。

寄無可大師

平生皖城友。當世白蓮師。金策搖何處。碧雲愁暮時。月臨無盡界。鳥擇最高枝。同病還同老。浮沈愧所知。

黃石公祠

素書傳孺子。黃石有吾師。何事穀城道。披榛尋古祠。風生雕虎嘯。日落蹇驢疲。濟北遙遙去。鷄鳴何處期。

秦溪獨往率爾遣懷

林香迎杖發。一路落橙花。復被鳥聲引。溪南人幾家。喧風吹日動。細水向人斜。卽事可深悔。平生白鼻騮。

感秋

故人書不至。邊雁度梅關。月色江湖上。秋聲枕席間。霜清九曜石。木落二樵山。獨向南樓眺。知予鷗鷺閒。

石埭訪姚六康明府

白筇陂前路。長吟問玉人。琴堂時一望。雨霽九峰新。野寺弛官禁。江樓納客身。還憑仙舄力。能使人山頻。

贈呂半隱常博

巴江隱隱流。豈是溯江秋。君住湖山曲。峨眉天際頭。雲松巢獨鶴。沙嶼過羣鷗。千里論膠漆。真堪此處投。

長興大雄寺聽吳仲徵彈琴

古寺過從密。秋心不待言。鳴琴篋裏出。歌鳳指端翻。獨作高閣嘯。猶嫌鄰磬喧。當攜畫溪上。彈向老梅根。

客長興時京口李司直自卞山買舟相尋

浮萍各自飄。折簡不煩招。知有五千字。來從丁卯橋。埋名已東郭。訪古尙南朝。想借天人供。禪房慰寂寥。

金陵

六朝君莫問。千古併生愁。宮似咸陽劫。江勝洛水流。鷓鴣何日散。蘆葦颯然秋。獨有秦淮月。時時照客舟。

贈脂落上人住景泰寺

常時住山意。獨與老夫論。眷屬恆相外。雲峯覺爾尊。向人求箬笠。並鳥過松門。度得中餐飽。疏泉注茗根。

上巳蒲澗偕諸子

異地蘭亭會。春郊蒲澗遊。杖隨清瀑引。觴帶白雲流。旅食忽三月。狂歌仍一邱。何煩修禊事。靈境卽蠲憂。

答陸導甫

陸郎金散盡。蕭索對斑駁。踏遍重關草。空餘兩鬢絲。春芳一以歇。陰雨況淒其。世故還相見。披襟似舊時。

相逢行

相逢君不見。疏柳對黃昏。水畔鴉頭襪。壚間犢鼻褌。與雲兼送目。爲草亦交魂。未得通媒妁。微私曷敢言。

閱袁公安卽事起語云箇是春江舊樓海棠花下小梁州愛其尖麗效而小變焉曰箇是

箇是春江絕豔船。芙蓉塘外小遊仙。偶看竹淚回雙袖。令譜楓香入四絃。細馬馱來羞虢國。流鶯驚起隔韓嫣。東南亦有秦家女。白日高樓只愛眠。

咸陽



羸馬垂鞭氣亦豪。關門勝蹟莽相遭。錫來鶻首霸秦繆。會去鴻門興漢高。三輔依然環帝里。二嶠不動表神皋。少年卻在遠林下。閒臂角鷹新放條。

金陵

秦淮新月浸微波。曾咽當年玉樹歌。雙闕荒涼山鳥至。六朝煙靄寺僧多。桃迎渡口春無限。蘋采江南晚奈何。莫把鬚眉倚紅粉。酒樓高絕客顏酡。

自贈

好處都非外物成。自看不解自心情。談詩起舞忘垂老。聽梵悲來感宿生。半口尙沾曾戒酒。終身拌別舊居城。人家積穀塵皆滿。獨埽明窗花裏明。

訪李生池館

枕榔里外薜蘿陰。隔一溪居便自深。書屋總拋疏地置。詩人多過板橋尋。閒書野事收山葉。偶喚家僮聚水禽。多少名流空眼底。得無迂拙屬知音。

贈蕭孟昉

心過虔江汨汨流。一峯晴處且夷猶。名家彭蠡湖西著。姓氏梁皇寺裏留。園列邨莊皆歇馬。池分沙澗各眠鷗。藏書自祕誰看得。聞說高僧共一樓。

卷書溪寄慎旃副憲

門當水郭隱湖灣。秋憲家林自愛閒。偶出總經驛客地。端居能鎮道場山。座參奇石聆深語。酒對禪僧發靜顏。頓使嶺南歸思緩。刺船仍約畫溪還。

望圭峯

圭峯歷歷樹燈殘。回首岡州落照寒。欲上峯頭散愁思。匡門東下水漫漫。

# 明詩紀事卷十二

## 辛籤

彭孫貽二十八首

孫貽字仲謀海鹽人太僕期生子拔貢生鄉人私謚孝介先生有茗齋集

明詩綜王貽上云仲謀詩宏深奧衍窮變極奇

明人詩鈔正集仲謀太僕期生子太僕守贛州盡節章貢臺故吏杜鳳林桂芳等遷之臺上尋爲部將楊大器與萬安義士曾堯泉潛發之搆歸萬安及仲謀至無所得而人言藉藉有謂太僕踰嶺去粵西者是時狐鳴魚帛所在假託禍機不測仲謀乃詭爲得骸招魂以歸陰囑故吏徧蹤跡之卒不得消息仲謀素衣蔬食不交人事二十餘年有時獨立書空或中夜起坐悲歌痛哭人見而怪之乃賦遠遊以釋羣疑適仲謀出門而義士曾堯泉以太僕遺骸至仲謀聞之奔赴發喪制服擇地以葬卒抑鬱以死仲謀詩諸體皆擅場樂府古詩直造漢魏晉宋人堂奧七言歌行間作初唐體有時學溫李至律體之溫麗絕句之蘊藉與雖弟羹門無多讓焉

田按余閱羹門松桂堂集無一語及其兄仲謀並無一語及其父太僕公天下豈有無父之國哉興亡之際難言之矣仲謀詩沈壯鬱勃爲明季一作家其虜臺寒食怨詩云虜南草枯向南樹吹作虜臺塚旁土望帝思君君未歸嘸盡贛江寒食雨紙錢溼煙飛不起五父荒墳石無主幾人江上共招魂瘴海青蠅弔泉戶平原門下客劉生沽得梨花一杯乳獨洒西州淚數行

入泉臺草根苦。嶺頭孤兒望臺哭。跪問道旁雙石虎。何處龍蛇綿上灰。浩浩東風鷓鴣舞。當是尋太僕尸不得時而作也。

青溪小姑曲

白石隔青溪。小姑長獨臥。彩虹可作梁。青溪不可度。

玉階怨

獨坐惜羅襪。青苔生未歇。夜深梧影來。仔細尋秋月。

長相思

蜀柳柔碧色。盡是含情枝。吳蠶不上筐。那得長相思。相思道長心斷絕。隴水無聲寄鳴咽。悠悠千里下秦川。秦川盡處洲如月。月明恐不到君傍。君對月明應斷腸。清霜兩地訴容鬢。莫憶故人憶故鄉。

秋歎二首

豺虎畫方暄。白日長閉門。閉門自有人。我胡守故園。近聞湓城下。水戰魚龍昏。大江日夜流。萬里長波翻。跣行踐荆棘。苦月送旅魂。烽火塞路岐。欲去每聲吞。夜月鴻雁飛。流影到几席。高臺埋悲風。歸者乃無翼。三年江楓青。一夢秋月黑。淫雨吹覆巢。其傍多增弋。毀形謝交遊。廢圃自耘殖。柴車吾將行。歲晚不遑食。

埭溪眺月

埭溪鬱蒼蒼。俯見白石路。夕陰斂皓月。坐久不知暮。鳥歸羣籟息。夜景在高樹。萬物自相依。流水無心住。溪光受山色。寒雲動宿鷺。衆響空漸生。人跡杳非故。悠然立深更。草滴松上露。

陳章侯畫水滄葉子歌

張、吳、顧、陸之寫真。三子聖矣。吳入神。吳後千年有陳子。更開生面尤絕倫。觀其下手萬象變。神鬼觸案窺。纖新離奇衣紋古。面貌愈拙愈秀無前人。雄心怪膽破空出。思令盜跖張麒麟。東京橫行草間客。三十六彪鬚倒磔。宣和佚事譜豺狼。稗官暗舌搖予戟。章侯筆縛牡虎髯。白墨蟠屈行蛇蚺。方頤猛士性火烈。銳頭鶻突花巾尖。提刀顧盼意洵洵。自云義劍無妄殲。卽今寇盜鋒相敵。煙霧中原亂鳧鴨。張曹左革花刺袍。安有斯人不弄刀。梁山狂兒其寫照。鬚眉槎枒山鬼肖。邗人鬪虎杭鬪特。豬奴葉子今英妙。細看繡梓情思深。寫盡張角黃巢心。真龍智勇猛虎服。雲臺畫者曾平林。

棹頭行

黃金臺成凡馬至。擘騮駮耳俱逡巡。凌雲詞客新得意。驕嘶高馬胡由馴。彭郎掉頭仰天笑。翻身歸釣西山鱗。鱸魚正肥蓴菜熟。痛飲三日梨花春。狂來或走諸山上。海水一杯莽相向。觀潮起色僕未能。文園臥病人亡恙。世上文章那足論。窮途意氣輕相讓。丈夫落落非失意。乾坤尙有容汝地。或可披裘大澤中。不然去採湘江麥。齷齪毋爲妻子羞。清狂不畏時人忌。長安第宅高比天。須臾烏雀羅秋煙。黃金橫印何赫

奕指顧牛羊上墓田。以茲感慨更投筆。曳杖歸山抱犢眠。

湖上聞絃索歌

鳥飛日落煙冥冥。湖波不動羣山青。棲鴉唬破半湖影。欲沒不沒三兩星。昏黃小槽隔溪語。清歌滴瀝沈秋雨。一聲能使天早寒。蕭蕭亂葉飛螢。湖舫美人背絃立。夜深始怨哀絃溼。三絃撥捩湖鵲翻。柳梢月重天河急。寒塘悄坐孤蓬客。霜梧仔細尋秋人。露來響絕夢不歸。淒眠夜半成頭白。

武陵旒

武陵山青巖業。武陵之水何紆紆。丹泥而朱提。黃金錯盤螭。帝詔武陵麻衣墨。纓出草廬麻衣縵帶。名馬黃駁雷。司馬門開崖巍。職方象胥。鯁背駢趾。堵牆立觀。尙書來。帝坐司馬門。賜險麋。中監給仄理。從容坐對臨平臺。平臺十二墀。金吾開鹵仗。貂衣兩瑞捧白麻。傳制尙書拜丞相。赤金紫蟠虬。尺一朱押填。衛士傳魚鑰。監宮夜呼啓門鍵。丞相暮出文華殿。車何磴磴。馬何屯屯。虎賁御車。丞相夜坐司馬門。綠衣裂麻。廷諍辭嶙峋。帝爲丞相逐小臣。咄咄丞相威莫倫。櫬槍夜離離。軫翼紛相虧蔽。彤弧黃鉞。金根熊旂。栢梁高宴帝賦詩。帝送丞相出視師。丞相開幕府。握中權。諸侯俱膝行。再拜不敢前。徙易大吏。斬僂令。率司爵司寇不得專。芻如山。騎如鷲。甲如林。鉦如屋。朝焚襄陽。暮屠洛陽。丞相有矢。不得發一鏃。雉經未罹羅。狐死不首邱。悲哉丞相。丞相下從二王遊。丞相來。車斑斑。駟彭彭。丞相之去飛素旌。素旌如鳥。武陵溪流淫。

浩浩丞相班師止歸旄。

蕭山望海樓

危樓延野勢。荒樹轟孤村。一壑奔雷雨。羣山赴海門。帽簷雲氣逼。天角大江渾。指顧分吳越。長流屆水痕。與仲木夜話湖上

不速逢良友。方舟話夜分。憂時深對酒。散髮細論文。酷暑逃人境。清言落水雲。桔槔聲正渴。未忍醉殘醺。

避地村居二首

避兵離井邑。抱耒入深村。鳥雀柴門喜。風塵寇盜尊。輕陰秀禾耳。積水壞籬根。向夕占晴霽。前山白鳥翻。把酒時一醉。好山當我門。三川正龍鬪。八口寄漁船。日腳收殘雨。林光散遠天。千山斷歸雁。四望轉茫然。

遣懷

南陔聞轉戰。嶺上昔經過。篳路連熊繹。枕榔隱尉佗。春歸巴鳥怨。雪盡越蠶多。何日還初服。雲山臥薜蘿。夜至泰和縣

昏黑投山郭。天寒水急流。歸雲接嶺樹。江鶴下城樓。月轉星河直。村空戍火秋。風塵多寇盜。行止莫淹留。

愍亂詩三首

遠戍淮陰送荷戈。中原烽火沒銅駝。玉環幸自藏高廟。桂蠹還愁帝尉佗。三月杏花吹野燒。千村鬼哭怨

饒歌江東可有人龍臥痛飲棠梨萬叵羅。  
臥澤今無舊隱淪近來開閣擬平津。  
盈廷相顧成投鼠環衛何人可畫麟。  
聞道羣儒延白虎何時清論滅  
黃巾荒濠小邑多豺狗不敢高眠理釣緝。  
高歌夜舞少年場梁燕歡娛在畫堂。  
樹下郎官多狗尾監門俠客少魚腸。  
無雙未必來徵辟百一眞堪代  
補亡。溷跡酒徒甘犢鼻。牛衣竟日曝東牆。

歸思

閒階露白草離離。空館蕭條有所思。  
紅燭夜殘歸夢後。黃花人瘦倚樓時。  
山城亂杵催寒早。官閣疏鐘到  
枕遲。孤客獨眠聽不得。梧桐葉上自題詩。

避地賁湖和緯度

窮巷幽棲罷埽除。前溪殘月上方諸。  
紅塵避地經年睡。白眼看雲萬事疏。  
篋草屢刪詩律細。園花幾放酒  
尊虛。還應鄰叟時相就。楊柳深村坐網魚。

舟阻邗關

淮海盤紆道路長。羈人心事正茫茫。  
江聲白日收殘暑。夜月青天在野航。  
孤客不堪聞謝豹。嚴關何意用  
弘羊。嵒山此去猶千里。河水東流濟半黃。



螺川晤黃交侯共談家難感憤書懷

千戈滿地接山城。所在流亡苦甲兵。遊子那堪天北望。孤舟應共雁南征。俱傳纓布收彭越。相對黃公哭阮生。惆悵莫須論往事。嶺猿已過第三聲。

天壇晚眺

周垣環輦道。雲物鎖圓邱。大典刑牲帛。祠官職冕旒。銀潢扶砌落。珠宿抱壇流。二祖功殊絕。羣倫博考諏。乾坤合一氣。岳瀆視諸侯。神鼎高陵闕。齋宮御蹕留。綠苔蟠古籩。香草入空宙。夾路松陰直。虛筵鳥跡遊。兩京分邾鄆。百戰定嬴劉。五馬今南渡。三山控上游。長江龍虎闕。李廟石羊秋。野蜨飛花緩。春蕪燕子愁。何時上封禪。一爲奠神州。

海上竹枝詞四首

烏夜村西烏夜號。馬嘍城外馬頻嘶。三更歡去月上樹。照見踏霜郎馬蹏。  
葫蘆山月長珠胎。海市未開漁市開。殘星滿天細犬吠。黃魚船上販鮮回。  
妾家正住南市南。鮑郎場外柳毵毵。柳梢繫船雞喔喔。知有新安人賣鹽。  
江東歸信約今朝。空說秦皇石作橋。三十六鱗書未到。曹娥江上不通潮。

馮班五十五首

班字定遠常熟人有定遠小集二卷、鈍吟集三卷、別集一卷、鈍吟餘集一卷、集外詩一卷、遊仙詩一卷、樂府一卷、文藁一卷。

初學集定遠吾友嗣宗之子也。游於吾門。其爲人悠悠忽忽。不事家人生產。衣不揜衿。飯不充腹。銳志講誦。亡失衣冠。顛墜坑岸。似朱公叔。燎麻誦讀。昏睡燕髮。似劉孝標。闊略眇小。蕩佚人間。似其家敬通。里中以爲狂生。爲專愚。聞之愈益自喜。其爲詩沈酣六代。出入於義山。牧之。庭筠之間。其情深。其調苦。樂而哀。怨而思。信所謂窮而能工者也。

陸貽典元要齋集定遠詩敦厚溫柔。穠麗深穩。樂不淫。哀不傷。美刺有體。比興不墜。古之稱杜者。謂之無字無來歷。此定遠之長也。

池北偶談。馮定遠博雅善持論。著鈍吟雜錄六卷。論文多前人未發。

趙執信飴山堂集定遠先生詩。原本詩騷。務裨風教。至於條縷體製。含咀雅頌。北宋以來。未之有也。

靜志居詩話。啓禎詩人善言風懷者。莫若金沙王次回。定遠稍後出。分鏗並驅。次回以律勝。定遠以絕句見長。次回全學溫李。

定遠多師。其源出於才調集也。

王應奎柳南隨筆。趙秋谷於近代文章。多所警警。獨折服馮定遠。一見鈍吟雜錄。即歎爲至論。至具朝服下拜。嘗謁定遠。臺以私淑門人刺焚於冢前。

田按定遠博學多聞。鈍吟雜錄十卷。推爲獨絕。詩於齊梁及唐人溫李無所不仿。藻麗中別有古韻。固由才筆殊絕。亦是學古功深。觀其論古今樂府。獨見分曉。今具錄於此。古詩皆樂也。文士爲之辭曰詩。樂工協之於鍾呂爲樂。自後世文士或不關樂律。言志之文。乃有不可施於樂者。故詩與樂畫境。文士所造樂府如陳思王陸士衡於時謂之乖調。劉彥和以爲無詔伶人。故

平謝絲管。則是文人樂府。亦有不諧鍾呂。直自爲詩者矣。樂府題目有可以賦詠者。文士爲之詞。如鏡歌諸篇是矣。樂府之詞

有詞體可愛。文士擬之。如東飛伯勞。相逢行。青青河畔草之類。皆樂府之別支也。七言創於漢代。魏文帝有燕歌行。古詩有東飛伯勞。至梁末而七言盛。於時詩賦多有七言。或有雜五七言者。唐人歌行之祖也。聲成文謂之曰歌。曰行者。字不可解。見於宋書樂志所載魏晉樂府。蓋始於漢人也。至唐有七言長歌。不用樂題。直自作七言。亦謂之歌行。故文苑英華歌行與樂府。又分兩類。今人歌行題曰古風。不知始於何時。唐人殊不然。故宋人有七言無古詩之論。予按齊梁已前。七言古詩有東飛伯勞。盧家少婦二篇。不知其人代。故題曰古詩也。或以爲梁武蓋誤也。如唐初盧駘諸篇有聲病者。自是齊梁體。若李杜歌行不用聲病者。自是古調。如沈佺期盧家少婦。今人以爲律詩。唐樂府亦用律詩。唐人李義山有轉韻律詩。白樂天杜牧之集中所載律詩。多與今人不同。瀛奎律髓有仄韻律詩。嚴滄浪云。有古律詩。則古律之分。今人亦不能全別矣。才調集卷前題云。古律雜歌詩一百首。古者五言古也。律者五七言律也。雜者雜體也。歌者歌行也。此是五代時書。故所題如此。最得之。今亦鮮知者矣。大略歌行出於樂府。曰行者。猶仍樂府之名也。杜子美作新題樂府。此是樂府之變。蓋漢人歌謠。後樂工采以入樂府。其詞多歌當時事。如上留田。霍家奴。羅敷行之類是也。子美自詠唐時事。以俟采詩者。異於古人。而深得古人之理。元白以後。此體紛紛而作。總而言之。製詩以協於樂。一也。采詩入樂。二也。古有此曲。倚其聲爲詩。三也。自製新曲。四也。擬古。五也。詠古題。六也。井杜陵之新樂府。七也。古樂府無出此七者矣。唐末有長短句。宋有詞。金有北曲。元有南曲。今則有北人之小曲。南人之吳歌。皆樂府之餘也。

### 陽春曲

銀鉤綵絡雙鸞圖。錦痕花蹙穠紅皺。杏梁燕語莫愁眠。絲絲日影熏殘晝。玉臺霍霍挂菱花。漆背金龍雙攖擊。水翦清眸新月曙。十指如葱扶曉鴉。城南陌上桑芽綠。雲影煙絲交促速。長簷金櫳不相迎。暗上牆

頭窺宋玉。

江南曲

春風一夜吹江色。千里細煙生亂碧。草芽纖細徧金陵。古石苔荒江令宅。年年歲歲常如此。千燒萬戰臺城圯。鷓尾塵埋三閣平。張孔銷亡二周死。石頭城下水悠悠。暗數興亡得幾籌。山川不改繁華在。兩槳依然迎莫愁。

樓中憶春詞

曉風撼羅窗。凝霜封碧瓦。樓中淡日紅。亭瑋碎玉鳴檐馬。花匿金隱古漆光。口脂凍滑珊瑚香。低鬟壓領朝粧嬾。試倚朱闌欲斷腸。愁雲塞路關河杳。冰痕合處無青草。青皇消息隔嚴寒。小院苔荒人自老。

十二月樂辭

正月

煙籠疊錦鴛鴦嬾。半夜春回知夜短。輕風吹露洗枯條。東南半樹煙初煖。蘭室金堂有新故。開歲偏愁歲華度。誰將錦帖寫銀鈎。繡楣兩兩題花句。

二月

桃蹊李蹊風綽綽。額粧粉膩梅花落。衛郎羸病怯春寒。珍珠如露琉璃薄。垂楊逗綠煙如掃。銀鞍細犢城

南道飛香拂路晚歸時。明珮金丸滿芳草。

三月

義和浴日時。天紅落花露。深淺滿香谿。復著春煙護。美人握鏡紗窗裏。峩峩洛髻濃雲起。陌頭攜果待潘郎。碌碌金車咽流水。

四月

芳實墮金丸。喬柯壓頰綠。鳳花耿介南陌頭。銅牙柘彈閒相逐。細雨空濛晷溼紅。錦塘波煖鴛鴦浴。翠壘遠山雲簇簇。龍鱗冷滑鋪寒玉。

五月

湘竹波勻血暈光。生綃紅影籠虛涼。頰鬢壓枕玉無力。槿花露笑聞鸚黃。纈眼玲瓏透濃日。鏡檻無塵花密密。水精壺薄柘漿寒。織手金盤沃丹實。

六月

輕穀靜無波。玉宇少涼意。當空午暈紅徘徊。吐火燒塵撲天地。阿侯衫薄腰如束。塘上芙蓉花簇簇。紅粧待晚未歸來。艇子雙橈繫江木。

七月

河影西迴玉鉤淺。露泣鮫珠星閃閃。金井沈沈素綆長。玉几水咽銀屏掩。漢帝離宮樓百尺。鵲駕迢迢雲  
弈弈。蛛網懸空得巧時。綠窗風蕩蜻蜓翼。

八月

雲凝薄絮天如水。桂魄團團夜千里。蘭葉參差閃露光。芙蓉粉露愁香死。軋軋鳴機蟲嘖嘖。小窗燈暗拋  
蠅鼻。楚客孤眠愁夜長。流光遶簾疏螢溼。

九月

淒淒水國寒來早。千里青青一朝老。山陰古道馬蹏輕。刀截山光天杳杳。高樓粧罷金鴉沒。禽花無豔空  
雲髮。倚闌不寐戀殘秋。霜波著瓦琉璃滑。

十月

朝眠戀錦衾。夜飲愁花漏。日影鎖窗高。玉病蘭芽瘦。香熱毳毼紅。鳳尾金花透。落葉淨梧宮。西施雙綠皺。

十一月

雕薪爨五鼎。豹胎椒桂香。錦障圍花玉。蠟椽薰華堂。綠熊紫雉交輝光。博山雲起夜未央。門前白馬嚙嚴  
霜。

二月

九河濁浪堆頑玉。馬影車聲交獨鹿。愁雲漠漠日無光。旅被蒙茸貂不足。臨邛美人山黛結。梁園賦客朱絃絕。素翎丹頂是何人。泠泠對語堯年雪。

雜詩三首

人生抱志節。所遇蓋偶然。往往中下材。逢時幸瓦全。盛譽冠中區。膏明惟自煎。支天計不就。今爲人所憐。苟生既不易。罔死亦何稱。生死諒微渺。神理儻有憑。寢薪以待燃。履霜未知冰。多謝俗中子。迷謬何相仍。讀書日力盡。彎弓臂不開。栖栖五十載。餘生真可哀。山川百戰處。昔人已蒿萊。於今一具骨。不知何處埋。

題小刀

一尺清光勢似鉤。鏗邊名姓舊來讐。未甘孤怯常磨看。自恨粗疏更密收。無質暮煙輕欲動。有情秋水凍難流。飲飛七首堪爲伴。但斬蛟龍不覓侯。

偶然

偶然興到愛神仙。燒盡丹砂未有緣。雲粉可能粧弄玉。飛駟從自降羊權。奔星舊婢羞靈洞。繞日神駒秣野田。但得餘杭有奇酒。恆須一醉一千年。

偶書

少年孤露長年慵。詣死無成愧老農。墮地拖腸常作鼠。升雲燒尾未爲龍。弓彎也識天心曲。弦直方知世

不容百事須愁愁不得。壇邊常羨潑醅濃。

感舊

當日樓中夜未闌。隔簾紅藥露團團。清歌出格鯨尊滿。醉袂霑香鳳蠟殘。暗與美人收墮珥。狂教座客笑遺冠。重來事事陵成谷。一片秋陰作晚寒。

次韻四時回文宮詞四首

雛鶯小轉乍驚眠。內苑花開未禁煙。爐鴨凝寒春夢淺。鏡鸞呵冷曉粧妍。鋪塔玉鈿梅飄粉。覆殿金條柳  
驪綿。珠露滴殘鐘漏斷。烏曉曉樹碧窗前。  
雷輕響處走和鸞。隔院歌聲語笑歡。臺樹碧雲侵殿帳。渚蓮紅露滴珠丸。頽鬢綠枕冰綃薄。膩粉香肌玉  
簾寒。開扇翠花金尾鳳。垂簾繡額錦龍盤。  
秋聲一雁唳清霜。點點苔錢碧砌涼。愁掩舊屏銀燭暗。恨題新字粉箋香。鉤鉤月墮梧宮夜。翦翦風寒水  
殿湯。流淚暗銷魂夢斷。樓空倚遍數更長。  
風輕觸處動簾釘。老榦冰花浸水瓶。紅燄獸爐金冉冉。急絃蠻柱玉泠泠。空屏畫蠟煙飄地。暗牖瓊鉤月  
挂樞。龍繡凝香椒壁煖。重門禁院靜垂鈴。

古臺城



六朝形勝畫中開。重疊河山勢盡迴。誰躍青驄三閣下。曾聞白馬壽陽來。東游漫費秦王力。北去空教庾信哀。此日蘭皋徒極目。百年江表只蒿萊。

感事

風景當前漫撫膺。東南忍見杞天傾。龍盤王氣山空在。馬渡江湖水未平。誰致倒戈攻鐵甕。更聞降孽掠蕪城。謝安王導惟邱墓。天塹徒縈十萬兵。

梅花

素質先春迴出羣。相思何處夢紛紛。莫言蕩婦樓中粉。只是仙人嶺上雲。半樹臨風驚曉色。一枝如雪立斜曛。偏憐最有池中水。纔得冰開已照君。

早春偶題

膩粉妖香一番新。庭前蹊畔見精神。後先開落原由種。紅白紛張盡屬春。醉靈東家驚豔笑。倚風西子帶微颿。王孫莫惜頻頻賞。須怕吹來散作鱗。

酬友人韻

不得梯媒進步難。每逢知己但長歎。窮如海鳥愁過魯。冷似蝦蟆怕屬官。破甑轉頭成蝶夢。直鉤多事守魚灘。半生筆硯漸朱紫。渾是朝饑待一餐。

落花

秋菊春松各一時。不須惆悵怨殘枝。仙桃有實應難種。穠李無言莫費詞。判斷繁華誰是主。分張紅白豈容私。晚來斜日宵來雨。試問深閨幾箇知。

重經沈氏園

昔年無賴此猖狂。一飲從教一石強。鬧曉醒時鶯燕亂。趁春終日蝶蜂忙。浮雲帶樹添山影。嫩葉封條鬪日光。此事可堪惆悵極。抱山堂後舊長廊。

樂府體二首

桐生蜀坂上。絲生吳箔中。兩物不相纏。曲意無由通。起坐不自得。無端愁相縈。寒飈吹敗葉。判是作風聲。

讀漢書

天醉初醒赤帝昌。從來顧命係興亡。蕭公自築麒麟閣。卻與他時畫霍光。

春分日有寄

池塘狼藉草紛紛。日帶嫣紅露有文。刻意傷春春又半。可知愁煞杜司勳。

草

濃掃勻鋪綠不休。最宜長路水悠悠。昭君塚上千年色。每逐春風徧九州。  
畫屏風

時勢妝梳色色新。吳娃偏自小腰身。修蛾雲鬢能多少。枉向陽林賦洛神。  
有贈

隔岸吹唇日沸天。羽書惟道欲投鞭。八公山色還蒼翠。虛對圍碁憶謝玄。  
越鳥

無聊自撚鬢邊絲。日照殘春午景遲。每對茅檐慚越鳥。爲伊情性戀南枝。  
有感

禾黍離離天闕高。空城寂寞見回潮。當時最憶姚斯道。曾對江山詠六朝。  
柳枝詞

汴水東來欲下遲。千條依舊裊金絲。蕭娘流落宣華死。當日春風爲阿誰。  
做元微之春詞

一隻黃鸝萬樹花。粉牆回處是東家。馬蹏爭踏門前路。偏認蕭郎白鼻騮。  
戲題

世間無賴是豪家。處處朱門鎖好花。惟有夢魂難管束。任他隨意到天涯。  
行雲

滿袖嗁痕雜酒痕。百回消息暗銷魂。無端一片行雲起。知是瑤姬不敢言。  
送陳確菴遊楚

三戶存亡漫愴情。此中神理自難明。方城漢水今何似。爲我投書問屈平。  
江南雜感

席捲中原氣太饒。小朝終見作降俘。不爲宰相真閒事。留得丹青夜宴圖。  
火籠

坐對長明一盞紅。四更禪榻落花風。自憐喚老無燕玉。空倚盧姬舊火籠。  
錦峯春遊

白雲多處水潺潺。亂石縱橫翡翠編。最憶當時黃子久。愛將縑素寫虞山。  
感舊

擬託浮波又自休。水窗鸞鏡見梳頭。玉郎偏得瑤華贈。兩槳風輕只載愁。  
遊仙詩三首

愁來憤憤欲箋天。更保紅顏得幾年。自爲才高真氣薄。不如依分作頑仙。  
金母東家寧小郎。摩挲寶劍倚天長。笑他后羿調弓矢。不射妖星射太陽。  
珠自開花玉自苗。瑤窗雲影接丹霄。霞襦乞得天孫錦。自理金梭織鳳毛。

### 臨桂伯墓下

馬鬣悠悠宿草新。賢人聞道作明神。昭君恨氣長弘血。帶露和煙又一春。

### 紀映鍾二十四首

映鍾字伯紫。一字伯子。號鷺叟。自稱鍾山遺老。上元人。移居儀真。有真冷堂詩稿。

池北偶談。伯紫負詩名。嘗有句云。惆悵天涯頭易白。楊花空滿閱江樓。佳句也。

詩觀二集。伯紫詩。氣極雄渾。識極超卓。運置天然。自合尺度。

本事詩。懸叟與方文。林古度齊名。白髮當歌。紅牙聽曲。說青溪舊事。媿媿不倦。一日。與大梁周在浚。蒼溪徐倅暨僕輩痛飲燕市城西。有絕句云。風雅松陵勝昔時。力裁僞體出偏師。徐郎本事從珍重。始信無情未是詩。謂余所輯續本事詩也。

鄭方坤詩人小傳。崇禎時。張天如。張受先。楊維斗。周介生輩。筆舉復社。四方雲集響應。各以類從。金陵爲陪京重地。山川妍淑。風物清華。鐘鼓聲聞。衣冠都雅。是時扶貧垂憐。星奔川驚者。則必以紀伯紫。顧與治二君爲職志。繼丁陽九之厄。伯紫以青雲白雪之身。嶮然不滓。少與廬江龔宗伯友善。宗伯既貴。招至京華下榻。歲且十稔。此外未嘗輕謁一人。輕投一刺。如天半朱霞。可望而不可卽。詩若干卷。宗伯爲繡梓以傳。

田按。伯紫五古兀傲。七言長篇。尤痛快淋漓。律體老蒼。大都得力於杜老爲多。

學圃歌贈鄧孝威

我爲東湖樵。子學南山圃。相逢大道傍。雪涕問勞苦。我逢冬青樹。再拜不敢斧。子有東陵瓜。屢潰深秋雨。生事尙饑寒。吟詩作蒿堵。

渡黃河

黃河接東海。道路遠且長。白楊風蕭蕭。吹彼落日荒。孤城蘆荻中。四顧徒皇皇。病馬嘶寒煙。老鳥立平岡。中歲倦于役。筋力匪故常。舍鞍復望楫。意緒如亡羊。睠矚無匹儔。觸懷多盡傷。魚鹽藏聖士。販繒亦侯王。英雄皆瓦注。感此悲浪浪。

悲吟

賣畚洛陽市。不逢蒿山客。蒼蒼山下雲。日暮松楸碧。我憐王景略。甘爲苻堅畫。英雄悲不遇。既遇良可惜。觀白石翁三丈畫卷歌

石田畫卷長三丈。邱壑幽深氣塊莽。大山未斷小山出。大溪湔泓小溪急。山迎溪互密濛濛。大松小松查枒橫。側交其中。看過丈餘始閒曠。孤亭似有人來往。從此山川又奇奧。渾雄一變成蒼峭。千流萬壘排空來。龍湫鳥道偈天開。流觀兩目不暇瞬。當年落筆何奇哉。人觀此翁畫手妙在疾。不知翁也未畫凝思坐一室。忽然盤礴神明開。天地低昂萬形失。吁嗟乎未登太華東南峯。未攬河海陟登封。畫山卽山水卽水。

何時更得開心胸。石田翁落筆茫茫人不測。不知翁也何所得。畫成水石不異人。卻教舉世無人識。

七月六日方爾止齋山草堂對酒歌

天上雙星未渡河。秦淮流水秋生波。齋山草堂最疏豁。短牆風到吹煙蘿。我從江南徙江北。相思不見中情多。今來喜得話疇昔。比鄰客亦聞相過。謂鄭梅龜竹聲琅琅響寒玉。雲陰漠漠垂庭柯。六街禱雨禁屠割。君家生菜盈坡陀。小烹佐酒雜乾腊。懷抱傾吐捐沈疴。人生動卽千里隔。江山況復連兵戈。相逢縱飲意良足。清涼不異棲巖阿。牀頭鴟夷已交臥。睥睨顏色何人醜。芙蓉花開塘水淺。醉來起舞同高歌。城頭飛雨時一至。安得大地呼滂沱。

姚寒玉畫古梅屏障歌

姚氏畫梅世稱絕。古梅更有寒玉奇。輕綃尺幅且高閣。潑墨十丈光離離。楚江匹緄鵝溪絹。五間大屋橫鋪徧。崑崙朔客當前立。大呼落筆如飛電。千柯萬蒂花茸茸。聚頭交臂重復重。龍驚鶴攫勢莫喻。斷斂屋漏難爲容。立者一株掣空墮。懸石崩虹自礪礪。臥者一株強項起。病螭矯首肢猶惰。初看滿壁霏雲霞。拂拭珠斗移星槎。百回俯仰發狂叫。化工在手誰能掣。姚子精悍身短小。少年汗血推腰褭。弩折千鈞四海空。胸藏五岳孤雲渺。偶從筆端出靈怪。聖者難名愚者拜。腕中神物通冥濛。指下丹砂更狡獪。是日斜陽照積雪。疏林燦燦寒葩綴。羅浮孤山恍對面。堂上林間鬪工拙。我有心頭萬斛愁。萬斛之酒澆不休。見此

妙跡頓空澈。松風颯耳清。泉流嗚呼胡。琴何必碎。峴碑何必留。直從梅花證仙佛。衆香國裏春悠悠。

送鍾子黃歸鹿宕

送君歸鹿宕。山色正蕭蕭。雨氣江湖白。秋聲日夜驕。殘書披礪戶。幽鳥待松寮。他夕天門月。鍾期信可招。

過黑石嶺宿壽陽縣

黑石嶺當關。停鞭意獨躑。此行堪白骨。盡日厭看山。寨出荒雲外。田耕絕壑間。到來松下驛。好月照愁顏。

兵至閩中舊作

糜爛方完額。軍書趣借徵。呼嘯通比屋。髡薙淨邱陵。愛養天心嗇。追呼吏牘能。深山猶伏莽。多壘不堪增。

三山秋興次李空同河上韻

閩王營土宇。封域阻重關。行省前朝殿。層樓鎮海山。池隍藏厭勝。輿廢亦循環。眺覽情無極。斜陽下浦灣。

東郡中秋雨中書懷

去歲此宵雨。螺江動旅愁。夜深明月出。呼客共登樓。魯酒今年醉。商聲滿樹秋。疏燈人反側。浙瀝到床頭。

曹縣送陳宗來

同作兼葭客。蕭然河上秋。送君歸故里。大火正西流。匹馬循秦嶧。離人集楚邱。依依城畔柳。欲去更淹留。

雁門關



太原城北路。直與雁門連。秦月秋鳴鏑。并人夜控弦。地圖經百戰。山勢鎖三邊。西望銷兵久。淒其弔阪泉。  
寄紫淀翁

岸草濛濛碧。客心愁未終。春歸荒牖水。麥秀打船風。野廟悲無主。人煙日不同。故園櫻筍節。知爾念飄蓬。  
送郭皋旭之大梁

吹簫燕山風月清。朱家樽酒惜離情。火流七夕秋初到。客去三河雁有聲。逆旅埽除迎郭泰。監門慷慨問侯生。此行應有梁園賦。沙草萋萋繞故城。

送吳長文出塞

憶昔相逢漢澤頭。大行東阻白雲秋。孤城上黨砧初動。奇士南皮轍尙留。廿載再看顏色好。餘生強半別離愁。輸君結束情偏健。又著黃衫跨紫驄。

廣陵夏夜同與治半千蒼略訪楚吟城北村舍次與治韻

顧子乘舟江霧昏。杜龔促膝坐前村。白雲滿地鄰僧磬。黃葉封溪處士門。傍舍只須山一片。閉關常得酒盈樽。最憐合併如斯少。夜半傾泉煮北源。

稼公寓齋小集綺季攜被宿陳其年吳子班繼至

日日秋陰雨細飛。夕葵開落傍柴扉。幽人襍被移書榻。古寺鐘魚度翠微。飄泊酒杯逢李燮。疏狂詩句見

元暉板橋新水添三尺。衰柳依依送客歸。

張幼仁園居

結構幽居似輞川。鷺峯鹿苑一雲連。天涯白首歸張翰。海內丹山老鄭虔。高閣三層懸暮雪。荒畦十畝刈寒煙。城陰宅近堪來往。古路鐘聲不計年。

秦淮夏日詞二首

剩水殘山樂事多。少年能唱後庭歌。搗箏撥阮嘈嘈起。月落城烏奈樂何。片雨過城細草薰。江山如畫鳥空聞。誰家樓上穿鍼坐。一片秋雲似舞裙。

答元白惠兔腊

梅花如雪下荒廚。賀監高懷念老夫。何日短衣隨李廣。空山一矢斃於菟。

同戈驛唐太宗起兵處

李花開出晉陽宮。義士同戈氣決東。衰草祇今無馬跡。滿山落葉戰西風。

南風

日日南風吹面皮。黃沙如雪裹鬢眉。等閒下馬看流水。拾得昆陽舊箭鏃。

# 明詩紀事卷十三

## 辛籤

顧炎武十九首

炎武初名絳字甯人崑山人福王時授兵部司務唐王立除兵部主事光緒三十四年從祀孔廟有亭林詩集五卷

李光地榕村集甯人博涉強識好爲蒐討辯論之學十三經諸史旁及子集稗野列代名人著述微文碎義無不攷究騎驢走天下所至荒山頽阻有碑版遺跡必披榛菅拭斑蘚讀之手錄其要以歸于大書音韻尤有獨得有顧氏之書然後三代之文可讀雅頌之音各得其所自漢晉以來未之有也

潘耒遂初堂集甯人先生負絕世之資潛心古學九經諸史略能背誦尤留心當世之故實錄奏報手自鈔節經世要務一一講求當明末年奮欲有所自樹而迄不得試窮約以老然憂天閔人之志未嘗少衰事關國計民命者必窮源溯本討論其所以然是跡半天下所至交其賢豪長者攷其山川風俗疾苦利病如指諸掌精力絕人無他嗜好自少至老未嘗一日廢書出必載書數簏自隨旅店少休披尋搜討有一疑義反復參攷必歸于至當有一獨見援古證今必暢其說而後止當代文人學士語學問必斂衽推顧先生凡制度典禮有不能明者必質諸先生壁文軼事有不能知者必徵諸先生先生手畫口講探源竟委人人各得其意以去天下無賢不肖皆知先生爲通儒也

鮪埼亭集。亭林先生晚益篤志六經。謂古今安得別有所謂理學。經學卽理學也。自有舍經學以言理學者。而後邪說以起。不知舍經學則其所謂理學者禪學也。故其本朱子之說。參之以慈谿黃東發日鈔。所以歸咎於上蔡。橫浦。象山者甚峻。於同時諸公。雖以苦節推百泉。二曲。以經世之學推梨洲。而論學則皆不合。

靜志居詩話。甯人詩無長語。事必精當。詞必古雅。抒山長老所云清景當中。天地秋色。庶幾似之。

明詩別裁。甯人肆力於學。窮極根柢。韻語其餘事。然詞必已出。風霜之氣。松柏之質。就詩品論。亦不肯作第二流人。

明三十家詩選。亭林詩。憑弔滄桑。語多激楚。茹芝探蕨之志。黍離麥秀之悲。淵深樸茂。直合靖節。浣花爲一手。豈宋谷音。月泉

諸人所能伯仲哉。

田按。亭林五謁孝陵。四謁攬宮。辭大科。卻特薦之。死靡他。邇世無悔。爲明末之完人。啓聖朝之碩學。其詩包孕羣材。扶持風教。

點竄經籍字句。尤見雅裁。

### 贈萬舉人壽祺

白龍化爲魚。一入豫且網。愕眙不敢殺。縱之遂長往。萬子當代才。深情特高爽。時危見熟維。忠義性無枉。翻然一辭去。割髮變容像。卜築清江西。賦詩有遐想。楚州南北中。日夜馳輪鞅。何人調北方。處士才無兩。回首見彭城。古是霸王壤。更有雲氣無。山川但塊莽。一來登金陵。九州大如掌。還車息淮東。浩歌閉書幌。尙念吳市卒。空中弔魍魎。南中不可託。吾亦久飄蕩。崎嶇千里間。曠然得心賞。會待淮水平。清秋發吳榜。

### 贈鄔處士繼恩

市中問韓康。藥肆在何許。床頭本草書。門外長桑侶。每吟詩一篇。冷然在雲天。筠穿北固雪。艇迷京口煙。

六代江山好。愁來恣撻討。蘭蓀本獨芳。薑桂從今老。去去復棲棲。河東王伯齊。年年尋杜甫。一過浣花溪。  
登岱

尼父道不行。喟然念泰山。空垂六經文。不覩西周年。七十二君代。乃有封禪壇。書傳多荒忽。誰能信其然。  
既嘗小天下。復觀邃古前。羲黃與堯舜。蕩滅同雲煙。社首卑附地。徂徠高摩天。下視大海旁。神州自相連。  
天地有變虧。何人得昇仙。遺弓名烏號。橋山葬衣冠。末世久澆訛。孰探幽明原。三萬六千年。山崩黃河乾。  
立石既已刳。封松既已殘。太陽不東昇。長夜何漫漫。哀哉一顏淵。獨立瞻吳門。疲精不肯休。計畫無崖垠。  
復有孟子興。眷眷明堂言。庶幾大道遠。民質如初元。上采黃金成。下塞宣房湍。何時一見之。太息徒潺湲。

謁夷齊廟

言登孤竹山。愴焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行避虐政。  
甘餓首陽岑。不忍臣二姓。可爲百世師。風操一何勁。悲哉尼父窮。每歷邦君聘。楚狂歌鳳衰。荷蕢譏擊磬。  
自非爲斯人。棲棲無乃佞。我亦客諸侯。猶須善辭命。終懷耿介心。不踐脂韋徑。庶幾保平生。可以垂神聽。

長安

東井應天文。西京自炎漢。都城北斗崇。渭水銀河貫。千門舊宮掖。九市新塵閉。雲生百子池。風起飛廉觀。  
呼韓拜殿前。頡利俘橋畔。武將把雕戈。文人弄柔翰。遺跡俱煙蕪。名流亦星散。愁聞赤眉入。再聽漁陽亂。

論都念杜篤去國悲王粲。積雨乍開霽。淒其秋已半。惆悵遠行人。單衣裁至胔。

重過代州贈李處士因篤在陳君上年署中

雁門春草碧。且復過淖沱。爲念離羣友。三年愁緒多。魯酒千鍾意不快。龜山蔽目齊都隘。卻來趙國訪廉頗。還到關中尋郭解。陳君心事望詒儔。吾友高才冠雍州。玉軸香浮鈴閣曉。彩毫光射堂秋。人來楚客三閩後。賦似梁園枚馬遊。句注山邊餘舊壘。五原關下臨河水。青冢哀笳出漢宮。白登奇計遠天子。窮愁那得一篇書。幸有心期託後車。又逐天風歸大海。好憑春水寄雙魚。

千里

千里吳封大。三川震澤通。戈矛連海外。文檄動江東。王子新開邸。將軍舊總戎。登壇多慷慨。誰復似臧洪。應州

灑南宮闕盡。一塔挂青天。法象三千界。華戎五百年。空旛搖夜月。孤磬落秋煙。頓覺諸緣盡。臨風獨灑然。

閏五月十日

重逢閏五日。壇漫客山東。郡國戈鋌裏。園陵灌莽中。草穿新壘綠。花隔舊京紅。更憶王符老。飄淪恨不同。

京口

東吳北翟戰爭還。天府神州百二關。末代棄江因靖鹵。靖鹵伯當年開土是中山。雲浮鶴鶴春空遠。水擁

蛟龍夜月閒。相對新亭無限淚。幾時重得破愁顏。

金壇縣南五里顧龍山上有高皇帝御題詞一闕

突兀孤亭上碧空。高皇於此下江東。卽今御筆留題處。想見神州一望中。黃屋非心天下計。青山如舊帝王宮。丹陽父老多遺恨。尙與兒童誦大風。

淮北大雨

秋水橫流下者巢。踰淮百里卽荒郊。已知舉世皆行潦。且復因人賦苦匏。極浦雲垂翔溼雁。深山雷動起潛蛟。人生只是居家慣。江海曾如水一坳。

濟南

落日天邊見二峯。平臨湖上出芙蓉。西來水竇緣王屋。南去山根接岱宗。積氣蒼茫含斗宿。餘波滲潏吐魚龍。還思北海亭中客。勝會良時不可逢。

田按。齊人七律講氣格。濟南詩云。絕代詩題傳子美。近朝文士數于麟。可以知其旨矣。

居庸關

居庸突兀倚青天。一澗泉流鳥道懸。終古戍兵煩下口。本朝陵寢託雄邊。車穿徧峽鳴禽裏。烽點重岡落雁前。燕代經過多感慨。不關遊子思風煙。

與江南諸子別

絕塞飄零苦著書。揭來行李問何如。雲生岱北天多雨。水決淮壩地上魚。濁酒不忘千載上。荒雞猶唱二更初。諸公莫效王尼歎。隨處容身足草廬。

屈山人大均自關中至

弱冠詩名動九州。紉蘭餐菊舊風流。何期絕塞千山外。幸有清樽十日留。獨漉泥深蒼隼沒。五羊天遠白雲秋。誰憐函谷東來後。班馬蕭蕭一敝裘。

過蘇祿國王墓有序

永樂十五年九月。蘇祿國東王來朝。歸次德州。病卒。遣官賜祭。命有司營墳。葬以王禮。上親爲文。樹碑墓道。留其僮從十人守墓。其後子孫依而居焉。余過之。出祝版一通。乃嘉靖年者。宛然如故。其字體今人亦不能及矣。

豐碑遙見炳奎題。尙憶先朝寵日碑。世有國人供灑掃。每勤詞客駐輪蹄。九河冰壯龐狐出。十二城荒白鶴棲。下馬一爲郟子問。中原雲鳥正淒迷。

讀李處士顯襄城紀事有贈有序

處士之父可從。崇禎十五年以壯士隸督師汪公喬年麾下。以五千人剿賊至襄城。死之。處士年



十六貧甚。與其母彭氏并日而食。力學有聞。越二十九年。始得走襄城。爲汪公及其父設祭。招魂以歸。余與處士交。爲之作詩。

躑躅荒郊。醉一樽。白楊青火。近黃昏。終天不返。封嶠骨。異代仍招復楚魂。淇阪愁雲隨獨雁。潁橋哀水助號猿。五千國士皆忠鬼。孰似南山孝子門。

### 恭謁孝陵

閏歷窮元季。眞符啓聖人。九州殊夏裔。萬古肇君臣。武德三王後。文思二帝鄰。卜年乘王氣。定鼎屬休辰。江水縈丹闕。鍾山擁紫宸。衣冠天象遠。法駕月遊新。正寢朝羣后。空城走百神。九嶷超巒嶺。原廟逼嶙峋。寶祚方中缺。炎精且下淪。郊垆來獵火。苑籞動車塵。繫馬神宮樹。樵蘇御道薪。歸然惟殿宇。一望獨荆榛。流落先朝士。閒關絕域車。千戈逾六載。雨露接三春。患難形容改。艱危膽氣眞。天顏杳靄接。地勢鬱紆親。尙想初陵製。仍詢徙邑民。因山皆土石。用器不金銀。紫氣浮天宇。蒼龍捧日輪。願言從鄧禹。修謁待西巡。

### 王夫之四十二首

夫之字而農。衡陽人。崇禎壬午舉人。桂王時。以薦授行人。光緒三十四年。從祀孔廟。有買薇稿、澹濤園初集、蕘齋五十自定稿、六十自定稿、七十自定稿、柳岸吟、落花詩、遣興詩、和梅花百詠、洞庭秋、雁字詩、仿體詩、嶽餘集。

劉獻廷廣陽雜記。王而農先生壬申歲已八十矣。隱居山中。未嘗入城市。其學無所不窺。於六經皆有發明。洞庭以南。天地元氣。聖賢學脈。僅此一縷耳。

沅湘耆舊集。船山先生號蕺齋。又號雙鬢外史。中歲稱一瓢道人。南渡後。走桂林。依瞿忠宣薦授行人司行人。崎嶇楚粵。滇黔間。備歷艱險。後以母病間道歸。遂不復出。緬甸既覆沒。益自緝晦。嘗匿常甯搖洞。變姓名爲猿人。已築土室於石船山。名曰觀生居。敗葉廬。又曰湘西草堂。晨夕杜門著書。滄桑黍離之感。生死不忘。其學深博無涯涘。獨不喜陸子靜。王伯安之說。原本淵源。尤在正蒙注一書。往復辨論。所以歸咎於上蔡。象山。姚江者甚峻。其志行之超卓。學問之正大。體用之明備。著述之精卓宏富。當與顧亭林。黃梨洲諸老相頡頏。精研六經。詩其餘事。詞旨深覈。氣韻沈鬱。讀之如夏鼎商彝。如聞哀殺喉。使人穆然神肅。翛然意遠。

曾國藩文正集。先生匿迹湘西之石船山。荒山敝榻。終歲孳孳。求所謂育物之仁。經邦之禮。窮探極論。千變而不離其宗。曠百世不見知而無所於悔。先生歿後。巨儒迭興。或攻良知捷獲之說。或辨易圖之鑿。或詳考名物訓詁音韻。正詩集傳之疏。或修補三禮時宮之儀。號爲卓絕。先生皆已發之於前。與後賢若合符契。雖其著述太繁。醜駁互見。然固可謂博文約禮。命世獨立君子已。

田按。船山先生博通經史。闡明正學。允爲儒者之宗。究心吟事。自述早年問津北地。信陽未就。而中改從竟陵。晚乃和阮利陶。取境益上。自定爲五十。六十。七十三稿。余謂先生詩。講學則擬白沙。定山。摹仿則師漢魏。盛唐。下逮於明之作家。無所不擬。其論詩則薄宋元。猶是子七成說。而於東坡山谷。亦多詆諆之詞。未可盡爲典要。然其學問深遠。才力宏富。古體時與魏晉。盛唐合轍。七律七絕。音調洪亮。詞旨沈著。可與遠山山谷分席。又其遭時多難。驚音瘖口之作。往往與杜陵之野老吞聲。皋羽之西。零痛哭。同合於變雅離騷之旨。卽專論詩。亦明季一作家也。

擬古詩四首

臨歧送遠道。春草生道傍。春草生有時。遠行去無方。逝水無西歸。游子怨流光。高臺多夕風。平原足晨霜。去者日益永。留者情益警。玄雲迷四郊。方望不得騁。思君褰羅幃。滅燭無餘影。棄置良獨難。沒生誓幽秉。陽春二三月。綠草被修路。青林無鮮華。嘯鳩互晨暮。淒彼泉下人。不知春風度。馳驅無返轍。誰者爲新故。往古旣復然。非我獨憂懼。天物各推遷。胡爲滋驚怖。慮苦不得甘。蚤計良已誤。滅性以求真。浮光棲月露。鼎鼎百年中。含情抱貞素。

日落登崇岡。顧望青天高。四維何茫茫。浮雲但蕭騷。羣動旣已息。吾身若秋毫。自非精誠徹。蠕動徒已勞。精魄無固存。奄忽成焄蒿。及今百年內。何者終吾操。

古人不可期。今人當奈何。對酒乍相忘。援琴發清歌。適意方在茲。憂患徒相加。憤世而忘己。吾生亦有涯。商山採芝人。跡邈心自遐。

君子有所思行

天道不可見。往來孰令親。求仁信由己。循我得其真。宿糧陟穹谷。問彼度世人。浮屠東入漢。老聃西去秦。驚神離寶命。歛景寧輕塵。屈理逐所歡。淫曼增迷淪。孟軻喪齊梁。辯言隱千春。堅壘拒輪攻。墨守固重關。傾筐貴所寘。室遠願不伸。夜聞曷旦急。秋驚絡緯新。時哉隨逝水。極渚暇逡巡。

擬阮步兵詠懷

涼風西南來。吹此浮雲興。連帷相異態。奄忽如有憑。日暮靈雨飛。消釋如春冰。步上西南山。揮手謝太清。肝膽一胡越。百年非我生。胡滅隨須臾。吾心固不能。

雲山妙峯菴云是申泰芝鍊丹處

松陰合綠霧。木末飛空光。幽囑既云密。遙情歛已長。首夏積翠鮮。亭午條風涼。煙容澄岳壑。水氣辨蒸湘。圓宇目所鏡。孤立心未央。寓形俄邂逅。仙遊昔回翔。惻彼鸞鶴情。引茲邱海望。羽蛻固有待。仁樂詎無方。懷炎登天庭。悲憂陟首陽。繕性良有藉。終焉胡弭忘。

瓜圃夕涼

微月流西岑。初螢明青叻。夕雨一以息。樾徑珠露滋。窅爾釋傾疴。冷然得靜善。吾生豈不夙。物役固未淺。往昔從棄捐。今懷何繾綣。精靈寓天宇。昭滌隨游衍。所思來者遙。孰俟心期展。脈脈霄漢間。悠悠寄孤撰。

廣哀詩有序

追平生交遊凋替之頻仍。老棲巖谷。惟病相耦而已。夫之自弱冠。幸不爲人厭。搢出入喪亂中。亦不知何以獨存。諸所哀者。或道在死。或理不宜死。及其時相輳會。以靖其心。以安其命。而不肖獨參差了然者。蔑論箴石。卽告語亦杜口矣。德業文章志行。自有等衰。非愚陋所敢定。抑此但述哀。

情不以隱顯爲先後。因長逝之歲月序之。杜陵八哀詩。竊嘗病其破蘇、李、陶、謝之體。今乃知悲吟不暇爲工有如此者。

管中翰嗣裘

字治仲。說李定國迎蹕拒孫可。不果。甲午遇害於永安州。

昂畢南北街。牛女東西涯。分合各有故。精靈終不欺。之子自蹶弛。吾生本鈍遲。嶽陰義憤激。崧臺俯仰悲。雨雪封層巒。風潮盪縹緲。翦燈語自協。迷影聞者疑。駘宕吐丹虹。交映爲雌霓。臨歧一執手。畢命成參差。君速沉芷駕。白日照幽思。祕計營齏粉。吾君在憂危。事左果致命。天傾難獨支。哀哉負密約。非但泣長離。欲傳幽蛩心。未許流俗窺。魂爽儻夢遇。落日回坤維。

南嶽僧性翰

丙申沒

疇昔天狼驕。竄身潭龍吻。墊龍不我攫。親舊但笑聽。飛雲護杖屨。匿影度崦嶮。側聞蓮花峯。去之雲中近。緇素不相疑。泥滓爲扞技。羹芋或相貽。雪蕈偶同攜。不足恤死生。依之全曲謹。往來遂頻數。登眺躅疾忿。雜心非謝客。妙悟異龐蘊。爲有神駿賞。激揚忠憤隱。行歌方亢爽。社稷已齏粉。燒燈相嚮悲。坐待鐘聲殷。義旗同崎嶇。債敗無鬱菟。笑指樓閣燼。一如暮落槿。垂死猶致聲。心魂尙合脰。潭雲空淒迷。回望增悲愍。康州謠追哭。督府義興相公。是去秋同鄒管二中舍會公地。

可憐康州城。瀧水從南來。龍旗翩翩去。何繇蒼梧迷。密雲不開。秋風起。秋葉飛。旗翩翩。去不歸。烏頭黑。雀

舌白城上飛聲啞啞。羽林軍神廐馬。昨日靈羊溪。今日康江下。楊花自飛鳥自栖。相公白旆清潯西。康州城下生蒺藜。

箜篌引

彈箜篌擊鼙鼓。留君君不住。素絲玉壺白水清。博山蘭膏飛煙輕。華月微風吹鳳笙。他人不語君含情。胡爲乎凌狂波而亂流。從君不果心繁憂。東海之魚不可得。西飛之鳥不可留。往者不諫。來者徒傷。寸心炯炯明月光。千里萬里隨君傍。君凌濁水不見影。青天高懸獨傍徨。

不寐

夜火榜人驚。江沙依舸平。落花逢昨日。潮月應初生。芳草空凝望。綠雲詎有情。含悽愁夢杳。魚柝警嚴城。過李爲好山居信宿

紫雪桐花落。綠煙莎草凝。閑階斜日轉。薄篋緒風勝。消息中宵酒。過從太古僧。淹留春病減。君似一條冰。待于禮

望望還相待。悠悠問此心。禽歸孤樹夕。月上半峰陰。稻徑迷紆折。荷香送淺深。琅然琴韻在。莫止動游鱗。早春餘雪屬目偶成

溼雲飛不起。一半雪光欺。藥裏猶疇昔。鶯花笑幾時。烏藤苔露墜。白桧柳風吹。知否韶華借。閒心早自疑。

四月一日

莫更惜春光。遲遲愛景長。棟花三日雨。燕子一襟涼。魚影深搖綠。梅腮已上黃。韶華讀史過。天地儘清狂。露坐和白沙。

不辨香何際。回塘有芰荷。風來已良久。月上見微波。草氣從涼淨。星光在宇多。韶英吾識汝。枯竹有鸞歌。衡山曉發。

擊汰遲楓浦。歸心就翠微。江空雙岸古。天小衆山圍。嶽氣雲侵縣。墟煙月掩扉。松杉回望裏。一谷曙光飛。病。

鑪火微紅壁影搖。窗明殘雪遠山椒。人間今夕寒宵永。故國殘山老病消。玉歷有年成朽蠹。青編無字紀漁樵。閒愁四海難棲泊。藥銚松聲滴暗潮。

江行

虔兵入衛氣驕橫。歸路廬陵屢夜驚。取次渚宮成賊壘。蕭條淮北盡空城。家山近望憐征雁。谿路含愁聽早鶯。還恐南枝棲不穩。曉來星影射長庚。

耒陽曹伯實翁丈招同陳耳臣廣文訪杜少陵故墓

孤城斜日射荒邱。華表蒼煙對荻洲。郢樹秦城悲弟妹。天清野曠弔孫劉。傷心素旆陳濤恨。回首寒砧白

帝秋莫向江湖怨飄泊。人間還有水西流。

讀指南集

揚州不死空坑死。出使皋亭事未央。鳴鳩春催三月雨。楓林秋忍一林霜。礪門鶴唳留朱序。文水魚書待武陽。滄海金椎終寂寞。汗青猶在淚衣裳。

秋雨同子直

秋陰何來飛雨淙。杜陵歎之後堯江。井桐已落不知數。水鳥無愁聊自雙。遊屐幾曾過柳岸。青尊只少對蘭缸。猶傳錦字開幽獨。溼月穿雲上小窗。

元日過子直奕

今日何年復歲朝。曉窗新夢試逍遙。韶光流轉誰消息。春賞殷勤久寂寥。竹徑雲深通綠竈。蘭芽雨沁透紅苗。高齋奕散前溪路。回望炊煙隔小橋。

長沙旅興

江上紅芽始試春。乳鶯調語正迎人。人間韶日還相識。花下暄風已試新。鶴杖恰逢苔逕輦。漁舟初繞碧波勻。乘乘生事餘年在。隨處桃花可問津。

遣懷



乾坤極目不消愁。生事崢嶸只敝裘。漁艇可容人釣雪。故鄉還似客登樓。探梅的藥丹砂蒂。問月殷勤白玉鈎。儘有風光相假借。無妨孤棹試中流。

春山漫興

餘春春閨太從容。卽次鶯花老漸慵。送夕柳邊斜照淺。留寒雨外溼雲重。烹龜自惜千年表。放鶴先栽九里松。人事天情宜痼疾。草堂曲曲暮煙封。

元夕

望月蛤蜊出淺霞。背人約莫數年華。垂楊向夕驚新綠。蠟炬停風結小花。寂歷影堂香篆靜。蕭清春筵鮮紋遮。南檐欲問平安竹。好護劉蠡處士家。

春興二首

嬉春遲暮老廉夫。長臥歸休舊酒徒。不分傳家三傳在。從來亡國一身孤。玉錢月影窺雙鬢。碧海雲波認五湖。一味龍鍾供世笑。蒼天還識老狂無。

樓空山遠溼雲蒸。返景長天暝色仍。千里湘皋歸雁雨。九江春水釣魚燈。馬殷冢在生新草。陸遜營荒挂古藤。夢裏白蘋洲上月。遙遙北渚接黃陵。

五月前一夕唐心如以近詩見問病廢夜讀久矣卽夕口占寄意

榴花因雨不得紅。溪蓀浹露青煙叢。明朝誰續五絲縷。新月初彎一綫弓。楚國神絃惜往誓。山中桂樹思悲翁。紙窗晴日能相借。錦字憑開霧眼空。

病起

白髮重梳落萬莖。鏡花鏡影兩堪驚。水金丹訖聞方士。土木侵膏累友生。故國餘魂長縹緲。殘燈絕筆尚崢嶸。懸知藥力消冰雪。未擬垂楊聽早鶯。

昔夢

昔夢閒情一枕蠲。閒愁過眼萬心鑄。溼雲葉葉垂虹外。歸鳥泠泠照晚邊。礪草自分尋藥徑。湖天誰汎釣魚船。西清斜月能消得。片玉輕鬆半影懸。

雨餘小步

蓮花蓮葉柳塘西。疏雨疏風斜照低。竹籊冠輕容雪鬢。桃枝杖滑困春泥。垂虹疑飲雙溪水。砌草新添一寸萋。不擬孤山開放鶴。鷓鴣恰恰向人啼。

宿別峯菴庶僊策杖來慰時方從哭送先兄歸壟

羃羃蒼煙護小橋。回峰斜引上方遙。歸禽邀日沈平楚。宿露冷風潤綠蕉。白髮共憐鏡影瘦。青山未遣淚痕銷。憑君昨日山陽笛。吹徹寒冰慰柳條。

別峯菴二如表長老類知予者對衆大言天下無和嶠之癖者唯船山一漢媿不克任而表師志趣於此徵矣就彼法中得坐脫其宜也詩以弔之

延陵未識披裘客。楊億還疑轉盼僧。銀地界中金屑眼。熱油鑄裏雪山冰。相逢歧路雙趺印。顧笑懸崖一杖登。今日重拈唯薦淚。秋山葉落冷枯藤。

絕句二首

名花珍重試芳叢。白酒朱旗醉曉風。近日園亭荒落盡。百錢買得一窠紅。  
河滿子歌聲斷腸。人間難挽是斜陽。桃花零落留桃葉。簸蕩春風一倍狂。

樂府

西腔搖曳接龍游。生遣無愁果有愁。玉管金尊人盡哭。梧桐無葉不悲秋。

哭歐陽三弟叔敬沈湘

菖雨蘋風杜若香。懷沙千古弔瀟湘。遲回怕唱招魂曲。不信人間別已長。

南嶽摘茶詞

晴雲不采意如何。帶雨掠雲摘倍多。一色石薑葉笠子。不須綠箬襯青蓑。

陸世儀十六首

世儀、字道威、太倉州人。諸生。同治□年從祀孔廟。有桴亭集。

四庫總目世儀之學主於敦守禮法不虛談誠敬之旨施行實政不空爲心性之功於近代講學之家最爲篤實故其言曰天下無講學之人此世道之衰天下皆講學之人亦世道之衰嘉隆之間書院徧天下呼朋引類動輒千人附影逐聲廢時失事甚有借以行其私者此所謂處士橫議也又曰今所當學者正不止六藝如天文地理河渠兵法之類皆切於用世不可不講俗儒不知內聖外王之學徒高談性命無補於世所以來迂拙之謂也其言皆深切著明足砭虛憍之弊

結埼亭集桴亭先生之論白沙曰世多以白沙爲禪宗非也白沙曾點之流其意一主於灑脫曠闊以爲受用不屑苦思力索故其平日亦多賦詩寫字以自遣便與禪思相近或強問其心傳則答之曰有學無學有覺無覺言未嘗有得於禪也白沙本與敬齋俱學於吳氏皆以居敬爲主白沙和此日不再得詩曰吾道有宗主千秋朱紫陽說敬不離口示我入德方後來自成一家始以自然爲宗而敬齋則終身無所轉移是以有狂狷之分也論陽明曰陽明之學原自窮理讀書中來不然龍場一悟安得六經皆濼泊其言朱子格物之非謂嘗以庭前竹子試之七日而病是則禪家參竹篋之法元非朱子格物之說陽明自誤會耳陽明才氣過高遠爲致良知之說自樹一幟致良知固可入聖然打破敬字乃是壞良知也陽明之意主於簡易直捷以救支離之失故聰明者喜從之一切放下直下承當心粗膽大祇爲勸遂一敬字陽明在聖門狂者之流也其論整菴曰陽明講學在正德甲戌乙亥之間整菴困知記一書作於嘉靖戊子己丑之際整菴自謂年垂四十始志學正陽明講學之時也其後致良知之說遍天下而整菴之書始出然則非陽明講學則整菴何以善人終其身而是書且不作朋友切磋之功其可少哉整菴四十志道年踰八十而卒四十餘年體認深切故其造詣精粹然其論理氣也不識理先於氣之旨而反以朱子爲猶隔一膜則是其未達也陽明工夫不及整菴十分之五整菴才氣不及陽明十分之五於整菴吾恨其聰明少於陽明吾恨其聰明多論白沙弟子曰門戶之盛始於甘泉書院生徒之盛游談奔走廢棄詩書遂開陽明一派東林繼統欲救其弊而終

不能不循書院生徒之習。以致買禍。此有明一代學術升降之關也。論陽明弟子曰。姚江弟子。吾必以緒山爲巨擘。其序傳錄曰。吾師以致知之旨。開示來學。學者躬修默悟。不敢以知解承。而惟以實體得。今師亡未及三紀。而格言微旨。日以淪晦。豈非吾黨身踐之不力。而多言有以病之耶。此蓋爲龍谿而發。而救正王學末流之功甚大。緒山雖以天泉之會。壓於龍谿。然不負陽明者。緒山也。終背陽明之教者。龍谿也。凡先生思辨錄所述。上自周漢諸儒。以迄於今。仰而象緯律歷。下而禮樂政事。異同。旁及異端。其所疏證剖晰。蓋數百萬言。無不粹且醇。其最足以分諸家紛爭之說。而百世俟之而不易者。在論明儒。予惟國初儒者。曰孫夏峯。曰黃梨洲。曰李二曲。最有名。而桴亭先生少知者。乃仿溫公所作文中子傳之例。采其粹言。爲傳一篇。以爲他日國史底本。

陳瑚確菴集。桴亭古風。取裁漢魏。近體得法李唐。不屑爲卑弱不振之調。

田按。桴亭古體。取濤詞意。不專摹擬。五七律。格調軒爽。音節蒼涼。其講學立言。不與當世之分門戶。涉標榜者。角名爭勝。而沒後名。乃益彰。蓋能爲潛龍。乃能爲利見。不在一時。在千古矣。

### 哀黃雀

哀黃雀。黃雀飛且鳴。飛鳴一何急。苦饑不得食。荒田草離離。糝穀無糠粃。汝不聞東家之子。千金軀。朝來自分埋溝渠。那有餘穀活汝爲。

### 送閩中林衡者遊中原長歌

石齋先生天下師。君能弱冠長揖之。著書如風腕欲脫。吐論鑿鑿稱雄奇。石齋爲君亦拱手。略盡形骸呼小友。贈君藥言送君詩。直欲與君分半畝。石齋贈詩有應分半畝與君居之句天公天公何不仁。忠臣既死英雄貧。嶺雲如

山戰骨白。至今闔海飛征塵。男兒致身苦不早。雙髻蹉跎渾欲老。安能跼蹐轄下駒。鳳凰翱翔在蒼昊。束書躡屨作壯游。志氣直欲凌九州。扁舟千里入吳會。上書論古驚同儔。腐儒如子那足道。感君意氣爲傾倒。揮毫贈我琅玕辭。愧乏瓊瑤無以報。君今策蹇問中原。山川漫漫道路昏。胡琴欲捧向何處。夜半起舞心煩冤。金陵城中王氣盡。蔣山斷樹生芝菌。日落江潮殘不波。維揚明月歌春蚓。君不見昔日江東祖士雅。擊楫中流淚盈把。又不見遼東白帽翁。語維經典甘孤窮。丈夫處世只兩途。吾子坎壈將安終。中原人才頗不惡。風塵往往傾然諾。昂然七尺未長貧。暗中定可相摸索。歸來過桴亭。西窗剪燭開短屏。交知四海見吾子。相對使人雙眼青。

乙酉元夕婁城盛張燈火有感而賦

塞北旌旗亂。江南采色多。敷天猶有淚。薄海但聞歌。遊女飛金爵。王孫曳玉珂。太平誠足樂。九世奈仇何。

張睢陽廟

捍禦功勳烈。江淮廟貌尊。一時羅鼠雀。千古祀鷄豚。天地心猶在。風塵氣更昏。英靈如可作。慷慨欲同論。

遙哭希聲錢公公。婁舊令也。申酉之難。開關嶺海。卒死王事。葬海中之瑯琪山。其二弟肇一兼三負。

遺書至婁因賦一律以誌思慕

營頭夜隕海濤奔。真宰茫茫未可論。絕島君臣留正朔。瘴天風雨葬忠魂。誰將心事傳龍比。賴有遺書屬

弟昆千古崖山成恨事。臨風遙慟一傾尊。

次桓移居胥山之麓自名胥江草堂索贈

越國春深橋李城。胥山山下一江橫。南州高士新開徑。吳市英雄舊駐兵。帆影落窗晴欲暝。濤聲入簾夜還驚。浣溪莫漫誇名勝。此地滄桑眼倍明。

喜宋子猶從海上歸賦贈

十年蹈海一身輕。故國重回代已更。夢裏鯨波如昨日。尊前鮭菜只平生。乾坤何處容孤往。邱壑吾儕且耦耕。遜世功夫正無限。可能相助一經營。

萬卷樓同扶九甫草夜飲

萬卷樓開暮靄天。披襟此夕對高賢。一時人物雲中鶴。千里交情雪後船。震澤長風吹劍氣。包山秋色在詩篇。卻憐寂寞江亭下。剩有畸人獨草玄。

清明

二月輕寒又禁煙。郊原祭掃正紛然。桃花欲放鶯初語。楊柳新垂燕可憐。杜老春衣頻自典。漢宮蠟燭有誰傳。十年樵牧冬青老。寥落東風怨紙錢。

同葛瑞五遊吾谷

湖山久絕剡溪舟。忽漫相過續舊遊。樹裏波光高出屋。松間日色冷於秋。軟輿素舸芳時樂。石馬穹碑故國愁。惟有丹楓如血淚。年年和雨滴荒邱。

次韻挽瞿稼軒歸葬

稼軒爲桂林留守死難贈臨桂伯其孫扶柩歸葬

砥柱乾坤賴老謀。那堪宰相盡風流。橫江已斷千尋鎖。籌國誰開萬里樓。南粵兵戈行殿恨。東臬花木故園愁。稼軒思故鄉于桂林作別墅名小東皋渡河只有宗留守。慟哭相從地下遊。

重陽後一日含綠堂雅集

茱萸插罷酒還沽。餘興龍山尙未孤。萬古乾坤皆草莽。一時人物在菰蘆。月泉開社天星聚。鐵匣緘詩井水枯。宇內誰成三不朽。壯心空考北山愚。

辟疆園畫社卽席分韻

舉目青山是處愁。桃源漁父路悠悠。峨眉風雪林巒迴。海國雲霞島嶼浮。欲共向平樓五岳。誰從陶峴借三舟。不如坦腹長松下。欹枕看圖作臥遊。

出鄱陽泛大江作

一葉橫過彭蠡秋。大江東下接滄洲。半天劃界開長壑。萬里奔山送急流。南國君臣常恃險。北來車馬每生愁。靖康渡後虛名失。不用投鞭穩放舟。



偶念熊芝岡有作

履霜自爾至堅冰。今日何須重歎驚。二十年前檀道濟。中原已自壞長城。

過寶帶橋

澹臺湖水綠如油。寶帶橋平正練浮。好種碧桃三萬樹。年年花裏作春遊。

陳瑚九首

瑚字言夏。太倉州人。崇禎壬午舉人。有確菴集。

錢謙益有學集。嘉隆之間。吳中文章家以聲華浮豔爲能事。岷山歸熙甫守其樸學。言稱古昔。與其章布弟子。端拜循誦。倡道於荒江寂寞之濱。於是吳中有歸氏之學。逮及百年。而確菴陳子挺生於百里之內。磨礪名行。鏃礪經術。學者確然奉爲大師。人皆曰。確菴子今之歸熙甫也。

王流壑丹園臺先生十五。與同志陸桴亭。世倅盛寒溪敬。江藥園士韶結文會。年二十五。始與三人約爲聖賢之學。壬午。舉鄉薦。遇黃陶菴曰。試若不售。受國恩淺。猶是草野一介耳。則竄伏於荒江寂寞之濱。著書傳道。以畢餘生。亦中道也。陶菴捷先生下第歸。聞京師陷。痛哭焚衣冠。順治丙戌。遷居蔚村陳頑潭。有田數畝。躬自荷鋤。與諸子講學。做呂氏鄉約。朱子白鹿洞規。溫公真率會遺意。青蓮社約法。教以人倫。相戒以不妄言。不許私。不謀利。不作無益。又爲講規。以孝弟力田行善爲蔚村三約。州守白公以先生名應徵。峻拒之。曰。執事若不收回成命。卽當削髮入山。況所欲有甚於生。萬一急不擇音。得母爲仁政累乎。州守乃寢。年六三卒。門人私諡安道先生。

婁東詩派。桴亭詩以渾灑勝。確菴詩以沈雄勝。工力悉敵。

明詩紀事 辛籤 卷十三

二九四九

過吳門有感

不泊吳關下。星霜又幾回。轆車新使舫。煙草舊歌臺。易入王維恨。能令庾信哀。桃花緣底事。還傍戰場開。

宿顧雅儔草堂

幽人住何處。墨莊東復東。卷簾看曉日。散帙坐晴風。客話烹蠶荳。僧過翦鹿葱。一時偕隱樂。可得似梁鴻。

邨居

蘆白楓丹照綠蘋。粘天波浪自鄰鄰。愁知日月摧雙鬢。貧覺妻孥絆一身。詩卷行吟書甲子。熏爐匡坐守庚申。南山當戶明如髻。相對年年似故人。

春日

春上清溪冰復開。山村煙景若爲催。枝頭有鳥窺虛牖。門外無人掃落梅。餉米一囊衝雲去。市魚孤棹帶花回。久知學道能忘世。只恐猶添萬恨來。

次韻劉文成夏日雜興

綠波渺渺暗荒郊。日與忘情草木交。蘆葉一灣圍鷺宅。蓮花千歲老龜巢。移床就樹雲爲幄。倚竹懷人月滿梢。不用勞勞叩詹尹。十年前已決誅茆。

鹽鐵塘別石隱寒溪桴亭默菴

回首愁雲思惘然。舟分南北淚如泉。十年兄弟空雙鬢。四海功名剩一氈。看世有心留白眼。埋憂無地問青天。何時合買深山住。欲借襄陽百萬錢。

映碧先生見遺地圖

圖畫山川感慨多。邊陲風景近如何。入關無復蕭丞相。聚米空思馬伏波。兩戒一江橫似線。九州五嶽小于螺。錯疑留守魂歸夜。風雨聲聲喚渡河。

簡黃攝六

鬢絲初白佛燈紅。回首當年事事空。花落花開三月裏。人歌人哭十年中。宅邊綠柳思陶令。洞裏丹砂問葛翁。又見榆煙近寒食。健兒驅馬鬪春風。

所見

萬戶千門一炬焦。燕棲林木雨瀟瀟。藏春草暗先生塢。丁卯煙寒刺史橋。古寺嘯烏新鬼哭。空城走馬健兒驕。舞雞擊楫都成夢。搔首江頭看落潮。

送王石谷

臺城秋草暮雲殘。六代興亡雁影寒。無限傷心金粉地。憑君畫出與人看。



# 明詩紀事卷十四

## 辛籤

陳忱二十四首

忱、字遐心。烏程人。有雁岩詩集。

韓純玉明詩集。詩人隱逸者。唐如張志和。陸鴻漸。宋如林君復。魏仲先。明如孫太初。吳孺子。輩身雖隱而名愈彰。未有以名俱隱如吾鄉陳君雁岩者。雁岩與予同處城闌間。相去止里許。生平未識其面。并不聞其名。沒後始見其詩。及雜著小說家言。驅策史冊典故。如數家珍。而鬱鬱無聊。骯髒不平之氣。時復盤旋於楮墨之上。亟覓其全集。已零落不能多得矣。夫以同爲遜世之人。同居桑梓之地。尙不能一接其音容言笑。則其埋名匿影於古詩人之隱者何如也。

田按。遐心苦吟類。如鳥。大節似宋桑。集中九歌。激烈悲壯。聲出金石。詩綜僅錄一詩。安足見所長。韓子適序遐心詩。致歎於同居桑梓。不能一接其音容言笑。影墜聲沈。言之痛心。古今詩人。淹於荒煙蔓草。而無隻字以傳。此探詩者之責也。

春日田居

石田不力耕。蒲稗供鳧雁。陌上不植桑。荆榛任延蔓。豈不念飢寒。所得在閒散。租吏急追呼。我獨忘憂患。悠悠北窗眠。山光變昏旦。晴暉滿戶庭。春風勸餐飯。名業炳身後。千秋亦云暫。仰彼百尺松。蒼然覆清磻。訪倪羽飛

雲林散寒陰。隔溪蕩隱廬。長吟放漁艇。把檝還抱書。入門証肝膈。淡旭松窗虛。魚蔬存古致。醉後將何如。東風綠兩岸。凍草留踟蹰。

香谷上人投詩敬夫清新可讀因同過訪

異哉西谿翁。窮年被詩祟。閒將嶺上雲。引入發精粹。破壁逗奇光。直簾畫公位。三日不能去。遙思亦無爲。坦步飲湖光。雙峯十里翠。野煙深閉門。叩門更何忌。動止肅古儀。聲聞兩無愧。不知天地間。正始尙全備。誤討三十年。往日輕罵詈。牆陰吹冷香。一喜墮老淚。袖得新雲歸。周鄭且交質。

南溪秋汎

雲石折一溪。古木陰數里。幽禽鳴兩岸。漁家日成市。停午理輕楫。晴波作煙雨。野情易爲適。沿溯無起止。叩舷讀楚騷。黯然二三子。萬事阻干戈。秋遊從此始。

題東池草堂

大隱不買山。亦不溷朝市。林泉遠人境。結廬傍河渚。佳樹蔭蒼蒼。高堂曠無比。北牖映桑柘。南榮植蘅芷。蓮葯雜菰蒲。陂塘引溪水。香山池上篇。其義恆竊此。力田不自欺。先春舉耒耜。蟋蟀隘唐風。歲晏寬婦子。客至陳魚蔬。率真忘汝爾。慷慨寄詠歌。酒罄拂袖起。豁然吐心胸。爽氣西山紫。

九歌四首

江南半壁已崩裂。處小朝廷尙求活。錢塘不至三日潮。仙霞嶺上烽煙撤。拋戈解甲誰適謀。南人頸試北人鐵。青苔白骨沒野蒿。檻猿籠鳥何所逃。江頭野老何所依。羊裘五月坐漁磯。風波險絕終不顧。長鑱託命恆苦饑。掉頭豈復念妻子。懷沙哀郢知者稀。長安弈棋多反覆。有足那肯加帝腹。我今潦倒垂半百。相逢猶爲披肝膈。寒風刮天雪一丈。獨立柴門遲我客。荆卿入秦何足多。遂令白虹能貫日。抱膝長吟環堵中。草澤自有真英雄。黃塵汨汨白日荒。連年征戍背裹瘡。孤城晝閉黑雲壓。搏人當路嗥豺狼。肌膚皴裂足重繭。那能握粟占行藏。丈夫生死安足計。但求一寸乾淨地。

人日立春

春來如有故。天亦豁重陰。自信山家歷。疇論世上心。麥畦沾淺綠。梅影受孤吟。南歸從茲起。林塘煖易尋。秋晴喜凌山賓過訪。

秋霽經三日。柴荆敢一開。故人當我念。野艇載書來。古道煩相挽。詩名享不該。行藏知久定。未許世多猜。過妙峯精舍。

山氣逼遊屐。衆香國裏來。麥新吹過綠。松小點成苔。瘦石支筇影。寒雲戰茗杯。鐘聲回望遠。千嶂一門開。

雜感

所憂非一事。初不念飢寒。慷慨真無謂。悲涼實有端。煙雲終未幻。天地幾曾寬。客到須藏草。詩多行路難。

九日前一日重集東池

東野曠無事。吾生幸不才。好秋難閉戶。多難莫登臺。白髮傷心客。黃花明日杯。只因高處險。仍到水邊來。

茗城早發

東塘八里店。殘月蔽蒼煙。聽發山城角。來乘春水船。時危憂道路。老去惜詩篇。歷歷羣峯出。孤帆向日邊。

秋夜宿蓮花莊

水向月湖入。蓮花故國秋。無端深夜雨。忽動一身愁。柿葉紅書屋。山嵐溼畫樓。鳴笳激清淚。宿怕近城頭。

答長文春盡見訪雨宿之作

無事且危坐。匆匆莫似春。天低雲泊樹。世亂病留身。詩自用卿法。家何類我貧。不知今夜雨。還有共聽人。

寄懷黃長文兼呈湯海林

悠悠道路與誰論。況復聞君深杜門。遯世欲尋前日約。臨風恆憶別時言。干戈物命今方賤。耕鑿衣冠道自尊。唯羨几邊多靜侶。紙窗燈火共黃昏。

輓嚴開止



周粟先辭首宿盤。高風誰念子陵灘。麟經大旨通三傳。野火空堂閉九棺。單綬殮時零白露。雙盲孫自守儒冠。孤墳就築吟壇上。雲暮低空土不乾。

雨夜宿崔湘畹齋

齋閣春陰燈影昏。琴尊無恙舌還存。久知比屋多高士。思欲移家傍水村。故榻三年雲未埽。新松一夜碧生痕。浮天雪浪經時雨。風景瀟瀟且閉門。

秋日途中卽事

秋光踏遍桂花時。負手豪吟發靜思。菱葉田田鳧睡穩。籬暉淡淡犬聲癡。稻充飽眼香千里。煙壓衰楊影萬枝。舊事已拚東逝水。鬢華不畏晚風吹。

阜林道中

沙鳥唳雲剩半聲。孤篷閉雨暮還晴。客帆盡向橋邊落。野廟無煙臥戍兵。

詠史

鐵騎空殘石晉家。豈能一日戀中華。不知當日馮書記。曾到胡林哭帝猊。

康王寺

南渡鑾輿駐蹕多。只今疏磬出煙蘿。遺民不識中興主。猶喚康王是九哥。

傅占衡二十九首

占衡字平叔臨川人給事中櫬子有湘帆集二十六卷

陳孝逸擬山集平叔編集甫完。握予手咄咄。自道身不關世用。無由預廊廟制作。而研窮天人神鬼之精微。擬六經三史之簡要。著一家書。又大不逮。况饑寒逼窄。多弗暇。區區草野應酬。縱甚能妙。要無足存者。予於是歎造物之成平叔。殊未盡其理也。平叔幼遊長安。有遠志卓識。而盛時師友。又世所稱偉特。故不爲浮麗無用之學。其學不苟同。亦不好立異。持論公平。審核通達。事務又熟。本朝故實。因革興衰。是非邪正。有閎閱之胄。數歷之搢紳。所不了了者。平叔了焉。將以施之身。施之家國。宜無不可者。多難之際。欲爲歐陽激。陳東。復欲爲李夢柏。皆不果。嗚呼。平叔少陋以科第。終錮以泉石。且蓬轉於桃穴榴洞之鄉。無定宅。雖復寄意綿渺。招不來而靡不去。平叔固不失爲平叔。然而非其素矣。

王士禛蠶尾續文。平叔古文。實出大士。千子之右。昧者以爲附陳。艾以有聞於世耳。食者也。

鮑琦亭集外編。平叔湘帆堂集。在江右諸公中。文品出王。魏之上。然本領稍薄。魄力亦孱耳。平叔之父給事。天啓間爲奄黨。歷名逆案。故平叔終身不交復社諸公。以平叔之文。不能雪其父。孝子慈孫之憾也。

田按。平叔古詩蘊藉安雅。有柳。儲深致。時或效王半山。七律音節爽亮。出語清新。余謂平叔古文堂廡未宏。不若其詩之精詣。世獨稱其文。何哉。

諭俗

辛卯建寅月。癸亥始立春。兵從西南來。聞諸道路云。流九少甌。與荷。受呼我門。雞鳴測昏夜。不躬於其耕。是日浮氛。曠衆皆感所困。爰有里豪輩。率之聽於神。報賽古道然。茲理宜引伸。山有鑿公祠。由來號懷仁。

生爲豫章守。功德留精禪。史稱成都火。萬里得無焚。賜卮尙不醉。豈屑此芬醺。十室災祥命。纖忽繫穹旻。卜筮徒覽鑿。祈請空崩奔。磨刀何霍霍。置俎各紛紛。人孰不每生。戮物以藩身。黠鬼猶竊笑。況復漢直臣。矯誣醜酒肉。悲哉愚俗民。

同諸友河橋晚眺

春從道中度。跋余集維夏。相勞入纓塵。遊觀自初夏。河梁喧未息。升月波上瀉。少時麻姑容。至今多變化。遠藹際高原。落景浮城榭。寺鐘夾岸生。檣烏帶星下。淡淡川響隨。依依夕風借。曾是皋壤歡。而靡春秋暇。終懷信美談。歸哉視吾稼。

涼棚

赤日土山焦。南窗迫初照。諒無姑射才。煩襟損清妙。伐木課樵餘。縛棚佐深窈。藤絡斂無名。花庵偶相笑。溫公有花菴詩翠疑赫曦薄。靜覺涼颺召。未妨逸人眠。頗恣成公嘯。盤石蔓潭陰。思垂千尺釣。

雨中望塔

新涼日上衣。起坐朝雨兀。負牆閱高標。勢若溟波碣。煙侵欄下生。風入鐸中發。晦冥仰猶尊。威儀瞻未竭。昔時古德心。等觀羣辯訥。有待忘鐘磬。無諍謝唼咄。予乃枯槁人。流浪居巢窟。思躡層梯巔。江海窺出沒。秋色隔蒼茫。鹿田憶晞髮。屏慮接歸根。清境賴宵月。

謁陶桓公廟

在都昌城中像甚古

朝憩大湖舟。迺在鄡陽邑。仰見陶桓公。悔不衣冠入。幸當散髮年。勞動久非習。徘徊鐘鼓靈。懦夫忽將立。度豁元規來。志合太真泣。永懷江左人。往往未可及。瑯琊業已乖。北府義空集。公孫獨遙遙。羲皇與平揖。

四松堂飲酒詩有序 錄五

余性夙不善飲。數斟以還。自謂劉阮之趣。莫或異也。比乃欲以酒爲年。旣醉無徒侶。聊用敗筆棄紙。題數句自娛。詞不能雅。亦懶改擇。爰命兒子錄之。非敢和前人也。以飲酒名篇。此亦遭人之目耳。

初夏宜讀書。俯仰在一几。有時思麴生。甘苦適人旨。旣蠲身外忿。善佐篇中喜。罇浮坐不空。壺傾立終侍。予歌雖若瘖。汝醇我失鄙。方憂疑難多。胸懷忽如洗。乃知自驅惑。載醪徒好事。釀具焉可無。遂成每設醴。種秫苟無田。我憂勝箝市。祇妨索酒時。妻子諾不唯。

閒披嘉靖志。撫亦稱仕國。一從樂史來。釋褐幾千百。上自中書堂。下至二千石。其餘令長徒。句塗用濃墨。功業及文章。晨星屈指得。往往將姓名。問人對以默。鄉里尙茫然。豈在遠史冊。科名力如此。何況衣盡白。速宜飲十觴。不必待賓客。

旁人嗤我醉。謂忘貧賤恥。汝旣不知詩。安知濁醪理。嘗讀戰城南。又覩石壕吏。酸辛入鼻端。清淚下靡靡。

閨中無搗衣。塞上無遊子。牧犢非孤居。梁鴻未出里。譬彼乘空鳥。偶避由基矢。舉家蘆葦中。焉得不暫喜。我未勝杯酌。陳生學七賢。我欲營糟邱。陳生誦初筵。兩人合共飲。奈何相避然。反似劉公榮。虛坐嗣宗前。卽事成今昔。物理悟推遷。得非琴瑟和。不能專一絃。全神予晚德。攝生子思愆。若令淇洳俱。久作酒中仙。絕長各補短。可以獲延年。

潔士不厭客。豪士不諱貪。旣祖各取道。有如朔暨南。唯彼醒與醉。可以和酸鹹理。隔異孔墨。趣同似瞿聃。君去余欲瞑。至今猶美談。豁達觴酌間。何必史且監。吾觀禮法士。文俗令人慙。閉門對孤岫。命酒缺雙柑。試抽山海經。珍錯發苞緘。襄陵浩方割。龍蛇氣正酣。敢告神禹王。無庸憎荒耽。

### 效縛雞行

偶食濡肉投其骨。蟻呼羣類爭奔趨。雞來逐蟻空驚散。自覺不仁雞未驅。家雞穴。猶強弱。人坐食雞雞。俛啄。烹雞謝蟻勢不能。鼷鼠郊天食牛角。

### 海棠樹引

周鎬臣酒中述其里中老常侍所說甲申事甚與野語不符哀而記之。

潼關失險黃河狹。廣明大盜窺御榻。萬官袖橄吞炭聲。一朝鴛鴦空闔闔。太僕无馬奉至尊。礮飛落瓦九廟門。長秋天上宮女泣。壽皇殿前花露溼。問誰扈蹕二王公。身隨社稷叉手立。跪鬆鑿帶忙叩頭。置之海

棠樹陰幽。奏罷遠天下階去。夙沙先導山陵路。愚哉羣賊索都城。豈有國破英君生。況復滿朝皆良善。藏亡匿死非難辨。老璫墮淚述蕭牆。總覺民間聞見舛。可憐一帝只一奴。區區臨事潔不污。宮柳又青苑花紫。雲暗海棠對株死。

東鄉鼓

配鹽幽菽來活溪。一斛半兩精朱提。乍燃薪火炊香粒。不慕秋肥烹伏雞。山中木葉煎洗耳。石罅流泉漱礪齒。何當推倒白鹽山。共下蓴羹一千里。

雜詩

埋身干祿篇。江左動經年。落魄牛頭闕。歸心雁字天。青溪搖白塔。雷岸隱風船。悔不耕廬阜。恆齎三疊泉。

攤書

何由中祕讀。不遣故園看。老友隨家落。新知覓歲寒。眼光猶透脫。心緒惜叢殘。畢竟無奇字。從人貰酒難。

別陳伯磯

頻年離合夢。汝我各舟車。衰覺營藤杖。貧新失板輿。才名建業水。世味武昌魚。歸去門應杜。時時一入吁。

自若來居慈意有春盡且登山句因用爲題以贈

蕭然無事心。屋外惜春陰。細草出門遠。餘花背嶺尋。人煙村樹滿。鴨水野田侵。蘭若當峯盡。還同靈澈吟。

雨望廬山彭蠡間

數面廬山不辨遊。利名牽愧白江州。東林泉石過曾愛。左里風波夢亦愁。吊望昔年悽落日。歸帆幾度怨殘秋。康郎戰處猶存廟。瞿口滔滔水北流。

掃先孺人墓且卜先太常宅兆哭記一章

風雨魂消古渡頭。十年馬鬣思悠悠。鵲紅滿地餘生泣。莠蓼終天亂後憂。祖考有知應索杖。山川無語似藏闕。不須大刻豐碑字。無限園林或繫牛。

辛卯八月懷章門諸子

龍沙寺畔月新弦。維斷江流競著鞭。磨鏡未齋尋孺子。斬蛟重鑄問真仙。前朝畫閣餘秋水。故老祠堂入野田。無論歸舟并馬上。不妨憑弔及諸賢。

遙寄後雲門僧

吳中才壓辨亡論。入雒難辜大帝恩。家世蓬萊尋禹穴。浮湛笠澤號雲門。楞伽字裏騷嗚咽。壞色衣間筑吐吞。不話百年牛李事。看他垂拜杜鵑魂。

讀閩刻兩相公詩

誰遣羈心不可治。青編俱是黑頭詩。鍾陵玉碎經遊地。鎮海星沈失路師。行在尙方何處繳。瘴鄉老柏共

成祠轉傷壬戌初看榜。正是甘泉失火時。

暑日卽事柬癡山

午枕煩歛夢不清。茅堂已就土微平。攜書欲借花陰讀。聯句新尋竹影盟。查至詩文堆几席。遙通戲謔絕冠纓。晚涼鄰曲無來往。百尺松濤待汝烹。

聞南礫碧潭菴改造畢工欣然有寄

舊隱招提夢隔年。不堪塵俗混人煙。那知別後支公老。更有山中長者緣。深逕莫移原映竹。閒房須近好聞泉。自憐陸處全無屋。終愛空門受一塵。

廬陽對雨送曾子謙歸里

空階滴瀝雨秋同。客裏惟君馬首東。離別幾時今五月。平安剛寄第三封。西溪定約尋殘菊。夢水難隨渡晚風。歸向金風山下路。知應特取甕頭紅。

雨中效穆伯長江南體

水鳥飛亂豫章下。茅君暑雨秋欲初。碧紗窗開吹少女。青山塔隱思大姑。鏡髮千條鬪檐溜。歸心一滴催漏壺。夜涼剪燭不成寐。花落恨劇春鷓鴣。

暑讀武林舊事



松風不許借華陽。小洞門邊細納涼。枕上武林悲舊事。一時肌粟翠寒堂。

焚椒錄

二十年來榘幹嫵。青宮幾歲尙琵琶。無端春水秋山去。落盡回心院裏花。

雨中遣疾口號呈燕及仲章

晝雨臺中夜雨歸。雨中心事夢中非。蒲團曲几辭公等。除着維摩看翠微。

余懷三十一首

懷字澹心。一字無懷。又字廣霞。自稱鬢持老人。莆田人。僑寓金陵。有味外軒橐。研山草堂詩。

漁洋詩話。余澹心。莆田人。居建康。嘗賦金陵懷古詩。不減劉賓客。順治辛丑。屬毆子餐。寄子廣陵。子答詩云。千載秦淮水。東流繞舊京。江南戎馬後。愁絕庾蘭成。鍾阜蔣侯祠。青溪江令宅。傳得石城詩。腸斷蕪城客。

詩觀。澹心詩。純以氣象勝。是初唐沈宋之遺。

十五國風高言集。董蒼水曰。澹心詩格。如入芙蓉之寶帳。撫玳瑁之雕琴。玉英琪蕊。總異人間。麟脯胡麻。如來仙洞。所謂入唐人之佳境而化焉者也。

本事詩。澹心流寓南中。徵歌選曲。嚴如少俊。梅邨贈言。有石子岡頭聞奏伎。瓦官閣下看盤馬之句。過江風流。應復推爲領袖。關陔詩話。澹心作板橋雜記。述曲中事甚悉。自比夢華錄。其詩清而能綺。麗而不靡。明季莆田詩人。莫能與之抗衡。田按。澹心詩。擅六朝之華藻。連唐賢之格調。吐屬雋雅。角逐詞場。不減子山袁豔。小杜風流。

溪宿

秋月涼於水。秋水清於月。水月漾空明。寒光浸肌骨。竹雞叫青林。山鬼嘯翠樾。坐令悲秋人。一夜生華髮。

褚河南書枯樹賦爲孝升作

涼颯颯山鳥呼。丹青滿堂招酒徒。煙黃露白木葉下。芙蓉晝泣三千姝。主人好客思芳草。金鐙玉案供潦倒。湖海風塵濁酒杯。江南楊柳新亭道。昨夜楓林叫鳳凰。朱簾宛轉明月光。庭梧欲作瀟湘雨。崖桂先摧建業霜。牀頭鮫胎瀉秋水。寸絲尺絹雲霞起。就中一卷索題詩。六朝詞賦初唐字。平生蕭瑟庾子山。婆娑枯樹動江關。樹猶如此嗟何及。繁絃急管天應泣。臨池者誰褚潭州。詰偃瘦健拔老湫。銀鉤鐵畫更嫵媚。行間自帶英雄氣。當時歐虞八法工。文皇睿賞君臣同。豈知牝晨亂天紀。鬚眉竟向蠻煙徙。好書此賦十本餘。漢南搖落增歎歎。古人氣韻今人得。咨嗟坐臥忘頭白。今宵沈醉太常齋。飛箋擘軸皆奇才。嗟余坎壈填溝壑。十年夢到屏風腳。哀歌夜半風雨來。悽愴江潭淚雙落。

茗溪四時豔歌錄一

我有玲瓏秋玉珮。贈君篋中三尺水。桂華爛漫湘娥悲。飛入吳潭打蛟起。煙梧露井隔銀塘。美人彈箏坐曲房。倒轉天河寫明鏡。碧湖射落秋天影。

雨後登湖心亭

雨歇舟初定。煙波擁一亭。橋分千頃綠。鐘斷數峯青。駕水浮明鏡。環山列翠屏。登臨憑極目。愁絕是西泠。

遊憩南屏靜寺  
偶成  
小雨催搖櫂。湖南別有天。幾家臨水住。一塔倚天懸。聲出花邊磬。香流樹杪泉。絺衣渾欲冷。高屐破雲煙。

風雨十年夢。乾坤一病身。已知隨燕雀。莫問畫麒麟。太白非因渴。陽烏不照春。桃源空有路。無復避秦人。

長千秋興

夕嶂偏增翠。殘陽遠送行。砧聲隨落葉。笳吹滿歸城。野水今年闊。鄰雞昨夜鳴。躊躇征戰地。重見古人情。

送陳徙侯之采石

亂離頻送別。杯酒最關情。往日愁中過。新秋江上行。片帆湖海氣。兩岸鼓鼙聲。細雨高樓外。看君渡石城。

夜泛胥江

月色照吳縣。盈盈江上花。寒雲送歸雁。遠浦動棲鴉。暮笛長吹客。春帆早別家。不知芳草路。來往是天涯。

送錢季水之武昌

貧賤方知別更苦。亂離真覺此身難。丈夫長揖出門去。幾處孤城駐馬看。楚水落花官舍迴。吳山帶月草堂寒。愁來苦憶諸兄弟。好把雙魚託釣竿。

贈秋浦劉輿父

辛苦驅車到舊京。臨風攪涕說平生。身當戰鬪空存骨。家爲饑寒已廢耕。何日涉江牽杜若。有人閉戶種蕪菁。暮雲羌笛長干寺。臥聽秋堂蟋蟀聲。

和楊惘伯見贈

種瓜何地是青門。愁見濛濛八表昏。芳草故都春閉戶。落花寒食夜開樽。荒雞鳴處誰能舞。舊燕來時我尙存。雨後不知山徑滑。遲君雙屐印苔痕。

由畫溪三箸至合溪

畫舫隨風入畫溪。秋高天闊五峯低。綠蘿僧院孤煙外。紅樹人家小閣西。箸水長清魚可數。篁山將盡鳥空啼。桃源不是無尋處。楓葉紛紛路轉迷。

金陵雜感

六朝佳麗晚煙浮。擘阮彈箏上酒樓。小扇畫鸞乘霧去。輕帆帶雨入江流。山中夢冷依宏景。湖畔歌殘倚莫愁。吳殿金釵梁院鼓。楊花燕子共悠悠。

送別剩上人還羅浮

萬里孤雲返故關。一帆春草渡江灣。幾年浪迹干戈裏。何處藏身瓢笠間。愁聽笳聲吹白日。苦留詩卷伴

青山羅浮此去非吾土。須把蓬茅手自刪。

和肯堂韻贈巢民

百年風雨聚金閨。遊子相看兩鬢霜。白馬清流成隔世。黃雞濁酒醉他鄉。留賓自割東西宅。對客何分上下床。幸有故人供祿米。不須道士學休糧。

戊午元旦墨禪菴試筆

海內揚塵苦戰征。閉門高臥省逢迎。百年強半睡未足。五岳胸中氣不平。柏葉浮杯傷老大。梅花插鬢睨公卿。金陵宅內千竿竹。遙聽書聲和雨聲。

題宮紫元春雨草堂圖

流水孤村第幾橋。一亭春草雨瀟瀟。尊開北海遲新月。船過西湖帶晚潮。人爲窮愁多著作。地因征戰罷漁樵。杜蘅芳芷繚天末。鶴放孤山不用招。

孫楚酒樓

江南城西酒樓紅。無數楊柳送春風。孫楚去後李白醉。千年不見紫髯翁。

分甘餘話青箱雜記云。王安國詩好用酒樓。常問子詩有紫酒樓。余因憶甲子奉命往祭南海。大雪渡溇陽江後二十二年。作詩贈鄆城人樊稜云。苦竹黃蘆滿目愁。嘈嘈切切似江州。茫茫九派多風雪。憶泊溇陽舊酒樓。不知安國見之以爲何如也。又

陳倉有古賣酒樓。東坡嘗賦詩。予丙子再以祭告入蜀過之。題一絕句云。昨向宜南下苑遊。曲江櫻草似悲秋。珠簾甲觀俱黃土。何必陳倉賣酒樓。故友余澹心詠孫楚酒樓云云。予選入感舊集。此亦二酒樓也。

雨花臺

雨花臺下草青青。落日猶銜木末亭。一綫長江三里寺。千年鶴唳九秋雲。

勞勞亭

蔓草離離朝送客。驪駒愁唱新亭陌。夜深苦竹噉鷓鴣。空□獨宿頭皆白。

帝王廟

帝王將相一杯酒。落葉颯烏霜滿檐。祠廟英靈今在否。鷓鴣飛去月纖纖。

上巳雨中看花作

棠花開盡又梨花。燕子春波蹴尾斜。何處繡簾彈錦瑟。美人寒食又天涯。

吳門雜感二首

搔首紅闌七十橋。鬪雞陂下草蕭蕭。無端醉擊雷門鼓。潛向花陰哭海潮。  
茂苑樓臺接五湖。葦絲菱片野雲孤。煙波一櫂鷓鴣子。閒對西施話沼吳。

無題

紅蘿亭下寫蛾眉。憔悴江南刻襪詞。依舊西園綠蝴蝶。春風吹上木蘭枝。

遠遊詩三首

衡嶽閒遊遇懶殘。至今煨芋未曾餐。山人何事輕衣紫。笑殺桐江一釣竿。  
紛紛花柳映沙隄。豈有千金購馬蹏。痛哭江陵張相國。孤墳猶在洞庭西。  
一杯江水謝東山。賭墅蕭蕭渾是閒。莫怪老僧頻捉鼻。也曾談笑到人間。

李笠翁招飲出家姬演新劇卽席分賦

釧動花飛素口開。狂言忽發紫雲迴。湘簾直下風吹起。舞出山香薛夜來。

贈尹春

紅紅記曲采春歌。我亦聞歌喚奈何。誰唱江南斷腸記。青衫白髮影婆娑。

費密二十五首

密字此度。新繁人。知府經虞子。有鹿峯集。

池北偶談。此度少遇逆獻之亂。竄身西域不毛之地。已乃溯漢江下遊吳。越居淮南老焉。常寓泰州。州守爲除徭役。予曾見友人几上一卷。偶取視之。其首篇云。大江流漢水。孤艇接殘春。問之乃密作也。遂賦詩與定交。密跛一足。後往蘇門謁孫鍾元先生。稱弟子。

李調元蜀雅。吾蜀詩人。自楊升菴。趙文蔚。任少海。熊南沙四大家後。古學幾沒。費氏父子起而振之。其詩以漢魏爲宗。遂爲

西蜀巨靈手。

田按。此度詩。格律老蒼。才筆雄駿。集中長篇。有杜少陵北征遺意。李雨村稱爲蜀中巨靈手。有以也。

詠史

山東無足事。連衡欲用秦。咸陽方逐客。歸作大梁人。少年縱飲博。任俠顯諸侯。無人求劇孟。藏劍宿娼樓。

北征

邦國遇塗炭。歲已八九徂。展轉山澤間。困鬱意不舒。壬辰十一月。始發自成都。于時正凜烈。北風傷肌膚。老父方多病。乘牛取長途。官道畏游兵。山徑暗崎嶇。所賴多戚屬。恩愛相將扶。敗絮惡且棄。天寒不可無。荒絕驛路亭。但尋人迹下。或復鬼神祠。或復殘廬舍。過水寒侵骨。登山泥沒脰。行行無所止。日暮粗得息。筋力已困疲。伐薪具炊食。野燒周四圍。慮爲猛獸得。腸胃如枯稊。塵羹潤顏色。茆乾刺同刃。刈拔偃終夕。低頭就火視。流血浸肘腋。長松執百尋。巨石橫一里。寒草藏開花。枯藤留結子。花開色何皎。子結味何旨。人力徒辛勞。天地物皆美。沿途苦荏苒。除夕至綿州。烽火正擾攘。秣馬隔江流。出檄示軍官。呼人爲濟杼。一鼓入城中。破屋何所求。士卒感苦辛。各出飯一盆。嗟歎令強食。毋以飢煩冤。苦深精力消。皮肉皆血痕。親戚在閩州。可以救朝昏。作書一尺紙。爲報家人存。綿州城何大。中川之要津。舳艫接南楚。車馬通西秦。勢重控部落。赫奕鎮文臣。濟濟數萬家。一旦化荆榛。狼狐白日走。魍魅哭城闔。全蜀盡枯骨。陰晦聚災屯。



害氣久不絕。耕鑿困遺民。親戚自遠道。來迎當春天。乞假各數騎。背瘡深可憐。大馬一無輿。小馬一無韉。雙臂牽藤蔓。聊束耨與氈。馬力亦何少。相易出長道。曠遠憂意外。馬飢嘗嚙草。婦女艱難行。痛哭心慘哀。負物置宿莽。喘息還復來。藏身匿村樹。狙伺人歸逋。畏恐驚舍去。侶伴不敢呼。日暮至一家。炊飯若珍珠。老人置上座。再拜謝荒蕪。我顏如僮僕。食我堂之隅。飢人歡一飽。寧問禮意麤。往往官長間。亦復相餽餉。累月至閩山。毛髮盡焦枯。古時蜀道難。棧閣下方軌。葭萌諸郡縣。桑蠶遂生齒。後世割襄中。恐滋羣盜壘。利閩爲門戶。大軍嘗麾指。東川旣已沒。西川旅不守。捍關一夫當。賊人如摧朽。始知遠畫策。不在險與否。困頓留十日。買舟意欲東。倉皇奉老親。出此豺虎中。江漢幾卅年。衰弱病成翁。颯然翻飛意。不復故豪雄。衆庶罹喪亂。我復爲勞人。一朝辭墳墓。相望若崑崙。卽此眼中路。皆可成海濱。汨落如黃河。舊事痛不已。寸心思無窮。隱忍未能舉。茫茫者天涯。微身曷所止。二三骨肉親。居處各異里。當此無家別。安能不傷毀。天地固無情。人生豈終否。棲遲田野間。白首佳山水。我自種梧桐。遣妻樹蘭芷。村釀亦已熟。歡笑偕稚子。俯仰旣無憾。旦夕肆樂只。歲晏茆屋寬。狂歌從此始。

豐城安漢看梅同徐時俊

天陰羃遠霧。山沒青隱隱。江平沙涇幽。春草發岡嶺。舍舟尋斷岸。禾黍秀里井。叢竹鬱勃深。村樓列舊畚。依垣老花樹。微香散寒影。樹下逢一翁。言簡氣尤渾。亦欲卜山居。閒田畊半頃。

紡車口

七日五縣路，三百六十灘。山深無人至，好鳥相綿蠻。松樹大十圍，霜葉如渥丹。此中有隱者，抱璞鬢毛斑。

贛州

宗子稱兵出，中丞捕反時。廟謨資節鉞，亂卒倒旌旗。往事餘煙樹，新愁醉玉卮。南行弔楊僕，春水遠迷離。

僊霞嶺

野寺無僧住，蝸涎四壁乾。人家移絕壁，馬跡亂空壇。山色侵苔滑，松聲夾道寒。遠行猶百舍，處處向南看。

聽解二彈琴

自我傷寥落，空懷大雅音。忽從遷客指，重見古人心。巖溜潺春雪，松風出暮林。秋鴻休再鼓，幽怨已難禁。

移家定軍山下

移家接村舍，地僻好煙光。藏此新圖籍，仍歸舊草堂。白來蟠冢雨，青入陸渾莊。久住隨風俗，悠悠野興長。

朝天峽

一過朝天峽，巴山斷入秦。大江流漢水，孤艇接殘春。暮色偏悲客，風光易感人。明年在何處，妻子共沾巾。

別友

既來不甚數，去亦無乃輕。吾且行鼓瑟，子何多遠情。山寒滴珠露，屋靜聞松聲。幸有石閭在，四時禽鳥鳴。

贈客

屏跡屠沽內。常懷一飯恩。鐵椎報公子。寶玦贈高人。抗手自茲別。悲歌西入秦。可詢王景略。捫蝨向誰論。

涇縣雜詩

異境絕塵俗。從容到寂寥。市人羣鹿豕。村路出煙霄。溪水胡麻飯。寒齋細藥苗。埜隅聞好鳥。乘興石欄橋。

棧中

棧閣通秦道。青天未易行。盡過奇絕處。不負有平生。白馬巖中出。黃牛壁上畊。野花埋輦跡。幸蜀只空名。

翟村

二客乘秋艇。翩然過古村。不緣喪家久。勝地足銷魂。水族甘魚蟹。山居長子孫。此中忘貴賤。來往翟公門。

夢中作

勞心望春水。春水載孤舟。載此孤舟去。江南江北流。有時取美酒。獨上最高樓。高樓何所見。歷歷是神州。

送姚曼之鹽城

淮南旋舍暫相逢。便放扁舟過海東。未有男兒長袴下。不曾賓客處囊中。萬山月色孤筇路。十載秋思一笛風。別後新詩應滿篋。重來爲我咏飛鴻。

蕪湖

城北淒迷水霧浮。行人懷古自千秋。空餘鐵券殉芳草。不見箜篌止亂流。十里桃花春社酒。一天明月大江樓。久無蕩子思鄉淚。幾度鶯聲起暮愁。

金陵懷古

一聲殘篴旅魂消。柳暗花飛過六朝。甲第雲霞開壯麗。樓船鼓吹擁逍遙。石壇有路生春草。商女無端泣夜潮。極目可憐鍾阜外。長江空鎖水迢迢。

呂太常潛自歸安移家海陵

銅龍宮闕遶山河。臺笠穿雲就薜蘿。天近南徐開霧氣。人從西塞狎煙波。倉荒歲遠成遺老。草木人稀發浩歌。可許相邀尋舊約。江魚村釀共婆娑。

洋縣

春山青後青。春水綠復綠。花開不見人。何處滄浪曲。

古琴

古琴久不理。塵積斷痕斑。爲君彈一曲。明月滿江山。

空宅

春氣生寒月色微。蟠龍繡鳳隱雙扉。主人一去留空宅。花落苔深蝙蝠飛。

識舟亭

漁舸夾岸浪花腥。煙樹霏微草自青。春去何人記蹤跡。故衣重到識舟亭。

飲友人家夜歸

岸幘歸來酒半消。月中頻望短牆遙。畊夫久斷繁華事。猶買春燈照板橋。

紅橋

女壘飛烏趁曉昏。火攻猶見舊燒痕。春遊畫舫都年少。一路蕭聲進水門。



# 明詩紀事卷十五

## 辛籤

杜濬十四首

濬初名詔先字于皇黃岡人崇禎己卯副貢生有變雅堂集。

姜垓質庵集觀于皇詩固極天下之奇而正自寓乃詩家之真弊騷人之逸響。

張明弼盤芝集于皇詩一若幽以深一若壯以麗一若內無所不窺而外無所不際蓋定乎性情而饒乎分力者也。

薛竦諸孟集于皇才若春華鋒可截兕。

池北偶談康熙三年余于杜于黃陳其年輩同在如皋修禊於冒氏水繪閣賦詩或問杜阮亭詩何如答曰酒酣落筆搖五嶽。

詩成嘯傲凌滄州又問君詩何如曰但學高歌有鬼神焉知餓死填溝壑。

漁洋詩話杜茶村僑居金陵貧甚照客廣陵甲辰人日大雪時鎖印無事予造訪之清言竟日乙巳七日余北上京師諸人祖。

于禪智寺即席賦五言茶村有句云記逢人日雪造我吟窮愁謂此也。

靜志居詩話啓禎之間楚風無不效法公安竟陵者于皇獨以杜陵爲宗是亦豪傑之士惜以阨窮老孟貞曜所云好詩多抱。

山也。

陳肇昌秋蓬集往聞之鄧不如茶村有未刻詩三千餘篇雜文一帙在上元張氏祕不示人訪之宜可得將用廣其傳焉。

方苞望溪集于皇少儻席欲赫然著奇節既不得有所試遂一意於詩於並世人獨重宣城沈眉生吳中徐昭法自愧不如。

鄂漢儀詩觀。都是尋常眼前語。經茶邨手。便覺風趣洋溢。其才高。其筆妙也。

黃傳祖扶輪廣集。余詩文密契。首推于皇。武林寓中晤陳郊僧云。于皇邇來爲詩。一歲專事一體。

盧見曾漁洋感舊集。傳茶邨與周櫟園諸名士觀燈。舫於秦淮。櫟園出白金置席上爲采。賭鼓吹詞。茶邨遽起擲之曰。鮑叔知我貧也。就吟席振筆直書。立成長歌一百七十四句。一座爲之傾倒。晚年貧甚。往來淮揚間。客死金陵。陳滄洲鵬年作守。乃葬之於太平門之麓。生平論詩極嚴。於時人多所詆訶。有富於財者。重購其集而焚之。鄉人某搜得其遺篋行世。卽變雅堂集。蓋不及十之二云。

明詩別裁。茶邨長篇頗近頽唐。又聞燈船鼓吹歌。以此得名。其實頽唐之尤者也。五律蒼蒼莽莽。自是大家舉止。考田詩話。杜于皇以勝國遺民。流寓白門。壘芝麓宗伯招飲。演項羽故事。扮虞姬者因楚俗。坐客曰。楚人演楚事。先生楚人。請以一語贈之。提筆書絕句云。年少當場秋思深。座中楚客最知音。八千子弟封侯去。惟有虞兮不負心。語關名教。不得以罵坐少之。

田按。于皇詩。師法杜陵。身際滄桑。與杜陵遭天寶之亂略同。故其音沈痛悲壯。讀之令人酸楚。

嵇康

嵇康人中龍。義不可當世。視彼盜國臣。伎倆如兒戲。吐辭薄湯武。千載有生氣。臨命索琴彈。聊示不屑意。

懷尚白施公

宣城用心苦。達曙嘗不寐。廣業信惟勤。讀書彌益智。鍊格貴清高。造語必精緻。贈我孤松篇。霜雪化爲字。有文繼曾王。曠世一能事。



至清江浦

江浦盤渦異。河流疊浪勻。已知家稍近。漸與寇相親。解劍無完室。彈冠有破巾。幾人相問訊。何日離燕塵。  
歸來

屢怯刀環夢。今知返草堂。吹簫徒倖免。躍馬太踰跟。豈有相如宅。空猜陸賈裝。歸來魂更苦。深悔聽巫陽。  
雨後集含露堂言別論文分得留字

桐柘交陰處。能爲雨後秋。過從含別緒。談笑隔清流。古意淮南葉。他鄉劍外州。十年對知己。今日自言留。  
真栖攜錢過草堂酌我時余自滌陽返真栖自武昌復來

破日秋光好。荒年酒債平。相逢沽一斗。亦足慰殘生。我恨梅花落。君悲漢水清。鄉愁何必話。鐵笛作邊聲。  
清明客瓜渚作

又值清明節。春晴只苦風。鄉關惟我遠。野哭與誰同。亂世紙錢薄。荒江兵馬雄。飄萍多少淚。半落酒杯中。  
焦山

觸處迷人代。茲山尙姓焦。上頭仍棟宇。到眼忽雲霄。樹色南徐近。江聲北岸遙。衣冠留洞壑。不必訪松寥。  
元夕江樓看月

星火夢瓜洲。燈時得勝游。難逢今夕月。復此大江流。碧浸三山影。煙含萬古愁。夜深誰擊楫。吾道在漁舟。

聽軫石琴

江雲飛不盡。流水上空堂。寂歷人誰在。颺颺曲自長。哀猿吟雪嶺。匹馬弔沙場。此意吾能識。憑君鼓數行。

寄胡孝緒太史

野客天邊抱膝窮。卻瞻藜閣憶名公。詩成晉代衣冠後。別在秦淮簫鼓中。想見雪兒歌折柳。莫辭春酒學  
郭筒。劉郎到日應相問。虎氣龍身注草蟲。

蘇子瞻

堂堂復堂堂。子瞻出峨眉。幼讀范滂傳。晚和淵明詩。

漁洋詩話。于皇吟蘇子瞻詩。龔端毅每誦之。以爲二十字說盡坡公一生。

閔君談水東之勝

魚愛深池鳥愛叢。君談句句合幽蹤。憑將骨與青山誓。老號詩人杜水東。

送龔孝升至燕子磯

江干欲別更維舟。沽酒斜陽好滯留。直上燕磯高處望。青山白雪是神州。

董樵十二首

樵字樵。又字亦樵。一名鬻。字喬谷。萊陽人。崇禎諸生。有南遊、岱遊、買遊、入山、偶存、燕山、還山、耦耕

堂等集。

漁洋詩話。董樵江東懷古詩云。春風嗚咽鳴珂地。寒雨淒涼散蠟辰。又春風公瑾墓。細雨呂蒙城。樵有集三四十卷。屬余論定。未及報而樵卒。

靜志居詩話。董生高蹈之士。甲申後。移居文登海濱。日荷蓆入市易米。人莫知其住處。縣有紳士。要於路與言。生棄薪道左。詭云。吾科頭。當取冠與公揖。竟去。日暮不復來。紳士取棄薪以歸。曰。此高士所遺也。生從此不復入市。其詩合騷掩雅。惜不多傳。田按。亦樵詩。華整矜鍊。不類山澤之癯。集久不傳。嘉慶中。其鄉人選刻傳之。惜未備也。

同姜如須宋林寺禪院冬居和如須見贈韻

桑梓豈無念。人情反覆新。逃名知俗累。避世覺僧親。風霽優曇雪。香凝祇樹春。與君塵外意。蕭颯見衣巾。

九日邀宋殿白張省括宋楷林蒲水伊水張芳潔登花石峯小酌

貧苦羈愁日。衰殘多病身。萸囊秋色老。魯酒故交親。薜荔紅依樹。谿山晚照人。勞勞何處是。自覺石泉真。

同王文石表兄夜歸大漳

又渡寒沙路。疏星平野長。貧成萬事拙。人老十年荒。瓢笠多山色。鬢眉半夜霜。行藏難自問。回首意蒼茫。

村莊止宿

始踐尋梅約。今朝載酒過。遠村花氣合。春社鼓聲多。野艇宜鷗鷺。幽人到薜蘿。醉來歡藉草。煙月任高歌。

遊禪覺寺

策杖尋幽徑。轉深禪關。春意問嗁禽。勞人山色偏多怨。留客溪聲似有心。埽石爭題苔斷壁。傾樽直待月穿林。疏狂到處堪存迹。明日重來過北岑。

間步

日向滄州曳短筇。年華隨處任從容。尋常粗糲留佳客。斟酌桑麻問老農。雪霽階除爭鳥雀。月明江海臥魚龍。喜看修竹清如許。莫待三春花事濃。

雨過玄墓

箬笠探幽歷萬峯。冥冥細雨隔山容。谿流迴台看無路。樵牧依稀渡有蹤。荒塚麒麟春草暗。梵王臺殿碧雲濃。洞庭入望青巒杳。煙水蒼茫十二重。

抵越州感懷

江東行殿已荆榛。碧瓦苔深有暮燐。南渡從官矜上第。西清封事主分鄰。春風嗚咽嗚珂地。寒雨淒涼散蠟辰。慚媿鴟夷終霸越。功成甘作布衣人。

禹陵

崔嵬宮闕空山裏。此地曾經會萬邦。遊客帆檣春探筴。寢園風雨夜歸幢。千年貢賦還滄海。三月龍蛇起越江。野老不知疏鑿力。滿庭薜荔上虛窗。

午日湖上

絃管中流越客船。榴花蒲酒自年年。白雲仍向雙峯合。芳草平看萬馬旋。競渡旌旗含落日。江城畫角動晴川。乾坤幾處留漁釣。坐臥石磯夜月圓。

中秋傳定侯使君招飲精舍

微雲籠樹暗。高秋幕府依山曲。幽賓客欣逢河朔飲。笙歌清徹庾公樓。故宮明月荒鷓鴣。海上仙槎望斗牛。卻憶芙蓉寂寞夜。何人尊酒對滄洲。

花山

錦樹瑤花十里濃。香臺石磴白雲封。似無高鳥凌雙翼。更有幽人策短筇。梵閣寒光依絕壁。禪林清夢覺晨鐘。曉來直到蓮峯上。煙鎖珠宮隔幾重。

陶澂十九首

澂字季又字昭萬。寶應布衣。有湖邊草堂。舟車前後集。

四庫總目。季平生足跡半天下。詩多於舟車得之。因名舟車集。其詩多才鋒蹕厲。風發泉湧。不爲邊幅所容。然有警句。亦有率句。有健句。亦有弱句。蓋跌宕有餘。而陶鍊未至者也。

池北偶談。寶應陶澂字季。萊陽蕭樵字樵。二人皆以布衣遊於都下。初不相識。予爲介之曰。二君非但詩筆相當。卽一字字亦絕對也。二君遂賦詩定交。澂所著舟車集。予爲刪定。其客滇南閩中諸詩。多似高峯龍標。今日一作手也。

阮元淮海英靈集。昭萬詩。取法六朝。初盛唐。蒼老邁逸。爲時鉅手。

朱彬白田風雅。括翁詩體源少陵。其當二吏三別詩。蓋生丁末造。目擊明季秕政。感憤而作。故多變徵之聲。

田按。陶季詩筆勢聳拔。有凌紙突兀之觀。明季古詩如此者鮮。可以自成一派。

當新安吏

我生遘末造。天戒猶未央。連延三輔地。十載九旱蝗。害氣致晦蒙。妖星爲機槍。有時雨如血。疵癘見伯彊。中原復凶飢。行者心盡傷。城郭漸蕪塞。弱肉爭豺狼。邊境士易驕。脫巾呼癸庚。絲菅斂且盡。國計何倉黃。守臣繫安危。川決必有防。涓涓不能遏。汜濫日以長。蟻賊關西來。縱橫入畿疆。詔旨下六郡。大義誠激昂。我亦良家子。戴履共一王。聞詔卽自誓。肯復依舊鄉。雄劍久挂壁。拂拭生輝光。持此報恩去。存歿惟沙場。

當垂老別

槍雲起西陲。鬚鬢紛四塞。地缺紫溟漲。天傾百日蝕。中原正格鬪。東南括民力。宰相出筦兵。奔走不得息。江漢恃鎖鑰。矯矯虎而翼。尾大莫敢制。癰潰徒自感。帶甲十萬人。秦越終異域。諸蕃復流虐。淮泗苦畢弋。天子日深居。優詔還示德。側聞京尹令。上奉司馬檄。大募勇健兒。蹶張守隄壁。老夫年半白。鬢髮尙藜黑。沃土棄蓬蒿。諸男委鋒鏑。入爲飢寒併。出爲豺狼逼。不如事征戰。橫行寄胸臆。

飢民謠

高原託羣命。佗離無安居。三日僅一食。誰復計其餘。大府方南來。宣言發倉糈。皇皇感且泣。提挈滿路衢。里正仍作奸。公然雜追呼。終歲重剝肉。不得寬須臾。蒼天聽彌高。吞聲行次且。艱難已盡骨。願乞身爲奴。

### 潦水溢

吾邑兩隄決。百里今無村。巨室渺露積。貧者惟瓦盆。倉皇馮高原。佗離能幾存。老弱僅一息。敢計饗與飧。粒食苦難計。先謀賣雞豚。白日亦晦匿。陰黔徒飛翻。回憶總髮時。吾曾擢此屯。豈意數十載。重見傷心魂。城郭半卑溼。急雨摧蓬門。十屋九沈竈。日仄嗚兒孫。里巷旣窒塞。溝洫多崩奔。東西陷溺甚。破壁連苔痕。吾廬幸未圯。萎盡草木根。誰其披雲霄。陳懇通九關。

### 將進酒

白日獵獵容易過。春風玉顏當奈何。君能忘憂我和歌。重傾迭酬金叵羅。騰鳳脂。擘麟脯。炊珠羹。流玉醪。憂來填膺不能食。何如交權及爾汝。君不聞閉關沈湎稱達生。又不聞大噓狗竇千載名。人生不飲空獨醒。

### 陳州官舍觀定番刀歌

馮生短小氣超絕。遭逢險巖百不折。攜來襍被蕭蕭寒。腰下尙餘三尺鐵。自言生平莽馳騖。購此非關學荆聶。間時摩挲獨快意。不肯尋常向人說。昨宵拊匣爲余發。燦如青虹湛如雪。鞞錯鏤疑鬼工。赤文盤

螭細糾結。虛堂無人。四焜燿。迸出寒泉。照人冽。半生牢落。壯心在。對此不覺耳後熱。明日辭君大梁去。嘯鳥東風。綠楊陌。天涯萍絮。吹復來。當酒何須黯然別。男兒志意在勇決。鷺鳥將秋氣先掣。淬鋒斂鐔。元有宜君不見。古人周防慎明哲。

浮湘

春江北流。日西匿。繫景割波。留不得。道旁赤岸。今爲墟。霸業何人更相憶。昨宵峽雨來自東。巴陵遠樹煙空濛。湘娥染黛幾千歲。朝暮只臨明鏡中。柳生井邊沒芳草。依然昔日相逢道。音沈響逝天茫茫。愁見白波吹浩漾。船旗不定南風旋。寂寞一聲聞杜鵑。

陳思王墓

斜日冒高樹。秋風生細塵。可憐衰草地。猶是建安人。白屋更新主。青山結故鄰。童童雙栝在。風雨各千春。

繁臺同子山

平野秋無際。嚴城曉未開。共君聊註馬。杖策更登臺。抱日孤村出。衝寒一雁來。茫茫自今古。吾意不須哀。

宿滄浦

江郭夜初靜。繫舟空復情。好山無恙在。纖月可憐生。對酒顏先熱。懷人夢不成。荻花風動後。憔悴欲三更。

訪蕭處士汎柳湖歸



南郭散墟煙。人乘放鴨船。一溪清漾影。萬木翠侵天。覓句鶯聲裏。尋春燕子前。何當結鄰住。吟坐草芊芊。

登恆山

恆陽地與塞垣通。山勢紆迴接大同。黑霧不消陰磧雪。翠微時下石壇風。燔柴有制思虞典。持節無人出漢宮。幽渺嶽靈何所寄。巋然碑版綴苔紅。

七夕

誰道神仙任別離。本無憔悴隔年期。人間錦石空相羨。天上河源實未知。烏鵲自還秋樹裏。彩蟾空落夜潮時。雲霄一望皆寥廓。渴鳳鱗魚費所思。

八月一日

八月一日江上歸。石頭城邊橫翠微。雲霞晴色自朝暮。松柏故陵今是非。柳花不見酒應熟。湖水初平魚正肥。年來矰弋未嘗廢。此後只虞鴻雁稀。

北道二首

萬木吟風沙路長。居人茅屋置中央。門前繫馬誰家子。漫坐調鷹送夕陽。

城西芒角動寒星。城北塵沙塞杳冥。莫問十三陵下路。有時山鬼哭冬青。

襄陽謠

真州大舶萬斛強。真州小婦紅粉香。勸郎峭帆莫更急。林中城郭是襄陽。

故宮詞二首

水殿風搖楊柳絲。先皇朝罷獨憂時。抽毫卻寫賢臣頌。面敕中涓賜主兒。自注：故宮人左氏，今爲民間浣衣婦。能言掖庭舊事。云宮中稱曰主兒。

茲甯宮禁老莓苔。元日驚傳法從來。上下隔簾遙拜畢。六龍飛輅一時回。懿安張后居慈甯宮。帝朝后不相見於簾內。答兩拜。

萬壽祺二十二首

壽祺字年少。徐州人。崇禎庚午舉人。自稱壽道人。有隰西草堂集。

胡介河渚集。彭城壽道人數緘詩相勞。每得其寸緘孤詠。輒如采杜若於芳洲。吹玉笛於滄海。使人自遠。

今世說。年少自詩文畫之外。琴棋劍器百工技藝。無不通曉。

無聲詩史。年少古文詩詞。皆雋永秀拔。頗精篆刻。得漢人章法。隨事賦形。不假配搭。絕去柳葉鐵線。急就鋼鋼。諸習。行楷道逸。有鸞鶴停時之概。畫士女作唐裝。楷模周叻。不必黠治。明媚得靜。女幽閒之態。山水林石。隨意點染。夏然出塵。其筆墨甚自矜惜。鼎革之後。儒衣僧帽。往來吳楚間。

靜志居詩話。年少多才多藝。詩亦清逸。無努目掀髯之狀。

田按。年少詩壯麗。有芒碭猛士之風。國變後。尤多激楚之音。如長安一夜陰風慘。萬壽臺前血未乾。二陵殘黍西風急。十郡寒笳北吹哀。山川不改真人氣。涕淚重霑通客衣。人間歌哭悲風起。天外登臨落日斜。青門花鳥芳樽滿。滄海旌旗畫角哀。百年殘戶松杉老。十代官祠日月荒。入門自覺淚瑟瑟。握手空對湖瀾纒。陵戶無人朝上食。閣門懸馬夜鳴笳。南山無恙身將隱。東

溘餘生淚未乾。子山江南之哀。舉羽西臺之哭。不是過也。

讀曲歌

江頭颿婀娜。天風吹四面。歡心似江颿。隨風日日變。

志別

有友有友閉松關。一旦出門游海壑。寶劍三尺走下邳。新詩一卷夢康樂。禿髮露頂擁襤被。舉手定交禮數略。七尺立地自崢嶸。雙睛向人長磊落。一從側身天地間。古往今來事如昨。治亂勞勞何日甯。仕隱紛紛互酬酢。牢落風塵非一人。與君萬里同寥廓。

送友

昔人交道重白日。今人交道重飲食。策杖四海空歸來。蘅茝滿把無人識。今人爭與昔人同。與爾殷勤淡漠中。萬里彷彿如對面。一時努力千秋通。世間碌碌生且死。富貴貧賤亦偶爾。蘇門清嘯轉眼空。君且還家我在此。

秣陵舟讖

北郡長戎馬。東吳小太平。笙簫雲外出。士女鏡中行。水氣肥楊柳。秋風老杜蘅。月城雙槳去。半夜望河明。

行腳

杖益孤蹤去。淒其驛路間。水喧沂北道。風撼穆南關。飛鳥移前浦。歸雲滿故山。五年江上客。今有幾人還。

隰西草堂

老病移淮市。擔簦稱逸民。乾坤悲晚歲。山水憶前身。芳草舟車路。桃花秦漢人。冥冥謝弋者。雁羽在沈淪。

北上

時逢飲馬窟。清濟百年游。盜賊東山閉。關梁西塞愁。陰風吹大澤。白日澹沂州。處處憑高望。春雲滿故邱。

發彭城循河南下

路接長隄窈窕橫。家家風雨釀清明。望窮芳草行人出。開徧桃花春水生。落日山河臨大澤。極天烽火接高城。中原羣盜今方盛。聞道西師已厭兵。

甲申大雪前二日同汪大嘉光包二輔挑鐙永夜

閉戶陰風暮轉廊。藥爐茶碾倚方牀。一年凍雪雲初合。此夕挑鐙夜未央。雁響自沈江渚遠。馬蹏誰蹋野城荒。明朝重放雙眉角。欹帽蹒跚入酒場。

燕子磯

碧鐙重陰長古苔。孤亭日影見層臺。石城對岸千松合。鐵鎖當門一水來。不夜車騶雲外過。臨春香草雨中開。江冥人去蕪城遠。潮打空山歲幾迴。

京口社集

桐花三月覆吾廬。櫻筍年年短犢車。米氏研山收北固。蕭家賓客起南徐。烏嗁芳樹香輪遠。人散春城碧草舒。隔得揚州煙雨外。畫樓簾影夜如何。

贈顧大

新亭殘淚未曾乾。猶見江東顧彥先。襆被自攜彭蠡賦。題詩獨紀義熙年。舊京郎將才方壯。南渡君臣國屢遷。淮海登壇人在否。桑田十畝且高眠。

贈胡大介

河渚經營託隱淪。乾坤草莽一閒身。南陽高臥眞名士。東海餘生舊黨人。十載荃蘅同入夢。三冬冰雪獨傷神。荷鉏歸去田廬閉。莫向人間學問津。

過蘭陵禪寺

秋殿玲瓏秋水明。黃花碧樹寺門平。僧投退院人聲寂。月滿高城仙梵生。鐘磬六時依淨土。榛苓三歲怨周京。爲詢漑釜懷歸者。誰向西方最有情。

再入沛宮

泗亭春盡樹婆娑。漢帝宸遊不再過。魂魄有時還至沛。樓臺落日半臨河。風吹大澤龍蛇近。天入平沙雁

驚多我亦遠隨黃綺出東山重唱采芝歌。

將去夏陽留別諸公

塵世碌碌何所求。湖東高臺時一遊。不需奏免孫長史。更遇鞭撻張徐州。南月娟娟倚峭壁。北風栗栗吹寒邱。出城盜賊滿郡縣。兩耳蹇驢歸去休。

草堂外舊梅一枝放花

賸得南枝疏影橫。草堂谿館獨淒清。百年冰雪身猶在。十日春風花又生。亂後故人猶見汝。定中居士未忘情。紛紛桃李滿城市。坐對空山共月明。

登臺城東望

江梅依舊發紅花。碧宇清江滿積沙。陵戶無人朝上食。閣門懸馬夜鳴笳。兩朝禮樂風流盡。六代衣冠落照斜。暇日臺城一回首。淚痕洗面向東華。

有憶

梧桐清露不勝寒。獨夜無人共倚欄。鴻雁一聲天似水。西風兩地月中看。

登安宜西門

雙淮風雨自西來。一望茫茫盡可哀。記得去年曾過此。安宜秋草沒襪鞋。

題畫

朱藤花發乳鶯飛。草滿前湖人未歸。莫向浦西西畔立。斷腸春色在斜暉。

天山曲

木落天山征雁來。北風吹雪磧門開。舊時賓客蕭關外。更上單于百尺臺。





# 明詩紀事卷十五下

## 辛籤

胡承諾二十六首

承諾字君信。竟陵人。崇禎丙子舉人。有青玉軒、頤志堂、菊佳軒等集。

居易錄。竟陵胡變手寫其父石莊先生讀書說四卷。釋志十九卷。相寄。屬序。其書亦中鑿論衡之流也。石莊博雅工詩。尤長於五言古選。變太學生。亦能詩。有寄余八詩極佳。予編感舊集。取石莊五言頗多。變詩未假新文充祕府。先將詩格入編題。謂此也。

楚風補。君信敦行寡言。望而知爲盛德君子。晚年學益力。著釋志六十一篇。成一家言。卒年七十五。

湖北詩徵傳略。承諾識解超邁。有屹立不移之操。丙子舉於鄉。慨然有舉道易世之意。及計偕入都。見權奸朋結。國事日非。正人君子。與齟齬爲難。將激成禍變。南宮試罷。驅車過大明門。下轅揮淚。隱隱以遠方之臣。長謝京華去矣。及國步之改。人皆瀟瀟求用。承諾深自韜晦。謝客著書以卒。

田按。君信詩有深沈之思。古樸之質。在明人中。可以高挹蘇門。平揖夢澤。五七律音節瀏亮。而自有別趣。

## 肆郎篇

漢家都肆郎。緋衣白羽箭。一發破巨石。馬上橫梨善。至尊亦含笑。詔以軍禮見。羽林百餘人。獨賜上方絹。

載聞羽檄馳。繆荷公卿餞。受賑出都門。衷甲事征繕。連營幾百里。大小數十戰。城邑歸版圖。羌燹朝北面。軍正旣書功。士卒皆乘傳。朝會建禮門。策勳白虎殿。太常銘彝器。光祿開廣宴。晉疏五等爵。俾侯萬家縣。由來寵貴臣。禮絕疏與賤。韓盧不獲免。何以答天眷。

昔遊

少年抱沈疴。志輕人間世。散木誠不材。虛舟誰能繫。見人無拜揖。語默恥啗嚙。時與嵇阮遊。朗然行天際。一與病法辭。所在成詬厲。袞袞迹已濡。濟物理猶戾。狂風振溟海。殺氣浮疵癘。君子據蒺藜。智士困脆脆。大患若倒懸。小患若踈鑿。盡人無相恤。愁歎以卒歲。

覽古二首

功成不易居。自古多危厲。吁嗟蕭相國。依光日月際。起沛贊神謀。誅秦決大計。樹基嚴筦籥。蒐卒補精銳。竭資奉軍實。聚族赴行衛。沈慮辭禍機。極深遠疵戾。一言忤龍準。天威不少霽。太史猶書勳。宗臣已械繫。豁達漢祖心。忠謹鄼候世。有孚如不終。所據皆脆脆。

蒼姬膺寶歷。鸞鸞鳴岐豐。繼體皆恭儉。景命日以融。刑措四十年。至樂與民同。始聞穆天子。荒宴瑤池中。復聞夏庭妖。欵起入深宮。釁成前星隕。寇來宮室空。十五始基命。十四卒喪邦。安得黍離詩。誦彼瞽與矇。惜哉疏爵日。磐石固大宗。五服未雲擾。階闕已內訌。至今西土人。不敢斥王躬。皆云用讒慝。馴致此鞠凶。

慘澹行邑里。悲憤填心胸。既恨號石父。復恨榮夷公。

古意

楊柳託禁煙。嫋娜不自持。零露下百草。晨夕非故姿。飄英依宿壤。槁葉抱前枝。一朝蒙採掇。長與根株辭。質美必榮遇。既榮苦易衰。後此棄置機。卽在握手時。霜雪亦天功。胡令羣芳萎。自是繁華子。歲暮爽所期。清泉映白石。終古不相離。

藥盤吟

石折市里中。鵬集承塵上。達人固知命。是以解惆悵。病軀自弱冠。草木香衣桁。至今七十三。藥盤隨所向。如聞肺腑語。免教醫師誑。極知減俗累。志趣得疏放。譬若馳輕車。轉丸下疊嶂。懼以慎疾心。誤墮貪生障。何日排冥筮。無藥亦無妄。

候鍾居士不至

居士採藥歸。澗底無行迹。幾年避火食。雲氣生兩腋。偶逢負薪侶。寄聲道旁客。孤飛盧耽鶴。迢迢不可卽。

陸文學茶井

茶井覆釜洲。至今淪沒久。專祠表祇園。亂後亦何有。清風動孤磬。湖煙散高柳。

七里沔

名齊嚴子瀨。一展東皋眺。平蕪旣蕭散。水木更清妙。豈無幽棲者。異地亦同調。

俠客行

俠客雄劍色如銀。紫髯碧眼膚龍鱗。銜恩不解道姓字。但逢危難思致身。人生一死何容易。此客以死酬衆志。事雖未成人已驚。身餘一擲情猶愧。搏擊能空九世仇。赤丸夜出貪夫憂。漢家方重褒衣士。此客年少今白頭。

夏日郢中集呂公寅宅

多難星霜改。留歡此日同。注床家釀熟。散髮石林空。片雨夷陵黑。殘霞夢澤紅。瓊枝猶解渴。況復對車公。贈鍾居易

此時鍾居士。他時二隱林。耀惟食松子。間只數家禽。樹葉安禪合。溪雲宴坐深。一燈無障礙。常照妙明心。秋日贈點雪上人

卜居

何處息勞侶。紺園秋氣清。晚風禾黍熟。斜日野禽鳴。樹葉交深坐。藤花照獨行。逍遙雖有注。至此已忘名。宵城夏水北。新市泌山東。窈窕羣流會。參差衆壑同。耕田隨楚老。蕩槳學巴童。於此逃名姓。吾甯黃綺翁。

送王山長還湘潭

湘水孤帆轉。衡山深淺看。聽歌來遠棹。弄影狎危灘。照日青林緝。颺風極浦寬。撫心渺徑寸。送子越層瀾。  
吳旣閑移家相近喜而贈之

之子來何晚。山中木落時。清談連夢寐。月色在階墀。江草吾將刈。舊遊君莫思。寒宵兩客鳥。共對一霜枝。  
老人歎

馮唐非皓首。顏駟豈龐眉。老有徐來日。窮無送去時。遊絲牽落絮。候鳥匿深枝。病骨年年換。侑跗自我爲。  
自浮梁赴饒州

百里餘千積翠來。晴江水煖暗生苔。晚援初起船纜繫。春鳥能言花盡開。洞口澆泉留客賞。雲邊買酒喚  
僮迴。曲中暴謔嫌餘俗。一夜微停畫角哀。

贈寒碧上人

往事曾隨鮑照遊。碧雲高唱滿吳洲。煙埋宿草縈香閣。葉下繩床倚石樓。種智自能觀小劫。客塵爲我洗  
寒流。東林欲別還凝望。斷燒平蕪不勝秋。

曉起

布穀五更嘯至曉。披衣行到野人家。昨宵殘霧猶沾草。何處輕風更落花。初夏懶梳頭上髮。舊疴知禁卯  
時茶。開門自怪身將老。不類兒童臥日斜。

入村

常多旱潦世方艱。不測輿圖有觸蠻。烏鵲春葦巢未補。風雷晝晦雨猶慳。客談朝事閒停杖。門掩僧房學閉關。三十年前曾此地。深衣綦屨出林間。

雜興

飯稻觀花足此生。心光內照息無聲。駐顏莫被丹砂誤。搔背難逢指爪輕。坐近匡床時假寐。閒吟翠嶂任徐行。何須更住雲泉側。滌盡塵昏氣自清。

澄湖

西鄰有歸客。落葉滿黃昏。歧路無相識。殘陽送到門。

送人還山

桂子松花盡擬擔。掉頭捉鼻定難兼。酒泉南嶂宜堅臥。莫羨徵書到宋纖。

湘陰阻風

西上喜聞欵乃曲。南遊畏見磨崖碑。湘流解送欲歸客。何事天風卻到吹。

與謝階生夜別湖上

家住微茫認水雲。漁歌中斷卻相聞。扁舟漸近空村月。望盡湖煙不見君。

# 明詩紀事卷十六

## 辛籤

徐枋六首

枋字昭法吳人少詹事沂子崇禎壬午舉人有居易堂集二十卷

葉雙已畦集侯齋先生以名貴公子才名甚盛早歲擢科名處之闒然絕驕矜去鄙吝鼎革時考文靖公死之先生誓從死文靖曰我死君不可不死也爾死親使爾有子又將爲親死則子孫遞死無噍類有是乎手揮先生曰去先生號泣殮公畢徒跣以避裹足荒山中以死志未遂形存而志等於死生平戚友俱絕操作勤苦非力不食歲祲寒一女三歲衣不完致寒疾十年不瘥兒年十二飢不得食病不得藥以死先生歎曰人情孰不愛兒女喪行以殉兒女不敢以彼易此川湖大帥蔡聞先生名不敢以金餽致以名藥值千金因馮生羽以道意謝不受巡撫睢陽湯公重先生屏徒從微服至門則先生已避之秦餘山湯公喟然曰賢者不可測如是徘徊久之而去時時事筆墨以餽口善屬文書畫尤稱絕有購得片紙者以爲寶例不書款年七十三卒先生一身繫名教者五十年志以風而伸身以晦而榮以視碌碌降且辱者其相去何如矣

王峻良齋集侯齋迹不出初居鄧尉山中後隱靈巖之上沙土舍數椽讀書其中布衣草履終身不入城市常糞盪自給雖藜藿不繼而莫能強以一錢之餽時以侯齋與宣城沈壽民嘉興葉鳴盛爲海內三遺民侯齋山水宗董巨閻法倪黃當其得意自謂前無古人

田按侯齋高節全謝山謂以湯文正之賢欲致一絲一粟且不可得惟南嶽大師儲公獨飲之食之其死也戴南枝賣字吳門

以葬之。可稱千古韻事。余見侯齋湖上草堂圖。墨筆山水草屋數間。後有遺像。附遺囑一紙云。一寡媳孤孫。不可移居蕩口。山居不便。入城可也。一自身後一應家事。無論巨細。俱要仰重楊先生經理。悉聽主裁。自然盡善。吾生平知之深而信之篤。謂在我可託孤寄命者兩人。一爲易亭。一爲次畊。今次畊在遠。不及面囑。然小孫將來。自叨卯翼。奚俟面囑哉。至拙集遺文。前已與次畊面言。不必更贅矣。書畢灑然。甲戌年九月二十日。已刻。秦餘山人侯齋遺囑。付寡媳華氏收執。臨危之筆。考易亭名先哲。維斗先生子。草堂圖前後二十餘頁。有王蘭泉。潘三松。伊墨卿。阮雲臺。孫淵如。梁山舟。洪北江。袁子才諸人題跋。此冊於光緒丁酉入廠肆。爲一豪家購去。庚子之亂。豪家遭兵火。想已同爲灰燼。余錄侯齋詩。附詳其事於此。

懷人詩九首錄三

靈巖和尙與余敦人外之契有年矣。余嘗東一友云。靈巖爲海內所宗仰。諸方耆宿。謂此唐。宋以來諸大善知識中之所少也。至其篤好人物。別具至心。望之如渴。視之如傷。余則以爲此唐。宋以來諸大善知識中之所絕無也。

靈峰絕天表。孤雲傍琴臺。傳燈曉長夜。法界森昭回。當茲象教晦。一出溟濛開。慈心接羣品。物色來塵埃。野人荷深鑒。千載同襟懷。視之猶如傷。茫然令我哀。仰首睇翠微。幾時陟崔巍。但聞塔鈴語。惻惻從風來。遠人遠遊之人也。死生契闊。數年不一面。嘗夢見之而不能一言。若存若亡。邈如隔世。亦竟不能舉其名字矣。遂以遠人稱之。可悲也已。

嗚呼魯仲連。屈強不帝秦。區區蹈東海。大意終能伸。胡然天帝醉。金符被強羸。眇焉匹夫節。而與天帝爭。



十年遍天涯。四海誰情親。一心貴有託。豈敢輕死生。故人在畎畝。攬涕爲屏營。念子不成寐。落月空照庭。願言入我夢。夢見遙吞聲。

髯叟南明方夏氏也。爲人長者。重然諾。亂後與余定交。周旋緩急。時刻不爽。嘗索余畫冊。爲余代償斤金焉。

甬里有髯叟。幽棲稱隱君。生平在然諾。緩急嘗殷勤。千金重心期。一言比蘭薰。余年踰弱冠。賓從常如雲。結交多老蒼。不如髯超羣。俯仰十六年。所志高秋雯。索余一豪素。價抵雙南金。斯人未易期。薄俗徒紛紜。戊申春二月送筇在道兄越遊二首

瓢笠容君老。江山未定居。行吟過越嶠。作賦愛吾廬。筇在爲余作澗上草堂賦故及之。澗上鶯花寂。天涯雁侶疏。君行吾悵望。且復寄雙魚。

花雨淹遊屐。樵風送客舟。江山猶故國。耆舊盡荒邱。一往滄洲遠。千春杜宇愁。此行非避地。乘興獨相求。重過治平寺次先中丞公韻

一葉蒼茫泛五湖。登臨勝境屬浮圖。青山白社人空老。古寺閒房興不孤。極目林巒隨杖屐。會心煙水映菰蒲。千秋手澤重瞻對。丈室居然冠我吳。

沈壽民四首

壽民字眉生，宣城人，縣學生，舉賢良方正，有剩菴詩稿。

黃宗羲南雷文定有明之輔臣以奪情見劾者三人曰李賢、張居正、楊嗣昌。然劾賢之羅一峯、劾居正之趙吳艾、沈鄒，皆有祿位於朝，唯劾嗣昌之沈耕巖，則諸生也。賢與居正皆天下無事之日，所失不過一身。嗣昌當危急存亡之秋，所關乃在社稷，耕巖之言，拯溺救焚，懸記後來，不爽累黍，又非一峯諸公所言，僅在一時者也。

靜志居詩話：崇禎丙子，詔舉賢良方正，巡撫應天都御史張公國維以宣城沈徵君壽民應詔。既入都，適宣大總督楊嗣昌督情起兵部尚書，徵君抗疏劾之。其略云：嗣昌居喪起復，業一年矣，君命莫可委，即應躬歷戎行，滅寇朝食，奈何安坐司馬之堂，支吾朝夕，以一十二萬方張之師，二百八十餘萬成集之餉，顧不及鋒而用，鼓行以前，使餉日以虧，師或解體，因循釀禍。嗣昌斯時雖屈首服丁汝璣之刑，束身死王治之獄，竟何益哉？又疏云：嗣昌既不能躬履行間，曲徇熊文燦之說，兩人專欲主撫，奉天子之聲靈，以邀賊一紙之認帖，即撫局果成，而辱國損威，已不可贖，而況其未必也。流寇之禍，蔓延七省，肆毒十餘年矣，屠戮之慘，振古未聞，甚乃悖逆滔天，擅驚陵寢，凡為臣子，疇弗痛心。嗣昌統一十二萬之師，不為不武，運二百八十餘萬之餉，不為不充，整旅以往，何凶弗摧，俾賊力極勢窮，面縛與櫬，猶應宣布皇威，律以無赦，而後昭上恩德以宥之。夫如是而撫可成也。今者漫無翦治，頓事姑容，招之不來，強而後可，毋乃既墮勦之功，而復乖撫之術乎？雖復遠寬三歲之限，更累數年之民，正恐邊賊無期，主憂彌切，臣不知所終矣。通政使張紹先以其言危切，借字數溢，類沮勿封進。徵君復彙括兩疏之綱領上之，疏入，留中不報，乃投劾歸。漳海黃公道周歎曰：此何等事，在朝者不言，而草野言之，真希元在朝一月而封事三十六上，吾豈可遠愧希元。近慙沈子，隨拜疏爭之，由是臺諫則何公楮、錢公增、林公闈友、成公勇、詞臣則劉公同升、趙公士春、次第俱上，南兵部尚書范公景文復率南九卿具公疏，思陵震怒，削范公籍，解成公赴訊，餘俱鑄謫，無得免者。諸公之廷諍，實徵君倡之。阮大鍼既得志，將出緹騎，逮徵君，乃變姓名，搆家匿金華山中，久之，還故里，終老不出。學者私謚曰貞文先生。

明語林。徵君足迹不入城市。垂四十年。當事委曲納交。罕得見面。有別駕迹其在僧刹。潛追躡及之。退語人曰。今年晤沈耕岩。前年捫黃山天都峯。都忘人世。二者吾任甯國大快事。亦生平大快事。

田按。明末吳中二張。與江上二沈相配。二張謂天如。受先。二沈謂崑銅。耕岩不以名位相甲乙也。入國朝。深陽旣相。將特疏薦耕岩。耑使寓書。耕岩不開封。對使焚書。深陽意猶未已。耕岩寄書曰。嬰勝。謝枋得其智。非不若舉羽。所南也。而卒以隕厥。驅者緣多此物色。故耳。凡今之欲薦僕者。直欲死僕者也。深陽曰。先生所謂名可得而聞。身不可得見者也。耕岩詩有云。丈夫忍饑耿介死。不學鷓鴣鳴啾啾。又云。但全松柏性。霜雪亦深恩。可以見其志矣。其卒也。黃黎洲銘其墓曰。吳門之卒。卽攻王氏之人。西臺之哭。卽劾似道之臣。嗚呼耕岩。千載同論。

### 覽古二首

擔簦復何事。迺事邯鄲遊。一見賜雙璧。再見卿與侯。甯知萬戶重。不敵魏齊頭。徒步走大梁。慷慨如有求。惜哉謀不成。義至復何尤。虞卿雖著書。所傳非春秋。漢帝馳六區。舞陽亦附驥。欽彼鼓刀人。密識洞且異。豁達稱沛公。一朝見小利。忠言在咸陽。痛哭奏忘事。子房雖籌策。斂手佐末議。孰以一夫勇。而有千里智。

### 溪漲

霜雪不出地。風雷亦行天。如何一夜溪。生此聲與顏。幽幽太古山。閱奇須臾間。

### 桃源

明詩紀事 辛籤 卷十六

聞說雲人去，青溪幾樹紅。人聲雞犬外，古法衣裳中。漢姓何年異，秦威此路窮。春桃不耐寂，浪使野航通。

巢鳴盛一首

鳴盛字端明，嘉興人。崇禎丙子舉人，有永思草堂集。

擢李詩繫。鳴盛嘉興石佛里人，爲人外和內嚴，舉步不踰尺度，舉於鄉，益自刻勵，敝衣草履，如平時。人重其名，爭致之。鳴盛皆謝去。順治乙酉，隨一蒼頭渡錢塘，寓野寺中，以觀時事。見江東拒守失律，遂乘漁舟，由他道還家。塞側搆數椽，閉戶不出。鄰里罕見其面。隔溪築一小閣，屋外植短籬，環栽橙橘百本，親荷鋤種菜以自給。妻錢氏，篝燈紡績，泊如也。二三友人相造，必具雞黍，但不及人間一字。其持論，勉忠孝，敦廉恥，期於中庸而已。

題匏杯

回也資瓢飲，悠然見古風。剖心香自發，刮垢力須攻。不識金銀氣，何知陶冶工。尼邱疏水意，樂亦在其中。

靜志居詩話：孝廉肥遯深林，絕迹城市。時羣盜四起，鏤鐵銀鑲之器，無得留者。於是遠屋種匏，小大凡十餘種，長如鶴頸，纖若蜂腰。杯杓之外，室中所需器皿，莫非匏者。遠邇爭效之。擣李匏樽，不蹜而走海內。孝廉作長歌詠焉。茲讀五言一律，剖心刮垢，蓋自喻也。

李世熊十六首

世熊字元仲，甯化人。萬歷諸生。入國朝，祝髮號寒支。有寒支初集十卷、二集四卷。

魏禮季子集：國甯化泉上里，有文行奇偉士曰李君元仲，爲人負奇氣，植大節，更危險，死生弗渝，篤交友之義，敢任難事。其才力足相副，生平喜讀異書，雖千里必多方購借之。年八十餘，讀書至夜分始休。六經諸子百家之言，靡不貫究，而發諸其古今。

之文都盛名於海內者六十餘年。當國變，自號寒支道人，徵書累下，固謝卻之。守令監司鎮將至其門者，罕能一識面。而隆武監國時，用薦徵拜翰林博士。君曰：不可爲也。竟不就。蓋君以大節定力自持，而審機事故，動靜不失其正也。

黎士弘託素齋集。先生文奇偉悽麗，長於推測，恒變層見疊出。雖百家無不窺，少獨好韓非、屈原、韓愈之書，故其造就，咸有根柢。

藍鼎元鹿洲集。余聞先生少時嘗單車走泉州，出安海，潛觀鄭芝龍，其意念深矣。使先生早年得志，癸未甲申間，必有可觀者。一腔熱血，付之清冷之鄉。悲夫！文章如韓，心事如屈，志節之清高，管幼安伯仲矣。

靜志居詩話。元仲詩，鏗鏘見長，澄澗不足。

田按。元仲詩，淒婉如謝皋羽，藻麗似杜牧之。沈摯又似黃雙井。陳後山去其薰染時習者，元仲之眞面出矣。

### 淮陰侯

爭同橫死五百，獨祠越頭一臣。嗟爾淮陰三族，徒聞跖犬狺狺。雉烹走狗，母哺王孫。生死恩讎兩婦人。

### 和陶飲酒

避焚於水涘，避溺於山隅。此計未必然，憂患實多途。前爲榮貴引，後有貧賤驅。所以達者心，止足不願餘。仲蔚今何歸，吾欲從之居。

### 鷓鴣行

鷓鴣眼最明，羣行啄秋水。得鮮滿腹不敢殮，吐向漁人何萋萋。官家今日戒私取，爾若爲吏當稱旨。江流

歲歲網如茶。何處著汝雙眸子。

冬舟

霜吹徐徐來。沿舟入蘋蓼。好山迢遞青。一鏡照飛鳥。白鳥差池穿野菱。天寒水落陰棱棱。澹雲到地無纖影。紅樹圍村知幾層。

雪朝限韻

世豔刪須淨。地文相自難。洗心同止水。刮目待青山。太始澹無畛。化城蕩不關。霏霏玄唾靜。聽眺杳茫間。

七里瀨

浦激昂藏石。負舟柄鑿鳴。一篙移十武。列岫轉孤清。雪凜雕鷲影。村深猿狖聲。半規千嶂紫。夕滃水雲平。馮爾弢先生令揭陽時侍姬墓在金山同林用始過而追輓之

返魂無計覓名香。泉路人間總斷腸。夜月珠歸迷合浦。春風花落惱河陽。玉釵影化難留燕。瑤瑟聲淒泣斷風。去住因緣俱莫問。空花看換眼前光。

睡霧岩

峯峯峯色一岩收。朝煙暮煙雲夾浮。山鳥彈聲空翠落。松風激響秋濤流。江寒半落鶻鷗水。土淨平分鷺子洲。坐對斜陽翮絕壁。只如乘氣汎神舟。

讀修氏幽憤錄因弔熊之岡

天壤由來力不支。黨人杳杳快恩私。襄平一網連江夏。修爲熊所  
竊用者臺省批根假北司。辨諱豈能伸李賀。主

讀劉佐明拜傅相公空墳詩

九土何分室與塋。到頭埋骨不埋名。世間儘有長生訣。拔宅仙人只舍生。

聞南曲四首

紅豆秋枝靚可憐。坐中驚見李龜年。江南風景今全別。不似乾元與上元。  
哽亂哀音不可聞。持杯灑痛想汪雲。於今獨對幽花泣。眼底曾無十八人。  
宮商離亂怨涼州。落葉吹蓬颯似秋。未是曼聲過逆旅。如何坐上淚長流。  
願曲曾依舊令狐。棲遲零落事屠沽。中朝供奉紛如許。肯撲檀槽話座無。

秋海棠

繫臂紅絲縷。縷長珊瑚枝。挂紫銀璫。羅衣新試花陰立。驚見霓裳舞袖香。

石泉菴

焰心渾欲煮冰華。乞與玄漿漱慧牙。石髓一泓流汗漫。仙人平等施千家。

方授二首

授字子留桐城人諸生有三奔浙江草浙游四集奉川草

田間集子留嘗和子美諸將詩悲憤激恠爲雲間夏緩公所賞甲申後祝髮扁舟東下望見鍾山孝陵痛哭失聲所至賦詩悽愴聞者泣下

居易錄子留甲申後焚棄筆硯逃之四明山中結茅採椽間爲吟詠流傳人間時謂真隱

桐城方氏詩輯子留國變後飄泊江湖間自號園道人既祝髮從浪杖人遊或歌或泣流離悵鬱以死年才二十有七

贈蕭尺木居士

眼枯未忍望鍾陵。早見鍾山梅下僧。四海有情空入畫。千秋何事欲傳燈。敢當倒屣憐貧病。聊與科頭數廢興。我夢不離靈谷樹。欲隨君住白雲層。

喜得戴大書

分手秦淮四月間。三年風雨別離顏。夢魂不去南朝寺。書札初通東海關。我尙未能知死所。君從何處得生還。開函總是長相憶。珍重龍眠大小山。

王錫闌一首

錫闌字寅旭一字昭冥吳江人有曉菴詩文集

靜志居詩話寅旭爲人耿介拔俗詩亦不沿時習



杭世駿道古堂集。曉菴性狷介。不與俗諧。著古衣冠。獨來獨往。用篆體作楷書。人多不能識。凡象數聲律之學。殫精研窮。必得其肯綮而後已。尤邃於歷學。兼通中西之術。自立新法。用以測日月食。不爽杪忽。中壽沒。且無子。潘耒從其家求遺書。得詩文二帙。著述數種。有曰大統西歷啟蒙。曰丁未歷稿。曰推步交朔。曰測日小記。曰三辰略志。曰圖解。而歷法六卷最爲完善。又有歷說。歷策。左右旋問答。答萬充宗。徐圃臣諸書。言歷事者。精核可傳。梅氏嘗評近代歷學。以吳江爲最。識解在青州以上。丁子復見堂文鈔。曉閣蘊性耿介。以志節自勵。乙酉以後。忍飢杜門。歷二十餘年如一日。所與游皆一時遺老。桐鄉張楊園先生履詳。崑山顧石戶先生奕武。交最篤。石戶云。學究天人。確乎不拔。我不如王寅旭。其傾倒至矣。予嘗讀先生詩。有云。我固冰雪心。炎燦不能灰。又云。蟬抱高枝鳴。噤死聲不哀。釋其志意。皜皜乎與寒冰比潔可也。

### 過湘蟬業師村居看牡丹

柳塘三里近。步履幾回過。爲道名花放。春光去已多。

### 李成憲一首

成憲一名正。字正甫。番禺人。諸生。國變後爲僧。字雪牀。

廣東新語。零丁山人。番禺諸生。丙戌城破。其父及於兵難。山人乃髡首。名今日僧。遷居零丁之山。遇衰至。放聲曼歌。歌文文山正氣之篇。歌已而哭。哭復歌。四顧無人。輒欲投身大洋以死。既又自念。吾布衣之士耳。與其死於父。何如生於君。死於父則無子。斯死父矣。生於君則有臣。其尙可以致吾之命。而遂吾之志也乎。於是棄僧服而返。性好獨坐。酒酣慷慨爲詩。有曰。身當病後哀歌短。家自亡來骨肉輕。又曰。多病一身堪久客。故園兄弟尙重圍。又曰。夜夜哀魂同夢父。年年孤影稱兄兒。又曰。當天落日愁無影。到地悲風壯有聲。皆悲酸慘絕。如猿吟鶴唳。不堪入耳。久之。竟鬱鬱以死。

獨漉堂集。零丁山人既痛家國之禍。東身孤旅。寄食於漁者。遇哀至。則拊心零丁之上。澆酒四顧。放聲曼歌。所爲詩。多刻厲悽惋之音。

寶安清明

江邊芳草自清明。久客思歸計不成。邱隴十年無孝子。兵戈萬死有孤臣。身當病後哀歌短。家自亡來骨肉輕。未論故園豺虎窟。窮途魍魅尙縱橫。

黃澂之五首

澂之。初名師正。字帥先。改名後。字靜宜。又字波民。建陽人。

陳庚煥惕園初稿。王貽上嘗傳澂之小桃源山居一詩。小桃源爲武夷最勝處。詳其詩語。澂之蓋嘗以黃冠歸故鄉。其後出遊大江南北。康熙丁未。郡人葉矯然遇之京口僧寮。三伏中。爲矯然揮汗賦五律於便面。意氣不少衰。後二十年。矯然主延令。放生菴。見其壁間詩。詢主僧云。化去五年。窮老無子。歿於維揚。同人釀金以殮。矯然求其全稿不得。錄所見詩以歸。其詩妍麗中正。復冲遠。有王孟風致。

全閩詩傳。靜宜爲史公可法幕府上客。才如王景略。節如謝皋羽。詩筆妍麗。不類其爲人。

小桃源山居五首

柄斨方知入世非。幽尋勝迹豈全違。琴清夜月留僧宿。酒熟春山待客歸。自製竹皮籠短髮。新裁荷葉理初衣。平生羞乞人間米。橡實寒泉可療饑。

買山端爲好藏書。較勘丹鉛慰索居。未醉亦言卿可去。相過先問客何如。紅疏藥逕尋詩處。香漬蒲汀洗硯餘。不欲種松知歲月。年光自分老蟲魚。  
停雲零雨感天涯。臥看仙源萬樹花。鄰舍飯香炊薏苡。野人羹美摘芹芽。傳書每倩司扉鶴。押字能驚沸沼蛙。栽菊藝桑吾事了。石田空種故侯瓜。  
新蟬響壑樹先秋。煙梵沈沈靜夜流。自覺據梧方喪我。何須攬茝要盟鷗。移山愛著愚公號。逐日兼無夸父愁。聞道仙人多玩世。竹間舒嘯有高樓。  
嵐光霞氣繞青林。投榻松根抱膝吟。飲澗野麝歸洞晚。隔花嘯鳥語煙深。交多谿友邀論釣。社結山家約會琴。爲愛躬耕從避世。遙遙沮溺是同心。

李確六首

確。初名天植。字因仲。更名後。改字潛夫。平湖人。崇禎癸酉舉人。有蜃園山游諸集。

橋李詩繫。因仲甲申後。遷迹龍湫山。稱龍湫山人。數十年不入城市。一子早喪。家奇貧。門無三尺童。厨無爨婢。惟白頭婦相對。閒織棕鞋。秋冬際。俟天日僧至。償其值易去。又劈竹爲器。鬻於人。往來海涯九峯。頽然窮老。後復耳聾。與人相接。無一言。久或相視而泣。長吏守帥聞其名。訪之。踰垣避去。山中糧絕。或給以酒米。非其人。雖饑勿受也。每歲必賦。三月十九日詩。悲涼感憤。讀者哀之。又和梅花百詠。多以自况。其詩清真雋逸。得元白之致。

鮎埼亭集。乍浦之以科名起者。自蜃園先生始。三上公車。癸未。其子諸生觀卒。自以爲有隱匿。痛自刻責。絕意仕進。改名確。字

潛夫彭仲謀作先生傳以爲國難後改名者非也。既游遭喪亂，髮其髮別其妻入陳山。訓山中童子以自給，其自畧曰：村學究，老頭陀，居山十年，陳山之僧開堂先生避喧，始返其寮園。寮園者，乍浦勝地，可以望見海市者也。又十年，先生益困，不能保其鬮，寄食於僧寺。戚友憐之，相與贖園而歸之。二老相對，時時絕食。歎曰：吾本爲長往之謀，顧蠟屐未能，乘桴又未能。至於今日，悔之無及，待死而已。魏凝叔自江西來，造其廬，相對而泣，臨別以銀五錢贈之。五反不受。凝叔固請曰：此非盜跖物也，乃納之。凝叔因屬曹侍郎倦圃，糾同志復爲繼粟之舉，且謀其身後。徐昭法聞之曰：李先生不食人食，聽其餓死可矣。俄而使至，先生果堅拒不受。凝叔歎曰：吾淺之乎爲丈夫也。先生竟以餓死。

田按：潛夫結鞋賣簞，不受人食，真有逸民風節。所當列之一代惇史者也。詩亦音節抗朗。

聽楊太常彈琴詩有序

西川楊懷玉名正經，西陽宣慰使善音律。崇禎年間，召定郊廟樂章，賜琴一張，換文階，特晉太常。甲申後，髡爲僧，遊寓於淮，張子爾嘗居時彈琴其中，相得甚歡。豫章王子于一嘗聽其西方操，作五言十律，余爲賦七言長句。

秦箏與趙瑟，傾耳多繁音。惟有蜀國弦，能傳獨客心。關西老禪楊業後，自言先帝蒙恩厚。家世兜銜一武弁，援兵山海馳驅久。時提長劍復邊城，時撫孤桐理性情。丹心一寸憑誰訴，碧月三更愴自鳴。何期薄技承聰眷，天子明光初召見。祇憂疆事東西爭，那識角音風氣變。都護銜新換太常，瑤琴傳旨賜師襄。可憐倉猝流氛惡，一夜烽煙入建章。旄頭星明帝星落，天王聖明不可作。故國無家泣旅魂，天涯乞食嗟行腳。

淮海飄零值故知。南州高士今何之。空堂今夕復何夕。爲君感激彈朱絲。朱絲有情君不語。朱絲無聲君不去。西方凝望天沈沈。美人縹緲無尋處。

阮葵生茶餘客話。張虞山七夕琴歌序云。楊太常名正。經西陽宣慰司人。初官總戎。時大祀郊廟。樂章失次。宗伯林欲梅薦正。經審音律。改中書。樂成。晉太常。賜漢琴。唐琴各一。亂後。流寓淮海。自製二操。一曰西方思。一曰風木悲。爲作長歌。按正經。字體王家世爲將。少有別解。通樂律。懷帝召至別殿。令彈琴。稱善。國變後。抱琴逃止故土。主陳碧涵家。時李予變爲淮安推官。正經往見。爲李上客。李爲買宅。又爲其子納婦於淮。年七十餘而卒。葬城東黃土橋。與碧涵祖墓鄰近。陳氏每墓祭。必置酒澆太常墓。淮人集中。多聽太常彈琴詩。平湖李因仲天植詩云。淮海飄零值故知。南州高士今何之。謂碧涵也。

### 清明日長安旅懷

節物傷羈思。歸程計夢中。柳搖深禁綠。花發故園紅。鄰火分銀燭。街塵暗玉聰。上林春已老。爲我謝東風。

### 自金家灣出抵桃花灣而歸

地險金家口。臨危欲杖藜。熬波無剩土。東有公冶塢。俱煮海。栽稻有青畦。海味珍沙虎。此地沙最厚。故多此。山禽賤野雞。秋鳥最貴。

### 冒雨尋菊戲簡知己

冒雨相尋憶駱丞。茲遊不獨古人能。芝蘭祇許來三徑。裘馬遙知謝五陵。紫蟹肥時君莫惜。青山晴日我還登。誰將老圃圖秋色。添箇看花白髮僧。

觀濤閣酌萬定遠

海浦潮平一鏡空。石欄尊酒此時同。秋生故邑蕭條處。人在新亭涕淚中。山鳥隔林嘯晚日。江豚狎浪拜西風。聞名欲訪滄洲客。好向鼇磯問釣翁。

賦傷鄭嬰垣凍死有序

老友嬰垣年八十一。無妻無子兼無食。性高傲物不肯于人。真介守者凍死雪中。殊深悲悼。賦此唁之。

貧居傲性不干人。楚楚衣冠迴絕塵。昨夜雪中騎螭去。白雲堆裏一遺民。

李雲龍八首

雲龍字煙客。番禺人。諸生。後祝髮爲僧。有嘯樓集。

廣東詩粹鄧玄度云。煙客詩閒適恬愉。

田按。煙客五言律得唐人意境。可與區海日繼武。

秋日有懷

促織嘯寒月。柴門終夕閒。晨興坐高館。木落見前山。北雁已又至。故人殊未還。芙蓉尙可采。涉水爲君攀。

訪朱季美環谷莊居

尋君谷口路。杖策入孤村。逕轉方知處。山開忽到門。陰崖蒼樹合。幽磴野花繁。向夕涼風起。高齋聞夜猿。

送張山人歸始安兼寄汪伯耳

二月春江深。送君歸故林。綠波與碧草。一倍傷離心。故人在象郡。欲往隔湘陰。相見煩相問。多愁年鬢侵。

寄陳來獻

東風門巷寂。楊柳數枝斜。一夜聞寒雨。開簾見落花。感時念離索。之子臥煙霞。願託青松樹。山中閱歲華。

茅堂

茅堂占西嶺。門對亂峯開。時有巖花落。香從樵徑來。松陰宜散帙。山月每當杯。十載風塵客。勞勞夢乍回。

春江泛舟同韓孟郁賦

柳色漾春流。黃鸝上釣舟。偶來浮海興。因作采芳遊。楊葉藏孤島。桃花夾小洲。歌聲聽不盡。多在水邊樓。

韓孟郁招同黃宮諭劉憲副高太守梁韓二明府暨蘇梁諸公遊浮邱步寅仲韻

仙山在人境。出郭愜幽尋。花雨散瑤席。松雲結暮陰。勝情欣有託。酒政虐能禁。借問三青鳥。何時有報音。

送方士招還漳州

津亭橫笛促歸槎。一片蒲帆帶暮霞。江上疏鐘生遠寺。天邊寒樹接平沙。蒹葭雁下人初別。楊柳鶯啼客到家。聞道清漳煙水闊。相思何處寄梅花。

談遷七首

遷初名以訓字孺木一字觀若海甯人有棗林集

靜志居詩話南都議上景皇帝號曰代宗一時以爲當仲木獨以爲非有答友人問景皇帝廟號詩云成周作謚法大小行乃節公且暨師望肇制自聖賢相古后皇涉南郊必稱天易名典克慎敘法宜精專漢後避帝諱臨文率拘攣唐以代易世宋以真易玄其文雖或殊其義則一焉景皇帝承大業卽祚凡七年多難固邦國文武要略全屢遣奉迎使事兄禮問愆及乎裕陵反黃離位南偏初非因堯城奪門言何調梁瑤策始建張懋册用宣廟號猶未備何以垂簡編禮臣失不學代乃居世先相越僅五世文義詎可沿謚說十五家秉禮恐不然益庭以爲是橫議臣談遷

杭郡詩輯孺木性孝友而廉不妄取一介藐山張公磴哉高公素交也金陵擁立之際高入相張爲冢宰孺木以布衣遊二公間頗爲引重高公力薦於朝孺木固辭不就迨二公相繼野死孺木抱遺民之恫拜思陵哭故人開關跋涉死於平陽司理解中吁可悲已平生深於史學嘗集十五朝實錄並訪崇禎十七年邸報成國權一書卽皇明日錄也里中盜起稿失去沈思強索復閱羣書詢訪故老墨枯筆秃飢不及餐日得十二紙爲率書成約數百卷

田按孺木博綜舊典詩亦長於詠古多哀豔之音

題徐道力壁上墨梅

猶龍蜿蜒幾千尺下挾風雷噴四壁天公激怒醒長夢左耳割入華陽洞怨血流腥涌墨雲枯鱗脫盡三  
江凍蒼髻筆筆皴莓苔寒冰畫裂橫飛來長風萬里吹不落羌笛關山易蕭索

臨平



宿雲棲嶺上。往往有松峇。疊嶂樵初到。空香梵乍聽。魚苗太湖白。桑種睦州青。欲問前朝事。輕橈此暫停。  
過魏忠賢葬處

口敕曾聞敵至尊。九重日月竟黃昏。北邙張趙無歸路。西市斯高有瘞魂。國社遂傾悲大廈。軍容翻使誑重關。一杯臭骨何堪記。頌德空勞義子孫。

舟中雜詠

九河故道改東流。此地嘗貽漢帝憂。碣石舊思崇伯子。代田今少富民侯。天津月落嗁鶻夜。瀚海風橫戰馬秋。寄慨目前非一事。先須鑿石爲沈牛。

渡江

長江駭浪限東南。當日降帆有舊慙。擊楫空聞多慷慨。投戈畢竟爲沈酣。龍天浩劫餘孤塔。海嶽書生別舊菴。聞道佛狸曾駐馬。豈因佳味有黃柑。

廣陵懷古

南朝舊事一蕪城。故國飄零百感生。柳影天涯隨去輦。楊花江上變浮萍。遠山依舊橫新黛。斷岸還看散冷螢。今日廣陵思往事。十年前亦號承平。

邊詞

白龍堆上草千秋。元菟城南雨亂流。少婦不知邊塞苦。時時飛夢到涼州。

文祖堯一首

祖堯字心傳。呈貢人。貢生。除名山訓導。遷太倉州學正。私謚貞道先生。有明陽山房詩稿。

滇南詩略介石初任名山訓導。刊進修日程。以古道訓士。士習爲之不變。改太倉學正。刊儒學日程。頒諸生。俾日記善過。月朔考其進退。躬行以率之。一時咸謂安定復生。國變後。棄官從中峯蒼雪師遊。僑寓曩陽菴。服僧服。以青烏術自給。婁人無賢愚貴賤。愈益敬愛。周以粟帛。吳浙獨行君子。爭相延致。歲會講學。後還鄉。競爲詩歌送行。繪像作傳。以誌思慕。既聞道卒。因就其所居室爲位以哭。顏曰思賢廬以祀之。私謚貞道先生。

田按。陸道威。陳確菴。東南大儒。其於介石。心悅誠服。則介石之品可知矣。道威贈介石講易詩云。舉世悲胥溺。中流幸有師。發蒙分復。安節處明夷。盛德古無敵。太和今在茲。春風周茂叔。觀面莫相疑。確菴奉留介石詩云。園橋相圃久蕪萊。祭酒家從南詔來。青杖夜迎劉向入。絳紗晨侍馬融開。諸生忠孝扶天地。都講詩書起俊才。忽報降幡馳牛渚。西風一夕捲堂哀。長江鐵鎖竟何爲。中夜旁皇泣素絲。晝日筆隨降表進。草玄人恐獻文遲。武陵洞口桃花笑。朱雀橋邊燕子知。獨有孤忠老博士。焚冠和淚寫新詩。

清浪灘聞杜字時有還家之想

怪石磷磷與浪平。扁舟搖蕩怯前行。歸心正與灘俱急。況是重聞杜字聲。

周歧三首

歧字農父桐城人貢生以辟舉開封推官有執宜集

李雯舒章集農父爲人溫厚直諫居前使人軒居後使人衽其學長於經術邃於兵農博於緯數周於人物其爲詩根柢乎漢魏條穎乎六代茂成乎初盛唐

靜志居詩話農父始入京師卽上書宰相言時政得失馮公鄴仙薦參宣大軍隨授開封推官參陳元倩軍復以按倉事銜參史公道隣軍識者比之陳琳阮瑀其詩雄奮亞於方密之錢幼光

潘江龍眠風雅農父國變後歸築土室吟臥其中足不履城市以終

### 嫠女吟答陳百史

蟾魄既西蝕烏羽亦東藏。烈烈驚風吹壁冷。燈無光中有獨居女。唧唧聞悲傷。問女何所悲。不字稱未亡。豈悲衾與裯。切恐人無良。有客何方來。將書委筐箱。開緘讀素書。姊妹舊成行。上慰顏色好。下言夫婿當。疊書筐箱中。卻拜歸空房。孤鸞戀枯澤。彼鳳自有凰。感君纏綿意。還君明月璫。寄謝諸姊妹。勉事新姑嫜。

田按深陽旣相將特疏薦巖穴之士寓書將意沈耕巖對使焚書深陽意猶未已耕巖以死誓乃免農父嫠女吟亦答深陽卻聘書也竹垞詩話謂農父參楊龍友軍死于浙右此係孫武公事誤屬之農父當以潘蜀藻築土室足不履城市以終之論爲確

### 方仁植中丞還里

欲反離騷問汨羅。至今聲咽洞庭波。雲中舊牧堅言戰。丞相神機只講和。狂客悲來三策廢。仙人舟去五

湖多歸思豈爲鱸魚膾。滿耳秋潭漁父歌。

桐舊集中丞撫楚勦賊屢戰剋捷而督師重臣乃以私自誤讓國當時草茅之見朗若列眉而朝臣乃見不及何也。

弔故相國史道鄰先生

舉目河山勢已更。當年百戰此危城。恨留一矢浮圖著。臂刺孤忠血迹明。擲杖長憐夸父沒。揮戈難起魯陽生。相看惟有庭前柏。猶宿棲烏向我鳴。

魏禮七首

禮字和公甯都人有魏季子詩文集十六卷。

錢林文獻徵存錄和公詩若高竹露初下寒花香未分孤雲秋正池雙雁遠相隨落魄遠行客風煙何處村煙月虛遙夜溪山帶早秋與唐人近伯子叔子不能及也。

吳德旋聞見錄和公築室翠微峯最高處名曰吾廬冰叔爲作吾廬記稱和公渡海時颶風發舟中人眩怖不敢起和公獨起視海中月作乘月渡海歌兵變闔門而坐作海南道中詩三十首其膽略過人如此。

田按甯都三魏長善伯次叔子季和公善伯任俠好義當世隱君子暨族戚倚以爲安危者三十餘年叔子蒙於文以議論傾動海內和公稍晚出師事叔子其文尤奇闢警動而終歸於正大嘗有答人書云天下去樸久矣樸者人之本萬物之根世道治亂之源也夫惟樸去至於盡而小人盜賊弒逆烝報殺戮之禍害相尋矣故世之治也必先反樸而其亂必先之以浮靡巧詐言行乖戾以醴醖殺機天地莫可如何遂聽人之所爲日月星辰易其度山崩川竭震坼貿亂之變成兵戈疾疫水旱之災其勢有所不得已蓋不如是則不足以芟除廓清其氣運使天下之人困慮無聊巧詐莫能發財竭力盡浮靡無由作於是疆

漚渾渾。太古復出。猶秋冬凋殺。木葉盡脫。元氣悉反於根莖。而春始萌矣。爲文喜昌黎。東坡。不喜曾南豐。嘗著論曰。子固屏絕百家。其爲文雖祖劉向。而所以自處者。嘗比董仲舒。然禮以爲非。真有得於六經之學者也。嘗讀子固王深甫論揚雄書。紕繆乖離。莫甚於此。子貢曰。君子一言以爲知。一言以爲不知。公羊高以祭仲逐君爲行權。吾以爲必無得於春秋。子固以揚雄合箕子之明夷。王安石以雄之仕合孔子無可無不可之義。吾以爲必無得於六經。邱濬以秦檜於宋有再造功。岳武穆雖見委用。終不能克金以全宋。吾以爲必無得於大學。而董仲舒漢之大儒。於祭仲亦附會其師說。此與子固之好雄書而強飾其過者相似。人著書立論。以傳後世。其論議間有出於此。則生平文章。盡可投之水火。而不足惜。陳義甚高。可以震動一時之耳目。生平喜遊。於閩交李元仲。於粵交陳元孝。二人傾倒甚至。詩格好奇。余少錄其平易者。

### 上灘謠

左洋洋。右澎澎。前立虎。後立狼。上麻羊。下麻羊。

灘名。

### 贈淮安張天中

君子受譽如受毀。豪傑報恩如報仇。丈夫磊落不得意。吹燈夜起看吳鉤。淮陰市上當日午。茶亭酒肆喧歌舞。不見當時惡少年。何論千金酬漂母。天中意氣成春雲。于我相逢異地親。樓上鐘聲對曉色。門前荒草共黃昏。輕舟自過燕齊水。長河濁浪勢千里。秦梁不去空南來。敝衣短髮見吾子。

### 嘉禾道上

征途嚴夙駕。起坐聽雞鳴。細雨望中合。諸峯雲裏生。炊煙村斷續。春草路縱橫。苦旱今方稼。紛紛又說兵。

海淀李氏舊園

但剩頽垣在。猶聞繞徑香。藕花知舊恨。菱葉滿橫塘。石落洞門閉。畦寬雲水長。紛紛歌舞日。種得此淒涼。

燕邸偶作

遠望當歸去。還登何處樓。連陰只似夢。見月始多愁。饑鳥寒仍出。浮雲暮欲收。看看燈火夜。門掩一庭秋。

舍舟行洞口岸

野草野花江上村。家家犁耜水田勻。鷓鴣飛處橋頭路。螻螻聲中客子身。新夢日多憑薄篔。故人春思在衡門。此間可有胡麻飯。未許桃源更避秦。

潭口尋仙人蹟

我非許道士。乘興亦能來。但領秋光去。石門何必開。

林時益二首

時益甯藩裔孫。原名議。字用霖。授奉國中尉。國變後。變姓名。字確齋。

魏禧叔子集。中尉友南昌彭士望。九江破。兩人挈妻子。走建昌。士望三至甯都。見甯都魏禧。立談定交。遂同中尉往依焉。與諸子結廬金精之翠微峯。講易讀史。士望嘗遊四方。中尉以病多家居。並督二家事。既日貧。中尉曰。不力耕不得食也。率妻子徒冠石種茶。親鋤畚。手爬糞土。以力作。夜則課子弟讀通鑑學詩。間射獵除田豕。有自外過冠石者。見圃間三四少年。頭著一幅布。赤腳揮鋤。朗朗然歌出金石聲。皆竊歎以爲古圖畫。不是過也。中尉酒後。亦往往悲歌慷慨。見精悍之色。近十餘年。益隱畏。

務摧剛爲柔。儉樸退讓。使終身無所求。取於人。無怨惡於世。雖子弟行以橫。非相干者。勿與較也。晚又好禪。嘗素食持經咒。尤嚴殺生戒。見者以爲老農老僧。不復識爲誰何之人。中尉更姓林。字確齋。所製茶高妙。遠近名曰林茶。工二王草法。詩於杜爲別出。人或推服之。

### 白甯都城陟峴

迢遞出城郭。霜煙聞暮鐘。人行古細路。屋在此高峯。煑粥呼寒女。歌詩對小童。不須疑物外。已有白雲封。

### 下橋

侵晨懷刺出西關。每到長橋意自閒。兩岸人家齊種樹。一溪流水曲依山。下船舂米先冬辦。船上設輪與

置船急流處。白以陡堰水。衝輪杵米。傍屋犁田入夜還。直欲此間成小築。憂時復恐徙家難。

### 徐夜十首

夜初名元善。字長公。改名後。字東癡。一字嵇菴。濟南新城人。諸生。有東癡詩選。

池北偶談。東癡年二十九。棄諸生。隱居東皋。鄭黃河上。掘門土室。絕迹城市。有朱桃椎。杜子春之風。

漁洋詩話。徐東癡。余叔祖季木公外孫。與余兄弟爲外從兄弟。詩學陶。章屺刻處似孟東野。余目之爲礪松露鶴。

田按。東癡詩。清真絕俗。時有獨造之語。非隱處巖穴者不能道也。

### 初夏田園

朱夏輒復變。深綠日以肥。感彼生物勤。節候曾不違。清晨荷鋤出。田間人尙稀。觀物適自然。時見朝雉飛。

不惜筋力疲。但恐坐食非。作勞有時息。高春行來歸。端坐撫素琴。可以理朝饑。

東村

麥登蠶已盡。時斧伐我桑。條後盛枝葉。次年柯不昌。農家節嗇意。不使樹力傷。姑息成晚茂。誅絕先秋涼。今歲既已矣。來歲豈不霜。新絲甫下杼。可以爲衣裳。非無適體衣。於心終有常。

季夏西山

結屋此山間。柿陰濃晝暑。雲從巖際來。向我窗中佇。北上最高峯。下瞰臨何許。愛彼南澗松。去濯清冷渚。時來石上坐。月下聞樵語。風雨澗香過。石田響禾黍。

清濤閣看夜雪題季亮壁

君家清濤閣。邊好雪後陵。臨更幽。官林村欲近。峰欲遙。掩映清光殊了了。一幅倪家冷淡皴。深寒古穆如其人。忽然忘卻。是筆墨巖邊。特欲置儂身。蒼茫一抹。竟何辨。高巢老鶴。作人嘆。閣東簾影。燈火儂。茶香坐煖。無隆冬。就君情話。夢君榻。懷抱溪山千萬重。

侍家叔夜坐試茶

月吐東峯隙。蛩鳴山悄然。鳥棲雙樹影。僧定一龕禪。鐘靜聞空籟。茶香汲夜泉。坐深衣露冷。不寐抱秋天。

秋晚途中



一徑入蟲響。層陰天暮寒。迴風吹短策。落葉下長干。雁與關山盡。秋隨禾黍殘。人家籬下菊。忘作故園看。  
崇川雨泊

身與孤舟暮。帆檣落市聲。遠潮經岸失。鄰火過窗明。風雨橫江夜。烽煙近海城。故鄉千里外。回首憶歸耕。  
富春山中弔謝皋羽

晞髮吟成未了身。可憐無地著斯人。生爲信國流離客。死結嚴陵寂寞鄰。疑向西臺猶慟哭。思當南宋合酸辛。我來憑弔荒山曲。朱鳥魂歸若有神。

九日登吳山絕頂

漂泊江城漫賦哀。更逢搖落此登臺。南中節候看人過。北地秋風少雁來。雨勢遠從天目入。潮聲高擁海門開。黃花白酒傷心日。不獨他鄉送客杯。

高陽道中

潦餘波水淨漂禾。慘澹郊容感慨多。地近酒鄉須痛飲。時方秋氣祇悲歌。夕陽遠樹迷三鎮。古道驚風散九河。不見荒城屠狗客。荒城野墅獨來過。

夏古丹三首

古丹本姓胡名涵。國變後析姓爲名。改姓夏。有葫蘆藏稿。

靜志居詩話。古丹與吾鄉吳縣吳可黃。項上舍子毗結契。是亦湖海之士。詩如春風明日動。柳色上吳船。晴雲一束山腰白。秋色無多樹杪紅。非下里音也。

鄭元慶湖錄。古丹避地吾邑之埭山。有張庭賓者。不知何許人。與古丹遊處。古丹有詩輒錄之。山齋懸一葫蘆。紙盈幅。即投其中。古丹沒。葫蘆適滿。爰繕寫成帙。系以輓詩五章。題曰葫蘆藏稿。然古丹之詩。不盡此也。韓子夏廣爲搜求。錄一大冊。顏曰古丹詩稿。

吳興詩存。古丹本姓胡。名涵。字天木。越中望族。生長燕山。繼遷白門。丙戌丁亥間。析姓爲字。遨游溟渤。錚錚以豪傑自負。其詩顧芊綿婉麗。不似其爲人。嘗往來吳興。隸山。乙卯冬。卒於茅茨之下。山中友人胡山眉葬之隸南龍興橋畔。昔人作詩入九命。一曰無終。古丹者擬諸唐人。亦駱賓王。周朴之流歟。

立春首一日夜泊橫塘同休菴夜話

久矣厭城市。橫塘今夜眠。霜風吹敝屣。星火照殘年。爲客艱難盡。同僧去住便。春風明日作。柳色上吳船。

獅子崖訪石巢上人

縹緲空中寺。高寒物外僧。去天方一握。浮世隔千層。飛鳥相知否。孤雲到未曾。我來妨屐齒。終日步峻嶒。

春歎

燕子歸來門巷差。於今王謝已無家。東城甲第空流水。南國衣冠半落花。白髮亂中春雪老。青山醉後夕陽斜。自騎款段和風裏。不羨長安白鼻騮。

薊過庭二首

過庭。本姓計。改稱薊。字尊聞。歸安人。

吳興詩存。尊聞父賈於江南。稱素封。僑寓虞山。及尊聞長。揮千金購書。與至輒吟詠。咄咄自喜。喜擊劍。好結客。客有罹禍者。傾資拯救。有俠士風。性堅僻。視妻子如路人。學禪於苕西葛隴。結廬栽梅竹。蒔藥草。有終焉之致。偶與遠鄰小不協。即棄去。暮年飄泊貧病。卒於苕。友人陳蘭碩殯之。

田按。過庭改姓喜事。迹頗矜奇。時有佳作。如遊雪竇。題秀巖。但不可多得耳。

### 遊雪竇

野策過眉笠覆肩。軍持腰繫踏巖前。碓舂田舍成村落。犬吠林泉識洞天。荒磴夕陽催屐上。欹松明月到頭圓。好將題字鐫新竹。記取名山信宿緣。

### 題秀巖

絕壁粘菴沁骨冷。平臨七十二峯青。巖頭花落輕於雪。湖面船浮小似星。忽地放歌驚谷鳥。從天得句笑山靈。不須更覓安心法。到此都教百慮甯。

### 張蓋九首

蓋字覆輿。一字命士。永年人。有張子詩選。

曝書亭集。永年有隱君子曰張蓋。能詩文。丁草書。亂後謝去學官。弟子悲吟侘傺。過成狂疾。嘗遊齊晉。楚豫間。歸自閉土室中。引酒獨酌。醉輒痛哭。雖妻子不得見。惟同里申滄光。雞澤殷岳。至則延入土室。談甚洽。其爲詩。哀憤過情。恒自毀其稿。或作狂

草累百過。至不可辨識。乃已久之。狂益甚。竟死。其五言詩。高簡方詣古人。

居易錄。廣平張覆。輿贈申。鳧鳴一絕云。草澤賢豪盡上書。奎章閣外卽公車。我同漁父因衰老。獨有漁光是隱居。

田按。覆輿五古。神似杜陵。其情景亦宛肖。

寄贈李十三郎君

主人十三齡。天駒見龍脊。絕塵瀟灑態。能解留人客。予時至平干。復著遊山屐。足繭澀登途。盜賊況充斥。踟躕數里間。落日藏光赤。投宿上君堂。張燈照昏夕。蹇驢足芻菱。老病須燔炙。奴僕亦殷勤。自來埽床席。酌酒須玉瓶。傾光泛琥珀。感情欲痛飲。所恨胸腸窄。恭聞爾先人。遺汝登朝舄。汝兄善草聖。海內稱名碩。汝才駕徐陵。準擬文章伯。予有兩男兒。雞鶩空毛翮。大兒倍汝年。弧矢未能拾。小兒少汝年。祇備樵蘇役。何以汝聰明。日夜親圖籍。老夫若汝年。走馬垂楊陌。有時叢臺下。醉舞揮金戟。中歲好彈琴。素琴橫白石。旁植一枝松。今已高千尺。忽忽鬢髮蒼。自顧無良策。何處可容身。避地來山澤。結交無老少。遭時有順逆。長嘯望停雲。題詩謝疇昔。

昭明臺呈襄陽諸公

楚郡蟠江腹。危樓逼太清。窗通高鳥過。檻俯白雲生。帝子留文字。羣公列治平。我來戎馬際。登眺獨含情。

兔嶺卽雲外。羊祠楚甸中。鄉心堪夜雨。旅病苦秋風。湖橘垂丹實。江蕉卷綠叢。幽姿不可見。倚樹獨書空。

盧工部說楚中山水

說峽山垂座。談湖水在襟。幾時能到眼。此物最關心。戰伐周流阻。窮愁老病侵。酒中聞勝事。感動一長吟。

渡沁水宿穆陵關

斜陽明晚渡。倦馬踏寒雲。岸動移舟影。沙喧落雁羣。山城秋似畫。水市暮多聞。老客歸心急。無眠到夜分。

谿村卽事

羃歷樹中行。潺湲石瀨清。野花開間色。秋鳥落寒聲。家住愚公谷。書傳老伏生。鄰人自來往。日見不知名。

喜郭楚玉至

五載一相見。乾坤幾變更。亂離驚汝在。衰病惜人情。齒髮前朝貌。丹青後世名。談詩悲喜外。好雨向簷傾。

夜泊樊城

竹樹楓林旅舍情。無邊星月照江城。雲帆夜宿漁燈小。山閣風傳戍鼓鳴。鴻雁不來鄉信斷。兵戈欲動客心驚。明朝白髮含霜露。辛苦黃塵道上行。

漫作

玉盤漬墨可二斗。高麗繭紙冰蠶紋。醉來揮灑興不盡。欲上青天寫白雲。

韓畱六首

畱字經正大輿人有天樵子集。

池北偶談石耕亂後遊江南徧歷台宕諸勝客死平湖善鼓琴尤工五言詩有句云春愁當二月酒渴起三更。

靜志居詩話石耕善琴所操北音耽作妮妮兒女之語終身不娶游覽江湖以終今之牧犢子也五律清穩頗足名家

田按石耕詩善於寫景不爲詞費而意境自遠

送友人之晉州

策馬不辭勞。看君氣自豪。秋風雷澤迴。寒色太行高。黃葉當關路。清霜脛布袍。遙知初到郡。應解醉葡萄。

雨中送春

綠草疏籬映水濱。清溪寂寂四無鄰。一簾細雨仍飛燕。幾日殘花又送春。多病翻愁今夜酒。傷心如別故鄉人。明年客迹知何在。早向天涯慰苦辛。

九日登雞鳴山

聞道東籬菊已黃。無因移向酒尊旁。西風忽起野煙暮。落葉亂飛山樹蒼。雁帶寒聲歸渚急。江涵秋水與天長。浮雲遮盡登高眼。不許愁人望故鄉。

山家卽事

山家就宿看山月。松際清光半未升。涼色漸生花徑露。微風欲滅草堂燈。壁鄰荒寺疏鐘斷。簷壓春星夜氣澄。亦願幽棲來此地。柴門相望幾時能。

舟行

川長靜無風。擊楫逐前侶。落日煙水昏。舟人暗相語。

早發

斜月下煙村。孤舟乘晚發。臥聽往來船。橈聲自鳴軋。

周蓼卹二首

蓼卹字真栖。大冶人。

楚風補蓼卹號苦蟲。大冶遺民。與王子一。杜于皇遊。其詩多見卓子任遺民集。

秦淮竹枝辭二首

輕盈繡扇去來風。香氣霏微落照紅。莫道巫山多少路。美人只隔一簾中。  
南絃北管不同鄉。今日吹彈共一場。若問清溪波上影。梨園還是昔時裝。

彭士望十一首

士望字躬庵。南昌人。徙甯都。弘光隆武時。授兵部司務。再授湖西道。改湖東。事敗。潛身草野以沒。

有恥躬堂集四十卷

盧宜二續表忠記。清江楊廷麟死於章貢。長子璠先卒。次子璠七歲。義僕楊學負奔門人彭銳家。甯都破。璠掠於兵。門人彭士望傾貲贖歸臨江。生二子。羣卒。二子亦殤。清江遂無嗣。士望。南昌名士。具古道者。

魏禧叔子集。翠微峯距甯都城四十里。四面削起百十餘丈。自山根至絕頂。若斧劈然。上古以來。無或登而居者。歲甲申。子采山隱。鑿磴架閣道於山之中。幹辟平地作屋。其後諸子講易。蓋所謂易堂者也。遠近之賢者。南昌彭躬庵。句容林確齋。貴池方山子先後附焉。山東南隅構草堂。阻石爲池。蓮華滿其中。曰勺庭。余獨居之。環屋種桃花。躬庵詩曰。雲中蓮葉秋池豔。玉半桃花春井香。謂此也。

陸麟書胥瓶山館文存。躬庵父督。聞漳浦黃道周平臺。召對語。歎曰。鐵漢也。臨卒。語躬庵當師之。適道周觸思宗怒。繫詔獄。躬庵傾身營護之。甲申變聞。閣臣史可法督師揚州。招躬庵。至則進奇策。請用高。左兵清君側之惡。可法駭曰。君年少氣銳。果爾得爲純乎。辭歸。挈妻子至甯都。依魏禧居翠微峯巖。與禧兄弟講學於此。所謂易堂諸子者也。時江西講學者。易堂外。在星子者曰髻山。南豐曰程山。躬庵皆與往復。大抵以陽明念庵之說爲宗。而歸於有用。實可試諸行事。嘗謂天下學者之病。在於虛經義。氣節曠達。文章延而至於理學。經濟皆虛病也。生平嗜朋友。海內宿望。結納殆遍。夕聞一十。迫不待旦。至於老不衰。田按。躬菴論學戒虛。用世取權。蓋非拘於一方者。集中冬心詩數十首。愷切沈痛。皆中當時之癥結。徒以時局大壞。雖豪傑有志之士。拮据赴難。無裨毫末。齋志以沒悲夫。

木莊同林確齋魏凝叔遲邱邦士

田家獨楓樹。霜丹映寒石。微徑出其中。白日罕人迹。維子林子俱。沿溪翫澄碧。溪上有精廬。晴峯何歷歷。



破碎斧劈文。根齒淨搜滌。花木難指數。松梧最高鬱。梅得數株好。老榦竟踰十。喬木見村村。隨意自疏密。十年戎馬生。不復問城邑。近郊獨留此。遂與幽人室。于此遲邱生。庶幾一來卽。

冬心

人才天地心。長養萬物命。學術蠱壞之。好惡失其正。舉世愛一同。幻出千蹊徑。標榜各是非。傾危互機穽。遂令天失權。假人發眞病。盜賊九廟墟。將相三木鑿。方隅九萬里。雞犬不能靜。到今無悔慚。耿耿勢彌盛。天亦且奈何。蓄怨不遑定。

秦俗棄詩書。宋朝繁議論。明廷謹資格。以此俱不振。宋人稱堯舜。文具樂寬巽。明人非科目。孔孟不能進。秦人盜賊心。農兵令嚴信。明肯雜秦治。到今足無釁。救世必偏枯。不得驟平順。如藥藥病人。瞑眩方和潤。亦如歷歲差。待後重整頓。嗟哉廟堂客。目不經行陣。空以文字筆。遙遙敵鋒刃。潰敗不可彌。千秋抱長恨。古今用盜賊。獨推銅馬帝。祖述與宗澤。岳家有名字。八日平湖南。俱用賊爲餌。少壯籍爲兵。峻令嚴節制。不似張韓軍。殺掠多縱肆。逃以徒手行。過淮鍛軍器。用賊蹙河南。石勒亦斂避。澤誅趙世隆。隆弟帶刀侍。隆衆露刃立。徐語反流涕。王善七十萬。呼遣同圈斃。此必有中權。不徒感忠義。奈何後來人。倉卒輕嘗試。孱老稱家翁。健婦益抗恣。徒使家門空。盡殺羣僕婢。澤豈師武臣。元祐名進士。

古今撫盜賊。當問源與流。漢制選守令。意乃重懷柔。其時風尙醇。解劍卽買牛。建武十六年。屯結連四州。

許盜自相擣。不罪吏逗留。但取獲賊多。報最居上優。賊解徒其魁。受稟賦田疇。自是戶不閉。牛馬放不收。唐有高仁厚。立破阡能謀。用一嚮麪人。遂令全賊休。六日五寨平。未始加虔劉。元則董侍選。守地嚴干振。誅其囊橐奸。賊出爭自投。賊平黜賊吏。畀火除根蠹。民賊一元氣。變化良有由。苟且終撫局。疽食正堪憂。漢滅于賈詡。亦滅皇甫嵩。賈詡自救死。甘爲郭李庸。韓盧獵漢祚。曹氏收其功。嵩挾震主威。不敢聽閭忠。并不誅宦官。自謂臣節恭。又不誅董卓。鄙言亦不從。于身則養虎。于國則養癰。其人實淹博。苦被書牢籠。丈夫決大策。雷電發其蹤。呼吸成敗分。豈得姑含容。利苟在君國。惡名甯在躬。我恨張守珪。其事將無同。

乙未夏五惶恐灘作

惶恐灘聲五月寒。舟程出石報平安。英雄此路老俱盡。天地到今愁未寬。白日下照水流疾。蒼松高鬱雲孤盤。江村漸急求湘鼓。野客初聞涕獨酸。

題三峴彭中叔青壁堂

青壁靚面幾千尺。細看雲煙生石根。須教日腳冬回谷。獨許泉聲夜到門。客子過談雜醒醉。主人冥坐隨朝昏。芙蓉翠竹秋窗冷。愁絕中原萬里村。

雨漲

春雨連江漲百川。蛟龍夜起未安眠。平欺綠草全吞岸。不讓青山直到天。衝溼盡逢騎馬客。乘流時有釣

魚船。吾生徒倚將何適。空對芳洲獨樹前。

自冠石谷口過西橋涉溪並行至水莊古木平疇山川曠秀慨然有詩

奇石錯立低復昂。出谷入谷雲茫茫。左折西橋渡溪水。回看諸嶺生煙光。平疇野靄含千樹。急湍迴波縈一壙。獨此愛山自朝暮。百年與世爲冰霜。

同祝仲立瀟湘泛月

十載江湖秋夢多。月明誰共話煙波。憂來只與青山近。老去其如白髮多。芳草同舟公子思。落花空谷美人歌。紛紛木葉辭前渚。獨有西風戀黍禾。

戴笠二首

笠初名鼎立。字則之。更名後。改字耘野。又字曼公。吳江人。諸生。

靜志居詩話。曼公谷隱。嚴耕不入城府。句如愁邊細雨孤舟遠。夢裏青山故國春。夜雨聲中流水急。東風陌上野花開。眠鳥夢裏誰家地。嘯鳩聲中故國秋。大有孤山處士遺韻。

玉峰南郊遇臞庵法兄寄妙喜雲和上

遜浦當時別。思今二十年。同誰吟笠澤。獨自望琴川。煙水情空切。雲山句已傳。爲逢徐孺在。半偈寄峰前。

同臞庵次耕問津宿永甯次臞庵韻

逢僧南郭外。殊似舊相親。冒雨過婁水。歸舟溼角巾。喜安居士榻。吟共故鄉人。自是雲深處。何須更問津。

朱士稚二首

士稚字伯虎。更字朗詣。紹興山陰人。門人私謚貞毅先生。有集。

朱彝尊曝書亭集。朗詣所最善者一人。曰張生宗觀。宗觀字朗屋。善樂府歌詩。以王伯之略自許。時號山陰二朗。

靜志居詩話。山陰二朗。具郭景純倚上之才。仗劉越石清剛之氣。令假以年。直可凌顏鑠謝。陳臥子云。越國山川出霸才。二子咸以管樂自命。誦朗詣讀史詩云。英雄窮賤盡無常。天下侯王自有時。慨當以慷。不啻擊缺壺口也。

雞鳴歌

晨雞膠膠天當曙。風吹四野行客去。日落霜深鷺馬鳴。巖城遠角解秋戍。曉寒蒼茫宿雁悲。殘星明滅低欲垂。

寄童師遠

搖落輕遠道。慊慊登南岡。西風日以厲。寒雁橫天翔。浮雲難自託。單絲不易長。大輅載秋薺。黃金委道傍。齊門奏妙瑟。芝蘭行履霜。反覆不得歡。陟岵思故鄉。征人顧短晷。人命如夕陽。何爲須臾間。困苦以悲傷。

# 明詩紀事卷十七

## 辛籤

姜琛七首

琛字如農萊陽人崇禎辛未進士除密雲知縣改儀真入爲禮部主事遷禮科給事以言事廷杖削籍戍宣城同人私謚貞毅先生有敬亭集十一卷

四庫總目琛詩才本清剛氣尤激壯故詩文皆直抒胸臆自能落落不凡然縱筆所如不暇鍛鍊故粗獷之語亦時錯雜其間

靜志居詩話廷杖與東西廠錦衣衛鎮撫司用刑之酷前代未有自王振亂政鞭撻朝士大臣有枷項者迨成化中王直用事廷杖塞省臣王濬李俊等五十六人正德間以諫南巡杖舒芬黃鞏等百三十人死者十一人嘉靖初以爭大禮哭左順門杖豐熙等百三十四人死者十七人此其最甚者矣萬歷六年論首輔張居正奪情杖趙用賢沈思孝鄒元標等五人後定陵頗厭建言諸臣疏多留中廷杖寢不用至天啟四年太監王體乾奉勅大審復開其端重笞戚臣李承恩以悅魏忠賢於是主事萬燦御史吳裕中相繼斃杖下而許顯純田爾耕輩煩刑以馳備極慘毒楊左諸君子之禍有不忍言者矣思陵卽祚雪消見暎用獄稍平不意嘉魚熊公暨萊陽姜公論列柄臣時日輻輳逆鱗旣觸天怒莫回拷之慘洵九死而一生者蓋自柄臣自裁而兩公之荷戈終未見釋姜公臨歿語其子安節實節曰敬亭吾戍所也戍者吾君所命吾未聞後命而君亡吾猶罪人也死必埋吾戍所乃葬宣城公晚歲始爲詩風格一本杜陵其自序云記哀鳴於異鳥感音節於候蟲可謂善於喻物者矣

田按。明初開國。作法於涼。太祖成祖。淫刑以騁。戮功臣。則波及文士。屠節士。則蔓及十族。子孫肖之。廷杖之刑。若專爲忠直敢言之士而設。一代之弊法也。思陵初政。非無可觀。乃不久而信用僉壬。摧折正士。如黃公道周。解公學龍。姜公琛。熊公開元。皆不免廷杖。雞驚翔舞。鳳凰在笄。悲夫。

搖落用杜韻

旅食頻頻改。朱雲冉冉流。弱齡辭海岱。老眼送江舟。袖內三年字。山中五月裘。飄零吾已厭。何得更高秋。

宣州有感

南國遷流日。西京喪亂年。山城睥睨處。水樹隱明邊。花墅陳梁在。詩名謝李傳。祇今成浩劫。未覺盡前賢。

薄遊

淮南霜落雁初飛。河上菱花菰米肥。少壯幾時人已老。簡書猶在客安歸。十年往事傷銅馬。四海相知盡布衣。荷芰秋風隨意去。江邊莫厭舊漁磯。

東歸省墓留別吳門親友

身世繇來歎轉蓬。汀洲况復滿秋風。百年作客鬚眉老。千里還家道路窮。北海松楸瞻望裏。東吳兒女亂離中。笛亭相送尋常事。此別還須努力同。

寓宣州作

野浦飛花接石關。百年心事北樓間。乘舟弄月歌仍哭。破帽單衫往復還。莫向此生愁白髮。好爲吾骨買青山。石金戴表皆名碩。弔古臨風淚欲斑。

讀胡天仿集因憶過淮有失尋訪悵然而作

飄飽秋風一葉孤。草書不暇問潛夫。花叢竹徑曾添否。水滸山顛復憶無。賓客梁園枚乘宅。魚蝦淮甸射陽湖。殺青案牒相傳久。好附征鴻寄入吳。

廣陵遇嘉禾友感賦

朝罷西華並馬遠。龔曹昔日此鷄班。人留天寶風塵後。客在雷塘雨雪間。連歲喪亡哀白馬。幾年離別慘朱顏。婁東學士三詞伯。身世傷心庾子山。

姜垓三首

垓字如須。塚弟崇禎庚辰進士。除行人。有篋筥集。

張貞半部稿。如須先生入行人司。翼見題名碑。載崔呈秀。阮大鍼與魏公大中名。先生上言。大中忠節。夔帥之臣。不可與奸逆同列。請鏹除崔。阮名上從之。及其兄下詔獄。先生晝夜號呼。奔走營救。得不死。國變後。流寓天台。號佇石山人。莫年與兄共隱鹿洲。鶴市之間。論文講學。以仁義忠信爲旨。三學後學。翕然從風。兩先生歿。吳人築祠鶴澗上祀之。

靜志居詩話。如須詩篇。溫潤而恂栗。

魏禧叔子集。公詩沈鬱離憂。無媿三百篇之旨。

蘭江歲晏雜感

未遇孫登嘯。猶工庾信哀。殘花三載過。歸雁數行來。刀尺寒衣改。關樓暮角催。妻孥回首地。翻恨別天台。

雨華菴

隴首涼風起。空田野鵲鳴。院青深映竹。江暗遠浮城。八月旅還滯。三山情易生。鄉僧出徐竟。秦岱語分明。

江天閣眺覽

別浦凍雲飛不遲。稷苗黯黯黍離離。雨邊楓樹伍員廟。江口蓼花文相祠。騏驥病殘五馬渡。鳳凰栖老萬年枝。重山縹緲非京縣。日暮高樓有所思。

王嗣翰一首

嗣翰字侍臣。邵陽人。隆武丙戌舉人。有六聲亭草。延喜堂集。石崖。研莊諸稿。

沅湘耆舊集。侍臣性奇敏。尤善臨池。長洲徐元歎有寄邵陵王侍臣詩云。土壁昏燈雞再曉。夜闌樓色轉低迷。秋來積水無情闊。此夕愁君夢畫溪。

楓嶺隱居

小築頻年住水涯。環山又認是吾家。非緣好事開幽徑。偶引餘情拾落花。未燬琴書消歲月。無多鬚髮老煙霞。嶺雲伴我如相得。漫學東門日種瓜。



王嗣乾一首

嗣乾字穉潛。嗣翰弟。隆武丙戌舉人。有黃雪園集。

沅湘耆舊集。穉潛詩雅高。

九日送潘章辰夢白歸武岡

登高已自謝才名。詩卷相看氣漸平。乍笑鬚眉同洛社。且忘風雨在彭城。何山漫送羣公淚。絲竹難陶晚歲情。世事未堪容久住。各攜歎息返柴荆。

黎延祖一首

延祖字方回。番禺人。主事。遂球子。貢生。以蔭除錦衣僉事。有瓜圃小草。

秋螢

度水飛將星影亂。入林團作野燐愁。東家織女無燈火。莫惜餘光過小樓。

黎彭祖一首

彭祖字務光。延祖弟。貢生。有醇曜堂集。

將進酒

將進酒。進酒當君敍歡悅。朝歡盡白日。夜歡繼明月。人生世事請莫爲。金樽有酒斟酌之。不見綠髮易爲

白逝水不復回。歡樂安可辭。富貴何時來。囊中有錢但沽酒。糟如邱。吾獨守。醉後還高歌。歌闌拔劍重起舞。吁嗟酒人留名千古。

張若化一首

若化字雨玉。漳浦人。崇禎丙子舉人。官御史。

黃日紀全圖詩傳。丹山二張文章。宋之二宋。清節則古之二墨。及文明之門。又濂溪之二程也。不以儒學顯。以遺老傳。各年八十餘。疏食推述。化及盜賊豺虎相遇。不傷。豈惟完人。亦異人也。

東南嶠外詩話。雨玉弱冠卽師事黃石齋先生。得明誠之旨。及律歷之學。官京師時。值石齋入詔獄。雨玉改服雜劇役中。入獄問視。後歸居丹山之中。四十年。足迹不履城市。年八十八。無疾卒。

謁黃文明師墓

城郭人民是耶非。不堪獨鶴隴頭歸。草堂尙有青榕在。纔上空壇淚溼衣。

張若仲一首

若仲字吉友。若化弟。崇禎庚辰進士。官益府長史。

全圖詩傳。吉友與兄同師黃文明。同隱丹山。卒年八十四。

春寒

待得春深還苦寒。碧煙如椽裹峰巒。山靈似喜人多病。不顧囊空藥餌難。

陳孝威一首

孝威字興霸臨川人有壺山集三卷

今世說陳興霸喜談兵論劍抵掌天下事酒後耳熱輒罵古偽豪傑不中一文錢

田按興霸弟少遊哭兄詩注云兄上疏擊五虎又詩云問關百死髮猶彭堪著行聽御史貂蓋嘗於水歷時官御史

幕府唱和詞

瀑雨蒼煙罨碧山欲埋姓字海雲間勸君緩覓神仙藥衣白山人那得閒

陳孝逸一首

孝逸字少遊孝威弟有癡山集六卷

田按大士先生二子長孝威次孝逸皆能古文守家法少遊詩尤磊砢可傳

金吾較

漢家天子尙規模。虔死如生事事都。龍藏多填掖庭女。鼎湖三分天下租。可憐思寢半坏聚。夜臺疑是冬青樹。影籠殘照落孤瑩。百尺蒼虬空鬱翠。誰將妃子侍寂寥。此山豈容標懷字。比聞陵吏忠足傳。棄官宿衛守墳園。幾見舊人來下馬。時聽猿鶴唳霜天。干椒猶執金吾仗。狐兔縱橫不可傍。何處黃冠風雨中。一拜一慟一惆悵。老卒誓此畢餘生。會穿穴畔從田橫。孤臣隱死無名字。孝廉爲我書銘旌。

戴本孝四首

本孝字務旃。和州人。推官重子。有鷹阿山樵集。

漁洋詩話。務旃詩畫皆絕俗。在京師一夕。聞人談二華之奇。晨起卽襆被往遊。其與會不羈如此。

田按。鷹阿山樵畫善用乾筆。積墨磊砢。彌覺葱蔚。

泊慈姥磯雪歸陶窳

犀風捲江白。飛橋去如矢。雨注空濛中。望之失遠邇。慈磯中流眠。雲頽曳不起。荒時麥芊芊。草春吹欲死。拂頰跋沙涂。屐穿印寒趾。草堂松火紅。影照歸人喜。

中山老嫗

中山田家有老嫗。年近八十矣。失其姓氏。甲申五月。聞國難。蹈水而死。

三百年耕鑿。恩深草土間。傾危當暮齒。激烈僅婦鬢。至性何關學。愚忠豈可刪。殺青存信史。留簡記中山。

安遠侯隸卒

南都破。安遠侯柳迎降。有一隸卒哭叩之曰。世受國恩。此行可緩。願侯裁之。侯怒。叱之者三。不及。駕而行。卒牽其裾力止。侯怒甚。手批其頰。卒哭隨之。至中河橋。大聲曰。侯不聽我。我死矣。投河而死。

大忠思一獻。不售死何逃。身賤心難詘。名傳義益高。忍爲新手版。辱浣舊戎韜。自此河邊柳。薰條向碧濤。  
長干丐者

長干有丐者。曳杖挈瓢。且哭且笑。行至通濟橋。植杖挂瓢。脫屣橋上。投河而逝。人於其瓢中得一詩云。誰把乾坤忽動搖。風吹淮水冷蕭蕭。逢人莫訴傷心事。乞丐如何愛此瓢。

青天蓋黃土。生死太尋常。欲乞誰家食。甘同故國亡。一瓢詩淚盡。雙履跡塵香。蒙袂真堪誅。斯人豈廟廊。

戴移孝三首

移孝字無忝。本孝弟。有碧落後人集。

擬古

佩莫佩。靡蕪靡蕪。易枯槁。逢莫逢。故人故人。易衰老。故人農家女。新人商家婦。新人弄琴瑟。故人織流素。流素生光華。潑刺比目魚。裁爲新人衣。顛倒在裙襦。新人且莫歡。故人何苦悲。新應有故日。故當無新時。  
答人述先君舊事

莫道吳興事。酸風刺骨寒。相知皆死別。無處問平安。故鬼千家哭。孤城百戰難。當時衣上血。今日與誰看。  
訓子

已入愚公谷。甘爲鄭子真。兒孫猶漢臘。雞犬自秦人。讀易無如損。遺安一味貧。更嫌名累汝。筆硯不須親。

方以智十三首

以智字密之桐城人。巡撫孔炤子。崇禎庚辰進士。授檢討。國變後爲僧。名宏智。字愚者。一字無可。別字藥地。有浮山全集。

陳子龍忠裕集。方子移居金陵。有詩數百篇。名曰流寓草。皆憂愀感慨之作也。然其情怨而不怒。其詞整渾而達。其氣激而沈實。

徐世溥榆墩集。密之樂府深厚雄傑。出奇不窮。古風淵雅。無復浮聲。又能備擬歷代。兼擅衆長。高涼蒼鬱。一振唐風。

靜志居詩話。先生紛綸五經。融會百氏。插三萬軸於架上。羅四七宿於胸中。早推許郭之人倫。晚結宗雷之淨社。樂府古詩。磊落嶽崎。五律亦無浮響。卓然名家。

讀畫錄。無可大師。幼稟異慧。生名門。少年舉進士。自詩文詞曲。聲歌書畫。雙鉤填白。五木六博。以及吹簫擗鼓。優俳平話之技。無不極其精妙。三十歲前。備極繁華。甲乙後。薙髮受具。耽嗜枯寂。羸衣糲食。惟意與所適。或詩或畫。偶一爲之。多作禪語。自喻而已。施尙白云。予昔同無道人。自蒼梧底廬山。見其乘輿作畫。多用秃筆。不求甚似。警戲示人曰。若猜此何物。此正無道人得處也。

無聲詩史。密之山水得元人派。淡煙點染。筆入三昧。

柳亭詩話。方以智題正學先生祠句。十族可憐無姓字。三楊終不是功名。爲一時傳誦。

寄梅朗三

陰雨忽成雪。北風吹樹林。江流日千里。安知遊子心。中夜一何寒。自撫雷開琴。瞿礪山中人。其當知我心。

悉索詩

薄田數百畝。連年屬煙塵。家僮復乾沒。九月不食新。匄貸謀稻粱。猶欲延鄰賓。鄉人故里至。一飯飲以醇。嗤我何鄙吝。憐我何苦辛。望君者甚多。不但君家親。自恨不巨富。又恨不赤貧。巨富可結客。赤貧可謝人。

答長干舊韻似字昭覺岸

高岡謝疏雨。獨立自泠泠。空數南朝寺。休傷東冶亭。江流天外白。山洗晉時青。木末遊人少。松濤不許聽。

小東皋卽事

便門小馬慕安豐。尊酒胡牀在水東。開徑嘗封千樹雨。渡人分送半江風。種蘭自不妨高士。班草何須問老翁。別墅如雲堪折屐。時聞清嘯上樓中。

贈閩中劉薦叔

聞君昨歲出溫麻。作客荆吳不顧家。萬里風塵憑漏影。十年慷慨弔懷沙。單衫落葉秋將盡。小社城迴菊有花。邂逅高談共尊酒。東谿涼月浸蒹葭。

送別劉薦叔

遠遊才子著先鞭。載筆江湖又十年。白眼相逢秋色裏。青山環立酒杯前。一時快意難題盡。千古銷魂是黯然。重詠謫仙黃鵠白。齊飛挂在落霞邊。

告哀詩

守陴神策亂紛營。樞密雍容禁請纓。東觀士猶朝試閣。北衙軍已夜開城。攀髯竟把龍湖痛。嚼臂虛傳駱谷行。金紫貂蟬何處哭。小臣血伴闕烏聲。

哭臥子

共指西湖靈隱松。揮毫刻石記相逢。文章自小誇司馬。名字當今比臥龍。一死泰山於汝畢。再生苗地爲人傭。悲歌奠酒沅江水。與淚東流到九峯。

從江上歸里作

新壘依田田半荒。懷歸正月履繁霜。暮行有虎邨煙少。野宿無鷄寒夜長。但有蓬蒿如昔日。卻將桑梓作他鄉。城南敗榭多枯骨。愁對北風說戰場。

南州行

江岸多垂柳。春風春日長。美人浣衣處。無限雙鴛鴦。

酒樓贈燕人

燕客善彈箏。悲歌舊有名。近來離別易。不作斷腸聲。

一線天



鋸破崑崙刺漏痕，卻開鐵片夾斜門。雁湖太姥匡廬客，一線青天請共論。

每問

聖主精勤祀典隆，四郊遍禮幾年中。重修輦道鋪黃土，盡撤街心瓦子篷。

桐舊集先生此題詩四十八首，其體似王仲初宮詞，所詠多當時儀制，如臨雍云：彝倫堂上開黃幄，祭酒安然坐講筵。郊祀云：做漢竹宮遙望拜，正陽竿上九燈籠。冬至云：復壁更衣通大道，陽生冬至造椒湯。雷鼓云：重重紙布膠成革，入聽工官說尙疑。御輦云：三十二人肩大輦，版輿節鼓步隨聲。朝靴云：軟底烏靴朝上粉，御階行處不聞聲。樂舞云：舞成天下太平字，蜺斗頒圭。白打錢賜坐云：宮官不具成堂椅，有召臨時賜繡墩。稱呼云：道長掌科寅不說，詞林通號老先生。拜謁云：投帖長班無忌諱，當朝宰相亦呼名。輿衛云：三品肩輿開棍列，油幢張蓋出京城。

方其義三首

其義字直之，以智弟諸生有次公詩集。

錢澄之田間集直之天姿警敏，爲詩文不假思索，卽席數十首，援筆立就。

詩慰直之爲詩，英偉抗爽，神似古人。國變後，嘗入斷事廟祈死，子往持之，然悲憤卒不能解，竟以早死。

野宿

芳草闌萋，妻鄉心逐馬蹏。亂雲時聚散，流水漫東西。歲月銷烽火，江山入鼓鼙。壯懷看漸老，惆悵此聞雞。

和李舒章燕臺懷古

明詩紀事 辛籤 卷十七

三〇五三

薊門秋色冷邊關。猶憶龍旗漠北還。飲馬直教臨瀚海。射雕誰敢過燕山。陣前遁寇新王子。口外降兵舊  
朵顏。側席祇今勞聖主。諸臣何以策時艱。

懷范小范

堂前白髮近何如。菽麥離離好荷鋤。貧賤祇求能避世。澄清莫漫說登車。已拚歲月供漁艇。豈料江關遍  
羽書。風冷漳湖飛雁少。思君夢裏寄雙魚。

王光承二首

光承字玠右上海人有鑣山草堂詩集。

居易錄予嘗有齋中三詠。王玠右草書云。逃名東海上。時復帶經鋤。自是高人筆。非關餓隸書。王與徐昭法。金孝章。皆吳中高  
士也。

松風遺韻。光承福王時被徵。知時不可爲。伴墮驢傷足歸。與弟烈借隱石筍里。屏迹城市以終  
田按玠右詠史詩。當是紀弘光時事也。

詠史二首

南國花光上紫霄。芙蓉水殿白雲遙。貢琛使者新乘傳。按舞中官舊賜貂。千斛葡萄浮夜月。六宮簫鼓動  
春潮。君王不信毛延壽。親駕朱龍選孟姚。

曲部新歌夜未闌。天街風色似長安。袞衣甲第頻開豎。錦纜春光議築壇。三輔軍聲雲外迴。六朝山色雨

中寒旄頭夜夜明如月。多少愁人倚戶看。

王烈一首

烈字名世光承弟。

秋日家兄移居

樽前執手淚霑衣。蘆荻蕭蕭木葉稀。卻恨不如湘浦雁。江南江北一行飛。

梁以柵二首

以柵字仲木錦衣衛籍大興人有澹軒遺詩。

今世說梁仲木任俠仗義博覽洽聞與弟以樟並有高名江淮人士皆宗之。

過龍湫古刹

尋源經此地。萬象起秋陰。一水開龍藏。三天下梵音。蟲魚驅浩劫。燈火集疏林。無著譚經處。懸知般若深。

湖上贈朱瓊留

艱難百戰日。冰戍古黃河。入眼遺黎少。連天火哨多。饑烏嘯壞漉。荒堞枕殘戈。與子傳呼急。仍看羽檄過。

梁以樟九首

以樟字公狄以柵弟崇禎庚辰進士授商邱知縣有印否集。

喬萊石林集。國家定鼎燕京。數召用勝國諸臣。以樟年纔三十七。名傾海內。姊夫王文貞父子官津要。頗致書勸駕。不應。買兔避田數十畝。棲遁於蒼涼煙水之鄉。嘗自比宋之謝皋羽。鄭所南。亦無愧也。

今世說。梁公狄初與豫章王于一交。兩人論詩。每篇成。不卽示草。率相攜至荒臺古寺。車馬不經處。始出詩共讀。狂呼驚拜。或至慟哭而後返。

安東道中

黃雲橫百里。落日大河隄。謠俗分南北。江山割楚齊。人家蠶月近。海徼鹵煙低。膏雨勞田峻。僦僦服犢犁。  
送王于一移家秦郵

雨雪關河路。誰驅妻子行。百年猶念亂。吾道此孤鳴。草木荒中壘。江山老步兵。蒼茫甓湖水。莫辨鼓搗聲。  
西湖雜興

尺幅西陵地。偏增旅話長。暮笳鳴戍火。曉角動星芒。馬飲殘湖水。螢飛故苑牆。只餘圖畫裏。孤笠弔斜陽。  
登帽光菴

四山青欲下。衆樹密難名。時有竹光入。遠聞泉水聲。聽拌石子落。猿挂翠微行。對境忘言說。玄情去復生。  
渡淮至泗上

曾溯荆塗口。長淮動地來。萬山龍氣合。一水霸圖開。賈客爭魚麥。周行鞠草萊。艱難思過沛。重上大風臺。  
送高二亮歸平州

汝歸觀碣石。雲海正蒼茫。天地尙雄畧。王孫幾夕陽。白頭羞苜飯。黃葉夢樓桑。吾道方行旅。無爲歧路傷。  
別攝山瞿大師

蕭然孤衲影。高意滿松門。山曙羣青合。林空一鳥喧。世緣谿水淡。道味芋苗存。不負靈源意。重尋古德論。  
白田雜詩

吳歛楚舞雜羌歌。翠靨紅顏駕囊駝。一曲琵琶萬行淚。朔風吹夢度交河。

邗上逢舊歌者

內家檀板幾人存。凝碧池頭暮雨繁。莫唱開元供奉曲。臺城煙柳自黃昏。

姜安節二首

安節字勉中。萊陽人。給事中塚子。有永思堂詩鈔。

宛雅安節之父塚。抗疏劾首輔。廷杖謫戍宣州。未及赴而國變。卒于吳門。遺命歸骨戍所。以無忘故君之命。安節扶柩葬敬亭。移家廬墓。遂爲宣城人。又函父生前遺齒。歸瘞萊陽先隴。復從萊陽移母鬮來敬亭。與父同邱。別兆葬焉。暮年多病。猶歲時依墓側。風雨不暫離。常囑其子曰。死必埋我於二親之旁。卒。同人私謚曰孝明。

渡江遙憶金陵所知

豆花雨下江水寒。旅客早發揚子灣。兩岸菰蘆何寂寞。青山一望多辛酸。遙向南中憶諸子。往來只在青

山裏箬帽草蓑任去留。相思颯遯秋雲起。

依吳晴巖滿聽樓詩韻奉贈梅東渚

東渚精廬就題詩一寄君。兼葭懷十載。風雨悵離羣。贈客多紅豆。怡人有白雲。何時蠟雙屐。把酒挹清芬。

姜實節四首

實節字學在安節弟。

今世說學在少不事舉子業。獨習爲五七言詩。善鑒別書畫。及周秦以來器物。僑寓吳門。所居位置清潔。日邀諸名士賦詩飲酒。出其所蓄書畫器物。摩挲賞玩。移日抵掌不倦。

張雲章樓菴集。仲子所居曰藝圃。清流演漾。古木叢茂。隔岸巖石列峙。狀若層嶺。蓋相國文文肅公之故居。所謂清瑤嶼者也。仲子以攻詩工畫。聞於吳中。求仲子之畫。必得其題句以爲重。雖不識仲子者。見其畫與詩。意其遺世獨立。不讓古之遺民焉。畫徵續錄。學在工詩善書畫。山水樞法雲林。涉筆超雋。爲時所重。晚年建二姜先生祠於虎邱。又築謙草樓於祠後。爲棲息所。足不入城市。人稱鶴澗先生。

芮玉權招飲同章穎叔諸子卽席分賦

選石支茶竈。留賓啓竹關。繞籬雙澗水。對酒一樓山。屋小疑僧住。林空羨鳥還。買田吾有意。終傍二溪間。

卽事寄吳門知交

相思不可道。日暮更登臺。樹影當窗合。溪流抱郭來。停杯山雨到。打鼓客船開。獨有忘機鳥。飛鳴去復回。

程汝諧移居

斟酌橋邊市。花園巷裏居。石牆低見屋。山溜暗通渠。有客攜詩卷。從親奉板輿。此中多勝境。應不羨華裾。

題黃鶴山樵聽雨樓卷

湖天過雨水冥冥。吹綠東風草一汀。絕似銅坑橋上望。遠山如髮向人青。

張可仕一首

可仕字文峙。以字行。自稱紫淀老人。應天人都督可大弟。有落葉哀蟬集。願不願集。編年稿。擊磬集。

帝里明代人文略。張逸名文峙。七歲能讀楚詞。爲諸生。務爲根柢有用之學。南大司馬范公景文詢以江防策。文峙臚陳古今方略。擢南樞志一百七十卷。虞山太史爲之傳曰。文峙慷慨有大志。孤行側出。歌石欄而憂天墜。非時人所知也。家鍾山之陽。墊巾壞服。往來棲霞。雨花間。出無童。入無廬。冬無裘。夏無葛。衰不杖。病不藥。行忘之。遊忘返。行吟野哭。嘻嘻咄咄。癸巳冬。積雪。拒門。擁衣寒餓。詠雪滿山中之句。賦詩四章。歲暮懷友十六章。踰年病死。所著紫淀老人編年稿五十卷。選宋元詩十卷。明布衣詩百卷。沒後皆失散。猶子瑤星作遺書歎以傷之。

憶舊

門掩寒雲溼數重。深嵐一徑埽花封。草堂終古通仙驛。蓮漏何心答暮鐘。鸚鵡夢殘人得句。芙蓉香冷月當胸。半編黃鶴騎雲讀。卜宅依然七十峯。

張可度二首

可度字二嚴。可仕弟。自稱巖筱老人。有鴻雪草墨莊巖筱道人詩集。

池北偶談。張可度。楚人家金陵。好佞佛。一食清齋。迨然終日。兄文時能詩。與歸安茅元儀善。茅死。有姬楊宛。以才色稱。戚曉田宏遇欲得之。以千金壽文時。求喻意。文時絕不與通。范文貞公禮爲上客。公殉國。文時設位雨花臺。爲文哭之。

廬山雜詩

父居黃閣女崆峒。流水桃花石室中。多少男兒淪落盡。神仙卻讓李騰空。

題盛林玉空山冒雨圖

孤舟傍岸借煙霞。松裏藤蘿映月華。曉起不知風雨冷。南村有客伴尋花。

嚴調御二首

調御字印持。餘杭人。與弟武順。敕齊名。有三嚴作朋集。

黎遂球蓮鬢閣集。印持先生與聞子將爲小築社。四方文人多裹糧數千里至。不則亦載書而馳。數十年來。所爲公卿宰輔。當塗要津。先生固嘗拍肩相友。及兒子呼之。而先生經術宏辭淵然內足。乃獨以諸生老。先生善書。於顏得其深。於蘇米得其瀟灑。又善琴。爲詩悲感慷慨。述時事憂危之狀。類多似杜。而其閒逸自得。不爲物遷之旨。則神情韵況。又皆似陶。

田按。三嚴性情樸野。詩句率真。生當末季。朝局水火。寇盜縱橫。讀其詩。有世外桃源之樂。

病思莫適心和先生餉及率爾賦謝



余生愛茹草，蕁莫得其真。年衰胃寒薄，猶覺莧味真。城中多廣秧，麤澀煮不馴。往寓有隙地，勸奴糞溉頻。柔苗類稚子，初猶恃嬌憐。撫視意有餘，濯濯皆挺身。朝翦畏雨漬，創合喜雨新。一摘飽數客，上鼻肥香津。清腴蕁爲師，菘韭皆稱民。今來慧日峯，故畦成荒屯。鄰畦莧常滿，老饕未沾唇。邵父知我饑，晨餉類束薪。嫩欺春盤菜，綠失雨後筠。伊余方臥疾，對食雙眉顰。付奴慎細煮，料理鹽豉勻。入口沁心脾，此情高秋旻。老翁區區意，俗故未可論。

秋來歎

夕鳥向山雙滅沒，空煙處渺然。萬古心羈栖，尙延佇。

嚴武順二首

武順字忍公

答無敕弟示補兒就傅詩次韻

舐犢癡情似老牛，塗鴉甯遠慰余愁。遺書滿架何時讀，好句高軒未解酬。小學也憐兒輩及，衰年倍昔歲華流。與君應憶同堂事，此日閒宜共一邱。

古秋堂卽事

庭樹風摧半已焚，寄生猶見昔年人。身經老賤惟知退，世值荒艱益耐貧。加飯肯分迎客犬，折腰羞拾落

巢薪。衰窮亦有閑持勵。敢恃清懽恣隱淪。

嚴敕五首

敕字無敕。

遺病走筆和韻答忍兄

債與歲俱迫。病隨閑有餘。清時甘自負。白業肯教疏。拙劣渾多句。窮奇猶剩書。何時共瀟灑。同駕鹿門車。

十一月十七日伯仲兩兄偕子姪輩自村居之武康期卽來夜候不至遺懷

缺月來亦晏。扁舟胡遲行。寒宵耐深坐。一水動遠情。笑語可不隔。相思殊未平。徘徊茅屋下。霜色已三更。

大兄寄示愈別許菴詩次韻

一生除學道。盡屬夢難憑。小歇分禪榻。高談折老僧。傷心呈古壁。茶眼沸炊藤。豈以家無懌。依依方外朋。

家居書懷寄兩兄山中

束書闕筆費躊躇。婦病厭厭僕又痛。一室關春蠹自遣。空囊需酒強誰沽。風傳鳥語山情近。雨逼詩愁花事徂。此日西湖好兄弟。煙波雲樹夢中俱。

和忍兄督釀用原韻

水色同眼碧。秫光耀雪明。俄聞妙音裏。怒發松風聲。

